


# Mokilese Bible



Matthew and Mark in the Mokilese language of Micronesia

# **Mokilese Bible**

## **Matthew and Mark in the Mokilese language of Micronesia**

Copyright © 2019 Mokilese Bible Translation Committee

Language: Mwoakilloa (Mokilese)

This is a draft translation. Please check back often for updates at <https://eBible.org/mkj/>.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-11-11

---

PDF generated using Haiola and XeLaTeX on 11 Nov 2022 from source files dated 11 Nov 2022  
4097fd30-31ee-5fdc-8d01-bc0facef348a

## Contents

Matthew . . . . .	1
Mark . . . . .	57
LUK . . . . .	93

## Rongmwehu ma ne insingdi jang ipen Matthew

### *Oarlap in Puk oauwe*

*Rongmwehu in Matthew* sikoa doahroar Jounkoamoaur ma inoaupoa ne wihwiawi nen Kadehde Mering; doari, doahroar Koahs ih kapwai-hahda ah inoau oang nah armaj kan, jaudihoar oang mihn Jew kan nen anjoauwo ma Jesus minmme ipasai, apel oang sohn jampah ohroj.

Sikesikin *Rongmwehu in Matthew* ma inenin joanmwehu. Ih sapkiha sikesik in noaisikdihn Jesus, a doaula sikoahda doahroar Jesus ah poapdaijla apel oaloa jongjong ipen Jehsen, apel doahroar ah doadoahk nehn Galilee; doari, doadoahk in kapahrakki Rongmwehu, apel kihda padahk oang armaj ohroj, apel kemwehuwihla johmwehu kan. Mwerin mehpwiai Matthew ken doaula siksikoa doahroar en Jesus injang Galilee pwa en jeiloaklahng Jerusalem, apel doahroar wihwia kan ma pwoaida in kadoarieklahn wihk ma ih mohmohmourki pohn jampah. In imwla ih ken kadoarihkihla loklok, mehdi apel iejdahn Jounkoamoaur.

Oau irair ma janjal mehlel nehn *Rongmwehu in Matthew*, ioar kajan-jaldahn Jesus doahroar jounpadahk laplap men, ma anki manman en kawoahwoahda Kojonned in Koahs, apel ma kin padahkikhwe doahroar Wein Koahs. Nehr pukkoauwe ah padahk kin nehnehpijang wiahda irair limoau in doahroar me: (1) kapahrak pohn dollo, ma kajalehda mourin arai kan ma uhdahn sohn Wein Koahs, pel irai pwukoa kan, kapai kan, apel kahrpoan irai mour (iroa koalik 5-7); (2) kaweidpen sohn doadoahk ejek roahmenno oang in poaroan ma ih kioang irai (iroa koalik 10); (3) karajraj doahroar Wein nehnloanng (iroa koalik 13); (4) padahk doahroar woahwoahn wiahla sohn padahk in Jesus (iroa koalik 18); (5) padahk doahroar imwlahn irair in anjoauwoauwe apel doahroar pwurdoahn Wein Koahs (iroa koalik 24-25).

### **Audoapoa in Oarlap**

Doahroar irokdihn kadaudok apel noaisikdihn Jesus Christ 1.2—2.23

Doahroar en John jounpoapdaij ah kapahrak kan. 3.1-12

Jesus poapdaijla ipen John apel oaloa jongjong pehn Jehsen 3.13—4.11

En Jesus doadoahk nen Galilee 4.12—18.35

Jesus injang Galilee inlahng Jerusalem 19.1—20.34

Kadoarieklahn wihk ma ih mohmohmourki nehn Jerusalem apel ipen Jerusalem 21.1—27.66

Koaunno iejda apel pwokkoang nah sohnpadahkkok 28.1-20

### *Irokdihn dihkan ma lel Jesus*

<sup>1</sup> Irokdihn dihkan ma lel Jesus Christ nihn David, nihn Abraham:

<sup>2</sup> Abraham ioar jemen Isaac, Isaac jemen Jacob, Jacob jemen Judah pel riahkan. <sup>3</sup> Judah ioar jemen Perez apel Zerah, ma inanki Tamar, Perez ioar jemen Hezron, Hezron jemen Ram, <sup>4</sup> Ram jemen Amminadab; Amminadab jemen Nahshon; Nahshon jemen Salmon;

5 Salmon jemen Boaz (ma inanki Rahab); Boaz jemen Obed (ma inanki Ruth); Obed jemen Jesse; <sup>6</sup> Jesse ioar jemen Nahmwarki David.

David ioar jemen Solomon, ma inanki pahien Uriah. <sup>7</sup> Solomon jemen Rehoboam, Rehoboam ma jemen Abijah, Abijah jemen Asa, <sup>8</sup> Asa jemen Jehoshaphat, Jehoshaphat jemen Jehoram, Jehoram jemen Uzziah <sup>9</sup> Uzziah jemen Jotham, Jotham jemen Ahaz, Ahaz jemen Hezekiah, <sup>10</sup> Hezekiah jemen Manasseh, Manasseh jemen Amon, Amon jemen Josiah, <sup>11</sup> Josiah jemen Jechoniah pel riahkan nehn anjoauwo irai kaliplipla Babylon.

<sup>12</sup> Mwerin kaliplipla Babylon: Jechoniah ioar jemen Shealtiel, Shealtiel jemen Zerubbabel, <sup>13</sup> Zerubbabel jemen Abiud, Abiud jemen Eliakim, Eliakim jemen Azor, <sup>14</sup> Azor jemen Zadok, Zadok jemen Achim, Achim jemen Eliud, <sup>15</sup> Eliud jemen Eleazar, Eleazar jemen Matthan, Matthan jemen Jacob, <sup>16</sup> Jacob jemen Joseph, pahien Mary, ma noaisikihdi Jesus, ma adanki Christ.

<sup>17</sup> Ohroj ma insingdi me ioar di ejek pahu jang Abraham lel David, di ejek pahu jang David lel kalipliplahng Babylon, di ejek pahu jang kalipliplahng Babylon lel Christ.

### *Doahr Noaisikdihn Jesus Christ*

<sup>18</sup> Me ioar mwomwen en Jesus Christ noaisikdi: Ah nohno Mary inoauwen pwoapwoaud oang Joseph, a mwohn ara paspene, diarekda pwa ih lijaian jang Ngen Joarwi. <sup>19</sup> A Joseph nehn ah wia woal lelpoak apel pwung men johpwa nimen koauwehla oadoan Mary mwohn armaj kan, lemehda pwa ih en mweijang ih in rir. <sup>20</sup> A mwerin ah lemehda me, Sohnloang in Koaunno men pwokkoang ih nehn ah oarmoan pwehng ih, “Joseph nihn David, joah mijik in oaloa Mary wiahkihla pahioamw, pwa dahkij ih lijaankihda jang Ngen Joarwi. <sup>21</sup> Ih pirin noaisikihdi jermwein men, koawoa en kioang oadoa Jesus\*, pwa Ih pirin doaroahla Nah armaj jang nehn diparaihok.”

<sup>22</sup> Mehpwiai ohroj wiawi pwa en pwoaida da ma Koaunno pwa jang ipen joukohppo, <sup>23</sup> “Meipwonno pirin lijaanda, noaisikihdi jermwein men, ma irai pirin kioang oadoa Emmanuel,” (woahwoahki “Koahs pwilpwili kisai”).

<sup>24</sup> Nehr en Joseph pwohrda ih wia da sohnloang in Koaunno pwehng ih. Ih ken oaloa Mary painkihla. <sup>25</sup> Joseph johpwa suhwoang Mary in palwahr oaroh liho noaisikihdi nah jermweinno. Ih kioang oadoa Jesus.

## 2

### *Woal loalkoanngok jang palimese*

<sup>1</sup> Mwerin en Jesus noaisikdi nehn Bethlehem wein Judea, nehn mwein Nahmwarki Herod; woal loalkoanngok jang palimese indoa Jerusalem <sup>2</sup> kalkalelpoak wijia ma jeri siksikko noaisikdi mine, nahmwarkihni mihn Jew kan. Irai pwa, “Kamai kapangda Ah ujuhwo palimese in loannge ioar kamai indoahng pwongi Ih.”

<sup>3</sup> Nehr en Nahmwarki Herod rongda me, ih jalohkihda pwilihkihoar sohn Jerusalem ohroj. <sup>4</sup> Ih panginpene Jamwrou laplappok apel

\* **1:21** Addoauwe Jesus woahwoahki “Koaunno koamoaurla”.

jounpadahk in kojonneddok, ih kalelpoak iparai “Ia wija Messiah pirin noaisikdi?”

<sup>5</sup> Irai japoang pwa, “Nehn Bethlehem nehn wein Judea, pwa ioar mehwa joukohppo insingehdi:

<sup>6</sup> ‘Koawoa, Bethlehem, nehn wein Judah,

jaudi koawoa, keiou siksik nehn pwungen koaun in Judah kan,  
pwa jang ipoamw emen koaun pirin indoa  
ma pirin kahlwa noai armaj in Israel kan.’”

<sup>7</sup> Doar Herod kapokonihpene in rir woal loalkoanngok pwa ih en woahwoahkihda ngehd uhdahn anjoauwo ujuhwo pwokda, <sup>8</sup> ih kadarla irai Bethlehem pwehng irai, “Alwe rapahki mwehu jeriho. Ma kamwai kapangda Ih, kamwai pakairkihdohng ngoahi, pwa ngoahi en pel pwili alwe pwongi Ih.”

<sup>9</sup> Mwerin irai rong mehpwiai irai ken dauluhlla; A ujuhwa ma irai kapang palimese in loannge pel pwuroahng pwokda kahlwa irai oaroh lel wijahu ma jeriho mine. <sup>10</sup> Anjoauwo irai kapangda ujuhwo, irai inenin malauda. <sup>11</sup> Nehn irai dilda nehn ummwo kapangda jeriho pel ah nohnohu, Mary, irai poadpwomwla pwongi Ih. Doar irai kihda irai kijakij kajampwallok kijakijkihoang Ih kohl, frankincense pel myrrh.

<sup>12</sup> Anjoauwo irai japahllahng nehn arai wei, irai wud nehn apas al sohrohr pwa Koahs ne kaperki irai nehn oau oarmoan pwa irai en joah pwurla ipen Herod.

### *Kaula Egypt*

<sup>13</sup> Nehn irai ne inla, sohnloang in Koaunno men pwokkoang Joseph nehn ah oarmoan. Sohnloanngo pwehng ih, “Pwohrda oaloa jerihen pwilihki inahu kaukihdihla ara Egypt. Mine oaroh ngoahi kapwa pwehng koawoa, ngehd kamwai en japahldo, pwa Herod raprapahki jerihen pwa ih en kojukdi.”

<sup>14</sup> Inpwonngohr Joseph pwohrda oaloa jeriho pwilihki inahu irai inla Egypt, <sup>15</sup> mine o oaroh lel en Herod mehdi.

Me ne kapwaihahda dahkij ma Koaunno ne pwa jang ipen joukohppo, “Ngoahi pangin noai jermweinno jang Egypt.”

### *Kojkojdihn jeri kan*

<sup>16</sup> Nehn en Herod kidalda pwa woal loalkoanngok ne kapweipweidi ih, ih inenin lioas. Ih ruwojla pwa jeri woal ohroj ma mahki johnpar riau apel pehnangin ma minmine nehn Bethlehem apel kahnihmw ohroj ma koaroannoang en kojkodzi; me jang in ah rong jang pwihnnin woal loalkoanngok sapin irai kapangda ujuhwo.

<sup>17</sup> Me ne pwoaida dahkij joukohp Jeremiah kohpda:

<sup>18</sup> “Ngilloau indoa joang nehn Ramah,  
ngilen joang koalik,

Rachel ma joangoangoangki nah jerihok,  
johpwa nimen injenmwahula,  
pwa jerihok ne mehdi.”

### *Japahlla Nazareth*

<sup>19</sup> Mwerin Herod mehdi, sohnloang en Koaunno men pwuroahng pwokkoang Joseph nehn ah oarmoan nehn Egypt, <sup>20</sup> “Pwohrda,” Sohnloanngo pwehng ih, “oaloa jerihen apel inahn kamwai japahlla

Israel, pwa irai ma jongjong in kojukdi jerihen ne mehdi.” <sup>21</sup> Joseph pwohrda, oaloa jerihon apel inahu japahlla Israel.

<sup>22</sup> A nehn ah kidalda pwa Archelaus nihn Herod, koaun kapwin Judea ioar ih mijikin inla o. Mwerin ah ne pel oaloa kaweid nehn ah oarmoanno, ih inla nehn wein Galilee. <sup>23</sup> Peneineiho inla koaujoanla nehn kahnihmw oau adanki Nazareth. Me ne pel pwoaida dahkij ma joukohppok ne kohpda: “Ih pirin wiahla mihn Nazareth.”

### 3

#### *John Jounpoapdaj Koaunopda Al*

<sup>1</sup> Nehn rehn pwioi John jounpoapdaj indoa padpadahk nehn japssoahn in Judea, <sup>2</sup> ih pwa, “Kamwai koluhla pwa Wein nehnloannge\* ne koaroando.” <sup>3</sup> John ioar woalwa ma joukohppa Isaiah pwa: “Ngilloau ma kin poangpoangpoang nehn japssoahn:

‘Kamwai koaunopda alin Koaunno,  
kamwai kainenehla Ah al kan ma Ih pirin alu loaloa!’ ”

<sup>4</sup> En John likkoauwok wiawihda jang winen kamel, ih kangirki kilin kahu nen lopko. Kanah mwinge ioar padda apel jukehn loanglap in nehn woallo. <sup>5</sup> Armaj jang Jerusalem, jang koujapw ohroj nehn wein Judea apel wijahkan ohroj koaroannoang Pillap Jordan indoa pwa, <sup>6</sup> irai en woahkda diparai kan, a ih poapdaijihla irai nehn Pillap Jordan.

<sup>7</sup> A nehn a kapang dirin Pharisee apel Sadducee allaluhdo ipoa pwa en poapdaij, ih pwehng irai, “Kamwai sinekpwi, inje pwehng kamwai pwa kamwai kak pisjang koaloklok in Koahs ma nimenoar lel kamwai? <sup>8</sup> Kamwai wiahda siahk kan ma pirin kajalehda amwai ne koaluhla apel wiliakapwla. <sup>9</sup> Kamwai joah lemleme pwa kamwai nen kak pisjang koaloklok pwa kamwai kadaudokin Abraham. Ngoahi pwehng kamwai pwa Koahs kakkoar wiahda nihn Abraham jeri jang in sakai pwiai! <sup>10</sup> Jiloahu ne onopdahng poaloahdi sipin suhkoa ohroj ma johkin kihda wah mwehu, en poalpoaldi peidekla nehn oaiho. <sup>11</sup> Ngoahi poapdaijihki kamwai pil pwa en kajalehda amwai koluhla, a Ih ma pirin indoa mwerin ngoahi pirin poapdaijihki kamwai Ngen Joarwi apel oai. Ih inenin laplapjang ngoahi; ngoahi johpwa warroang wa Ah sandellok. <sup>12</sup> Ih kol nah poahkko, onopdahng pwa en kasohrohrihpijoang liporrohn wiid kan jang in kilinnok. Ih pirin nekidla wah kan nehn johkohu, a okojla kilinnok nehn oaiho ma johkak kunla.”

#### *En Jesus Poapdajla*

<sup>13</sup> Jesus ken injang Galilee inla Pillap Jordan pwa en poapdajila ipen John. <sup>14</sup> A John jong en kauhdi, pwehng Ih, “Ngoahi anahne koawoa en poapdaiji ngoahi, a koawoa ken indoa ipoai?”

<sup>15</sup> Jesus japoang, **“Joah kauhdi, pwa ioar koajoandi wa me, pwa ioar ma koanoahng kisa kapwaihahda kupwur en Koahs.”** John ken pwungkikhla.

\* **3:2** Wein nehnloannge Mihn Jew kan mehj kin inenin mijikin pwa ke insinge oadoan Koahs, ioar kahrehda Matthew kin insingehdi “Wein nehnloannge” ah mehlelin lal pwiai ioar “wein Koahs”

<sup>16</sup> Jesus ken poapdajla, Ih doauda jang nehn pillo; anjoauwo nehnloannege risda, Ih kapang Ngenin Koahs indihdo in mwomwen mwurei men jokdi pohn Ih. <sup>17</sup> Ngilloau jang nehnloannege pwa, “Me ioar noai jermwein kajampwalwa, ma Ngoahi keiou ipwilki.”

## 4

### *En Jesus Kajongjong*

<sup>1</sup> Ngen Joarwi kahlawla Jesus nehn japwsoahn pwa en kajongjong ipen Jehsen. <sup>2</sup> Mwerin Ah joah mwinge rehn pahjek pel pwong pahjek, Ih mwakohkohla. <sup>3</sup> John Kajongjonngo indoa pwehng Ih, “Ma koawoa nihn Koahs, pwehng sakai pwiai en wiahla pilahwa.”

<sup>4</sup> Jesus japoang, “**Ne insingdi nehn puk joarwi: ‘Jaudi pilahwahr doari armaj kak mourki pwa lalkan ohroj ma kin indoa jang ipen Koahs.’**”

<sup>5</sup> Jehsenno ukla Ih nehn Jerusalem, kahnihmw joarwiho, kihdi oang Ih pohn koadkoan Umw Joarwiho, <sup>6</sup> pwehng Ih, “Ma koawoa nihn Koahs, lujdihwe pwa ne insingdi nehn Puk Joarwi:

‘Ih pirin ruwoj nah sohnloanngok doahr koawoa,  
    irai pirin kolkihda koawoa poahrai  
        pwa ehmmwen kan en joah ohla pohn sakai.’”

<sup>7</sup> Jesus japoang ih, “**Ne pel insingdi: ‘Joah kajongjungi Koaunno oamw Koahs.’**”

<sup>8</sup> Jehsenno pel ukdahla Ih pohn dol illoahioau, kajalehng Ih wein jampah ohroj apel doahr ahr ling. <sup>9</sup> Jehsen pwehng Jesus, “Mehpwiai ohroj ngoahi pirin kioang koawoa, ma koawoa rukdi pwongi ngoahi.”

<sup>10</sup> Jesus pwehng ih, “**Alwe jang Ngoahi, Jehsen! Pwa ne pel insingdi, ‘Pwongi Koaunno oamw Koahs, papah Ih kalahpwuk.’**”

<sup>11</sup> Doari Jehsenno injang Ih, a sohnloanngok indoa jeuweje Ih.

### *Jesus sapda padahk*

<sup>12</sup> Anjoauwo ma Jesus rongda pwa John ne mine nehn kalpwuhj, Ih pwurla Galilee. <sup>13</sup> Ih joah koaujoan nehn Nazareth, Ih inla wud mine Capernaum, ipen jed in Galilee, nehn wein Zebulun apel Naphtali.

<sup>14</sup> Me wiawi pwa en kapwaihahda kokohp en Isaiah:

<sup>15</sup> “Nehn wein Zebulun apel Naphtali,  
    ipen jeddo, oaloap Pillap Jordan,  
        nehn Galilee wija ma mihn likin dir mine!

<sup>16</sup> Armaj ma mine nehn ros pirin kapang maram koalik oau.

Araihok ma mine nehn japw ros apel mehdi, marammo pirin dakarda.”

<sup>17</sup> Jang anjoauwo inla Jesus sapda padahk, “**Wikjang dipamwai kan, pwa Wein nehnloannege ne koaroando.**”

### *Jesus Pangin Sohnloakjid pahmen*

<sup>18</sup> Rehn oau Jesus allaluhla pohn poahrinjedin Galilee Ih kapangda riari oau, Simon ma pel adanki Peter apel riah Andrew. Ara loakloakjidki nihra ukko nehn jeddo, pwa ara sohnloakjid roahmen.

<sup>19</sup> Jesus pwehng ara, “**Kamwa indoa pwilihla Ngoahi, a Ngoahi pirin wiahkihla kamwa sohnloakjidi armaj.**” <sup>20</sup> Anjoauwohr ara kihdi nihra ukko pwilihla Ih.

<sup>21</sup> Pel aluhla ekij Ih kapangda pel oau riari, James apel John, nihn Zebedee, mwindi nehn wararai pohsso pwili ara pahma Zebedee,

winwina nihrai ukkok. Ih pangin ara en pel indoa. <sup>22</sup> Anjoauwohr ara kihdi pohsso apel ara pahpa, pwilihla Ih.

*Jesus Kemwehuwihla johmwahu*

<sup>23</sup> Jesus allaluhjili nehn Galilee ohroj, padpadahk nehn jinakoke kan, padpadahkki doahr Rongmwehuin Weiho, kemwehuwihla joangoan johmwahu ohroj ipen armaj kan. <sup>24</sup> Rongin Ih lel wija ohroj nehn Syria, armaj kan wahdohng Ih ohroj ma johmwehuki joangoangoan johmwahu, irai kan ma anki moadaoak koalik, irai kan ma ngen jaus dilloang loaloa, pel irai kan ma anki epilepsi apel mwoasor—Ih kemwehuwihla ohroj. <sup>25</sup> Pokon koalik pwilihla Ih wija ma Ih inla—armaj jang Galilee, jang Decapolis, jang Jerusalem, jang ohroj Judea, apel jang palimese in Pillap Jordan.

## 5

*Padahk in Pohn Dol*

<sup>1</sup> Nehn en Jesus kapangda pokonno, Ih indahla pohn dol oau mwindi; Nah sohnpadahkkok pokondo Ipoa. <sup>2</sup> Ih ken sapda padahki irai pwa:

*Pai mehlel*

<sup>3</sup> “Meid pai irai kan ma anahne ngen,  
pwa arai pirin johjohki Wein nehnloanng.”

<sup>4</sup> Meid pai irai kan ma joang,  
pwa Koahs pirin kainjenmwahuwihla irai.

<sup>5</sup> Meid pai irai kan ma aksiksik,  
pwa irai pirin johjohki jampah.

<sup>6</sup> Meid pai irai kan ma kin ngoangki me pwung,  
pwa Koahs pirin kaisarihla irai.

<sup>7</sup> Meid pai irai ma kin kadek,  
pwa irai pel pirin diar kadek.

<sup>8</sup> Meid pai irai ma mwakelkel nehn mohngiongirai,  
pwa irai pirin kapang Koahs.

<sup>9</sup> Meid pai irai ma kin wiwia doadoahk in kamwahu nehn  
pwungen armaj kan,  
pwa irai pirin adanki jerihn Koahs.

<sup>10</sup> Meid pai irai ma kin loklokki pwung jang in irai  
mohmohmourki Koahs,  
pwa irai pirin anki Wein nehnloanng.”

<sup>11</sup> “Meid pai kamwai ma armaj lahlahwe, apel koalkoa kamwai,  
apel karaunihki kamwai joang likamw apel japwung ohroj pwa  
Ngoahi. <sup>12</sup> Kamwai injenmwahu apel malau pwa kijakij koalik  
joujouwi kamwai nehnloanng, pwa ioar pel joangwahr irai  
wiahng joukohppok mwohn kamwai.”

*Jed apel Maram*

<sup>13</sup> “Kamwai ioar jed in jampah. A ma nimen jeddo johla nime,  
joh mehkij kak en wiawahoang pwa en pwuroahng minehda  
nime. Johla kaspoan jeddo, ioarroar en kerpihekla pwa armaj  
kan en alu puwoa.”

<sup>14</sup> “Kamwai ioar maram in jampah. Kahnihmw oau ma mine  
pohn dol oau johkak oakkoakla. <sup>15</sup> Armaj pel johkak okojda  
lahm oau kioang pehn pwohl oau. A irai en kioang pohn dohiahu

pwa en kamarami ohroj nehn ummwō. <sup>16</sup> En pel doahr amwai maram en janjalda mwōhn armaj, pwa irai en kapang amwai wihwia mwehu kan apel kapngahki Jamamwai nehnloannge.”

*Padahki doahr Kojonned*

<sup>17</sup> “Joah lemleme pwa ngoahi indoahng koauwehla Kojonned in Moses ke pel padahk in Joukohppok; Ngoahi joah indoahng koauwehla arai padahk kan, a Ngoahi indoahng kapwaihahda.

<sup>18</sup> Ngoahi pwehng kamwai in mehlel, ma nehnloannge apel jampah johla, insing siksik oau ke mwei siksik kij in Kojonneddo johkak joaloangla oaroh audioapoa ohroj en pwoaida. <sup>19</sup> Emen ma koauwehla oau in kojonneddok, mihndahr ma kojonnedwahr ma keiou siksik apel padahkihoang epwi en pel wia doahroar, pirin keiou siksik nehn Wein nehnloannge. A inje ma kin kapwaihahda apel padahki kojonné pwiai pirin laplap nehn Wein nehnloannge. <sup>20</sup> Ngoahi pwehng kamwai, ma amwai wihwia mwehu joah mwehu jang en jounpadahk in Kojonned apel Pharisee-ok kamwai uhdahn johkak dilda nehn Wein nehnloannge.”

*Kojarmaj*

<sup>21</sup> “Kamwai ne rong padahkkok ma mihn mehjjok oaloa, ‘Joah kojukdi armaj; emen ma kojukdi armaj pirin lelloang kadeik.’

<sup>22</sup> A Ngoahi pwehng kamwai: emen ma lioas oang riah pirin lelloang kadeik. Pel oau, emen ma pwehng riahu, ‘Pweipwei men koawoa,’ pirin pel wijkla mwōhn Mwoalen Koapwung. A emen ma pwa, ‘Koawoa Iahk!’ ih kak lel oang nehn keper in oaiho nehn ehl. <sup>23</sup> Ma koawoa wia oamw meiroang in mwoallo a koawoa samanda pwa rioamw men injinjuwed oang koawoa, <sup>24</sup> kihdi oamw meiroanngo ipen mwoallo. Inla koapwungla nehn pwungamwa, japahldo wia oamw meiroanngo.

<sup>25</sup> “Ma mine emen pirin wahlahng koawoa nen mwoalen koapwung, pispis koajoanehdi nehn pwungamwa mwōhn ah wahla koawoa ipen jounkoapwung kan, doar koawoa ken wijkla nehn kalpwuhj. <sup>26</sup> Ngoahi pwehng koawoa in mehlel, koawoa johkak pisla oaroh ngehd koawoa en dupukla pwaipwanid ohroj.”

*Kamwahl*

<sup>27</sup> “Kamwai ne rong padahk paso, ‘Joah kamwahl.’ <sup>28</sup> A apkas Ngoahi pwehng kamwai emen ma kapang lihmen apel mwehukihda, ih ne kamwahl nehn mohngiongin. <sup>29</sup> Ma loap kidal kioang koawoa nen dihp, dipaaljang kerpihla. Ma ekij in palwoaroamwen kerpihikla mwehujang ma palwoaroamwen ohroj kerpihikla nehn ehl. <sup>30</sup> A ma loap kidal kahrehng koawoa en wia dihp, poaloahjang kerpihla. Mwehuwoang koawoa en luhjjang ekij in palwoaroamwen jang palwoaroamwen ohroj en kerpihikla nehn ehl.”

*Mweipijoang (in pwoapwoaud)*

<sup>31</sup> “Kamwai ne kidal da kojonnédo pwa, ‘Emen ma mweijang pahioahu en kioang ih kijinlikoau in kamweid.’ <sup>32</sup> A Ngoahi pwehng kamwai, ma woalmen mweijang pahioa, jang

**in kahrpoahioau likin kamwahl, ih ne kahrechioang liho nehn kamwahl, a ma emen woal painkihda liho, ih ne mine nehn dipen kamwahl.”**

### *Kahula*

<sup>33</sup> “Kamwai ne rong da ma ne pweiekkoang mihn mehjjok. ‘Joah koauwehla oamw kahula, a kolkol oamw inoau oang Koounno.’<sup>34</sup> A ngoahi pwehng kamwai, Joah kahula mwahl. Joah kahukihla nehnloanne pwa ioar mwoalen Koahs wa.<sup>35</sup> Joah pel kahukihla ke jampah pwa ioar dohn ehn wa; ke Jerusalem pwa ioar kahnihmw in Nahmwarki Laplap.<sup>36</sup> Pel joah kahukihla moangoammwen, pwa koawoa johkak wiahng apas pisen moang en korohrohla ke soalla.<sup>37</sup> Amwai sikesik en kin mine in ‘Eh’ ke ‘Joah’; a ma daulihla a kin sapjang ipen me juweddo.”

### *Pwoaroan maj oau oang Pwoaroan maj oau*

<sup>38</sup> “Kamwai ne pel rong pwa. ‘Pwoaroan maj oau dupukki pwoaroan maj oau, a ngihipas dupukki ngihipas.’<sup>39</sup> A Ngoahi pwehng kamwai, kamwai en joah pallan armaj men. Ma emen pokihdi joapoamwen loap moaun, pel kioang ih oaloap.<sup>40</sup> A ma emen panglahng koawoa mwoal en koapwung en kihjang oamw jehsso, pel kioang ih oamw joakidden.<sup>41</sup> Ma emen ipong oang koawoa en alu ki mwail oau, a koawoa en pwili aluhkihla mwail riau.<sup>42</sup> Ma emen poaki koawoa mehkij koawoa mweidoahng, ma emen poaki koawoa mehkij pwa ih en kajpahlihdo mwuhr pel mweidoahng.”

### *Ipwilki Imwinsihs*

<sup>43</sup> “Kamwai ne pel rong Ih ne pwa, ‘Ipwilki mihn ipoamw a lioassoang oamw imwinsihs.’<sup>44</sup> A Ngoahi pwehng kamwai: Ipwilki amwai imwinsihs kan apel kapkapki irai ma kin koalkoa kamwai,<sup>45</sup> pwa kamwai en kak wia jerihn Jamamwaiho nehnloanne. Pwa Ih ma wiahng joauwo en dakda pohn me nauna apel pohn me mwehu, Ih kadardo wud pohn armaj pwung apel armaj japwung.<sup>46</sup> Ma kamwai ipwilki irai ma ipwilki kamwai, kijakij dahioau kamwai nen oaloa? Jounrik daksis kan joah kin pel wia doahroar?<sup>47</sup> Ma kamwai pel kajamwo rioamw kan oar doari, dahioau kamwai wia koalik jang epwi? Armaj rosros kan joah kin pel wia doahroar?<sup>48</sup> Kamwai en unjek doahroar Jamamwaiho nehnloanne ma unjek.”

## 6

### *Kioang ih ma Anahne*

<sup>1</sup> “Kanaihoahng kamwai en joah wia pwa amwai wihwia mwehu kan en janjal mwohn armaj pwa irai en kapang kamwai. Ma kamwai wia me, nen joh amwai pwaij jang Jamamwaiho nehnloanne.

<sup>2</sup> “Doari, nehn amwai pirin kijkijoa emen ma anahne, joah kalohkihjili doahr mwalaun kan kin wia nehn jinakoke kan pel nehn al kan pwa armaj en kapnga. Ngoahi pwehng kamwai in mehlel, irai ne oaloa dupkoan irai doadoahk ohroj.<sup>3</sup> A nehn amwai en kijkijoa emen ma anahne, joah mweidoahng loap

**jehjoa in poahmmwen en kidal da loap kidal wihwia, <sup>4</sup> pwa oamw kijakij en wiawi in rir. Doar oamw Pahpa, ma kin kapang mehkan ma kin wiawi in rir, pirin dupuk koawoa.”**

*Kapkak*

**5 “Nehn amwai kin kapkap, joah wia doahr mwalaun, pwa irai kin perenki kapkap, uhda nehn jinakoke kan apel nehn koaimw in al kan pwa armaj en kapang. Ngoahi pwehng kamwai in mehlel, irai ne oaloa dupkoaraiwa pwon. <sup>6</sup> A nehn oamw en kapkap, inla nehn oamw perehu, risingdi wanihmmwo, koawoa kapkap oang oamw Pahpa, ma koawoa joh kak kapang. Doar oamw Pahpa, ma kin kapang da ma wiawi in rir, pirin dupuk koawoa.**

**7 “A nehn amwai kapkap, joah pwurur doahr armaj rosros kan, pwa irai kin lemleme pwa arai kohs kan nen rong irai pwa dir irai lallok. <sup>8</sup> Joah doahroar irai pwa Joamoammwo kidal da koawoa anahne mwohn oamw poaki Ih. <sup>9</sup> Doar me, ioar doahr oamw pirin kapkap:**

**‘Jamamai nehnloannge,**

**oadoamwen en joarwi,**

**10 oamw wei en pwoaida,**

**injenoamw en wiawi pohn jampah doahroar nehnloannge.**

**11 Kihdoa rehnnoauwe kanmai mwingehn oauwoau rehn.**

**12 Mahkoahng kamai amai japwung kan,**

**doahroar amai kin mahkoahng irai kan ma wia japwung oang kamai;**

**13 joah kahlawahng kamai nehn jongjong,**

**kapisla kamai jang ipen ih ma naunahu.**

**[Oamw mwei ioarroar Mweiwa, ma sihkei apel ling allaluhla.**

**Amen.]’ \***

**14 “Pwa ma kamwai mahkoahng irai kan ma wia naunahng kamwai, Jamamwai nehnloannge pirin pel mahkoahng kamwai.**

**15 A ma kamwai johpwa mahkoahng arai japwung kan, Jamamwai nehnloannge pel jehpirin mahkoahng kamwai.”**

*Kaijihjol*

**16 “Nehn amwai kin kaijihjol, kamwai joah wia mwomw doahroar mwalaunnok kin wia, pwa irai kawikla mwomwoarai en kajalehda pwa irai kaijihjol. Ngoahi pwehng kamwai in mehlel, irai ne oaloa dupkoarai. <sup>17</sup> A nehn oamw kaijihjol, salipla pel duhpla mioammwen, <sup>18</sup> pwa en joah janjal oang armaj pwa koawoa kaijihjol, a oang oar Joamoamw, ma kisai johkak kapang, a joamoamw, ma kin kapang mehkan ma wiawi in rir, pirin dupuk koawoa.”**

*Pai nehnloannge*

**19 “Joah nekidpene oang pein koawoa oamw pai kan nehn jampah, wija woahd a mer johkak koauwehla, pel jounpirap kan kak dilda pirapoahla. <sup>20</sup> A nekidpene oamw pai kan nehnloannge, wija woahd apel mer johkak koauwehla, apel**

\* 6:13 Epwi Puk Joarwi, johpwa insingdi me loaloa.

**jounpirap kan johkak dilda pirapoahla. 21 Pwa wija oamw pai  
kan mine, ioar mohngiongimmwen pel mine.”**

*Mih Joaroa Palwahr*

**22 “Maj ioar lahm in palwahr. Ma pwoaroan mioammwen kan  
mwehu, palwoaroamwen nen dirin maram. 23 A ma pwoaroan  
mijoammwen kan nauna, palwoaroamwen nen pel ros. Doar ma  
marammo nehn koawoa ros, ia woahr koalikin rossauwe!”**

*Koahs a Koapwoahn Jampah*

**24 “Joh emen kak papah koaun roahmen. Ih kakkoar lioas-  
soang emen a ipwilki emen, ke ih nen poadidi oang emen a  
mwamwahlki emen. Koawoa johkak papah Koahs apel mwani.**

**25 “Ioar Ngoahi pwehngki kamwai, joah pwunodki amwai mour,  
da kamwai pirin kang ke nim; ke oang palwoaroamwaikan, da  
kamwai pirin likkoauki. Mour joah kajampwal jang mwinge? Ke  
palwahr joah kajampwal jang likkoau? 26 Kapang mahnsang in  
nehn woahwoa kan: irai johkin poadok ke doli ke nekid nehn  
wehraus kan, a Jamamwaiho nehnloannge kin kamwinge irai.  
Kamwai joah kajampwaljang irai? 27 Inje in kamwai jang in  
pwunod kak karoairoaihla ah mour awahioau?**

**28 “Mihnda kamwai pwunodki likkoau? Kamwai kapang kiepw  
in nehn japw kan, nehn irai kin koapkoapda; irai johkin  
doadoahk ke wiahda arai likkoau. 29 A Ngoahi pwehng kamwai  
pwa pel Solomon, nehn ah koapwoahpwoa johpwa kapwasda  
linginnoar mehpwiai. 30 Ma ioar doahr en Koahs kapwasihda  
mo in nehn mohj kan, ma mine rehnnoauwe a lakapw nehn  
oaiho, ih joah nen kapwasihda kamwai mwehu jang? Ia woahr  
siksikin amwai pwojon! 31 Doari, joah pwunod, pwa, ‘Da kamain  
kang? Ke da kamain nim? Ke da kamain kol?’ 32 Armaj rosros  
kan kin raprapahki mehpwiai, a jamamwaiho nehnloannge kidal  
pwa kamwai anahne mehpwiai. 33 Doar rapahki mijkoalkoal  
wein Koahs pel Ah pwung, a mehpwiak ohroj nen liklikkoang  
koawoa. 34 Doari, joah pwunodki lakapw, pwa lakapw kapwa  
pwen pwunodki pein ih. Johpwa anahne kapsahng apwal kan  
ma oauwoau rehn kan kin wahdo.”**

## 7

*Kadeiki Epwi*

**1 “Joah kadeik armaj kan, pwa doar Koahs kadeikda kamwai.  
2 Pwa Koahs nen kadeikda kamwai doahr kamwai kadeikda  
epwi, oh Ih nen jongki kamwai mihn jonngohr ma kamwai  
jongki epwi. 3 Amwda koawoa ke soahk dipoor siksik  
kij nehn mijen rioammwo a koawoa joah injinohki pwilein  
suhkoahn nehn mioammwen? 4 Ia mwomwen oamw en kak  
pwehng rioammwen, ‘Menlau, mweidoahng ngoahi en kihjang  
dipoar siksik kij nehn mioammwen,’ ma anjoauwohr pwilein  
suhkoahioau mine nehn mioammwen? 5 Armaj likamw men  
koawoa, keiou kihjang pwilein suhkoahn nehn mioammwen pwa  
koawoa en kak kapang mwehu, koawoa en kak kihjang dipoor  
siksik nehn mijen rioammwo.**

**6 “Joah kioang doahk mehkij ma Joarwi; pwadoar ih pwurdo koahdi kamwai; kamwai joah kerpwihla nihmwai sakai kajampwal kan oang pij kan, pwa ioarroar irai nen wia siakpijoang.”**

*Poaki, Rapahki, Lesles*

**7 “Poaki a kamwai pirin oaloa; Rapahki a kamwai pirin diar; lesles a wanihmmwo pirin risdahng kamwai. 8 Pwa inje ma poaki pirin oaloa; apel inje ma kin rapahki pirin diar; apel wanihmmwo pirin risdahng inje ma lesles. 9 Inje in kamwai ma nah jeri poaki pilahwa a ih kioang sakai? 10 Ke ma ih poaki mwumuw a ih kioang sinek? 11 Ma nehn amwai nauna, kamwai kidal kioang nihmwai jerihkan kijakij mwehu, ia woahr mwehuwin kijakijo Jamamwai nehnloanngé pirin kioang irai ma poaki Ih!**

**12 “Wiahng epwi da ma kamwai nimen irai en wiahng kamwai, pwa me oaroahpene Kojonned apel padahk in Joukohp kan.”**

*Wanihmw Soahsiksik pel Wanihmw Sahlaplap*

**13 “Dilda nehn wanihmw Soahsiksik. Pwa wanihmmwo inlahng ehl pwen sahlaplap pel allo pwen koalik apel moangoai a armaj dir alu loaloa. 14 A wanihmmwo inlahng mour pwen soahsiksik, allo pwen apwal doar armaj jipid diarda.”**

*Suhkhoa pas pel wehn suhkoahu*

**15 “Kamwai mwajahni mwehu joukohp likamw kan. Irai indoa ipamwai in mwomwen jihpw, a loaloarai doahr wolf ingkelpwi.**

**16 Kamwai nehn kidalki arai wahrai kan. Kak armaj en doli grape jang suhkoa dokdok, ke fig jang suhkoa karak? 17 Suhkhoa mwehu kihda wah mwehu, a suhkoa nauna kihda wah nauna. 18 A suhkoa mwehu pas johkak kihda wah nauna, a suhkoa nauna johkak kihda wah mwehu. 19 Suhkhoa ohroj ma joah kihda wah mwehu pirin poalpoaldi kerpwihekla nehn oaiho. 20 Ioar, jang in wah kan kamwai nen kidalki joukohp likamw kan.”**

*Sohnpadahk Mehlel*

**21 “Jaudi ohroj ma panginki Ngoahi, ‘Koaun, Koaun’ pirin dilda nehn Wein nehnloanngé, a araihokkoar ma kin kapwaihahda injenen Joamoaiho ma mine nehnloanngé. 22 Rehnin kadeikko armaj dir pirin pwehng Ngoahi, ‘Koaun, Koaun, jaudi kamai ma kin wia kokohp in oadoamwen, pel in oadoamwen kamai kin kaujjang ngen jaus pel wia joangoan manman dir?’ 23 A Ngoahi pirin pwehng irai, ‘Ngoahi jehjoa kamwai. Alwe jang ipoai, kamwai armaj nauna!’”**

*Sohn Kou Umw Roahmen*

**24 “Doari emen ma kin rong oai padahk kan a wia, ih doahroar woal loalkoanngo ma kouda umwahu pohn sakai. 25 Wuddo mwoardi, lapakehda, enngo koaldo pohk ummwo, a ih johpwa mwoardi, pwa ih poahjoanda pohn sakai.**

**26 “A emen ma rong Oai padahk kan a johpwa wia doahr woal pweipweiho ma kouda umwahu pohn pik. 27 Wuddo mwoardi, lapakehda, enngo pohk ummwo, ummwo kipla ripoadpoaddi.”**

*Manman en Jesus*

<sup>28</sup> Nehr en Jesus ne doari Ah padahk, pokonno inenin pwuriamweikihla mehlel joangoan padahk oauwo, <sup>29</sup> pwa manman in Ah padahk johpwa doahroar en jounpadahk in Kojonneddok arai padahk.

## 8

*Jesus kemwehuwihla woal Lepa men*

<sup>1</sup> Nehr Ah indi jang pohn dollo pokon koalik oau pwilihdo Ih. <sup>2</sup> Woalmen johmwehu lepa indoa ipen Jesus, poadpwomwla pwehng Ih, “Maing, ma koawoa nimen, koawoa kak kamwelehdha ngoahi\*.”

<sup>3</sup> Jesus kaila poah pukkoang woallo, “**Ngoahi nimen**,” Ih pwehng ih, “**Ken mwakelkelda!**” Anjoauwohr woallo mwehula jang ah lepa.

<sup>4</sup> Jesus pwehng woallo, “**Kapang! Pwa koawoa en johpwa pwehng emen. Inla kajalehng jamwrou a koawoa wia oamw meiroang joanngo ma Moses koajoanehdi, en wia oamw mihn kadehde oang irai.**”

*Jesus kemwehuwihla en Koaun in Jounpei men ah lidu*

<sup>5</sup> Nehr en Jesus lel Capernaum, koaun in jounpei men indoa ipoa, poaki jauwaj. <sup>6</sup> “Maing,” ih pwehng Ih, “noai lidu men mine in ummwuo, mwoasorla apel inenin weiroak.”

<sup>7</sup> Jesus pwehng woallo, “**Ngoahi pirin inla kemwehuwihla ih.**”

<sup>8</sup> Koaun in jounpeaho pwehng Jesus, “Maing, ngoahi joah warroang Koawoa en indoa nehn umwoaiho. Pwen lalloar, ah noai liduhwo ne mwehula. <sup>9</sup> Pwa ngoahi pel anki manman pohn jounpei kan pehn ngoahi. Ngoahi kin pwehng emen, ‘inla,’ ih inla; a oang emen, ‘indoa,’ ih indoa. Ngoahi pwehng noai liduhwo, ‘Wia me,’ ih wia.”

<sup>10</sup> Nehr en Jesus rong me, Ih pel pwuriamweikihla pwehng irai ma pwilpwili ih, “**Ngoahi pwehng kamwai in mehlel, Ngoahi kahjik diar emen nehn Israel ma anki joangoan pwojon koalik doahr me.**” <sup>11</sup> Ngoahi pwehng kamwai pwa armaj dir pirin injang palimese apel palikapi, mwindi nehn dohiarai pwili Abraham, Isaac pel Jacob nehn Wein nehnloannge. <sup>12</sup> A sohn Weiho pirin kerpihekla likin, oang nehn rosso, wija ma irai pirin joang apel keikeikeisakai.”

<sup>13</sup> Doari Jesus pwehng koaun in jounpeaho, “**alwe in umwoammwo, da ma koawoa kamehlele en wiawi.**”

Nah liduhwo mwehula Anjoauwohr.

*Jesus Kemwehuwihla Johmwehu dir*

<sup>14</sup> Anjoauwo Jesus lel nehn umwen Peter-o, Ih kidalda pwa inen pahien Peter-o johmwehu karkar. <sup>15</sup> Jesus koldi poahn liho, karkarro injang ipen liho; ih ken pwohrda sapda papah Ih.

<sup>16</sup> Injoausikdi, armaj dir ma ngen jaus sihda pohrai wijkdohng Ih, Jesus kihjang ngen jaus iparai, kemwehuwihla arai johmwehuwok.

<sup>17</sup> Me en kapwaihahda da me joukohp Isaiah pwa: “Ih oaloahda asai jasihkei kan pel wahda asai johmwehu kan.”

*Dupkoan Pwilihla Jesus*

---

\* **8:2** kamwelehdha ngoahi Joangoan johmwehu oauwe kin kajaminihla armaj oang joarwi.

18 Anjoauwo ma Jesus kapangda uhwen koalikin pokonnoauwo pwilpwili Ih, Ih pwehng nah sohnpadahkkok pwa irai en jeila oaloap jed in Galilee. 19 Jounpadahk in kojonneddoo men indoa ipoa pwehng Ih, “Jounpadahk, ngoahi en pwili koawoa wija ohroj koawoa inla.”

20 Jesus japoang, **“Fox mine arai lipw, mahnsang kan mine arai paj, a Nihn-Armaj joh wija Ih en koammoaldi.”**

21 Emen sohnpadahk pel pwehng Ih, “Maing, mweidoahng ngoahi en inla jaripdi oai pahpahu mijkoalkoal, a ngoahi indoa pwilihla Koawoa.”

22 A Jesus pwehng ih, **“Pwili Ngoahi, a mweidoahng mehdi kan en jaripdi pein arai mehdi.”**

### *Jesus Kamoaloailoaidi Melmel*

23 Jesus doaudahng nehn pohsso, Nah sohnpadahkkok pwili Ih.

24 Anjoauwoh melmel oau pwokda pohn jeddo, nohk jaujaudo nehn pohsso. A Jesus moair. 25 Sohnpadahkkok inla panginda Ih pwehng Ih, “Maing, doaroahla kisai! Kisain ken mehdi!”

26 Ih japoang, **“Siksik amwai pwojon, Amwda kamwai ke majp-wehk.” Ih uhda ruwoje enngok apel nohk en uhdi, anjoauwoh melmello ken molundi.**

27 Sohnpadahkkok pwuriamweila, idoak nehn pwungarai, “Armaj dahmen me? Ma eng apel no kin peikkoang!”

### *Kemwehulahn Woal Roahmen ma Ngen Nauna Dilda Nehn Ara Mour*

28 Anjoauwo ma Jesus lel oaloap jeddo, nehn koujapw in Gadara, woal roahmen suhwoang Ih ma indoa jang nehn joaujoauwok. Woal roahmen ne ma ngen jaus mine nehn ara inenin keper doar joh armaj kin wud nehn alloauwo. 29 Anjoauwoh ara wering Jesus pwehng Ih, “Koawoa Nihn Koahs, da koawoa nimen wiahng kama? Koawoa indoahng koalkoa kama mwohn anjoauwo?”

30 Mine pwihnnipij koalik oau mwingswinge joah dohla. 31 Ngen jaussok poaki Jesus, “Ma koawoa pirin kajroahla kama, kadarla kama nehn pijjok.”

32 **“Inla!”** Jesus pwehng ara. Doar ara ken inla dilloang nehn pijjok, nehn anjoauwoh pijjok kijoudihla duhla nehn lehu.

33 Sohn apwali pijjok kaula inla nehn koaujoanno pwehng me ohroj, pwilihki da ma wiawihoang armajjok ma ngen jaussok mine pohra.

34 Sohn koaujoanno ohroj inlahng suhwoang Jesus. Anjoauwo irai suhwoang Ih, irai poaki Ih en injang nehn arai wijahu.

## 9

### *Jesus Kemwehuwihla Woal Mwoasor men*

1 Jesus doaudahng pohn pohsso jeila oaloap jeddo, nehn Ah koaujoanno\*. 2 Woalpwi wahdohng Ih woal mwoasor men mine pohn rohp oau. Anjoauwo ma Jesus kapang arai pwojon, Ih pwehng woal mwoasorro, **“Koapwoarpwoar, noai jeri! Dipoamw kan ne lapwda.”**

3 A epwi Jounpadahk in kojonneddok ma mine o lemlemeiki pwa “Woal mene lahlahwe.”

4 Jesus kidal arai lamlam, doar Ih ken pwa, **“Amwda kamwai ke lamlam nauna nehn mohngiongimwai kan?”** 5 **Ia minno**

\* 9:1 nehn ah koaujoanno Capernaum (kapang 4:13)

**moangoai, Ngoahi en pwa, ‘Dipoamw kan ne lapwda,’ ke, ‘Uhda alu?’** <sup>6</sup> A Ngoahi en kamehlele oang kamwai en kidal pwa Nihn-Armaj anki manmanin mahkoahng dihp pohn jampah.” Ih pwehng woal mwoasorro, “Uhda, oaloa kioammwen koawoa inla nehn umwoammwo.”

<sup>7</sup> Woallo ken uhda inla in umwahu. <sup>8</sup> Nehn en pokonno kapang me irai inenin majpwehkda; irai kapnga Koahs ma kioang armaj joangoan manman oauwo.

*Jesus pangin Matthew*

<sup>9</sup> En Jesus injang o nehn Ah allaluhla, Ih kapangda woal men, adanki Matthew, jounrik daksis, ma onnonohn nehn ah oahpisso. Jesus pwehng ih, “**Pwilihla Ngoahi.**”

Doar ih ken uhda pwilihla Ih.

<sup>10</sup> Nehn en Jesus mwingmwinge nehn umwen Matthew-o, jounrik daksis apel armaj dipan dir indoa pel mwinge pwili Ih apel nah sohn-padahkkok. <sup>11</sup> Pharisee pwi kapang me pwehng nah sohnpadahkkok, “Amwda amwai Jounpadahkken ke pwili jounrik daksis pel armaj dipan kan mwinge?”

<sup>12</sup> Nehn Ah rongda me, Jesus pwa, “**Jaudi armaj sihkei ioar anahne jounwini, a armaj johmwehu.**” <sup>13</sup> Inla woahwoahkihda woahwoahn mehkije jang nehn Puk Joarwi: ‘Ngoahi mwehuki kadek, jaudi meiroangin mahn.’ Ngoahi joah indoahng pangin armaj pwung, a armaj dipan kan.”

*Peidekki doahr Kaijihjol*

<sup>14</sup> Doar nihn John jounpoapdaij sohnpadahkkok indoa idoak oang Jesus, “Amwda kamai apel Pharisee-ok kin dod amai kaijihjol a nihmw sohnpadahk kan ken johkin kaijihjol?”

<sup>15</sup> Jesus japoang, “**Imdoahr nihn woallo ma pirin koapwoap-woaud sohnkaparrok en injinjuwed ma ih minmine iparai?** A oau anjoau ma pirin indoa ma woal kamwohddo pirin wijik jang irai; doari, ioar anjoauwo irai pirin kaijihjol.

<sup>16</sup> “**Joh armaj kin doahng dipwin likkoau kapw kij in likkoau dehn oau, pwa dipwin likkoau kappwo nen pworpene doapw-doapwjang in likkoau merinngo, nehn kakoalikihla soahroakk.**

<sup>17</sup> **Joh armaj kin widekihoang wain kapw nehn dohn wain dehn. Pwa dohn wainno nen pwokpijoang, wainno widekla, dohn wainno ohla. Wain kapw en widekihoang nehn dohn wain kapw, a kapwa nekdekla.**”

*Jerpein Mehdi men apel Li Johmwehu men*

<sup>18</sup> Nehn Ah pwahpwahpwa me, koaunin mihn Jew men indoa poapwomwla mwoohn Jesus pwehng Ih, “Noai jerpeinno kapwehsen mehdì. A indoa kioang poahmmwen puwoa, pwa ih en mourda.”

<sup>19</sup> Jesus uhda pwilihla ih, pwilihki nah sohnpadahkkok.

<sup>20</sup> Anjoauwo lihmen ma johmwehuki insa koarkoar johnpar ejek riau indoa likinjarkin pukkoangdi imwin Ah likkoauwo. <sup>21</sup> Lih pwehng pein ih, “Ma ngoahi pwen kodurroar Ah likkoauwo, ngoahi nen mwehula.”

<sup>22</sup> Jesus jipwoalla pwehng ih, “**Koapwoarpwoar, Noai jerpein, oamw pwojon ne kasikheda koawoa.**” Lih mwehula anjoauwohr.

<sup>23</sup> Anjoauwo ma Jesus dilda nehn umwen koaunno Ih kapang jounkoajoanngok apel armaj kan loakloakoa, <sup>24</sup> Ih pwehng irai, **“Kamwai dilla, jerpeinne johpwa mehdi, a ih moair.”** A irai uruhrkii Ih.

<sup>25</sup> Mwerin armajjok dilla, Ih dilla loaloa koldi poahn jerpeinno, ih pwohrda. <sup>26</sup> Rong oauwe lohk pijoang nehn wija ohroj.

### *Jesus Kemwehuwihla Woal Majkun Roahmen*

<sup>27</sup> Jesus daudauluhlla jang wijahu, woal majkun roahmen kaujla Ih, poangpoang, “Mahkoahng kama, nihn David!”

<sup>28</sup> Nehr Ah ne dilda nehn umw, woal majkunnok indoa Ipoa, a Ih peidek oang ara, **“Kamwa kamehlele pwa Ngoahi kak kemwehuwihla kamwa?”**

“Eh, Koaun,” ira japoang.

<sup>29</sup> Doar Ih jair mijara pwa, **“Me en wiawi jang in amwa pwojon;”**

<sup>30</sup> ira pwuroahng kapangda wija. Jesus pwehng ira, **“Kapang pwa johpwa emen en kidal mehkije.”**

<sup>31</sup> A ira inla likin kalohkihjili wijahu ohroj.

### *Jesus Kemwehuwihla Woal Loahsoang men*

<sup>32</sup> Nehr ara allaluhlla, woal loahsoang men ma ngen jaus dilingla ih wijikdohng Jesus. <sup>33</sup> Anjoauwo ma ngen jausso diljang ipoa, woal loahsoanngo lallalda. Pokonno inenin pwuriamwei pwa, “Kahjikkoar mehkij doahre wiawi nehn Israel.”

<sup>34</sup> A Pharisee-ok pwa, “Koaunin ngen jaus kan ma kioang Jesus manman in kajroahjang ngen jaus.”

### *Sohn Doadoahk Jipid*

<sup>35</sup> Jesus allaluhjili nehn kahnihmw apel koujapw ohroj, padpadahk nehn jinakoke kan, padpadahkki doahr rongmwehuin Weiho, kemwehuwihla joangoan johmwehu ohroj ipen armaj kan. <sup>36</sup> Nehr Ah kapang pokonno, Ih ipwilikhda irai, pwa ara injinjuwed apel joh jauwajparai, doahr jihpw ma ne joh jiloapoarai. <sup>37</sup> Doar Ih pwehng Nah sohnpadahkkok, **“Roakke koalik a sohn doadoahk jipid.** <sup>38</sup> **Poaki koaun in roakke en kadardo sohn doadoahk dir pwa en doadoahk nehn mwoaswello.”**

## 10

### *Woaroak Eijek Roahmen*

<sup>1</sup> Jesus panginpene Nah sohnpadahk eijek roahmenno, kioang irai manman en kajroahjang ngen jaus apel kemwehuwihla joangoangoan johmwehu ohroj. <sup>2</sup> Me ioar oadoan woaroak eijek roahmenno: Keiou Simon (ma pel adanki Peter) a riah jermweinno Andrew; James nihn Zebedee, apel riahu John; <sup>3</sup> Philip apel Bartholomew; Thomas apel Matthew, jounrik daksis; James nihn Alphaeus, apel Thaddaeus; <sup>4</sup> Simon mihn Canaan\*, apel Judas Iscariot, ma pangla Jesus.

### *Jesus kadarla Sohnpadahk Eijek Roahmen*

<sup>5</sup> Sohnpadahk eijek roahmenno Jesus kadarla kioang irai kaweid pwiai: **“Johpwa inla nehn pwungen mihn likin kan ke inla nehn koaujoan in mihn Samaria kan.”** <sup>6</sup> **A kamwai inlahng jihpw**

\* **10:4** Simon mihn Canaan pel Simon mihn Zealot pel Simon ma ngoang

joaloanglahk ipen mihn Israel kan. <sup>7</sup> Kamwai inla padahki pwa: Wein nehnloanne ne koaroan. <sup>8</sup> Kemwehuwihla johmwehu kan, kamourda min mehdi kan, kamwkelehdha irai kan ma anki johmwehu lepa, kauj jang ngen jaus kan. Doar amwai oaloa in joh dupko, Kamwai pel kihwei in joh dupko. <sup>9</sup> Johpwa wa kohl, silper, ke kapa nehn amwai pwuko kan; <sup>10</sup> johpwa wijik pehk nehn oamw jeiloak, ke joakid riau, ke ju ke jokon; pwa sohn doadoahk kan warroang oaloa dahkij arai anahne.

<sup>11</sup> "Nehn amwai dilda nehn oau koaujoan ke koujapw, rapahk-ihda armaj men ma nimen kamwain mine nehn umwahn oaroh kamwai pwur. <sup>12</sup> Nehn amwai en dilda nen umw oau, amwai rahnmwahu en doahroar me; popohl oang sohn ummwoauwe. <sup>13</sup> Ma sohn ummwo kajamwo kamwai, amwai popohl en minmine iparai, a ma joah, amwai popohl en japahldohng kamwai. <sup>14</sup> Ma mine umw oau ke koaujoan oau joah nimen kajamwo kamwai, ke rong amwai padahk, diljang wijahu jiped jang pwirejpar in pwoalkoamwai. <sup>15</sup> Ngoahi pwehng kamwai pwa in mehlel, Rehn in Kadeikko Koahs pirin kajalehda Ah kalahngan oang sohn Sodom apel Gomorrah koalik jang koaujoan pwiai.

### *Koaloklok kan ma pirin leldo*

<sup>16</sup> "Kamwai Rongmwehu Ngoahi kadarwe kamwai doahroar jihppwi nehn pwungen wolf. Kamai uhdahn pirin kanaihoahng kamwai doahroar sinek kan apel maid doahroar mwurei kan. <sup>17</sup> Kamwai mwajahn pwa armaj kan pirin joalihdi kamwai apel pangla kamwai mwohn Mwoalen Koapwung kan, apel poki kamwai nehn jinakoke kan. <sup>18</sup> Pwa Ngoahi, kamwai nen wijikla mwohn koaun apel nahmwarki kan, pwa kamwai en kadehdehng irai apel mihn likin kan doahr Rongmwehu. <sup>19</sup> Nehn irai pirin panglahng kamwai koapwung, kamwai joah pwunodki da kamwai pirin pwa, ke ia mwomwen amwai pirin pwa; nehn anjoauwo pirin lel, nen mweimweioang kamwai da kamwai pirin pwa. <sup>20</sup> Pwa lal kan ma kamwai pirin pwa jaudi amwai a Ngenin Jamamwaiho pirin kalallali kamwai.

<sup>21</sup> "Armaj pirin pangla riarai kan pwa en mehdi, pahpia kan pirin pangla nihrai jeri kan; Jeri kan pirin uhwoangda arai pahpia kan pwa irai en kojkojdi. <sup>22</sup> Armaj ohroj pirin lioassoang kamwai pwa ngoahi ma kahrehda, a emen ma pwojon lel imwin pirin mourla. <sup>23</sup> A ma kamwai koaloklok nehn oau koaujoan, kaulahng nehn oau koaujoan. Ngoahi pwehng kamwai in mehlel, kamwai nen johpwa koarjoahla koaujoan in Israel kan mwohn Nihn-Armaj pirin pwurdo.

<sup>24</sup> "Joh sohnpadahk men laplap jang ah jounpadahk: joh lidu men laplap jang ah koaun. <sup>25</sup> Sohnpadahk men en pel isarki en doahroarla ah jounpadahkko, apel liduhmen en pel doahrla ah koaunno. Ma moangoan peneinei oau poangpoangki Beelzebul, ia woahr nauna in ad ma emen sohn peneineiho en poangpoangki!

**26** “Kamwai en joah mijik armaj. Me ohroj ma kin oakkoakla, uhdahn pirin janjalda, ke me rir ohroj pirin janjalda. **27** Da ma Ngoahi pwehng kamwai in rir, kamwai en kajalehda nehn pokon janjal; a me ma Ngoahi ngudngudkihoang kamwai, kamwai en pakairkihda pohn umw kan. **28** Johpwa mijik irai ma kak kojukdi palwahr a johkak kojukdi pali ngen. A mijik Ih ma kak koauwehla ara, ngen apel palwahr nehn ehl. **29** Send oau kamwai kak dupukda mahn siksik roahmen, a emen joh kak kipdi pohn pwirej likin koajoandi en Jamamwaiho. **30** A pel oang kamwai ohroj, pisen moangoamwai kan ohroj ne pel wadwaddi. **31** A doar joah mijik; kamwai kajampwaljang mahn siksik dihrdir!

*Kadehdehda Christ mwohn armaj*

**32** “Emen ma pohneje Ngoahi mwohn armaj, Ngoahi pel pirin pohneje ih mwohn Joamoaiho nehnloannge. **33** A emen ma kahmahmki Ngoahi mwohn armaj, Ngoahi pel pirin kahmahmki ih mwohn Joamoaiho nehnloannge.

*Jaudi Moaloailoai ngoahi indoahki a Kodlaij*

**34** “Johpwa lemleme pwa Ngoahi indoahng wahdo moaloailoai pohn jampah. Ngoahi joah indoahng wahdo moaloailoai, a kodlaij. **35** Pwa Ngoahi indoahng ukudla jermwein men en uhwoang jamah, jerpein men en uhwoang ah nohno, lihmen uhwoang inen pahioa. **36** En emen ah imwinsihsipirin wia sowoa mehlel in nehn umwahu.

**37** “Emen ma ipwilki jamah ke inah koalik jang ah ipwilki Ngoahi johpwa warroang Ngoahi; emen ma ipwilki nah jermwein ke jerpein koalik ah ipwilki Ngoahi johpwa warroang Ngoahi; **38** emen ma johpwa wahda ah lohpwu pwili ngoahi johpwa warroang Ngoahi. **39** Emen ma nimen kolkol ah mour nen luhj jang, a emen ma luhj jang ah mour ki Ngoahi nen kolkol ah mour.

*Dupkoan wihwia mwehu*

**40** “Emen ma kajamwo kamwai kin kajamwo Ngoahi, a emen ma kajamwo Ngoahi kin kajamwo ih ma kadardo Ngoahi. **41** Emen ma kajamwo joukohp en Koahs men pwa ih joukohp en Koahs men pirin oaloa kijakij in joukohp men, a emen ma kajamwo armaj pwung men pwa ih armaj pwung men pirin oaloa kijakij in armaj pwung men. **42** Ngoahi pwehng kamwai in mehlel, ma emen kioang mwoak in pil mwolou oau oang pwilihoai siksik pwiai, ih nen uhdahn oaloa dupko.”

## 11

*Jesus apel John jounpoapdaij*

**1** Anjoauwo ma Jesus ne doari Ah kioang kaweiddok oang Nah sohnpadahk eijkek roahmenno, Ih inla jang o pwa Ih en sukuhli pel padahk nehn arai koaujoan kan.

**2** John jounpoapdaij, mine nehn kalpwuhj, rongda pwa da Christ wihwia, kadarla nah sohnpadahkkok ipen Jesus, kalelpoak. **3** “Koawoa oar ma John jounpoapdaij ma pirin indoa, ke kamain pel kajkajik emen sohrohr?”

<sup>4</sup> Jesus japoang, “Pwurla pwehng John da kamwai rong apel kapang: <sup>5</sup> Majkun kan kapangda wija, mwoasor kan alu, irai kan ma anki lepa mwehula, pongpong kan rongda wija, mehdi kan mourda, Rongmwehu ne pel padahk oang armaj joamwoahmwoa kan.” <sup>6</sup> Meid pai armajjok me johpwa peikajalki Ngoahi.”

<sup>7</sup> Anjoauwo ma nihn John sohnpadahkkok pwurpwurla, Jesus sapda siksikoahng pokonno doahr John: “Da kamwai inlahki nehn japswoahn ipen John pwa kamwain kapang? Alek pas jahkkihla enngo? <sup>8</sup> Ma jaudi, da kamwai inlahng kapang? Woal men kapwasda inenin mwehu? Irai ma kin kapwasda mwehu kin mine nehn umwen nahmwarki. <sup>9</sup> Doari da kamwai inlahng kapang? Joukohp men? Eh, Ngoahi pwehng kamwai, pel koalikjang joukohp men. <sup>10</sup> John ioar ma puk joarwi pwa: ‘Koahs pwa, Ngoahi pirin kadarwe Noai jounpakairro mwohn koawoa, ma pirin koaunopda allo mwohn koawoa.’ <sup>11</sup> Ngoahi pwehng kamwai in mehlel: Johpwa armaj men ma mour nehn jampah laplap jang John jounpoapdaij; a ih ma keiou siksik nehn Wein nehnloange laplapjang John. <sup>12</sup> Jang nehn rehn kan ma John kapkapahrak leldo apkas, Wein nehnloange inenin apwalkihda mwoakidpwi, apel iraihok ma wia mwoakid pwiai jong en koldi. <sup>13</sup> Mwohn John jounpoapdaij, Joukohp kan ohroj apel kojonné en Moses sikoa doahr Wein Koahs. <sup>14</sup> A ma kamwai nimen kamehlele, John ioar Elijah ma kokohppok sikoa ma pirin indoa. <sup>15</sup> Armaj men ma mine sioa mihn rongrong, a ih en rong!

<sup>16</sup> “Da Ngoahi kak karjahkihoang armaj en rehn pwiai? Irai doahroar jeri kan mwindi nehn market kan poangpoanglahng epwi: <sup>17</sup> ‘Kamai koajoang oang kamwai, a kamwai johpwa kahlek; kamai koaul ki koaul en mehdi, a kamwai johpwa joang!’ <sup>18</sup> John indoa, ih kaijihjol apel joah nim wain, a armaj ohroj pwa, ‘ih dirkihla ngen jaus.’ <sup>19</sup> Anjoauwo ma Nihn-Armaj indoa, Ih mwinge apel nimnim, armaj ohroj pwa, ‘kapang woal menen! Ih mijen mwinge apel sohn nim jakau men, Ih pirienki jounrik daksissok apel armaj jekenkennok!’ En Koahs loalkoang kadehdehda ah wihiwia pwung kan.”

*Apwal oang koawoa Kahnihmw oau ma joah Wikla.*

<sup>20</sup> Doar Jesus sapda kajalehda Ah jpwungki koaujoannok ma Ih wiahda loapdirin Ah manmannok, pwa sowoahk johpwa koluhla apel wikla. <sup>21</sup> Ih pwehng irai, “Inenin naunahng koawoa, Chorazin! Pel naunahng koawoa, Bethsaida! Pwa manmannok ma ne wiawihoang kamwai, wiawihoang Tyre pel Sidon, irai ne likkoaukihda likkoauwin injinjuwed pel kamwroahdihoang moalkoahr pohrai, pwa en kajalehda irai ne koluhla apel wikla. <sup>22</sup> A Ngoahi pwehng kamwa, Ngoahi nimen kamwahn kidal, pwa nen rehnin kadeikko Koahs pirin kajalehda Ah kalahngan oang sohn Tyre pel Sidon koalik jang kamwa. <sup>23</sup> A koawoa, Capernaum, koawoa ma nimen leldahla nehnloange, koawoa nen jinoakekdihla nehn ehl! Pwa manmannok ma ne wiawihoang koawoa, wiawihoang sohn Sodom, irai nen minehr lel rehnnoauwe. <sup>24</sup> Ah koawoa en

**kidal pwa rehnin kadeikko, Koahs nen kajalehda Ah kalahngan oang Sodom koalik jang oang koawoa!"**

*Koammoal oang armaj pwunod*

<sup>25</sup> Anjoauwo Jesus pwa, "Ngoahi kapnga koawoa, joamoai, Koaun in nehnloanngé apel jampah! Ngoahi kapnga ki koawoa, oamw kajalehng irai joaloalkoanngok mehkan ma koawoa oakihjang iraihok ma koahiok apel loalkoang in jampah. <sup>26</sup> Joamoai, me ne wiawi pwa ioar mehwa koawoa pwungki.

<sup>27</sup> "Me ohroj ne mweimweioang Ngoahi jang ipen Joamoaiho. Johpwa emen kidal Nahu likin Jamahu, pel johpwa emen kidal Jamahu likin Nahu pwilihki araihok ma Nahu pilda pwa Ih en kajalehng irai Ih.

<sup>28</sup> "Kamwai ohroj indoa ipoai kamwai ma ne koakoahkla apel soausoaukihla amwai wijik kan, Ngoahi en kakoammoalihla kamwai. <sup>29</sup> Kamwai oaloa aproahda Oai mihn wijikke, apel sukuhl jang Ngoahi, pwa Ngoahi ma aksiksik apel nehn kapehd karkarahk, kamwai nen diar koammoal nehn ngenimwaikan. <sup>30</sup> Pwa Oai mihn wijikke ma Ngoahi pirin kioang kamwai, moangoai apel marahra."

## 12

*Peidekki doahr Sabbath*

<sup>1</sup> Mwerin anjoaukij Jesus aluhla nehn mwoaswel oau Sabbath. Nah sohnpadahkkok mwakohkohda irai dolihdi wehn wihpwi irai kang.

<sup>2</sup> Anjoauwo Pharissee-ok kapang irai, irai pwehng Jesus, "Kapang! Nihmw sohnpadahkkok wia me ma uhwoang kojonned in Sabbath."

<sup>3</sup> Ih japoang, "Kamwai johkin wadek da David wia anjoauwo ma ih apel pwilihoahk mwakohkohla? <sup>4</sup> Ih dilda nehn Umwen Koahs, pwilihoahk kangla pilahwa joarwiho—ma uhwoang kojonned irai en wia, pwa jamrrouwok oar kin kang. <sup>5</sup> Ke kamwai kahjik wadek nehn kojonned en Moses-ok ma pwa Sabbath ohroj jamrrouwok nehn Umw Joarwi koauwehla kojonned in rehn joarwi a irai johpwa dipanki? <sup>6</sup> Ngoahi pwehng kamwai pwa mine armaj men ma laplap jang Umw Joarwiho. <sup>7</sup> Puk Joarwi pwa, 'Kadek mwehujang meiroang in mahn.' Ma kamwai woahwoahki lal kamwai nen johpwa koauwe armaj joh dipoa. <sup>8</sup> Pwa Nihm-Armaj ioar Koaun in Sabbath."

*Woal men ma mwoasor oaloap poah*

<sup>9</sup> Jesus injang o, inla nehn jinakokehu, <sup>10</sup> woal men ma mwoasor oaloap poah mine o. Armajpwi pel mine o ma jongjong en kadipoahki Jesus Ah japwung. Irai idoak oang Ih, "Johpwa uhwoang asai kojonned Koawoa en kemwehuwihla armaj johmwehu Sabbath?"

<sup>11</sup> Ih pwehng irai, "Ma emen in kamwai nainki jihpw men a ih kipdihoang nehn lipw oau Sabbath, kamwai joah nen pwoakda ih jang nehn lippwo? <sup>12</sup> Ia woahr kajampwalin armaj men jang jihpw men! Doari mwehu en wia me mwehu Sabbath." <sup>13</sup> Doar Ih pwehng woal mwoasor poahu, "Kailwe poahmmwen." Doar ih kailla poah doari ken mwehula dauluhl, doahrila loap mwehuwo. <sup>14</sup> A Pharissee-ok ken injang o pilahnehda irai en kojukdi Jesus.

*Nihn Koahs Lidu Pilpildahu*

<sup>15</sup> A Jesus kidal pwa da irai pilpilahne, Ih injang wijahu, armaj dir kaujla Ih. Ih kemwehuwihla johmwehu ohroj iparai, <sup>16</sup> a Ih pwehng irai en johpwa pwa inje Ih. <sup>17</sup> Me kapwaihahda dahkij Isaiah kokohpki doahr Ih:

<sup>18</sup> “Noai liduhwa, ma Ngoahi ne pilda.

Ih ioar Ngoahi ipwilki,

apel perenki,

ngoahi pirin kihdahng Ngenihoa puwoa,

Ih pirin kalohkihda kadeik oang wei kan.

<sup>19</sup> Ih jehpirin akmai ke rahrahu;

Ih jehpirin kapahrak nehn al kan.

<sup>20</sup> Ih jehpirin sipwangdi alek piroakla kan,

ke kakunihla lahm oau.

Ih pirin sihkeiki pwa pwung paiai en pwoaida.

<sup>21</sup> Sohn wei ohroj pirin koapwoarpwoarkihla oadoa.”

*Jesus apel Beelzebul*

<sup>22</sup> Doari woal men ma ngen jaus dilingla ih, ma pel majkun pel jehjoa lallal, wijkdohng Jesus. Ih kemwehuwihla woallo doar ih ken kak lallal pel kapangda wija. <sup>23</sup> Pokonno pwuriamweikihla, “Audi Ih ma kijehn kadaudok en David wa me?”

<sup>24</sup> A anjoauwo me Pharisee-ok rongda me, irai pwa, “Kamwai johpwa pwuriamweiki Ah kak kauj jang ngen jaus. Ih kihjang ah manman ipen Beelzebul, koaunin ngen jaus.”

<sup>25</sup> Jesus ne kidal da arai lemleme, ioar Ih pwehngkihoang irai, **“Wei oau ma uhpena apel peipene nen pwungarai jehpirin mour woaroai. Kahnihmw oau ke peneinei oau ma sowoa kan pel uhpena nehn pwungarai nen uhdahn mwoarpijoang.”** <sup>26</sup> A doar ma oau pwih mahwin oang oau pwih nehn wein Jehsen, woahwoahki pwa wein Jehsen ne pwalpijoang, doar nen pispis mwoarpijoang. <sup>27</sup> Kamwai pwa Ngoahi kin kauj jang ngen jaus kan pwa Beelzebul ma kioang Oai manman. A inje ma kioang nihmwai sohnpadahk kan manman in kauj jang ngen jaus kan? Pein nihmwai sohnpadahk kan nen kadehdehng kamwai doahr amwai japwung! <sup>28</sup> Joah, jaudi, a Ngenin Koahs ma kioang Ngoahi manman in kauj jang ngen jaus kan, a ioar me ma kadehdehda pwa Wein Koahs ne lel kamwai.

<sup>29</sup> “Joh emen kak koauwehla umwen woal sihkei men pwa en pirapoa ah koapwoa kan ma ih johpwa koldi piroahpene woal sihkeiho. Ioar wioapoawahr doari ih kak pirapoa ah koapwoa kan.

<sup>30</sup> “Emen ma johkin pwili Ngoahi, kin uhwoang Ngoahi, a ma johkin jeuweje Ngoahi rikpene, kin kamwroahpijoang. <sup>31</sup> Me ioar kahrpoahwa Ngoahi pwehng kamwai, Dihp ke lahlahwe ohroj kak mahkla—a lahlahwe Ngen Joarwi ioar johkak mahkla.

<sup>32</sup> Emen ma lahlahwe Nihn-Armaj, kak mahkla, a lahlahwe Ngen Joarwi pwanah johkak mahkla—apkas ke pel allaluhla.

*Suhkoo pas apel Wah kan*

<sup>33</sup> “Ma kamwai poadokdi suhkoa mwehu pas, a wah pirin mwehu. Ma kamwai poadokdi suhkoa nauna pas, wah pirin nauna. Pwa kamwai pirin kidal suhkoa kan ki wahrai kan.

<sup>34</sup> Kamwai doahroar sinek! Imdoahr armaj nauna doahr kamwai kak pwa mehkij mwehu? Pwa dahkij ma kamwai pwa ioar kin kajalehda audioapoan nehn kapehdimwaikan. <sup>35</sup> Armaj mwehu men kin pwahla lal mwehu jang nehn ah mohngiong mwehu, a armaj nauna men kin pwahla lal nauna jang nehn ah mohngiong nauna.

<sup>36</sup> “Doari, kamwai en kidal pwa nehn Rehnin Kadeikko armaj ohroj uhdahn pirin pwukoahki arai lallal mwahl ohroj. <sup>37</sup> Pein amwai sikesik kan ma pirin kadeikda kamwai ma kamwai mwakelkel ke dipan.”

### *Kilel in Jonah*

<sup>38</sup> Jounpadahk in Kojonned apel Pharisee pwi indoa ipen Jesus pwehng Ih, “Jounpadahk, kamai nimen Koawoa en kajalehng kamai oau manmanno.”

<sup>39</sup> Jesus japoang, “Ia woahr nauna apel rosros in armaj in anjoau kije! Kamwai poaki manman oau jang Ipoai a manman wahr Ngoahi nen kioang kamwai ioar manman in joukohp Jonah.

<sup>40</sup> Pel doahr en Jonah minmine nehn kapehdin mwumw koalikko rehn jiluh pel pwong jiluh, ioar doahr, Nihn-Armaj, pirin mine pehn jampah rehn jiluh pel pwong jiluh. <sup>41</sup> Nehn Rehnin Kadeikko mihn Nineveh pirin uhwoang kamwai apel kadeikda kamwai, pwa ahr koluhla apel wiliakapwla nehn ahr rong en Jonah padahkko. A apkas emen ma laplapjang Jonah mine me.

<sup>42</sup> Nehn Rehnin Kadeikko Li nahmwarki in Sheba pirin uhwoang kamwai apel kadeikda kamwai, pwa ih jeiloakdo jang nehn ah weihpwa en rong doahroar en nahmwarki Solomon kaweid loalkoang. A apkas emen ma laplap jang Solomon mine me.

### *Japahldohn Ngen Nauna*

<sup>43</sup> “Nehn en ngen jaus men kin diljang nehn armaj men, ih kin allaluuhjili nehn japwoahn, rapahki wijahn koammoal a nehn ah johkin diar. <sup>44</sup> Doar ih ken pwehng pein ih, ‘Ngoahi en pirin pwurlahng nehn umwoaiho.’ Doar ih pwurla diarda pwa umwahu ne soahnda, mwakelkel, apel joan. <sup>45</sup> Doar ngen jausso pel pwurla rapahkiha pel ngen jaus ijimen ma nauna jang ih, irai ohroj dilda koaujoanla wijahu. A doari armajo a kapwa nauna jang mijkoalkoal. Ioar joangoan mour wa me nen wiawi oang armaj nauna in rehn pwiai.”

### *Inen Jesus apel Riah Woal kan*

<sup>46</sup> Nehn en Jesus siksikesik oang pokonno, inahu apel riahk mine likin, nimen lal oang Ih. <sup>47</sup> Armaj men pwehng Ih, “Inoammwo apel rioammwok minmine likinno, irai nimen lal oang Koawoa.”

<sup>48</sup> Jesus japoang, “**Inje inoai? Inje rioai kan?**” <sup>49</sup> Doar Ih doklahng nah sohnpadahkkok Ih pwa, “Irai pwiai ioar inoai apel rioaikoa.

<sup>50</sup> Emen ma kin wia injenen Joamoaiho nehnloanngne ioar rioai woal, rioai li apel inoai.”

## 13

### *Karajraj in Jounkamwoaroa*

<sup>1</sup> Rehnnohr Jesus injang in ummwo Ih indihla in oaroahrin jeddo, wijahu ma Ih mwindi pwa en wia ah padahk. <sup>2</sup> Pokonin armaj koalikkoau kapilpene Ih. Ih ken doaudahng nehn pohs pas, mwindi, a pokonno uhda pohn oaroahrin jeddo. <sup>3</sup> Ih doadoahkki karajraj pwa en pwehng irai me dihrdir.

**“Armaj men mine ma inlahng kamwroa ah liporrohk.** <sup>4</sup> Doari, nehn ah kamwkamwroa ah liporrohk, epwi mwoardihoang nehn al siksik in nehn mwoaswello, mahnsang pwi sangdo kangjang. <sup>5</sup> Epwi liporro kipdi nehn wija sakaikai ma pwirejjo poadpoad. Liporrohk pispisin koapda pwa pwirejjo poadpoad. <sup>6</sup> A anjoauwo ma joauwo dakda, suhkoahk pispisinnoar mengla pwa koalohraiock johpwa lel nehn wija loal. <sup>7</sup> Epwi liporrohk kipdi nehn pwungen suhkoa soaksoak. A suhkoa soaksoakkok koapda kajasihkeihla irai. <sup>8</sup> A epwi liporrohk kipdi nehn pwirej mwehu uhwahda, epwi min epwiki, epwi weneijek, a epwi jilihjek.

<sup>9</sup> “**Armaj men ma mine sioa mihn rongrong, a ih en rong.**”

### *Kahrpoan Karajrajjok*

<sup>10</sup> Nah sohnpadahkkok indoa ipen Jesus idoakkoang Ih, “Amwda koawoa ke kin doadoahkki karajraj nehn oamw kin lalloang armaj kan?”

<sup>11</sup> A Jesus japoang irai, “**Kamwai ne mweimweioang en woahwoahkihla me rir in Wein nehnloanne, a irai joah.**” <sup>12</sup> Pwa armaj men ma anki mehkij, ekij nen pel aluhwoang, pwa ih en anki koalikjang. A oang ih ma joh ah mehkij, dakhij ma mine ipoa nen pel kihekjang. <sup>13</sup> Ioar kahrehda Ngoahi kin padahk oang irai in karajraj, pwa armaj kin kapang da Ngoahi wia, a irai johkin soahk, irai rong da ngoahi kin pwa, a irai johpwa nimen rong ke woahwoahki. <sup>14</sup> Me ioar kokohp in Isaiah, pwoaida iparai ma pwa:

‘Kamwai pirin rongrongrong, a johpwa woahwoahki;  
kamwai pirin kapkapang a joah dehdehki.  
<sup>15</sup> Pwa mohngiongin armaj pwiai ne koapsakaila,  
siarai kan pongpongla,  
a irai moairpene,  
pwa mijarai kan en joah kapang,  
a siarai kan johkak rong,  
a mohngiongirai johkak woahwoahki,  
a irai johkak okdekdhong Ngoahi  
pwa Ngoahi en kemwehuwihla irai.’

<sup>16</sup> “A kamwai, meid pai kamwai ma mijamwaikan kak kapang, apel siamwaikan kak rong.” <sup>17</sup> Ngoahi en kadehdehng kamwai pwa dir joukohp apel armaj pwung ma nimen kapang da kamwai kapkapang apel rong da kamwai rongrongrong, a irai johkak.

### *Jesus Kowoahwoahda Karajraj in Jounkamwoaroawo*

<sup>18</sup> “**Kamwai rong apel padahkihdi woahwoahn karajraj in Jounkamwoaroawo.**” <sup>19</sup> Irai kan ma rong padahk in Wein nehnloanne a johkin woahwoahki. Irai doahroar liporrohk ma

**mwoardi pohn allo, Ngen nauna kan indoa jerkihjang dahkij ma ne poaddi nehn mohngiongirai.** <sup>20</sup> Liporro ma kin mwoardi oang nen wijsakai woahwoahki irai kan ma kin rong oaloahda apel perenkihda. <sup>21</sup> A johkin soangdi iparai, ma apwal oau ke kojkoj kin lel irai pwa padahkko, a irai kin pispis in lohdi. <sup>22</sup> Liporrohk ma mwoardihoang nehn pwungen suhkoa soaksoakkok doahroar araihok ma rong apel oaloahda mahjanno, a nen johpwa kos mahjanno nen johla mine iparai pwa jang in pwunod in jampah apel ipwilki pai in jampah nehn arai mour, kahrehda arai joh kak kihda wahrai. <sup>23</sup> Liporrohk ma koapda nehn pwirej mwehuwo ioar kajalehda mohngiongin iraihok ma rong apel woahwoahkihla padahk mehlello, doar uhwahda dir pehn epwi min epwiki, epwi weneijek, a epwi jilihjek.”

#### *Karajraj in Dipwdipw*

<sup>24</sup> Jesus pwehng irai apas karajraj: “Wein nehnloanng doahroar jounkamwoaroa men ma kamwroahdi ah liporrohk mwehu nehn ah mwoaswello. <sup>25</sup> Oau pwong armaj ohroj moair, ah imwinski indoa kamwroahdi suhkoa dipwdippwi nehn pwungen suhkoahn pilahwa. <sup>26</sup> Anjoauwo ma suhkoahk sapda koap pwa en uhwa, dipwdippwok pel koapda. <sup>27</sup> Nihn woal nah liduhwok indoa pwehng ih, ‘Maing, jaudi liporro mwehupwi koawoa kamwroahdi nehn oamw mwoaswello? Ia injang dipwdipw pwiai?’ <sup>28</sup> Jounmwoaswello pwehng irai, ‘Imwinski men ioar wia men.’ Irai idoak, ‘Kamain inla wijdahjang dipwdippwok?’ <sup>29</sup> Ih japoang, ‘Joa, kamwai nen pel koauwehla suhkoa mwehuwok. <sup>30</sup> Mweidoahng ohroj en koapda lel anjoau in doddol. A ngoahi kapwa pwehng joundoddol kan irai en kasohrohr jang dipwdipw kan irai pwidengihla a min mwehu kan irai en kioang nehn oai johkohu.’”

#### *Karajraj in Liporrohn Mustard*

<sup>31</sup> Jesus pwehng irai apas karajraj: “Wein nehnloanng doahroar liporrohn mustard oau poaddi nehn ah mwoaswello. <sup>32</sup> Me ioar liporrohwma keiou siksik jang liporro ohroj, a koapda wiahla suhkoahwa keiou koalik nehn mwoaswello, nehn ah ne wiahla suhkoa koalik pas, mahn kan kin sangdo, koammoaldi pohn rah kan.”

#### *Karajraj in Ihs*

<sup>33</sup> Jesus pwehng irai apas karajraj: “Wein nehnloanng doahroar me. Lihmen oaloa ihs kij doaloahkihda pilahwa koalik kij. Pilahwahu ken pwoaida.”

#### *Doahr en Jesus Doadoahkki Karajraj*

<sup>34</sup> Anjoau ohroj Jesus kin doadoahkki karajraj doahr me oang pokonnok; Ih johkin sikesik oang irai joah doadoahkki karajraj. <sup>35</sup> Me kapwaihahda kokohppo jang joukohppo ma pwa:

“Ngoahi pirin doadoahkki karajraj nehn oai pirin sikesik oang irai.

Ngoahi pirin kajalehng irai joang kan ma johpwa janjal jang anjoauwo jampah wiawiha.”

#### *Jesus Kawaahwoahda Karajraj in Dipwdipw*

<sup>36</sup> Anjoauwo Jesus injang pokonno, inla dilda nehn ummwoau. Nah sohnpadahkkok sohdo ipoa pwehng Ih, "Maing, kawoahwoahng kamai karajrajin dipwdippwok nehn mwoaswello."

<sup>37</sup> Ih japoang irai, "**Woallo ma poadokdi liporro mwehuwo ioar Nihn-Armaj.**" <sup>38</sup> Mwoaswello ioar jampah; a liporro mwehuwok ioar armaj ma sohn Weiho; dipwdippwok ioar armaj koa ma nihn Jehsen; <sup>39</sup> a imwinsihsih ma poadokdi dipwdippwok ioar Jehsen. Anjoau in doddol wehn suhkoahu ioar imwin jampah, a joundoddollok ioar sohnloannngok. <sup>40</sup> Doahroar dipwdippwok kasohrohrla apel jirepla, ioar doahr da pirin wiawi imwin jampah. <sup>41</sup> Nihn-Armaj, pirin kadarla nah sohnloannngok, pwa en kihpene irai ohroj jang nehn Ah Weiho ma kin kahrehng armaj nehn dihp apel ohroj ma kin wia me nauna kan, <sup>42</sup> irai pirin kerpiwhla irai nehn oai pwidenngo, wijahu ma irai pirin joangjoangoang apel keikeikeisakai. <sup>43</sup> A irai kan ma pwung pirin lingla doahroar joauwo nehn Wein Jamaraiho. Armaj men ma mine sioa, en rong!

*Karajrajin Pai Kajampwallo ma Oakkoakla*

<sup>44</sup> "Wein nehnloanng doahroar me. Woal men kidalda pai kajampwaloau ma oakkoakla nehn japwoau. Nehn ah kidalda, ih pel pwuroahng jaripdi nehn pwirejjo ih ken perenda inla noaskihla ah koapwoa ohroj, ih jahalla dupukda jappwo.

*Karajrajin Sakain nehn Pwaihaoau*

<sup>45</sup> "Pel oau, Wein nehnloanng doahroar me. Woal men roaproapoan sakain nehn pwai ling. <sup>46</sup> Nehn ah kidalda oau ma inenin ling, ih noaskihla me ohroj ih anki ih dupukkihda sakaiho.

*Karajrajin Nehkko*

<sup>47</sup> "Pel oau, Wein nehnloanng doahroar me. Nehk in loakjid-doau ma jojohdi nehn jeddo pwa en koldi joangoan mwumuw ohroj. <sup>48</sup> Anjoauwo ma nehkko ne dir, irai warahkihdahla poahrinjeddo, mwindi, nehkpijang mwummwok. Mwumuw mwehuwok, irai kioang nehn arai pwukohk, a min naunahk kerpiwhela. <sup>49</sup> Me ioar pirin doahroar imwin jampah. Sohnloannngok pirin indoa kasohrohrihpijoang armaj naunahk jang ipen armaj mwehuwok, <sup>50</sup> kerpiwhla armaj naunahk nehn oaiho, wijahu ma irai pirin joangjoangoang apel keikeikeisakai.

<sup>51</sup> "Kamwai woahwoahki mehpwiak?"

"Eh," irai japoang, "kamai woahwoahki."

<sup>52</sup> Ih pel pwehng irai, "**Jounpadahk in kojonneddoh ohroj ma ne wiahla sohnpadahk in Wein nehnloanng, doahroar armaj men ma kihjang nehn ah johkohu me kapw apel me dehn.**"

*Jesus Johla Kenken Nehr Nazareth*

<sup>53</sup> Anjoauwo ma Jesus ne doari Ah siksikoahng irai karajrajpwiai, Ih injang wijahu. <sup>54</sup> Ih jahallahng uhdahn Ah wijahu. Nehn Ah padpadahk nehn jinakoke, ohroj ma rong Ih inenin pwuriamweikihla. Irai idoak, "Ia Ih kihjang Ah loalkoang apel manman? <sup>55</sup> Jaudi Ih ioar nihn daiksanno jermweinwa me? Jaudi Mary ioar Ah nohnohwa,

jaudi riah woalkoa James, Joseph, Simon, apel Judas? <sup>56</sup> Jaudi riah lihkan ohroj ma kin pel koaujoan ipasai? Ia Ih kihjang mehpwiak?”  
<sup>57</sup> Doari, irai ken johla nimen kamehlele Ih.

Jesus pwehng irai, “**Joukohp men kin woaun wija ohroj, a jaudi nehn pein ah wija apel nehn ah peneinei.**” <sup>58</sup> Doari Ih wia manman jipidpwihaar wijahu pwa jang in irai joah pwojon.

## 14

### *Mehdihn John jounpoapdaij*

<sup>1</sup> Anjoauwo ma Herod Antipas koaunin Galilee rongda doahr Jesus, <sup>2</sup> ih pwehng nah papahk, “Me uhdahn John jounpoapdaij ne pwuroahng mourda. Ioar kahrehda ih kak wia joangoan manman pwiaik.”

<sup>3</sup> Pwa Herod ne koldi John jounpoapdaij, piroahpene, kioang ih nehn kalpwuhj, ih wia me oang Herodias, pahien riau Philip. <sup>4</sup> Pwa John kin pwehng Herod, “Johpwa pwung koawoa en painkihla Herodias!”  
<sup>5</sup> Herod uhdahn nimen kojukdi John, a ih mijik mihn Jew pwa irai kin wiahki John joukohp men.

<sup>6</sup> Rehnin en Herod noaisikdiho nihn Herodias jerpeinno uhda, kahkahlek mwohn pokonno. Herod inenin malaukihda, <sup>7</sup> ih inoaukihdi apel kahukihoang jerpeinno, “Ngoahi pirin kioang koawoa me ohroj ma koawoa poaki.”

<sup>8</sup> Jang in kaweid in ah nohnu, jerpeinno poaki Herod, “Kihdoahng ngoahi wijahkije apel apkas moangoan John jounpoapdaij nehn oau pileis en!”

<sup>9</sup> Nahmwarkiho injinjuwedkihla, a jang in kahula apel inoau ma ih wiahda mwohn sohn kamdippwo ohroj, ih pwa en jerpeinno poakpoakko en pwoaida. <sup>10</sup> Moangoan John ken poalpoaljang nehn kalpwuhjjo. <sup>11</sup> Moangoan John wijkdo nehn pileis oau, liklikkoang jerpeinno; ih uhda wahlahng ah nohnu. <sup>12</sup> Nihn John sohnpadahkkok indoa oaloa palwoaroa wahla jaripdi; Irai ken inla pwehng Jesus.

### *Jesus Kamwinge Woal Limekid*

<sup>13</sup> Nen en Jesus rongda rongin John, Ih inla jang wijahu, Ih pwilihda pohs pas, jeilahng kalahpwukla wija kij. Armajjok rongda me, irai injang nehn ahr koaujoannok wud nehn japw kaujla Ih. <sup>14</sup> Nen en Jesus doaudihjang pohn pohsso, Ih kapangda pokon koalik oau, nen kapehdin ipwilkihda irai, Ih kemwehuwihla armaj johmwehuwok iparai.

<sup>15</sup> Injoausik pene Nah sohnpadahkkok indoa ipoa pwehng Ih, “Maing, ne rospene, a wija kije japwsoahn oau. Kadarla pokonno pwa irai en kak inla nehn kahnihmw dupukda kanrai mwinge.”

<sup>16</sup> A Jesus japoang irai, “**Irai johpwa anahne inla. Kamwai pein kamwinge irai.**”

<sup>17</sup> Irai pwehng Ih, “Mehwahr mine ipamai, lopwonin pilahwa limoau apel mwumuw roahmen.”

<sup>18</sup> Jesus pwehng irai, “**Wahdo oang Ngoahi.**” <sup>19</sup> Ih pwehng pokonno en mwindi pohn mohk. Ih oaloa lopwonin pilahwa limoau apel mwumuw roahmen, jardahla nehnloannge, kapingkalahngan oang Koahs, sipwangpijang pilahwa, kioang Nah sohnpadahkkok,

sohnpadahkkok wud nehkkoang pokonno. <sup>20</sup> Armaj ohroj mwinge oaroh moadla, sohnpadahkkok dowihda luhwen mwinge wiahda kiam ejek riau. <sup>21</sup> Dirin woal ma pwili mwinge, woal limekid, li apel jeri johpwa pwili wadwaddoang.

### *Jesus Alu Pohn Jed*

<sup>22</sup> Jesus pwehng Nah sohnpadahkkok arai en doauda pohn pohs oau jeila oaloap jeddo, pwa Ih en kadarpijoang pokonno. <sup>23</sup> Mwerin Ah kadarpijoang armajjok, Ih indahla kalahpwukla pohn dol oau, pwa en kapkap. Ih minmine wijahu kalahpwuk oaroh rospene. <sup>24</sup> Ioar anjoauwo ma pohsso ne dohla mine nehn pwungen lehu okdekkihjili nohk pwa enngo sihkei koaldohng pohsso.

<sup>25</sup> Nehr pwungen kiloak jiluh apel wonou injohrehn, Jesus inla iparai, alu pohn lehu. <sup>26</sup> Nehr en sohnpadahkkok kapang Ih alu pohn lehu, irai inenin majpwehkda. “Eni men!” Irai pwa apel rahrahuki arai majpwehk.

<sup>27</sup> Jesus pispisinnoar lallahng irai, **“Kamwai sihkei!”** Ih pwa, **“Ngoahi me, kamwai joah majpwehk.”**

<sup>28</sup> A Peter pwehnglahng ih, “Maing, amai Koau, ma uhdahn koawoa men, pwehng ngoahi en alwe ipoamw, alu pohn jed.”

<sup>29</sup> **“Koa, indoa,”** Jesus pwehng ih. Doar Peter kerdihjang pohn pohsso, alu pohn jeddo inla ipen Jesus. <sup>30</sup> A nehn ah poahmda sihkeilahn enngo, ih majpwehkda, sapda pwuhpwuhrdi. Ih pwa, “Maing, Doaroahla ngoahi!”

<sup>31</sup> Anjoauwohr Jesus pukla, koldi ih, pwehng ih, **“Amwda oamw pwojon ke siksik! Amwda koawoa ke joh kamehlele?”**

<sup>32</sup> Ara doaudahng pohn pohsso, a enngo uhdi. <sup>33</sup> Sohnpadahkkok pohn pohsso pwongi Jesus, pwehng Ih, “Mehlel oar pwa koawoa uhdahn Nihn Koahs!”

### *Jesus Kemwehuwlha Armaj Johmwehuwok nehn Gennesaret*

<sup>34</sup> Irai kosehla lehu lellahng japw wijahkij oadoa Gennesaret. <sup>35</sup> Nehr en armaj in wijahu kidalda Jesus, irai ken iloaklahng armaj johmwehuwok in wijahu apel wija koaroannok ohroj en wijkdohng ipen Jesus. <sup>36</sup> Irai poaki Ih en mweidoahng armaj johmwehuwok en pukkoang ikin Ah likkoauwo; doar ohroj ma pukkoang kin sihkeida.

## 15

### *Padahk in mihn Mehjrok*

<sup>1</sup> Pharisee pwi apel jounpadahk in Kojonnepwi indoa jang Jerusalem indoa ipen Jesus, idoak oang Ih, <sup>2</sup> “Amwda nihmw sohn-padahkkok kin joah kapwaihahda asai siakh koadoaudioaudo jang jamasai mihn mehjrok? Irai joh kin amwunla poahrai mwohn arai mwinge!”

<sup>3</sup> Jesus japoang, **“A amwda kamwai ke japeik oang kojonned in Koahs nehn amwai kin pein daur amwai padahk kan?** <sup>4</sup> Pwa Koahs pwa, ‘Woaunki joamoamw apel inoamw, a ma armaj men lahlahwe jamah ke inah, en kojkojdi.’ <sup>5</sup> A kamwai kin padahki, ma armaj men ma anki mehkij ma ih kak jeuweje ki jamah ke inah, a ih pwa, ‘Me en Koahs,’ <sup>6</sup> Irai johpwa anahne woaunki jamarai, ioar doar amwai kin mwamwahlki lal in Koahs, pwa

**kamwai en daur pein amwai padahk kan.** <sup>7</sup> Mwalaunpw  
kamwai! Mehlel oar pwa uhdahn pwung oang kamwai dahkij  
joukohp Isaiah ne kohpda oang kamwai nehn ah pwa,

**8 'Koahs pwa, armaj pwiai kin woaunki Ngoahi jang in arai lal  
a mohngiongirai inenin dohjang Ngoahi.**

**9 Johpwa kaspoan ahr kin joarwi oang Ngoahi,  
pwa irai kin padahki kojonned in armaj, a irai karaunki pwa  
en Koahs Kojonned.'**"

*Da ma kin kajaminihla armaj*

**10** Doar Jesus ken pangindo pokonno Ipoa, pwehng irai, "Kamwai rong apel woahwoahki mwehu me: <sup>11</sup> Johpwa mehkij ma kin aluhwoang nehn oawoan armaj ma kin kajaminihla armaj, pwa me ma kin injang nehn oawoa."

**12** Doar sohnpadahkkok indoa Ipoa pwa, "Koawoa kidal pwa Pharissee-ok lioaski dahkij ma Koawoa pwahla?"

**13** Jesus japoang, "Suhkoa ohroj ma Joamoaiho nehnloanng  
johpwa poadokdi nen wijwidahjang, <sup>14</sup> joah injinohki irai!  
Jounkaweid majkunpwi arai. Doar ma armaj majkun men  
kahlwa emen armaj majkun ara nen kipdihoang nehn lippwo."

**15** Peter pwehnglahng Ih, "Kawoahwoahda woahwoahn karajraj pasen."

**16** Jesus japoang irai, "Kamwai kahjik oar loalkoangla, doahr  
iraihok ma joaloalkoang? <sup>17</sup> Kamwai johpwa woahwoahki?  
Mehkij ma koawoa kangla indihla nehn kapehdimwen kin pel  
injang nehn palwoaroamwen. <sup>18</sup> A me ma injang nehn oawoa,  
kin sapda jang nehn mohngiong, ioar kin kajaminihla armaj.

**19** Lamlam nauna kin injang nehn mohngiong, ioar kin kahrelda,  
kojarmaj, kamwahl, nene, pirap, likamw, pel karaun mwahl.

**20** **Mehpwiai ioar kin kajaminihla armaj. A jaudi mwinge johpwa  
amwumwla!"**

*En Lihmen Ah Pwojon*

**21** Jesus injang wijahu inla wija kij ipen kahnihmw in Tyre apel Sidon.

**22** Lihn Canaan men, ma kin koaukoaujoan wijahu, indoa ipoa, ngil  
koalik poangoanglahng Ih, "Maing, koawoa ma nihn David, kadek  
oang ngoahi! Noai jerpein men mine ma ngen jaus ne dilingla; ih kin  
minmire nehn apwal koalik."

**23** A Jesus johpwa pwahla lal oau oang ih. Nah sohnpadahkkok sohla  
Ipoa, engdehn poaki Ih, "Kadarla lihen! Ih kadroapwoa kisai ki ah  
poakpoak en."

**24** A Jesus japoang liho, "Ngoahi, koadoaddoardoohng ipen jihpw  
joaloangla in mihn Israel oar doari."

**25** A liho sohla ipoa dairukdihoang in pwoalkoa, "Maing, jeuveje  
ngoahi!"

**26** Jesus japoang, "Johpwa pwung en kihjang kenen jerihkan  
mwinge peidlahng doahk kan."

**27** "Mehlel, Maing," liho japoang, "a doahk kan kin pel kang  
mwoarmwoarin mwinge kan ma mwoardi pehn en laplappok sehpil."

**28** Doar Jesus ken japoang ih, “**Koawoa lihmen ma anki pwojon inenin koalik! Dahkij ma koawoa poaki nen pwoaihoang koawoa.**” Nehn anjoauwohr nah jerpeinno mwehuda.

### *Jesus Kemwehuwihla Armaj Dihrdir*

**29** Jesus injang wijahu, alu paianla poahrinjedin Galilee. Ih doauda pohn dol oau mwindi. **30** Pokon koalik oau indoa Ipoa, wahdohng Ih armaj mwoasor, armaj majkun, armaj dangpel, armaj loahsoang, apel dir ma anki joangjoangoan kahpwal in palwahr, irai wahdo kihdi ipen ehn Jesus. Ih kemwehuwihla ohroj. **31** Pokonno pwuriamweikihla ahr kapangda doahr armaj loahsoanngok kakla lallal, armaj dangpellok mwehula, armaj mwoasorrok ne kakla alu, apel araihok ma majkun ne kapangda wija. Irai kapngahki Koahs in Israel.

### *Jesus Kamwinge Armaj Pahkid*

**32** Jesus panginpene nah sohnpadahkkok ipoa Ih pwehng irai, “**Ngoahi ipwilkihda armaj pwiai pwa irai minminehki Ipoai rehn jiluh, doar ne pel rojla kanrai mwinge. Ngoahi johpwa nimen kadarpijoang irai nen irai johpwa mwinge, pwadoar irai mwehlehhila nehn allok.**”

**33** Sohnpadahkkok idoakkoang Ih, “A ia wija kamai kak kihjang mwinge nehn japwoahnoauwe ma en isar oang pokonnoauwe?”

**34** Jesus idoak oang irai, “**Lopwon in pilahwa doapoa mine ipamwai?**”

Irai japoang, “Lopwon ijuh, apel mwumuw siksik jipidpwi.”

**35** Jesus pwehng pokonno en mwindi pohn pwirej. **36** Doar ih oaloa lopwon ijuhwo pwilihki mwummwok, kapingkalahnganki oang Koahs, sipwangpijang, kioang nah sohnpadahkkok, sohnpadahkkok wud nehk oang pokonno. **37** Irai ohroj mwinge oaroh moad. Sohnpadahkkok rikda luhwen mwingehek wiahda kiam ijuh. **38** Dirin irai ma pwili mwinge rehnno, woal pahkid, li apel jeri jehpwili waddoang.

**39** Doar Jesus kadar pijoang armajjok, Ih doauda pohn pohs pas, jeilahng ipen koaujoan in Magadan.

## 16

### *Koaunnok pwehng Ih en Wiahda oau Kilel Manman*

**1** Pharisee-pwi apel Sadducee-pwi indoa ipen Jesus pwa irai en lidipihdi Ih, ioar kahreha irai pwehng Ih en wiahng irai oau manman jang nehnloanng. **2** A Jesus japoang, “**Nen en joauwo kin duhla, kamwai kin pwa, ‘Lakapw nen mwehu pwa mijen loannge Wahssa.’** **3** A Inminjoang kamwai kin pwa, ‘Rehnnoauwe pirin wud, pwa mijen loannge wahssa apel soal.’ Kamwai kak kajawihda iren anjoau jang nen amwai kin kapang mijen loannge, a kamwai joh kak kajawihda kilellok doahr anjoau pwiai! **4** Ia woahr nauna apel rosros in armaj in anjoau kije!” Ih pel pwa, “Kamwai poaki manman oau jang Ipoai a manman wahr Ngoahi nen kioang kamwai ioar manman in Jonah.”

Doar Jesus ken injang irai inla ekij wija.

### *Ihs in Pharisee apel Sadducee-ok*

5 Nehr en sohnpadahkkok jeila lel oaloap jeddo, irai moalkoahla wahda pilahwa. <sup>6</sup> Jesus pwehng irai, **“Kamwai mwajahn apel kalikdihjang ihs in Pharisee apel Sadducee-ok.”**

<sup>7</sup> Irai sapda siksikoahpene nehn pwungarai, “Ih pwa me, pwa kisai johpwa wijk pilahwa.”

<sup>8</sup> Jesus kidal da irai pwahpwahpwa, ioar Ih idoakki iparai, **“Dahkij kamwai siksikoa pene nen pwungamwai pwa joh pilahwa ipamwai? Amwai pwojon inenin siksik! <sup>9</sup> Kamwai kahjikkaoar woahwoahkihla? Kamwai johpwa lemleme lopwon in pilahwa limoauwo ma Ngoahi kamwingehkihla armaj limekiddo? Kiam doapoa kamwai audohda? <sup>10</sup> A lopwon in pilahwa ijuhwo oang armaj pahkiddo? Kiam doapoa kamwai audohda? <sup>11</sup> Amwda kamwai ke johpwa woahwoahki pwa audi pilahwa ma Ngoahi pwahpwahpwa? Kamwai kalkehjang kamwai ihs in Pharisee apel Sadducee-ok.”**

<sup>12</sup> Doari, sohnpadahkkok ken woahwoahkihda pwa audi ihs in nehn pilahwa ma irai en kalkehjang irai, a padahk in Pharissee apel Sadducee-ok.

*En Peter Kadehde doahr Jesus*

<sup>13</sup> Jesus inlahng wijahkij ipen kahnihmw Caesarea Philippi, wijahu Ih idoak oang nah sohnpadahkkok, **“Inje ma armaj kan kin pwahki doahr Nihn-Armaj?”**

<sup>14</sup> Irai japoang, “Epwi kin pwa John jounpoapdaij, a epwi pwa Elijah, apel epwi pwa Jeremiah ke emen in joukohppok.”

<sup>15</sup> A Jesus pel idoak iparai, **“Inje kamwai kin pwahki Ngoahi?”**

<sup>16</sup> Simon Peter japoang, “Koawoa ioar Messiah, Nihn Koahs mourro.”

<sup>17</sup> Jesus japoang, **“Meid pai koawoa, Simon nihn John, pwa jaudi armaj ma kajalehng koawoa mehlel oauwe. Pwa Joamoai ma minmire nehnloanng. <sup>18</sup> Doari, apkas Ngoahi pwehng koawoa, pwa koawoa Peter, paip koalik oau, pohn paip koalikkoauwe Ngoahi pirin kouda oai mwomwohdjo. Doar mehdi johpwa pirin kak kalwehdi. <sup>19</sup> Ngoahi pirin kioang koawoa kihkan in Wein nehnloanng. Me ohroj ma koawoa kainoapwihdi nehn jampah pirin pel kainoapwdi nehnloanng, apel me ohroj ma koawoa mweidda nehn jampah pirin pel mweimweida nehnloanng.”**

<sup>20</sup> Doar Jesus pwehng nah sohnpadahkkok, irai en johpwa pwehng emen, pwa Ih ioar ma Messiah.

*Jesus sikoa Ah Pirin Koaloklok apel Mehdi*

<sup>21</sup> Jang anjoauwo inla Jesus sapda sikoa in janjal oang nah sohnpadahkkok, “Ngoahi uhdahn pirin inla Jerusalem, oaloa loklok koalik jang ipen jourmajjok, jamwrou laplappok, apel jounpadahk in Kojonneddok. Ngoahi pirin kojkojdi, a mwerin rehn jiluh, Ngoahi pirin iejda.”

<sup>22</sup> Peter kalahpwukihla Jesus sapda koapwung oang ih, “Maing oai Koaun, Koahs kainoapwi joanngoauwe,” ih pwa. “Me uhdahn johpwa pirin wiawihoang koawoa!”

<sup>23</sup> Jesus pwurlahng Peter pwehng ih, **“Alwe jang Ngoahi, Jehsen! Koawoa lidip keper oau oang Ngoahi, pwa oamw lamlam jaudi jang ipen Koahs, a jang ipen armaj.”**

<sup>24</sup> Doari Jesus pwehng nah sohnpadahkkok, “**Ma emen in kamwai nimen indoa pwili Ngoahi, en uhdaahn moalkoahla pein ih, wahda ah lohpwu, pwilihla Ngoahi.** <sup>25</sup> Pwa emen ma nimen doaroahla ah mour ih pirin luhj jang; a emen ma sohnmesekihla ah mour ki Ngoahi, ih pirin mourla. <sup>26</sup> Pirin mine kaspoan oamw en wihnkihda jampah pwon, a luhj jang oamw mour? Joh douluhl, joh mehkij koawoa kak kihda pwa en japahl oang oamw mour. <sup>27</sup> Pwa Nihn-Armaj, pirin indoa nehn ling in Jamahu pwili nah sohnloanngok, pwa en dupukkoang emenenem armaj jang in ah wihiwiahk. <sup>28</sup> Ngoahi pwehng kamwai in mehlel, pwa epwi kamwai ma mine me nen joah mehdi oaroh irai nen kapang Nihn-Armaj pirin indoa doahr Nahmwarki men.”

## 17

### *Jesus Wikla Palwoaroa*

<sup>1</sup> Mwerin rehn wonou Jesus ukda Peter apel riariho, James apel John, ukdahla pohn dol illoahioau pwa irai en kalahpwukla. <sup>2</sup> Nehn irai kapkapang, palwoaroan Jesus wikla, mijoa dakda doahr joauwo, apel Ah likkoauwo inenin korohrohla. <sup>3</sup> Sohnpadahk jilmenco pel kapangda Moses apel Elijah siksikesik oang Jesus. <sup>4</sup> Peter pwehng Jesus, “Oai Koaun, inenin mwehu asai minmine me! Ma koawoa mwehuki, ngoahi en kouda umpwal jiluh wija kije, oau umwoamw, oau umwen Moses, apel oau umwen Elijah.”

<sup>5</sup> Nehn anjoauwo ih pwahpwahpwa me, koasoau maram oau pwaindi irai, a ngilloau indihdo jang nehn koasoauwo ma pwa, “Me ioar Noai jermwein kajampwalwa ma Ngoahi kin ipwilki, kamwai rong Ih!”

<sup>6</sup> Nehn en sohnpadahkkok rongda ngillo, irai inenin majpwehkda, ioar kahrehda arai rukdi lel pohn pwirej. <sup>7</sup> Jesus indoa pukkoang irai, Ih pwa, “**Kamwai uhda, kamwai joah mijik!**” <sup>8</sup> Nehn irai jarda, joh armaj irai kapang, Jesus kalahpwuk.

<sup>9</sup> Nehn irai indihdohjang pohn dollo, Jesus inoapwihdi irai en, “**Joh-pwa pwehng emen doahr mwoakiddoauwe ma kamwai kapang oaroh Nihn-Armaj en iejda jang mehdi.**” <sup>10</sup> Sohnpadahkkok idoak oang Jesus, “Amwda jounpadahk in Kojonneddok pwa Elijah uhdahn pirin sapin indoa?”

<sup>11</sup> Jesus japoang, “**Mehlel, Elijah uhdahn pirin sapin indoa pwa en koaunopda me ohroj.**” <sup>12</sup> A Ngoahi pwehng kamwai, Elijah ne indoa, a armaj kan johpwa kidal ih, doar irai wia mwahlki apel wiahng ih injenarai. Nen doahr irai pirin wiahng Nihn-Armaj, ma pirin pel oaloa koaloklok jang iparai.”

<sup>13</sup> Sohnpadahkkok woahwoahkihda pwa Ih pwehpwehpwehng irai doahr John jounpoapdaij.

### *Jesus Kemwehuwihla Jermwein Men Ngen Nauna Mine Ipoa*

<sup>14</sup> Anjoauwo irai lellahng ipen pokonno, woalmen indoa ipen Jesus, poadpwomwla mwohn Ih, <sup>15</sup> Ih pwa, “Maing, jeuweje noai jermweinno, pwa ih kin johmwehu roarroar koalik ma kin lelloang ih, kapkihdihoang nehn oai ke nehn pil pehn dir. <sup>16</sup> Ngoahi wahdohng ih ipen nihmw sohnpadahkkok, a irai johkak kemwehuwihla ih.”

<sup>17</sup> Jesus japoang, “**Kamwai inenin joah pwojon apel japwung! Ia woaroai in oai pirin minmine ipamwai? Ia woaroai in oai pirin kanangmahng kamwai? Wahdo jermweinnen IPOAI!**” <sup>18</sup> Doar Jesus ruwoj ngen jausso en diljang nehn jermweinno, ngen jausso ken diljang. Anjoauwohr jermweinno mwehula.

<sup>19</sup> Sohnpadahkkok kalahpwukla ipen Jesus idoak oang Ih, “Amwda kamai ke johkak kaujjang ngen jausso ipen jermweinno?”

<sup>20</sup> Jesus japoang irai, “**Pwa amwai pwojon johpwa isar. Ngoahi lal mehlel oang kamwai, ma amwai pwojon inenin sihksik woahroar liporrohn mustard oau, kamwai kak pwehng dollo, ‘mwoakid jang men mwoakidla o!’ ih nen mwoakid. Kamwai nen kak wia me ohroj.** <sup>21</sup> [A joangoan ngen jaus oauwe joh mehkij koawoa kak kaujkihjang ioarroar kapkap apel kaijihjol.]”

*Jesus Pwuroahng Sikoa doahr Ah Pirin Mehdi*

<sup>22</sup> Sohnpadahkkok ohroj pokonpene Galilee, Jesus pwehng irai, “**Nihn-Armaj pirin ken likliklahng ipen armaj kan; <sup>23</sup> ma pirin kojukdi Ih, a rehn jiluh mwerin Ih pirin iejda.**”

Sohnpadahkkok inenin injinjuwedla.

*Jesus Kihda Ah Daksis oang Umw Joarwiho*

<sup>24</sup> Nehr en Jesus apel nah sohnpadahkkok lel Capernaum, jounrik daksis in Umw Joarwiho indoa idoak oang Peter, “Imdoahr, amwai jounpadahk en kin pwili dupuk daksis in Umw Joarwi?”

<sup>25</sup> “Eh, ih kin pwili dupuk.” Peter japoang.

Nehr en Peter inla nehn ummw, Jesus ken pispis oar pwehnglahng, “**Simon, Da oamw lamlam oang irairroauwe? Inje kin nohpwei ke dupuk daksis oang Nahmwarkihm jampahioauwe? Jang ipen nah armaj kan ke jang ipen mihn likin kan?**”

<sup>26</sup> “Jang ipen mihn likin kan,” Peter japoang.

“**Doari,**” Jesus pwa, “**Sowoa mehlel in weaho kin jehpwili dupuk daksis.** <sup>27</sup> A, kisai joah nimen kalioasihda sohn rik daksis pwiai, Doar indihwe nehn jeddo, peiddihwe nihmw ohn. Keioun mwumw ma koawoa oapihda, Kihpijoang oawoan mwummwo, koawoa nen kapangda mwani isar oang dupukla asa daksis.”

## 18

*Inje ma Keiou Laplap nehn Wein Koahs*

<sup>1</sup> Nehr anjoauwo sohnpadahkkok indoa ipen Jesus idoak, “Inje ma keiou laplap nehn Wein nehnloanng?”

<sup>2</sup> Doar Jesus pangindo jeri siksik men kihdi nehn pwung irai. <sup>3</sup> Ih pwa, “**Ngoahi pwehng kamwai in mehlel, pwa ma kamwai johpwa wikla doahroarla jeri, kamwai nen johkak dilda nehn Wein nehnloanng.** <sup>4</sup> Pwa emen ma kin aksiksikla doahrla jeri siksik mene ih pirin keiou laplap nehn Wein nehnloanng. <sup>5</sup> Apel emen ma kin kajamwo jeri siksik men doahre in oadoaioa ih kin kajamwo ngoahi.

*Kahrehioang Nehr Dihp*

<sup>6</sup> “Ma emen ma kahrehng en emen jeri siksik pwiai ma kamehlele Ngoahi en johla ahr pwojon, mwehu oang en pirapir-roang oau sakai koalikko in sipinwoaroa, pwa en sikmehula. <sup>7</sup> Ia woahr nauna in oang jampah mihn koauwehla pwiai ma pirin kahrechioang emen en kerpiwhla ah pwojon! A joah, joang pwiai pirin pwen mine anjoau ohroj, a ia woahr nauna in oang armaj meno ma mehpwiai sapdahjang ipoa!

<sup>8</sup> “Ma oaloap poahmmwen ke oaloap ehmmwen kahrehng koawoa nehn dihp, poaloahjang, kerpiwhla! Pwa nen mwehu-woang koawoa en dilloang nehn mour joahsukko, ki oaloappoar poahmmwen ke oaloappoar ehmmwen jang poah riau ke eh riau kerpiheklahng nehn oaiho ma johkin kunla. <sup>9</sup> A ma oaloap pwoaroan mioammwen kin kahrehng koawoa nehn dihp, roahkjang, kerpiwhwehjang koawoa! Mwehu ma koawoa loapin pwoaroan maj dilda nen mour joahsuk jang pwoaroan maj riau a kerpiheklahng nehn oai in nehn ehl.

#### *Karajraj in Jihpw ma Joaloangla*

<sup>10</sup> “Kamwai Kanaahoahng pwa kamwai en johpwa mwamwahlki emen siksik pwiai. Kamwai en kidal pwa arai sohnloang kin mine ipen Joamoaiho nehnloanne anjoau ohroj. <sup>11</sup> [Pwa Nihn-Armaj indoahng koamoaurla irai kan ma ne joaloangla.]

<sup>12</sup> “Da kamwai lemleme? Ma armaj men nainki jihpw epwiki, emen arai joaloangla, ih joh nen kihdi jihpw duweijek dohmenno arai en mwingmwingejhili pohn nahna, a ih inla rapahki jihpw joaloanglahu? <sup>13</sup> A ma ih kapangda, Ngoahi pwehng kamwai in mehlel, pwa ih nen uhdahn perenki jihpw meno jang jihpw duweijek dohmenno ma johpwa joaloangla. <sup>14</sup> Ioar nen doahr Jamamwaiho nehnloanne, ih johpwa mwehuki emen siksik pwiai en joaloangla.

#### *Rioamw Men Ma Wia Dihp*

<sup>15</sup> “Ma rioamw men wiahda dihp oang koawoa, inla ipoa, kajalehioang dipoahu. A me en wiawi in rir. Ma ih rong koawoa, a koawoa ne kajpahlido rioammwo. <sup>16</sup> A ma ih joah koawoa, a emen ke roahmen armaj en pwilihda koawoa, pwa ara roahmenno en wia kadehdehn joang ohroj ma doahr da ma Puk Joarwi pwa. <sup>17</sup> A ma ih pel johpwa nimen rong irai, a koawoa lelki mwomwohdjo. A ma ih pel johpwa nimen rong mwomwohdjo, a wiahkhla ih mihn likin men ke jounrik daksis men.

#### *Manman in Joalihdi apel Lapwadda*

<sup>18</sup> “Ngoahi pwehng kamwai in mehlel, pwa me ohroj ma kamwai joalihdi nehn jampah, a nen pel joaldi nehnloanne; a me ohroj ma kamwai lapwadda nehn jampah, a nen pel lapwda nehnloanne.

<sup>19</sup> “Apel Ngoahi pwehng kamwai in mehlel, ma roahmen ipamwai nehn jampah minminkihpene ara kapkap, poaki mehkij, ih uhdahn pirin pwoaidahng ara jang ipen Joamoaiho nehnloanne. <sup>20</sup> Pwa wijahkij ma roahmen ke jilmen pokon pene in oadoaioa, Ngoahi kin pwili irai mine wijahu.”

*Karajraj in Papah Joampoaak*

<sup>21</sup> Peter sohdo ipen Jesus pwehng Ih, “Maing oai Koaun, pehn doapoa ngoahi en mahkoahng rioaiho ma kin wia dihp oang ngoahi? Isar ma ngoahi mahkoahng ih pehn ijuh?”

<sup>22</sup> A Jesus japoang, Ih pwa, “**Johpwa isar pehn ijuh, a pehn ijuh wad ijihjek.** <sup>23</sup> **Pwa Wein nehnloannge doahroar nahmwarki men ma lemehma en wia koapwung in pwaipwanid oang nah papahk.** <sup>24</sup> Nen ah sapda wia koapwunngo, a emen irai wijik-dohng ipoa, ma pwaipwanidki doahloa milienpwi. <sup>25</sup> **Papahu johpwa nainki mwani isar in dupukla ah pwaipwaniddo, doar nahmwarkiho pwa ih en noasla, doahroar lidu men, pwilihki-hoar pahioa, nah jerihok, apel ah koapwoa ohroj pwa en kak dupukla ah pwaipwaniddo.** <sup>26</sup> **Papahu ken poadpwomwla mwohn nahmwarkiho, ‘Maing, koawoa en menlau mahkoahng ngoahi, koawoa en kanangmahng ngoahi, pwa ngoahi pirin dupukkoang koawoa me ohroj.’** <sup>27</sup> **Nahmwarkiho ken ipwilikhda ih apel mahkoahng ih ki ah pwaipwaniddo doar ken mweidoahng ih en inla.**

<sup>28</sup> “Mwerin a injang wijahu, ih suhwoang emen pwilihoa papah ma pwaipwanidki oang ih doahloa jipidpwi, ih jipoardi, padikpene sipinwoaroa, pwehng ih, ‘Pispis dupukdo oamw pwaipwanid oang ngoahi!’ <sup>29</sup> **Papahu rukdi mwohn ih poakmahk, ‘Menlau kanangmahng ngoahi, pwa ngoahi nen dupukkoang koawoa!’** <sup>30</sup> **A ih kia rong, doar ih peiddoang pwilihoahu nehn kalpwuhj oaroh pwilihoahu en dupukla ah pwaipwaniddo.** <sup>31</sup> **Nehn en pwilihoa papahk kapangda dahkij wiawi, irai injinuwedkahlha koalik, inla pwehng nahmwarkiho me ohroj ma wiawi.** <sup>32</sup> **Nahmwarkiho pangindo nah papahu pwehng: ‘Koawoa papah naunahmen! Ngoahi mahkoahng koawoa oamw pwaipwanid ohroj oang ngoahi, pwa koawoa poakmahk ipoai;** <sup>33</sup> **A da koawoa ke johpwa mahkoahngki pwilihoammwo, doahroar oai ne mahkoahng koawoa.’** <sup>34</sup> **Doari nahmwarkiho inenin lioas, doari ih peiddoang papahu nehn kalpwuhj pwa ih en loklok oaroh ngehd ih en dupukla ah pwaipwanid ohroj.”**

<sup>35</sup> Doar Jesus pwa, “**Ioar joangwa ma Joamoaiho nehnloannge pirin wiahng kamwai, ma emen emen kamwai johpwa mahkoahng riah jang nehn ah mohngiong.**”

## 19

*Padahk doahr Mweipijoang in Pwoapwoaud*

<sup>1</sup> Nehn en Jesus kadoarihla Ah sikoa mehpwiai, Ih injang Galilee inla nehn wein Judea oaloap Pillap Jordan. <sup>2</sup> Pokon koalik oau kaujla Ih, Ih kemwehuwihla irai wijahu.

<sup>3</sup> Pharisee pwi indoa Ipoa, jong in lidipi Ih ki ahr peidek, nen irai idoak, “Imdoahr, asai Kojonneddo mweidoahng woal men en kak mweijang pahioa ki kahrpoa joah lipilpil?”

<sup>4</sup> Jesus japoang irai, “**Kamwai kahjikkoar wadek Puk Joarwi ma pwa jang oh sapin kawa, ‘Jounkapikpikko, wiahda armaj, woal apel li.’** <sup>5</sup> Koahs pel pwa, ‘jang in kahrpoahioauwe woal men pirin mweijang jamah apel inah ih pasoahng pahioahu, ara

**roahmenne paspene wiahla oau.’<sup>6</sup> Ara ne johla wia roahmen a emennoar. Doari joh armaj men en kamweidpijoang da ma Koahs ne kapsahpene.”**

<sup>7</sup> Pharisee-ok idoak ipoa, “A amwda Moses ke kihda kojonneddoo pwa woal men kak kihda kijinlikoau in kamweid, ih ken kak mweijang pahioahu.”

<sup>8</sup> Jesus japoang irai, “**Moses mweidoahng kamwai en mweijang pahioamwai kan pwa amwai nohn koapsakai. A jang in sapdahu me johpwa kin wiawi.** <sup>9</sup> A Ngoahi pwehng kamwai, ma woalmen mweijang pahioahu in kahrpoa oau ma jaudi kamwahl, a ih **painkihla emen li sohrohr ih wiahda dipen kamwahl.**”

<sup>10</sup> Nah Sohnpadahkkok pwehng Ih, “Ma ioar pirin doahr men nehn pwungen woal men apel pahioahu, doar mwehu en pwen joah pwoapwoaud.”

<sup>11</sup> Jesus japoang irai, “**Jaudi ohroj kakkoang oaloahda padahkkoauwe, araihok oar ma mweimweioang jang puwoa.**

<sup>12</sup> Pwa kahrpoahpwi mine ma kahrehdha armaj johkak pwoapwoaudkihda. Epwi noaisikdi palwoaroarai johpwa unjek; a epwi jang in arai leklekla, a epwi jang in pein injenarai arai johpwa nimen pwoapwoaud pwa en mwehuwoang Wein nehnloanne. Ma emen kak oaloa padahkkoauwe, a en oaloa.”

### *Jesus Kapaiahda Jeri Siksikpwi*

<sup>13</sup> Jerihpwi wijkdohng ipen Jesus pwa en kihdahng poah pohrai apel kapkapki irai, a sohnpadahkkok lipwoarehda armajjok. <sup>14</sup> Jesus pwehng irai, “**Mweidoahng jerihkan en indoa Ipoai. Kamwai joah iroahdi irai, pwa Wein nehnloanngi ioar wein joangoan armaj pwiai.**”

<sup>15</sup> Ih kihdahng poahk pohrai, doar Ih ken inla jang wijahu.

### *Mwahnkapw Koapwoahpwoa men*

<sup>16</sup> Anjoau kij mwahnkapw men indoa ipen Jesus idoak, “Jounpadahk, joangoan wihwia mwehu da ma ngoahi uhdahn wia pwa ngoahi en oaloahki mour joahsuk?”

<sup>17</sup> “**Amwda koawoa ke idoak oang Ngoahi dahkij mwehu?**” Jesus japoang. “**Emen oar ma mwehu. Kapwaihahda kojonnénd kan ma koawoa nimen dilda nehn mour joahsuk.**”

<sup>18</sup> “Kojonnénd dahpwi?” Woallo idoak.

Jesus japoang, “**Joah kojukdi armaj; joah kamwahl; joah pirap; joah karaun likamw;** <sup>19</sup> woaunki joamoamw apel inoamw; ipwilki mihn ipoamw doahroar oamw kin ipwilki pein koawoa.’”

<sup>20</sup> “Ngoahi ne kapwaihahda kojonnénd pwiai ohroj,” mwahnkappwo japoang. “Da ngoahi en pel wia?”

<sup>21</sup> Jesus pwehng ih, “**Ma koawoa nimen unjekla, alwe noaskihla me ohroj koawoa anki, kioang dupkoa kan armaj joamwoahmwoa kan, oamw pai nehnloanngi nen koalikla; indoa pwilihla Ngoahi.**”

<sup>22</sup> Nehn en mwahnkappwo rong lal pwiai, ih injinjuwedla, ken allaluhla. Pwa woal inenin koapwoahpwoa men ih.

<sup>23</sup> Doar Jesus pwehng nah sohnpadahkkok, “**Ngoahi pwehng kamwai in mehlel: inenin apwal oang armaj koapwoahpwoa en**

**dilda nehn Wein nehnloanngē.** <sup>24</sup> Ngoahi en pel pwuroahng pwa: Apwal oang armaj koapwoahpwoa men en dilda nehn wein Koahs jang kamel men en dilda nehn pwokin si pas.”

<sup>25</sup> Nehr en sohnpadahkkok rong me, irai inenin pwuriamweikihla. “Doar inje kak mourla?” irai idoak.

<sup>26</sup> Jesus jipwoallahng irai, japoang, “**Me johkak ipen armaj, a ipen Koahs me ohroj kak.**”

<sup>27</sup> Doar Peter pwehng Ih, “Kamai ne kihdi me ohroj, kamai pwilihla koawoa. Dahkij kamai pirin anki?”

<sup>28</sup> Jesus pwehng irai, “**Ngoahi pwehng kamwai in mehlel, pwa kamwai ejek roahmennen ma kin pwilpwili Ngoahi, kamwai pirin pwili mwindi nehn mwoalin kadeikko apel pwili kadeikda kainek ejek riau in Israel, anjoauwo ma Nihn-Armaj pirin mwindi nehn Ah mwoal linngo nehn Ah Mwei Kappwo.** <sup>29</sup> Apel irai ohroj ma ne kihdi umwarai kan, riarai woal, riarai li, jamarai, inarai, nihrai jeri kan, japwarai kan ki Ngoahi, pirin oaloa pehn epwiki koalikjang apel pwilihki mour joahsuk. <sup>30</sup> A armaj dir ma kin mijoa apkas pirin mwerinla, a armaj dir ma kin mwerin apkas pirin mijolahla.

## 20

*Sohn Doadoahk in nehn Mwoaswelin Wain*

<sup>1</sup> **Wein nehnloanngē doahroar woal men ma inla inminjoang pwa ih en oaloa armaj in doadoahk nehn ah mwoaswelin wainno.**

<sup>2</sup> Ih pwungkihoang irai pwa ih en dupuk irai doahloa oau rehn oau, ih kadarla irai en doadoahk nehn mwoaswelin wainno.

<sup>3</sup> Ih pwuroahng inla nehn wijahn noasnoasso kiloak duwoau minjoanngo, ih pel kapangda epwi armaj onohn mwahl joh me irai wia. <sup>4</sup> Ih pel pwehng irai en inla doadoahk a ih en dupuk irai dahkij ma koanoahng. <sup>5</sup> Irai ken inla. A ih pel pwuroahng inla kiloak ejek riau apel kiloak jiluh, ih pel wia joangoehr ma ih wia inminjoanngo. <sup>6</sup> A injausik, nimwennoar kiloak limoau ih pwuroahng inla wijahn noasnoasso, ih pel kapangda epwi armaj ma pel onnonohn mwahl. Ih idoak oang irai, ‘Amwda kamwai ke koauwehkihla amwai anjoau onnonohn mwahl, johpwa doadoahk rehn oauwe?’ <sup>7</sup> Irai japoang, ‘Pwa joh armaj nimen doadoahkki kamai.’ Woallo pwehng irai, ‘Kamwai inla pwili doadoahk nehn mwoaswelin wainno.’

<sup>8</sup> **Injousikko woallo pwehng nah jounkouwahu, ‘Panginpene sohn doadoahk kan, koawoa dupukla irai, sapkihda irai ma indoa mwuhr kan oaroh lel arai kan ma sabin indoa.’** <sup>9</sup> Woal kan ma sapda doadoahk kiloak, emen oaloa doahloahioau. <sup>10</sup> A anjoauwo ma irai ma sapda doadoahk mijoa inдоahng oaloa dupkoarai, irai lemleme pwa irai nen oaloa koalik. A irai pel oaloa doahloahioau emen emen irai. <sup>11</sup> Nehr irai oaloa dupkoaraihok, irai sapda lipahnedi jounmwoaswello pwa, <sup>12</sup> ‘Armaj pwiaik doadoahk awa oauwoar, a kamai koakoahkla doadoahk pehn joauwo rehnoauwe pokon pehn joauwo, a koawoa kioang kamai joangoan dopdop oauwoar!’ <sup>13</sup> Ih japoang emen irai, ‘Johpwa jiwung oau ngoahi wiahng koawoa, kisa joah pwungkihpene

**pwa doahloahioau rehnnoau? 14 Oaloa dupkoammwen, koawoa ken inla in umwoammwo. Pwa injenoai, ma ngoahi nimen dupukkoang iraihok ma indoa mwuhr doahroar oai dupuk oang koawoa. 15 Imdoahr, ngoahi joah anki pwungin doadoahkki pein noai mwanikhkai oang pein injenoai? Ke koawoa pihrinki ki oai kadek?’**

**16 Jesus kadoariikhla Ah sikesik, pwa, “Armaj in mwuhr pirin mijaoahl, a armaj in mijoa pirin mwerinla.”**

*Kajiluhn en Jesus ah Kopda doahr Ah pirin Mehdi*

**17 Nehr en Jesus allaluhdahlahng Jerusalem, Ih kasohrohrihla nah sohnpadahk eijkek roahmenno wijahkij nehn allo, Ih pwehng irai, 18 “Kamwai kidal pwa kisai allaluhdahlahng Jerusalem, wijahwa ma Nihn-Armaj pirin likliklahng ipen jamwrou laplap apel jounpadahk in Kojonned kan. Irai pirin kadeikda Ih pwa Ih en kojkojdi. 19 Irai pirin pangla Ih ipen mihn likin kan ma pirin wiahla mihn kapis iparai, pwa en pokpok apel kalohpwuhla; in rehn kajiluh ih pirin iejda.”**

*Poakpoak in Nohno men*

**20 Doari, pahien Zebedee indoa ipen Jesus; pwilihkhla nah jermwein roahmenno, dairukdi mwohn Ih, wia ah poakpoak.**

**21 “Da koawoa anahne?”** Jesus idoak.

Liho japoang, “Inoauki oang ngoahi pwa noai jermwein roahmenne en pwili mwindi ipoamw in oamw loap moaun apel oamw loap meing nehn dohioammwo, ma koawoa pirin nahmwarkihla.”

**22 Jesus japoang ara, “Kamwa jehjoa pwa da kamwa poakpoaki-hen! Kamwa kak nim jang nehn mwoak in loklok ma Ngoahi ne pirin ken nim?”**

Ara japoang, “Kama kak.”

**23 “A doar mwehu kamwa pirin pwili nim nimoai mwoakke,”** Ih pwehng ara. **“A joh oai oang pilda pwa inje pirin mwindi loap moaun apel loap meing in Ngoahi. Wijahpwiak ne kileldi oang iraihok ma Joamoaiho ne koaunopda.”**

**24 Nehr en sohnpadahk eijkekko rongda me, irai inenin lioas oang riariho. 25 A Jesus panginpene irai ohroj, pwehng irai, “Kamwai kidal pwa nehn jampahioauwe koaun kan kin anki manman in koaunda sohn ahr wei kan, laplap kan ioar kin anki manman ohroj. 26 A ih jehpirin doahr me ipamwai. Inje ma nimen laplap ioar ih pirin papah ohroj; 27 a inje ma nimen keiou ioar ih pirin wiahla lidu in ohroj— 28 doahroar Nihn-Armaj, ma indoa jaudi armaj kan en papah, a Ih en papah armaj kan apel sohnmesei kihdi Ah mour pwa en dupukda armaj ngoadoar.”**

*Jesus Kemwehuwlha Woal Majkun Roahmen*

**29 Nehr en Jesus apel Nah sohnpadahkkok injang Jericho, pokon koalik oau kauj mwerirai. 30 Woal majkun roahmen mwindi imwin allo rongda pwa Jesus allaluhla wijahu, ara sapda rahrahu, “Maing, Koawoa ma nihn David! Jeuweje kama!”**

**31 Pokonno woarwoarihda ara, pwehng ara en nennenla, a ara kapwa koalikla ara rahrahu, “Maing, nihn David! Jeuweje kama!”**

**32** Jesus uhdi, pangin ara en indoa, “**Da kamwa nimen Ngoahi en wiahng kamwa?**” Ih idoak ipara.

**33** Ara japoang, “Maing, kama nimen kapangda wija!”

**34** Jesus ipwilkihda ara, Ih pukkoang mijarahk. Anjoauwohr ara ken kak kapang wija. Doar ara ken kaujla ih.

## 21

### *Dilda Jerusalem ki Rojon in Kalwehdi*

**1** Nehn en Jesus apel Nah sohnpadahkkok koaroannoang Jerusalem, irai lel Bethphage pohn Dolin Olip. Jesus kadarla sohnpadahk roahmen mijarai <sup>2</sup> pwehng ara “**Kamwa alwe nehn kahnihmw en mijoahn, kamwa pirin kapangda ejel men pirapirdi, pwilihki nah pwinihk siksik men mine ipoa; Kamwa lapwadda ara ukdo Ipoai.**” <sup>3</sup> A ma emen idoakkoang kamwa mehkij, kamwa pwehng ih, ‘**Koaunno anahne ara,’ nehn anjoauwohr ih nen mweidoahng kamwa.**’

**4** Mehpwiai wiawi pwa en pwoaida da ma joukohppo pwa:

**5** “Pwehng kahnihmw Zion,

Kapang, oamw nahmwarki allalu indoa ipoamw!

In aksiksik, mine pohn ejel lihmen.

Mine pohn nihn ejel pwinihk pwulopwul men.”

**6** Sohnpadahkkok ken inla wiahda me ohroj ma Jesus pwehng ara.

**7** Ara ukdo ejello apel nah pwinihkko, kihdihoang ara likkoauwok pohra; Jesus doauda mwindi puwoa. **8** A pokon koalik oau piroakihi arai likkoauwok nehn allo, a epwi pel poaloahdi rahn suhkoa piroakihoang nehn allo. **9** Pokonno ma alu mijen Jesus apel ihr ma alu mwerin, sapkihda ahr koaul rahrahuki, “Kapnga oang Ih ma kijehn David! Koahs en kapaiahda Ih ma indoa in oadoan Koaunno! Kapnga oang Koahs!”

**10** Nehn en Jesus dilda nehn Jerusalem, Kahnihmmwo pwon mwoakidkihda Ah dilda. “Inje woal mene?” irai idoak.

**11** A pokonno kin japoang irai, “Ih ioar Joukohp Jesus, jang Nazareth wein Galilee.”

### *Jesus Dilda nehn Umw Joarwiho*

**12** Jesus inla dilda nehn Umw Joarwiho, kajroahjang loaloa irai ohroj ma noaski apel dopdop koapwoa. Ih ukuddi en sohnkawiliali mwanihok arai sehpillok apel koauwehla dohn noaski mwureiok. **13** Ih pwehng irai, “**Ne insingdi nehn Puk Joarwi ma Koahs pwa, ‘Umwaoie pirin adanki umwen kapkap,’ a kamwai ne wiahkihla dohn jounpirap!**”

**14** Armaj majkunpwı apel mwoasorpwi indoa ipen Jesus nehn Umw Joarwiho, Ih kemwehuwihla irai. **15** Jamwrou laplappok apel jounpadahk in Kojonneddö kan lioaskihla irai kapang manman kapwuriamwei pwiai apel rong en jerihok nehn Umw Joarwiho rahrahuki, “Kapnga oang Ih ma kijehn kadaudok in David!”

**16** Irai idoak oang Jesus, “A koawoa rong dahkij jeri pwiai pwahp-wahpwa?”

“**Eh Ngoahi rong,**” Jesus japoang. “**Kamwai kahjikkoar wadek Puk Joarwi? Ma pwa ‘Koawoa ne oaloa kaping unjek jang in oawoan jeri kan apel jeri kan ma kin dihdi?’**”

<sup>17</sup> Jesus injang iparai, injang nehn kahnihammadwo inla Bethany, wija Ih koammoaldi inpwonng.

### *Jesus Kariahla Suhkoa Pas*

<sup>18</sup> Inminjoang in rehnno, nehn en Jesus japhahlahng in kahnihammadwo, Ih mwakohkohda <sup>19</sup> a Ih kapangda suhkao fig pas imwin allo. Ih inla pwa Ih en kapang ma mine wah, joh wah Ih kapang, a pwen soahr doari. Doar Ih pwehng suhkoahu, **“Koawoa johla pirin pwuroahng uhwa!”** Anjoauwohr suhkoahu mengda.

<sup>20</sup> Sohnpadahkkok kapang me, irai inenin pwuriamweikihla, irai ken idoak, “Imdoahr suhkao pase kak pispisinnoar mengda?”

<sup>21</sup> Jesus japoang, **“Ngoahi pwehng kamwai in mehlel, ma kamwai kin pwojon johpwa peikajal, kamwai kak wiahda da ma Ngoahi wiahng suhkoao pase; a jaudihoar mehwahr doari, kamwai pel kak pwehng dolloauwe, ‘Sohjang men, pein peiddihlahng koawoa nehn jeddo,’ a pirin pwoaida.** <sup>22</sup> Ma kamwai kamehlele, kamwai nen oaloa da ma kamwai poaki nehn amwai kapkap.”

### *Peidek doahr en Jesus Pwungin wiahda Manman*

<sup>23</sup> Nehr en Jesus japhahlla nehn Umw Joarwiho, Ih pwuroahng sapda padahk, a jamwrou laplappok apel epwi jourmajpwi indoia Ipoa wiahng peidek pase: “En inje manman ma Koawoa wihiwiahki joang pwiak? Inje ma kioang Koawoa manman oauwe?”

<sup>24</sup> Jesus japoang irai, **“Ngoahi pirin pel idoak oang kamwai peidek oau; ma kamwai japoangla Ngoahi, a, Ngoahi pirin pwehng kamwai nehn en inje manman ma Ngoahi wihiwiahki joang pwiak.** <sup>25</sup> **John jounpoapdaij kihjang ia ah manman in poapdaiji armaj? Jang ipen Koahs ke jang ipen armaj?”**

Irai sapda akmaipene nehn pwungarai pwahhpwahpwa, “Ma kisai japoangki, ‘Jang ipen Koahs,’ Ih nen pwehng kisai, ‘A amwda kamwai ke joah kamehlele John?’ <sup>26</sup> A ma kisai japoangki, ‘Jang ipen armaj,’ me keperroang kisai, pwa armaj ohroj kin wiahki John joukohp men.” <sup>27</sup> Doar irai japoangla Jesus, “Kamai jehjoe.”

A Jesus wud japoang irai, **“Doar Ngoahi pel jehpirin pwehng kamwai jang in en inje manman ma Ngoahi wihiwiahki mehp-wiai.”**

### *Karajraj in Jermwein Roahmen*

<sup>28</sup> **“A da kamwai lemlemehioang karajraj pase? Woalmen mine ma nainki jermwein roahmen, Ih inla ipen jermwein koalikko, ih pwehng, ‘Noai jeri, inla doadoahk nehn mwoaswelin wainno rehnnoauwe.’** <sup>29</sup> Jermweinno japoang jamahu pwa, ‘Ngoahi kia,’ a mwuhr ih koluhla, ukudla ah lamlam ih inla nehn mwoaswelin wainno. <sup>30</sup> Mwahmwahu pel inla ipen jermwein siksikko pwehng joannngohr. Jermwein siksikko japoang jamahu, ‘Eh, ngoahi pirin inla.’ A ih johpwa inla.

<sup>31</sup> Inje in jermwein roahmenno ma kapwaihahda injenen jamahu?”

Irai japoang, “Jermwein koalikko.”

Doar Jesus pwehng irai, **“Ngoahi pwehng kamwai in mehlel, pwa jounrik daksissok apel lihn noaski palwoaroaraihok nen dilda nehn Wein Koahs mijen kamwai.** <sup>32</sup> Pwa John jounpoapdaij indoahng kamwai, pwa en kajalehng kamwai alin mourro,

**kamwai ken joah kamehlele ih, a jounrik daksissok apel lihn noaski palwoaroaraihok kamehlele. A nehn amwai kapang mehpwiak wihwiawi kamwai johpwa nimen ukudla amwai lamlam, kamehlelehla Ih.**

*Karajraj in Sohndoadoahk in nehn Mwoaswelin Wain*

**33 “Kamwai pel rong apkas karajraj: Mine jounmwoaswel men ma anki mwoaswelin wain oau. Ih ken kelihpene, jaripda dohn ungud wain oau loaloa, kouda wijahn iroir oau. Ih kioang armaj en koadoahkoia ih ummwoaisla nehn wai. 34 Nehr ah ne lel anjoau in doddol wehn mwoaswelin wainno, ih ken kadarla ah liduhpwi ipen sohndoadoahkkok pwa en oaloa pwoaijua jang nehn mwoaswello. 35 A sohn doadoahk in nehn mwoaswello koldi liduhwok, emen irai pokihjili, a emen irai kojukdi, a emen irai kasoaohki sakai. 36 Doari woallo ma anki mwoaswello pel pwuroahng kadarla liduhpwi ma dir jang pwihnh keiouwo. Sohndoadoahkkok wiahng irai joanngohr. 37 Oh mwuhr ih kadarla nah jermweinno iparai, lemleme, ‘Mehlel irai uhdahn pirin woaunki noai jermweinno.’ 38 A nehn en sohndoadoahk in nehn mwoaswello kapang jermweinno, irai pwahpene nehn pwungarai, ‘Ioar nihn woallo jermweinwa me; koa, kisai kojukdi ih, kisai ken wud japwankihla jappwe!’ 39 Doari irai jipoardi ih, kerpwihla likin mwoaswello, irai kojukdi ih.”**

**40 Jesus idoak iparai, “Anjoauwo ma woallo ma anki mwoaswello pwurdo, da pwa ih nen wiahng sohn doadoahkkok nehn mwoaswello?”**

**41 A irai japoang, “Ih uhdahn pirin kojukdi armaj nauna pwiak. Ih kioang epwi sohndoadoahk sohrohr nehn ah mwoaswelin wainno, ma uhdahn pirin kioang pwoaijua anjoau ma koanoahng.”**

**42 Doar Jesus pwehng irai, “**Da, kamwai kahjikkoar wadek da ma Puk Joarwi pwa?****

**‘Sakai ma jounkou umw kan ne kerpwihla,  
wud wiahla sakain pwukoakoaimw!**

**KOAUNNO ma wiahda me;  
mehkij ma kapwuriamwei mehlel oang kisai.’**

**43 “Ioar Ngoahi pwehngkihoang kamwai, pwa Wein Koahs pirin liklikjang kamwai liklikkoang oau wei ma nen kak kapwarahda wehn Wein Koahs. 44 [Armaj men ma pirin kipdihoang pohn sakaihoauwe, ih pirin kipdihoar mwoarpijoang, a ma armaj men ma sakai oauwe pirin kipdihoang puwoa pel nen kamwisihdi emen ma ih kipdihoang puwoa, ih pirin lelloar kamwisihpene.]”**

**45 Nehr en jamwrou laplappok apel Pharisee-ok irai rongda en Jesus karajraj pwiak, irai lioaskihla pwa Ih karajrajki irai. 46 Doar irai jong en joalihdi ih, a irai mijik pokon in armajjok, pwa irai kin wiahki Jesus joukohp men.**

## 22

*Sikesikin Kamdipwin Koapwoapwoaud.*

**1 Jesus pel pwuroahng doadoahkki karajraj nehn a sikesik oang armajjok, Ih pwa, 2 “Wein nehnloanne doahroar nahmwarki men ma koaunopda kamdipwin koapwoapwoaud oau oang nah**

jermweinno. <sup>3</sup> Ih kadarla nah liduhwok pwa en pakairkihoang irai ma oaloa lukko en indoa; a irai johpwa nimen pwili sowoahda. <sup>4</sup> Doari, ih pel kadarla epwi lidu en pwehng irai, ‘Kamdippwe ne onopda, uduken kahu pwulopwul kan ne kojkojdi. Me ohroj ne onopda. Irai en ken indoa!’ <sup>5</sup> A Iraihok ma luk wiawihoang johpwa soahk, a pwen wihwiahr pein irai doadoahk, emen inla nehn ah mwoaswel, emen nehn ah stohwa. <sup>6</sup> Epwi koldi nah jounpakairrok koalkoa, apel kojukdi irai. <sup>7</sup> Doari, nahmwarkiho inenin lioasla. Ih kadarla nah jounpeihok en kojukdi iraihok ma kojukdi nah jounpakairrok apel okojda arai kahnihmmwok. <sup>8</sup> Ih pel pwehng nah liduhwok, ‘Kamdipwin koapwoapwoaudde ne onopda, a irai ma luk wiawihoang joah warroang pwili. <sup>9</sup> Apkas inla nehn al kan lukehdo ohroj ma kamwai kapangda.’ <sup>10</sup> Doar liduhwok ukdo ohroj ma irai suhwoang, armaj mwehu apel armaj nauna doahr oauwoar, kamdippwo ken dirkihla armaj.

<sup>11</sup> “A anjoauwo ma nahmwarkiho indoahng suhwoang armajjok, ih kapangda woal men ma joah mine nehn likkoauwin koapwoapwoaud. <sup>12</sup> ‘Oai pirien, imdoahr oamw dildo nehn ummwe johpwa likkoauki likkoauwin koapwoapwoaud?’ A woallo johpwa japoang. <sup>13</sup> Doari, nahmwarkiho pwehng irai ma jeujeuveje ih, ‘Piroahdi poah apel ehn kamwai kerpwihla ih likin wija rosso, wijahu ma joang apel keikeikeisakai.’”

<sup>14</sup> A Jesus koarjoahla karajrajjo pwa, “**Dir armaj oaloa lukko, a epwihoar pilpilda.**”

### *Daksis oang Caesar*

<sup>15</sup> Pharisee-ok suhpene pwa irai en koajoanehdi doahr irai en lidipihdi Jesus ki mehk ma Ih pwa, pwa irai en kak kadipoahki Ih. <sup>16</sup> Irai kadarlahng Ih epwi nihrai sohnpadahkkok pwilikhki epwi nihn Herod sohn doadoahkkok, en idoak oang Ih peidek oauwe: ‘Jounpadahk, kamai kidal pwa Koawoa armaj mehlel men. Koawoa padahki kupwur en Koahs oang armaj johpwa kaspoahki da wiawihoang Koawoa. Koawoa johkin lipilpilki armaj. <sup>17</sup> Apkas pwehng kamai da Oamw lamlam oang me: Pwen pwung en dupuk daksis oang Caesar in Rome ke joah?’

<sup>18</sup> A Jesus pwen kidal arai lamlam nauna, Ih pwa, “**Mwalaun kamwai! Amwda kamwai ke jongjong in lidipihdi Ngoahi?**

<sup>19</sup> **Kajalehng Ngoahi oau send en ma kamwai kin dupukki daksis!**”

Irai wahdohng Ih sendo, <sup>20</sup> a Ih idoakkoang irai, “**Mijen apel oadoan inje me pohn sende?**”

<sup>21</sup> “Caesar,” irai japoang.

**“Doar ioar,”** Jesus pwa, “**Dupukkoang Caesar dahkij ma ah. A dupukkoang Koahs dahkij ma Ah.”**

<sup>22</sup> Nehn irai rongda me, irai pwuriamweikihla, irai ken japahlpi-joang.

### *Peidek Doahroar Jejda Jang Mehdi*

<sup>23</sup> Rehnnohr Sadducee-pwi indoa ipen Jesus (Ioar irai joangoan armajko ma kin sikoa pwa armaj mehdi kan jehpirin iejda). Irai

pwa armaj jehpirin iejda jang mehdi. <sup>24</sup> Irai pwehng Jesus, “Maing Jounpadahk, Moses pwa, ma woal men mehdi a joh nah jeri, riah woal pirin wud painkihla liho pwa en wiahda kadaudokoan woal mehdihio. <sup>25</sup> Doari, riari oau kin minmine ipamai, woal ijimen. Minnohr koalik pwoapwoaudla oaroh mehdi jang pahioahu a joh nihra jeri. A in doahroar siahk oauwe riah woal pel painkihla liohdiho. <sup>26</sup> Joanngoehr pel wiawihoang karoahmenno, apel kajilmenno. Allaluhi oaroh lel min kajimenno. <sup>27</sup> A oh mwuhr lihwa mehdi. <sup>28</sup> Doari nehn rehnno ma armaj mehdi kan pirin iejda, inje in min ijimenno ma ioar pirin pahien liho, nehn irai ohroj ne painkihda ih.”

<sup>29</sup> Jesus ken japoang irai, “**Kamwai inenin japwung, kijehn amwai johkin woahwoahki Puk Joarwi apel manman in Koahs.** <sup>30</sup> **Anjoauwo ma mehdihok iejda, irai pirin doahrla sohnloang in nehnloannge, jehpirin pwoapwoaud.** <sup>31</sup> **A oang in irair oauwe, kamwai johkin Wadek dakhij Koahs pwehng kamwai? Ih pwa,** <sup>32</sup> ‘**Ngoahi ioar Koahs in Abraham, Koahs in Isaac, apel Koahs in Jacob.’ **Ih ioar Koahs in armaj mour, jaudi armaj mehdi.**”**

<sup>33</sup> Nehn en pokonno rong Ih, irai ken pwuriamweikihla Ah padahk.

### *Kojonned ma Keiou Kajampwal*

<sup>34</sup> Nehn en Pharisee-ok rongda pwa Jesus ne kasukihdi en Sadducee-ok ahr peidekkok, irai ken pokonpene. <sup>35</sup> Emen in irai, jounpadahk in Kojonneddo nimen lidipihki Jesus peidek oau, <sup>36</sup> ‘Jounpadahk,’ ih idoak, “ia kojonné wa ma keiou kajampwal nehn Kojonneddok?”

<sup>37</sup> A Jesus japoangki, “**Koawoa en ipwilki Koaunno oamw Koahs ki oamw mohngieng ohroj, ngenimwen ohroj, apel oamw lamlam ohroj.**” <sup>38</sup> Me ioar kojonné wa ma keiou koalik apel kajampwal. <sup>39</sup> **A kariau in kajampwal ma pel doahroar me:** ‘**Ipwilki mihn ipoamw doahroar oamw ipwilki pein koawoa.**’ <sup>40</sup> Kojonné in Moses kan ohroj apel padahk in joukohp kan ohroj poahjoanda pohn kojonné riau pwiai.”

### *Peidekki doahr Messiah?*

<sup>41</sup> Nehn en Pharisee-ok pokonpene; Jesus idoak oang irai, <sup>42</sup> “**Ia amwai lamlam oang Messiah? Kijehn kadaudokin inje Ih?**”

Irai japoang, “Ih kijehn kadaudokin David.”

<sup>43</sup> Jesus pel idoak, “**Amwda Ngenin Koahs ke audohkihda David pwa Ih en panginki ‘Oai Koaun.’**”

<sup>44</sup> **‘Koaunno pwehng Oai Koaun:**

**Koawoa en mwindi oang in loap moaun in Ngoahi,  
Oaroh Ngoahi kihdihoang oamw imwinsihsí kan pehn  
pwoalkoamwen kan.’**

<sup>45</sup> **Ma David panginki ih ‘Koaun’, imdoahr ih en kak wia kadaudokin David?’**

<sup>46</sup> Johpwa emen kak japoangki Jesus mehkij; Jang rehnno inla, johla emen nimen idoakkoang Ih mehkij.

<sup>1</sup> Doar Jesus kapahrak oang pokonno apel Nah sohnpadahkkok, <sup>2</sup> "Jounpadahk in kojonned kan apel Pharisee-ok ioar irai anki manman in kawoahwoa kojonned in Moses." <sup>3</sup> Doari, kamwai uhdahn pirin pel peikkoang apel kapwaihahda me ohroj ma irai kin padahkihoang kamwai; a kamwai johpwa japjang arai wihwia kan. Pwa irai johpwa kin kapwaihahda dahkij arai kin kapahrakkihwe. <sup>4</sup> Irai kin piroahdihoang wijik soausoau pohn armaj. Irai johkin kamwoakid apas jandin poahrai pwa en jewejehda wijik soausoau pwiai. <sup>5</sup> Me ohroj ma irai kin wia, irai wia pwa en janjal mwehu mwohn armaj. Kamwai soahk mwehu koalik in koakon kan ma mine in soamwoarai apel in poahrai ma iren Puk Joarwi kan mine loaloa apel roairoai in mihn pirapirin arai likkoauwo.

<sup>6</sup> "Irai perenki mwindi in moangoan sehpil kan nehn kamdipw apel mine nehn jeia ma keiou janjal nehn jinakoke kan! <sup>7</sup> Irai perenki armaj en kin soahk irai pohn al kan, irai pel perenki armaj en panginki irai 'Jounpadahk.' <sup>8</sup> Kamwai joah kin nimen armaj en panginki kamwai 'Jounpadahk', pwa kamwai ohroj doahroauwoar, apel anki Jounpadahk mennoar. <sup>9</sup> Pel johpwa panginki emen pohn jampah 'Mwahmwa', pwa Jamamwai emennoar doari ma mine nehnloanng. <sup>10</sup> Kamwai joah pel nimen emen en panginki koawoa koaun, pwa amwai koaun mennoar ioar 'Christ.' <sup>11</sup> Minwa ma keiou laplap nehn pwungamwai kan en wia sohn papah. <sup>12</sup> Pwa emen ma nimen laplap pirin siksikla, a irai ma kin aksiksik pirin laplapla."

*Jesus Kariahla arai Mwalaun*

<sup>13</sup> "Ia woahr apwal oang kamwai jounpadahk in kojonned kan, apel Pharisee kan! Mwalaunpw i kamwai! Pwa kamwai kin risingdi jang wanihmw in Wein nehnloanng, a pein kamwai joh kin dilda ke mweidoahng armaj kan ma kin engdehn in dilda.

<sup>14</sup> "[Ia woahr apwal oang kamwai jounpadahk in kojonned apel Pharisee kan! Mwalaunpw i kamwai! Kamwai kin jerkihjang umwen liohdi kan nehn amwai kin lioajoahjki amwai kapkap roairoai. Ioar mehwa kamwai nen oaloahki koaloklok koalik.]

<sup>15</sup> "Ia woahr apwal oang kamwai jounpadahk in kojonned apel Pharisee kan! Mwalaunpw i kamwai! Kamwai kin joarjoaroakjili nehn jed apel kosehwe weipwi pwa kamwai en ukuddoang lamlamin armaj emen oang in amwai lamlam in mihn Jew; nehn ah ne lohdi kamwai kin wiahng ih en warroang inla nehn ehl pehn riau koalik jang kamwai.

<sup>16</sup> "Ia woahr apwal oang kamwai jounkaweid majkun kan! Kamwai kin padahkihoang armaj kan ma emen ma kin kahukihla Umw Joarwiho johkin pwukoahki. <sup>17</sup> Armaj majkun pweip-weipwi kamwai! Ia mehwa kajampwal in kohl ke Umw Joarwi ma kin kajarwihla kohl. <sup>18</sup> Kamwai pel pwa ma emen ma kahukihla Mwoal Joarwiho, jehpirin pwukoahki; a ma armaj men ma kin kahukihla mihn meiroang in pohn mwoallo ih ioar pwukoahki ah kahula. <sup>19</sup> Ia woahr amwai majkun! Mindahioau ma kajampwal, meiroang ke mwoallo ma kajarwihla

**meiroanngō?** <sup>20</sup> Doari, armaj men ma kin kahukihla mwoal joarwihoau, ih kin kahukihla mwoal joarwiho apel me ohroj ma mine puwoa. <sup>21</sup> Nehn en emen kin kahukihla Umw Joarwiho, koawoa kahukihla Umw Joarwiho apel Koahs, ma mine loaloa. <sup>22</sup> Nehn en emen kin kahukihla nehnloanngē, ih kin kahukihla mwoalen Koahs apel Ih ma mine puwoa.

<sup>23</sup> “Ia woahr apwal oang kamwai jounpadahk in kojonned apel Pharisee kan! Mwalaunpwı kamwai! Kamwai kin meiroangki oang Koahs eijkek kij oau in amwai koapwoahn jampah, apel mihn kioang nimen mwinge ma doahroar mint, dill, apel cumin, a kamwai johkin peikkoang padahk kajampwal kan in kojonneddö ma doahroar pwung paiai, kalahngan apel mehlel. Ioar mehpwiai ma kamwai uhdahn pirin kapwaihahda apel pwilihkihoar minpwiock. <sup>24</sup> Jounkaweid majkunpwı kamwai! Kamwai likihla loang jang nehn nimamwai pil pwadoar kamwai japsungla johploahdi kamel?

<sup>25</sup> “Ia woahr apwal oang kamwai jounpadahk in kojonned kan apel Pharisee kan! Mwalaunpwı kamwai, kamwai kin kamwkelehdä likin nihmwai mwoak apel pileis, a loaloa dirkihla dipwjoau ma kamwai kin pein oaloahdi jang in amwai kin roprop oang pein kamwai. <sup>26</sup> Pharisee majkun men koawoa! Keiou kamwkelehdä nehn mwoakkö mijkoalkoal, a likin nen pel mwakelkelda.

<sup>27</sup> “Ia woahr apwal oang kamwai jounpadahk in kojonned apel Pharisee kan! Mwalaunpwı kamwai! Kamwai kin mwehuki mwakelkel in likin joaujoau, a loaloa dir in sihn armaj mehdi apel me kajaus ohroj. <sup>28</sup> Pel doahr Kamwai, kamwai jong en doahroar armaj pwung likimwaikan, a loaloa mohngiongimwai kan dirkihla widing apel mwoarjuwed.

### *Jesus Kohpda doahroar Irai pirin Koaloklok*

<sup>29</sup> “Ia woahr apwal oang kamwai jounpadahk in kojonned apel Pharisee kan! Mwalaunpwı kamwai! Kamwai kin wiahda joaujoau mwehu oang joukohp kan apel kalingihda joaujoau in armaj mwehu kan; <sup>30</sup> kamwai kin pwa, ‘Ma kamai kin pwili mine nehn mwein jamasaihok, kamai nen jehpwili kojukdi joukohppok.’ <sup>31</sup> Kamwai ne pein kadehdehda pwa kamwai kijehn kadaudok en iraihok ma kojukdi joukohppok. <sup>32</sup> Kamwai doaudoaula kadoarihla dahkij ma jamamwaihok ne sapkihda. <sup>33</sup> Sinekpwi kamwai, ipwihpw in sinekpwi kamwai! Kamwai lemleme pwa kamwai kak pisjang kadeik in nehn ehl? <sup>34</sup> A doar Ngoahi pwehng kamwai pwa Ngoahi pirin kadardohng kamwai joukohppwi, woal loalkoangpwı, apel jounpadahkpwı; kamwai pirin kojukdi epwi, kalohpwuhla epwi, poki epwi nehn amwai jinakoke kan apel kauj jang irai nehn koaujoan kan. <sup>35</sup> Doari, imwlahn mehpwiai, koaloklok pirin aluhwoang kamwai pwa jang in amwai kojukdi armaj ma joh diparai; sapda jang Abel lel kojkodihm Zechariah nihn Berechiah, ma kamwai kojukdi nehn pwungen Umw Joarwiho apel mwoal joarwiho. <sup>36</sup> Ngoahi pwehng

**kamwai in mehlel pwa koaloklok in kojukdi armaj pwiai pirin aluhwoang armaj in rehn oauwe!"**

*En Jesus Ipwil oang Jerusalem*

<sup>37</sup> “O Jerusalem, Jerusalem! Koawoa ma kin kojukdi joukohp kan apel kasoahki sakai jounpakairrok ma Koahs kadardohng koawoa! Pehn doapoa Ngoahi nimen jupwurpene nihmw jeri kan doahr jummwa pein men kin kihpene nah pwinikh kan pehn poah, a koawoa joah nimen mweidoahng Ngoahi! <sup>38</sup> A doar, oamw Umw Joarwihn pirin soahnda johla sowoa. <sup>39</sup> A Ngoahi pwehng koawoa me, koawoa nen johpwa pwuroahng kapang Ngoahi oaroh koawoa en pwa ‘Koahs en kapaiahda Ih ma indoa in oadoan Koaunno.’ ”

## 24

*Jesus Sikoa Doahr Ohlahn Umw Joarwiho*

<sup>1</sup> Nehr en Jesus japjapahljang Umw Joarwiho, Nah sohnpadahkkok kajalehng Ih doahroar mwomwen Umw Joarwiho. <sup>2</sup> A Ih pwehng irai, “Kamwai kapang mwehuwi mehpwiai ohroj. Ngoahi pwehng kamwai in mehlel, joh oau sakai pirin luhwoahdi nehn dohiah, ohroj pirin mwoardi.”

*Apwal apel Loklok kan*

<sup>3</sup> Nehr en Jesus mwindi pohn Dolin Olip, Nah sohnpadahkkok indoa Ipoa in rir, “Pwehng kamwai, pwa ngehd mehpwiai pirin wiawi, a kilel dahpwi ma pirin kajalehda Oamw anjoau in japahldo apel imwin jampah.”

<sup>4</sup> Jesus japoang irai, “Kamwai kanaihoahng kamwai pwadoar armaj kapweipweidi kamwai. <sup>5</sup> Armaj dir pirin indoa in oadoaioa pwa, ‘Ngoahi ioar Messiah!’ Irai pirin kapweipweidi armaj dir. <sup>6</sup> Kamwai pirin rong rongin mahwin pirin wiawi wija koaroan apel doh, a joah majpwehkda. Pwa mehpwiai uhdahn pirin wiawi, a jaudi ioar imwin jampah me. <sup>7</sup> Wei kan pirin mahwin pene nehn pwungarai. Japw kan pirin uhpenne nehn pwungarai. Wija ohroj lehk koalik apel roarroarin japw pirin. <sup>8</sup> A mehpwiai ohroj pwen doahroar sapdakoan moadaoakin noaisik.

<sup>9</sup> “Doar kamwai pel pirin joaldi apel, kiheklahng koaloklok apel kojkojdi. Sohn wei ohroj nen lioassoangda kamwai pwa Ngoahi. <sup>10</sup> Nehr anjoauwo dir pirin kerpiwhla ahr pwojon, epwi pirin pangla, a irai pirin pel lioas pene nehn pwungarai. <sup>11</sup> A doar, joukohp likamw dir pirin pel pwokda, kapweipweidi dir armaj. <sup>12</sup> Me nauna pirin dirla nehn wijahkan, limpoak in armaj dir pirin siksikla. <sup>13</sup> A inje ma kolkol oaroh lel imwin pirin mourla. <sup>14</sup> Apel Rongmwehu in Weiho pirin padahk nehn jampah pwon, pwa armaj ohroj en rong; a imwin jampah kapwa leldo.

*Kamajpwehk Nauna oau*

<sup>15</sup> “Kamwai pirin pel kapang janjal kamajpwehk nauna oau ma Joukohp Daniel ne kohpda. Ih pirin uhda nehn wija joarwiho,” (Ma emen wadek me, en woahwoahki!) <sup>16</sup> “Doar irai ma mine Judea

**en kaudahla pohn dollok.** <sup>17</sup> Ma emen ma mine pohn umwahu en johpwa doaudihla nehn umwahu pwa en oaloa mehkij. <sup>18</sup> Emen ma mine nehn japw, en joah pwurla pwa en oaloa ah joakid. <sup>19</sup> Ia woahr apwal oang li lijaian apel nohnokh ma kadihdi jeri nehn anjoauwo. <sup>20</sup> Kamwai poaki ipen Koahs pwa amwai kaula in pisla en joah wiawi anjoau in kopou ke Sabbath. <sup>21</sup> Pwa apwal in anjoauwo pirin koalik jang apwal ma kin wiawi jang mehj leldo apkas; pel joh mehkij pirin doahroar jang me inla. <sup>22</sup> Koahs ne kajipidihla rehn nok; pwa ma Ih johpwa wia me, joh armaj emen pirin pisla. Pwa nah armaj pilpil kan ioar kahreha ih pirin kajipidihla rehn nok.

<sup>23</sup> “Doari, ma emen pwehng kamwai, ‘Kapang, ioar Messiah wa me,’ ke ‘Ih o,’ johpwa kamehlele. <sup>24</sup> Messiah likamw apel joukohp likamw pirin pwokda wia manman kapwuriamwei pwa en kapweipweidi nihn Koahs armaj pilpil kan, ma kak. <sup>25</sup> Kamwai rong, pwa Ngoahi ne pwehng kamwai mwohn mehpwiai pirin wiawi.

<sup>26</sup> “Doar ma armaj pwehng kamwai, ‘Kapang, Messiah mine nehn allo!’—joah inla kapang. Ke, ‘Kapang, ih oakkoakkaoak nehn ummwo!’—joah kamehlele. <sup>27</sup> Nihn-Armaj pirin indoa doahroar joarom ma kin kamarahida mijen loannge pwon.

<sup>28</sup> “Vulture kin pokonpene wija ma mahn ke palwar mehdii kin mine.”

#### *Indoahn Nihn-Armaj*

<sup>29</sup> “Mwerin rehn apwal koalikkok, Joauwo pirin rosla, john-pwonngo johla maramin, ujuhwok pirin kipdi jang mijen loannge, apel manman in nehnloanngae pirin mwoakidda jang nehn dohiarai. <sup>30</sup> A doar, kilel in Nihn-Armaj Ah pirin indoa pwokda mijen nehnloanngae, a kadaudok in jampah ohroj pirin jong nehn irai pirin kapang doahroar Nihn-Armaj Ah pirin alu indoa pohn koasoau in mijen loanngae in sihkei apel ling koalikhkoalik. <sup>31</sup> Ngilen jowi koalik oau pirin wiawi, a Ih pirin kadarla Nah sohnloanngae kan wija ohroj in jampah jang in palimese lel palikapi, pwa irai en kapokonihpene Nah armaj pilpil kan.

#### *Padahk jang Suhkoo Fig*

<sup>32</sup> “Ngoahi nimen kamwai en oaloa padahk oau jang in suhkoo fig ma rahn suhkoo pase kin green kodla apel mwisla doar soah kan ken sapda pouj doar kamwai ne kidal pwa roak ne koaroando. <sup>33</sup> Pel doahroar, ma kamwai pirin kapang mehpwiai ohroj wiawi, kamwai pirin kidal pwa anjoau in ne koaroando, ne nimwennoar sapda. <sup>34</sup> Ngoahi pwehng kamwai in mehlel pwa mehpwiai ohroj pirin wiawi mwohn en armaj ohroj ma mour apkas pirin mehdii. <sup>35</sup> Nehnloanngae apel jampah pirin johrla, a Oai padahk kan jehpirin joaloangla.

#### *Johpwa Emen Kidal Rehnno apel Awahu*

<sup>36</sup> “A johpwa emen kidal rehnno ke awahu ma mehpwiai pirin wiawi, sohnloang in nehnloanngae apel Nahu jehjoa. Jamahu kalahpwuk kidal. <sup>37</sup> Indoahn Nihn-Armaj pirin doahroar

ma ne wiawi oh nehn en Noah mweaho. <sup>38</sup> Nehn rehn nok mwohn nohlikko armaj kan kamkam dipw, jakjakau, woal kan apel lihkan pwoapwoaud oaroh lel rehnno ma Noah dilloang nehn warihmmwo. <sup>39</sup> A irai johpwa kidal pwa da pirin wiawi oaroh lapakehu ne indoa pohkla irai ohroj. Ioar doahr pirin wiawi anjoauwo ma Nihn-Armaj pirin indoa. <sup>40</sup> Anjoauwo woal roahmen pirin doaddoadoahk nehn japw oau; emen pirin wijk jang, emen luhwoahdi. <sup>41</sup> Li roahmen pirin daulahk pilahwa nehn wijahn wia pilahwa; emen pirin wijk jang, emen luhwoahdi. <sup>42</sup> Kamwai anahne onop anjoau ohroj, pwa kamwai jehjoa pwa rehn dahioau Koaunno pirin japahldo. <sup>43</sup> Ma koaunno peneinei oau kidal anjoauwo ma jounpirap men pirin indoa, koawoa nen kidal pwa ih pirin poahd apel johpwa mweidoahng en koauwehla umwahu. <sup>44</sup> Ioar mehwa kahrehdha kamwai en anahne onnonop anjoau ohroj. Pwa Nihn-Armaj pirin indoa anjoau oau ma koawoa joah kajik.

<sup>45</sup> “Inje jounpapah ma poadidi apel koahiok? Ih ma koaunno pilda pwa en pwukoahki apwali epwi jounpapah kan pwa en nehk oang kanahr mwinge nehn anjoau ma koanoahng. <sup>46</sup> Meid pai papahmeno ma koaunno pwurdo in umwahu kidalda pwa ih wia doadoahk mwehu, <sup>47</sup> Ngoahi pwehng kamwai in mehlel, koaunno nen kioang jounpapah meno en kohwahki me ohroj ih anki. <sup>48</sup> A ma ih jounpapah nauna men, ih pirin pwehng pein ih pwa, ‘oai koaunno jehpirin japahldo anjoau roairoai.’ <sup>49</sup> Ih ken sapda koalkoa pwilihoa jounpapahk, passoang irai mwinge apel nim jakau. <sup>50</sup> Ah koaunno pirin pwurdo oau rehn ma jounpapahu johpwa kajik apel kidal. <sup>51</sup> Koaunno pirin poaloa woasiksikhdi ih kihlahng ipen pwihm mwalaunnok wija ih pirin joang apel keikeikeisakai.

## 25

### *Karajraj in Jerpein Eijek*

<sup>1</sup> “Wein nehnloanng doahroar me; anjoau kij jerpein eijke wahda nihrai lahmmok inlahng kajamwo woal kamwohddo. <sup>2</sup> Limmen in irai pweipwei, a limmen loalkoang. <sup>3</sup> Jerpein pweipwei limmenno johpwa wahda pilen nihrai lahmmok, <sup>4</sup> a min loalkoang limmenno wahda rumehpwi audohkikhda pilen nihrai lahmmok. <sup>5</sup> Nehn en woallo kosin indoa, lihok moairla.

<sup>6</sup> “Lel in lopkoan pwong irai pwohrkihda ngilen poangpoang, ‘Kapang, woalwa ne leldo! Kamwai indoa kajamwo ih!’

<sup>7</sup> Jerpeinnok ohroj pwohrda onopda nihrai lahmmok. <sup>8</sup> Min pweipwei limmenno poaki ipen min loalkoanggok, ‘Menlau kidoahng kamai ekij pilen nihmwai lahm kan, pwa nihmai lahmkai ne kunla.’ <sup>9</sup> A jerpein loalkoang japoang, ‘Johkak. Nen johpwa isar oang kisai ohroj. Inla nehn stohwa dupukda nihmwai pilen lahm kan.’ <sup>10</sup> Anjoauwo irai inla nehn stohwa dupuk nihrai pilen lahmmok, woal kamwohddo ne indoa, irai ma ne onopda pwili ih dilda oang kamdipw in koapwoapwoauddo, wanihmmwo risdi loakdi.

**11 "Mwuhr, jerpein pweipweihok pwurdo, irai uhda likin wanihmmwo poangpoang, 'Maing, risingda wanihmmwen oang kama!' 12 A ih japoang, 'Ngoahi pwehng kamwai in mehlel, Ngoahi jehjoa kamwai! "**

**13 Jesus kadoarihla karajraj pase, "Doar onnonop, pwa kamwai jehjoa rehn ke awa ma Ngoahi pirin japahldo."**

*Karajraj in Papah Jilmen*

**14 "Wein nehnloanne doahroar woal men ma pirin wia a jeiloak. Ih pangin pene nah papahk ih nehk oang irai ah koapwoa kan, pwa irai en apwali oang ih. 15 Oang emen ih kioang uhwen ah koahiok: Oang emen ih kioang mwani kohl limekid, oang emen ih kioang riekid, a oang emen ih kioang kid doar ih ken jeiloakla. 16 Papahu ma oaloa mwani kohl limekid inla kadirihla nah mwanihok pel wiahda mwani kohl limekid. 17 Pel doahroar minno ma oaloa mwani kohl riekiddo, pel wiahda mwani kohl riekid. 18 A papahu ma ne oaloa mwani kohl kiddo, Ih ken inla jaripda pwoarroau nehn pwirejjo oakihla nihn ah koaunno mwanihok.**

**19 "Mwerin anjoau roairoai, en papahk ahr koaunwa pwurdo pwa en koajoanehdi mwanihok iparai. 20 Papahu ma oaloa mwani kohl limekid indoa pel wa mwani kohl limekid 'Maing, koawoa kioang ngoahi mwani kohl limekid, kapang pel mwani kohl limekid ngoahi ne koadoahkoahda.' 21 Koaunno japoang, 'Doadoahk mwehu, papah lelpoak apel mehlel men koawoa, ki oamw koahiok in koadoahkoahda mehkij siksik, ngoahi pirin kioang koawoa mehkij koalik koawoa en kin appwapwali.' 22 Papahu ma oaloa mwani kohl riekiddo pel indoa pwehng ih, 'Maing: kapang! Koawoa kidoahng ngoahi mwani kohl riekid, a me pel riekid ngoahi ne koadoahkoahda,' 23 Koaunno pel pwehng ih, 'Doadoahk mwehu, papah lelpoak apel mehlel men koawoa, ki oamw koahiok in koadoahkoahda mehkij siksik, ngoahi pirin kioang koawoa mehkij koalik koawoa en appwapwali. Indoa pwili injenmwahuki oai pai.' 24 A papahu ma oaloa mwani kohl kiddo, pel indoa pwehng ih, 'Maing, ngoahi kidal pwa koawoa woal joah mahk men; koawoa kin doli wija ma koawoa johkin poadok, koawoa kin nekid pene wija ma koawoa johkin kamwroahwe. 25 Nehr oai mijik koawoa, ngoahi inlahr oakihla nihmw mwanihok nehn pwirej. Kapang! Ioar nihmw mwani koa me.'**

**26 A koaunno japoang, 'Koawoa papah nauna apel dangahnga men! Koawoa kidal pwa ngoahi armaj apwal men, ma kin doli wija ngoahi joah poadok, oaloahjang wija ma ngoahi joah koadoahkoa? 27 Amwda koawoa joah nekidla noai mwani kan nehn pangk, pwa ngoahi en kak oaloa ohroj pwilihkihla wiuhn nehn oai pwurdo? 28 Doari, kamwai kihjang mwanihkan ipoa, kamwai kioang papahu ma nainki mwani kohl nennen. 29 Pwa oang emen ma anki mehkij, kakoalikpoa pirin pel aluhwoang; a oang ih ma joh ah mehkij, dahkij ma mine ipoa nen pel kihekjang. 30 Apkas kerpwihla min joh kaspoa mene likin wija rosso, wijahu ma ih pirin joang apel keikeikesakai.'**

<sup>31</sup> “Nihn-Armaj pirin indoa doahr Nahmwarki men, pwilihki Nah sohnloang kan ohroj, Ih pirin mine nehn Ah mwoalin kadeik linngo. <sup>32</sup> A sohn jampah ohroj pirin pokonpene mwohn Ih. Ih pirin kasohrohrihpijoang oang pwihh riau, doahroar jilepen jihpw men kin kasohrohrihpijoang jihpw jang kuhs. <sup>33</sup> Ih pirin kihla armaj pwunngok loap moaun a luhwoahk loap meing. <sup>34</sup> Doar Nahmwarkiho pwehng irai ma mine loap moaun, ‘Indoa, kamwai ma ne kapaida jang ipen Joamoaaho! Indoa oaloahdi weiho ma koaunopdahng kamwai jang sapin wiawihdahn jampah. <sup>35</sup> Pwa nehn Oai kin mwakohkohda, kamwai kamwinge Ngoahi; nehn Oai mareuda, kamwai kidoa Nimoai pil; a nehn Oai wia mihn keiru men, kamwai kajamwohng Ngoahi nehn umwamwai kan. <sup>36</sup> Nen joh Oai likkoau, kamwai kidoa Oai likkoau; nehn Oai johmwehu, kamwai kin pwokdo apwali Ngoahi; Ngoahi joaldi nehn kalpwuhj, kamwai paj Ipoai.’ <sup>37</sup> Armaj pwunngok japoang, ‘Maing, ngehd kamai kapang Koawoa mwakohko, kamai kamwinge Koawoa? Ke mareu, kamai kioang Koawoa pil Koawoa en nim? <sup>38</sup> Ke armaj in indoa men, kamai kajamwo Koawoa? Ke joah likkoau, kamai kalikkoauwihda Koawoa? <sup>39</sup> Ngehd kamai ne pel kapang Koawoa johmwehu ke joal nehn kalpwuhj, a kamai alwe paj Ipoamw?’ <sup>40</sup> A Nahmwarkiho pirin japoang, ‘Ngoahi pwehng kamwai in mehlel, nehn amwai wiahng emen rioai keiou siksik, Ngoahi ma kamwai ne wiahng!’

<sup>41</sup> “Doari Ih wud pwehnglahng iraihok loap meing, ‘Kamwai alwe jang Ngoahi, kamwai ma riahla kan! Alwehng nehn oaiho ma johkin kunla ma koaunopdahng Jehsen apel ngen jaussok! <sup>42</sup> Pwa Ngoahi mwakohko, kamwai joah kamwinge Ngoahi. Ngoahi mareu, kamwai joah kanimpili ngoahi. <sup>43</sup> Ngoahi armajin indoa men, kamwai joah kajamwo Ngoahi oang nehn umwamwai kan. Ngoahi joah likkoau, kamwai joah kalikkoawi Ngoahi. Ngoahi johmwehu pel nehn kalpwuhj, kamwai joah indoa Ipoai.’ <sup>44</sup> A irai japoang, ‘Maing, ngehd kamai ne pel kapang Koawoa mwakohko ke mareu ke wia armajin indoa men, ke joah likkoau, ke johmwehu, ke mine nehn kalpwuhj, a kamai joah jeuweje Koawoa?’ <sup>45</sup> A Ih japoang irai, ‘Ngoahi pwehng kamwai in mehlel, nehn amwai johpwa nimen jeuweje ih ma keiou siksik in rioai pwiai, kamwai johpwa nimen jeuweje Ngoahi.’ <sup>46</sup> Doar irai pirin inlahng koaloklok joh imwin, a irai ma pwung pirin inlahng mour joh imwin.”

## 26

### *Koajoandihn Kojkojdihn Jesus*

<sup>1</sup> Anjoauwo ma Jesus ne kadoarihla Ah padahk doahr mehpwiai ohroj, Ih ken pwehng Nah sohnpadahkkok, <sup>2</sup> “Mwerin rehn riau, doahroar amwai kin kidal, Joarwihn Passover pirin wiawi, a arai pirin pangla Nihn-Armaj pwa en kalohpwuhla.”

<sup>3</sup> Jamwrou laplappok apel jourmajjok pokon pene in umwen Jamwrou laplap Caiaphas; <sup>4</sup> irai koajoanehdi pwa irai en joalihdi Jesus in joah

janjal irai kojukdi Ih. <sup>5</sup> Irai pwahpene nehn pwungarai, “Kisai joah wia nehn anjoau in joarwi laplap oauwe, pwa armaj kan en joah mwoarongkihda.”

### *Jesus Keidi nehn Bethany*

<sup>6</sup> Nehr en Jesus minmine Bethany nehn umwen woal lepa men ma adanki Simon, <sup>7</sup> lihmen indoa Ipoo wahdo lehn wai wai kajampwal oau ma inenin koalik dupko. Liho widekihdi oang pohn moangoan Jesus. <sup>8</sup> Nehr en sohnpadahkkok kapang me irai lioasla pwahpwahpwa, “Mihnda lehn wai oauwe wiawahlla?” irai idoak. <sup>9</sup> “Lehn wai wai oauwe kak noasla koalikkkoalik dupko, kak kihekkoang min paijuwed kan!”

<sup>10</sup> Jesus kidal da irai pwahpwahpwa, Ih ken pwehng irai, **“Da kamwai diroapwkihdahki lihmene? Siahk mwehu oau ih wiahng Ngoahi.** <sup>11</sup> Min joamwoahmwoahk pirin pwen mine ipamwai anjoau ohroj, a Ngoahi joah. <sup>12</sup> Pwa nehn ah widekihoang lehi pohioa, ih koaunopda palwoaroaioa oang Oai pirin joajjoardi. <sup>13</sup> Ngoahi pwehng kamwai in mehlel, wija kij ma padahk in Rongmwehu wiawi nehn jampah, dakhij ih wia pel pirin lohkjili pwa en kasmanda lihmene.”

### *Judas Pwungki en Pangla Jesus*

<sup>14</sup> Doar emen irai eijke roahmenno—ma adanki Judas Iscariot—inla ipen koaun in jamwrou laplappok, <sup>15</sup> idoak iparai, “Da kamwai pirin kioang ngoahi ma ngoahi panngoang Jesus kamwai?” Doar irai wadekla mwani silper jilihjek kioang ih. <sup>16</sup> Jang anjoauwo inla Judas kapkapang anjoau mwehu ih en panngoang irai Jesus.

### *Jesus Pwili nah Sohnpadahkkok Kamdipwin Passover*

<sup>17</sup> Rehn keiou in kamdipw in pilahwa ma joah doal ihs, sohnpadahkkok indoa idoak oang Jesus, “Ia wija koawoa nimen kamain koaunopdahng koawoa kamdipw in Passover?”

<sup>18</sup> Ih japoang, **“Alwe nehn kahnihmmwen ipen woal men pwehng ih, Jounpadahkko pwa: Oai anjoau ne lel. Ngoahi pwilihki noai sohnpadahkkok pirin kasman Passover nehn umwoammwe.”**

<sup>19</sup> Sohnpadahkkok wiahda da Jesus pwehng ara, ara ken koaunopda kamdipwin Passover.

<sup>20</sup> Injoausik pene Jesus mwindihioang in sehpillo pwilihki nah sohnpadahk eijke roahmenno mwinge. <sup>21</sup> Nehr irai mwingsmwinge, Ih pwa, **“Ngoahi pwehng kamwai in mehlel, emen in kamwai pirin pangla Ngoahi.”**

<sup>22</sup> Irai inenin pahsoaula sapda wad emen ididoak oang ih, “Maing, injie me? Ngoahi me?”

<sup>23</sup> Jesus japoang, **“Inje ma pwili Ngoahi kaduhdi kanah pilah-wahu nehn pileisse pirin pangla Ngoahi.** <sup>24</sup> Nihn-Armaj pirin mehdi doahr ah ne insingdi nehn Puk Joarwi. A inenin naunahng ih ma pangla Nihn-Armaj! Mwehu oang oar ma armaj meno joah noaisikdi.”

<sup>25</sup> A Judas, ma pirin pangla Ih, pwehng Ih, “Mehlel jaudi ngoahi, Jounpadahk?”

Jesus japoang, **“Eh, ioar koawoa ma ne pwahda.”**

*En Koaunno Kamdipwin Koamwurmwur*

<sup>26</sup> Nehn irai pwen mwingswinge, Jesus pwoakda pilahwahu, kap-kapki, sipwangpijang, kioang Nah sohnpadahkkok, pwehng irai, **“Oaloa, kang, me ioar udukoaihoa.”**

<sup>27</sup> Doar ih pel oaloa mwoakkko, kapkapki, pel kioang irai, pwehng irai, **“Nim jang loaloa, kamwai ohroj.** <sup>28</sup> **Pwa insahihoa me, insahn inoauwo ma pirin widekdi pwa en lapwadda dipen armaj.** <sup>29</sup> **Kamwai en kidal pwa jang me inla Ngoahi johla pirin nim wain oaroh ngehd Ngoahi en pwili kamwai nim wain kapw nehn en Joamoaiho Ah Wei.”**

<sup>30</sup> Doari, arai ken koaulkihla koaul pas irai ken inla pohn Dolin Olip.

*Jesus Kohpda en Peter pirin Kahmahmkihla Ih*

<sup>31</sup> Doari Jesus pwehng irai, **“Pwongoauwehr kamwai ohroj pirin kerpwihla Ngoahi apel kaujjang Ngoahi; pwa Puk Joarwi pwa ‘Ngoahi pirin kojukdi Jiloapoahu, a pwihnnin jihppwok pirin kaupijoang.’** <sup>32</sup> **A mwerin Ngoahi en iejda, Ngoahi pirin inla Galilee mwohn kamwai.”**

<sup>33</sup> Peter japoang, “Mihndahr ma ohroj kerpwihla koawoa, ngoahi johpwa pirin.”

<sup>34</sup> Jesus pwehng Peter, **“Ngoahi pwehng koawoa in mehlel, mwohn joang jummwa, koawoa pirin kahmahmki Ngoahi pehn jiluh pwa koawoa jehjoa Ngoahi.”**

<sup>35</sup> A Peter japoang “Maing, ngoahi johpwa pirin kahmahmki koawoa, mihnda ma ngoahi pwili Koawoa mehdi.”

Ohroj sohnpadahkkok pel pwa me.

*Jesus Kapkap nehn Mwoaswel Gethsemane*

<sup>36</sup> Doar Jesus pwili Nah sohnpadahkkok inla wijahkij adanki Gethsemane, a Ih pwehng irai, **“Mwindi me a Ngoahi en inla o Ngoahi kapkap.”** <sup>37</sup> Ih ukda Peter apel nihn Zebedee woal roahmenno pwili Ih, a Ih sapda pahsoau pel injinjuwed. <sup>38</sup> Doar Ih pwehng irai, **“Nehn kapehdihoa inenin soausoau apel dirkihla injinjuwed, doahrma pwen pirin kojukdi Ngoahi. Kamwai jowi Ngoahi me apel pwili Ngoahi poahd.”**

<sup>39</sup> Ih ken aluhla pel ekij dohla Ih kipdi mijoa lel pwirej Ih kapkap, **“Joamoai, ma kak, kihjang Ngoahi mwoakin loklok oauwe. A jaudi Injenoai, a Oamw koajoandi en pwoaida.”**

<sup>40</sup> Doar Ih pwurla ipen Nah sohnpadahkkok kapangda pwa irai moair. Ih pwehng, **“Peter, imdoahr? Kamwai johkak pwili Ngoahi poahd awa oau oar?”** <sup>41</sup> **Mwajahn pel kapkap pwa koawoa en joah lohdi oang kajongjong. Ngen nimen a palwahr jasihkei.”**

<sup>42</sup> Ih pel inla kariau pel kapkap, **“Joamoai, ma johkak mwoak oauwe en liklikjang Ngoahi ioarroar Ngoahi en pwen nimla, Injenoamw en wiawi.”**

<sup>43</sup> Nehn Ah japahldo, Ih pel pwuroahng kapang irai moair, irai johkak poahdijoang ki arai nimen moair.

<sup>44</sup> Ih pel injang irai pwurla kapkap kajilpak, pwuroahng pwahpwah-pwa mehwahr. <sup>45</sup> Doar Ih pel pwurlahng sohnpadahkkok pwehng irai, **“Kamwai pwen moairroar koamkoammoal? Kapang, awahwa ne leldo, Nihn-Armaj ne pirin pangpangla ipen armaj dipan**

**kan. 46 Pwohrda, kisai inla! Woalwa ma pirin pangla Ngoahi ne indoa.”**

*Jesus Joaldi*

<sup>47</sup> Nehn Ah pwahpwahpwa me, Judas, emen in eijke roahmenno, leldo pwilihki pwihni oau wijik kodlaij apel suhkoia mihn pokpok. Jamwrou Laplappok apel epwi jourmajjin armajjok ioar kadardo irai.

<sup>48</sup> Judas ne kioang irai kilel oau: “Kamwai nen kidal inje kamwain koldi jang in oai en inla rahnmwahuwi ih kioang ih kis.”

<sup>49</sup> Doar Judas inenlahng oar Jesus. “Kajilel, Jounpadahk!” ih pwehng pel kioang Ih kis.

<sup>50</sup> Jesus pwa, “**Oai pirien, ken wia dahkij koawoa indoahng wia.**”

Doar epwi irai jipoardi Jesus joalihdi Ih. <sup>51</sup> Emen in woallok ma pwili Jesus wijla kodlaij pas poaloahjang oaloap sien liduhwo nihn jamwrou laplappo. <sup>52</sup> “**Kihdi nihmw kodlaijen,**” Jesus pwehng ih, “**pwa ohroj ma pei ki kodlaij pirin mehkihdi kodlaij.**”

<sup>53</sup> **Koawoa johpwa woahwoahki pwa Ngoahi kak poaki Joamoaiho en kadardo sohnloang kidpwi en jeuweje kisai, Ih pirin kadardo anjoauwohr?** <sup>54</sup> A ma Ngoahi wia, imdoahr Puk Joarwiho ma sikoa dahkij wiawi apkas en kak pwoaida?”

<sup>55</sup> Jesus wud pwehng pwihnnno, “**Da Ngoahi armaj keper nauna men pwa kamwain indoa wijik mihn pei doahr kodlaij pel pwilein pok kamwain joalihdi Ngoahi?** Amwda kamwai joah joalihdi Ngoahi nehn Umw Joarwiho? Ngoahi mine o padpadahk rehn ohroj. <sup>56</sup> **A me wiawi pwa en pwoaida dahkij joukohppo pwa ma insingdi nehn Puk Joarwi.**”

Anjoau kijo sohnpadahkkok ohroj kerpwihla Ih kaujjang.

*Jesus Mwoohn Mwoalen Koapwung*

<sup>57</sup> Armajjok ma joalihdi Jesus ukla Ih nehn umwen Caiaphas, jamwrou laplappo, wijahu ma jounpadahk in Kojonneddok apel jourmajjok ne pokonpene. <sup>58</sup> A Peter pel pwilpwilhwe ekij dohlahjang, oaroh lel nehn kelin umwen Jamwrou laplappo. Ih dilla loaloa mwindi ipen jiloapoahpwi pwa ih nimen kapang imwin mehpwiai ohroj. <sup>59</sup> Jamwrou laplappok apel sohn Mwoalen Koapwung laplappok ohroj engdehn oang kadiarekda kadehde likampwi oang Jesus pwa irai en kak kojukdi Ih. <sup>60</sup> Doari, johpwa mehkij irai diarda, apel jounkadehde dir kinehng Jesus likampwi. A jounkadehde roahmen pwokda, <sup>61</sup> ma pwa, “Woal mene pwa, ‘Ngoahi kak koawehla Umw Joarwiho Koahsso pel pwuroahng kouda mwerin rehn jiluh.’”

<sup>62</sup> Doar jamwrou laplappo uhda pwehng Jesus, “Da, joh oamw pajpoang oang kadip pwiai ma uhwoang koawoa?” <sup>63</sup> A Jesus pwen nennenlahr. Doar Jamwrou laplappo pwehng ih, “In oadoan Koahs mourro koawoa en kahukihoang kamai pwa koawoa Messiah wa ma nihn Koahs.”

<sup>64</sup> Jesus japoang, “**Koawoa ma pwa. A Ngoahi pwehng kamwai ohroj pwa jang me inla kamwai pirin kapang Nihm-Armaj pirin mwindi loap moaunin Wija Laplap ma allaluhdo pohn koasau kan in pehnloanange!**”

<sup>65</sup> Ki pajpoang oauwe Jamwrou laplappo ken soahrdi ah likkoauwo lioas, pwehng Ih, “Lahlahwe! Kisai johpwa anahne pel epwi jounkade-hde? Kamwai ohroj ne rong Ah lahlahwe. <sup>66</sup> Ia amwai koajoandi?”

Irai rahuki, “Ih ne dipda. Koanoahng Ih en mehdi.”

<sup>67</sup> Doari irai sapda andipoa mijoa apel pakiri Ih. A epwi poki Ih, <sup>68</sup> Kapiski Ih, “Messiah, kajawi oang kamai pwa inje ma poki koawoa.”

### *Peter Kahmahmki Jesus*

<sup>69</sup> Peter onnonohn nehn kelin ummwuo, a emen nihn jamwrou laplappo nah lidu jerpeinnok indoa ipoa pwehng ih, “Koawoa, emen ma pwili Jesus mihn Galilee-o.”

<sup>70</sup> A Peter kahmahmkihla mwohrai ohroj. “Ngoahi jehjoa pwa da koawoa pwahpwahpwa,” <sup>71</sup> Mwerin ah diljang nehn kello, emen lidu jerpein kapangda ih pwehng iraihok ma mine wijahu, “Woalmene kin pwili Jesus mihn Nazareth.”

<sup>72</sup> Peter pel pwuroahng kahmahmkihla, pwa, “Ngoahi kahukihla pwa ngoahi pwanah jehjoa woal menen!”

<sup>73</sup> Mwerinno, iraihok ma uhda wijahu sohlahng ipen Peter pwehng, “Uhdahn koawoa emen irai: pwa ngoaroammwen ne kajalehda.”

<sup>74</sup> Peter kahula, “Ngoahi pirin riahla ma ngoahi likamw—ngoahi jehjoa inje woalmenen!”

Anjoauwohr joang jummwa. <sup>75</sup> Anjoauwo Peter samanda en Jesus pwehng ih: **“Mwohn joang jummwa, koawoa pirin kahmahmkihla Ngoahi pehn jiluh pwa koawoa jehjoa Ngoahi.”** Ih ken inla jang wijahu kasoahng joangin.

## 27

### *Jesus Wijikla Ipen Pilate*

<sup>1</sup> Oh inminjoang jamwrou laplappok apel jourmajjok ne wiahda arai koajoandi pwa irai en kojukdi Jesus. <sup>2</sup> Arai joalihdi Ih, ukla jang wijahu ukla ipen Pilate, koapina in Rome.

### *Judas Lohjakla*

<sup>3</sup> Nehr en Judas, ma pangla Ih, kidalda pwa Jesus ne dipda pwa Ih en mehdi, ih inenin koluhla mehlel. Doar ih oaloa mwani silper jilihjek kapwurihlahng jamwrou laplappok apel jourmajjok. <sup>4</sup> “Ngoahi ne wiahda dihp,” ih pwehng irai, “pwa ngoahi pangla woal pwung men.”

“Ia kaspoahng kamai?” irai japoang ih. “Men pwen oamw pwukoa.”

<sup>5</sup> Doar Judas kerpihdi mwanihkoa nehn Umw Joarwiho ih inla lohjakla.

<sup>6</sup> Jamwrou laplappo pwoakda mwanihok, “Kisai johkak kioang mwani pwiai nehn wijahn nahk in mwanihn Umw Joarwiho,” irai pwa, “pwa uhwoang kojonned kisai en oaloa mwani dupkoan kojukdi armaj.” <sup>7</sup> Mwerin irai ekij sikoa irai koajoanehdi pwa arai en dupukla japwen jounwia ainpwoahsso, irai wiahkikhla pei in armaj in likin. <sup>8</sup> Ioar kahrehda mohj oauwo adanki Mohj in Insa.

<sup>9</sup> Me ne kapwaihahda kokohp in Jeremiah ma pwa, “Arai oaloa silper jilihjek, dopdopla mihn Israel lemleme pwa ioar woahr dupko, <sup>10</sup> irai dupuk kihda mohjo en jounwia ainpwoahsso, doahr en Koaunno kaweid.”

*Jesus Koapwung Mwohn Pilate*

<sup>11</sup> Apkas Jesus uhda mwohn Pilate, koapinahn Rome. “Koawoa ioar Nahmwarkihn mihn Jew?” koapina idoak oang Ih.

Jesus japoang, **“Eh, ma koawoa ne pwa.”** <sup>12</sup> A anjoauwo ma jamwrou laplappok apel jourmajjok kajalehda irai iroahk kadipoahki Ih, Jesus nennenla johpwa lallal.

<sup>13</sup> “Koawoa johpwa rong dirin arai iroahk ma irai kadipoahki koawoa?” Pilate idoak.

<sup>14</sup> A Jesus johpwa pwa mehkij, oang iroahk ma uhwoang Ih, ma inenin kapwuriamwei oang koapinahu.

<sup>15</sup> Nehr anjoau in joarwihn Passover ohroj. Koapina kin kapisla emen sohn kalpwuhjjo oang mihn Jew-ok, joah lipilpil emen ma irai pilda. <sup>16</sup> Nehr anjoauwo mine woal mwoarjuwed men nehn kalpwuhj oadoa Jesus Barabbas. <sup>17</sup> Nehr en armajjok pokon pene mwohn umwen Pilate-o minjoanngo, ih idoak oang irai, “Inje kamwai nimen ngoahi en mweidoahng kamwai—Barabbas ke Jesus ma adanki Messiah?” <sup>18</sup> (Ih woahwoahki mwehu pwa koaun in mihn Jew-ok joalihdi Jesus jang in pihrin.)

<sup>19</sup> Anjoauwohr, nehn en Pilate ah minmine nehn ah jeiahn koapwung, pahioahu kadardohng ih rong pas, “Mweidla woal pwung menen, pwa ngoahi loklok koalik nehn oai oarmoane ih pwohng.”

<sup>20</sup> Jamwrou laplappok apel jourmajjok kaweidki pokonno en poaki Barabbas en lapwda, a Jesus en kojkojdi.

<sup>21</sup> Koapinahu pel pwuroahng idoak, “Inje in ara roahmenne kamwai nimen ngoahi en mweidoahng kamwai?”

Pokonno rahukihla japoang ih, “Barabbas!”

<sup>22</sup> Pilate pel pwuroahng idoak, “A da ngoahi en wiahng Jesus ma adanki Messiah?”

Arai ohroj pel rahukihda, “Kalohpwuhla ih!”

<sup>23</sup> “Kahrpoa?” Pilate idoak oang irai. “Dihp da ih wiahda?”

A irai kapwa kakoalikihla ngilarai, “Kalohpwuhla ih!”

<sup>24</sup> Pilate ne kidalda pwa ih johpwa kak wia mehkij ma en kak kauhdi pwa pingpinngo ne koalkoalikla. Doar ih pwa oau pwohl in pil en wijikdo ih amwunla poah mwohn pokonno, pwehng irai, “Ngoahi pijekjang insahn woal mene. Kamwai wud pwukoahki.”

<sup>25</sup> Armajjok ohroj pel rahukihla, “Kamai pirin pwukoahki Ah mehdi —kamai apel nihmai jeri kan.”

<sup>26</sup> Doari, Pilate kadarla Barabbas oang irai. Ih koajoanehdi arai en poki Jesus ki joal pahrang imwin pas, irai kioang jounpeihok en kalohpwuhla ih.

*Jounpeihok Koauwe Jesus*

<sup>27</sup> Epwi nihn koapina jounpeihok wahla Jesus oang nehn arai umwen koapinahu a pangindo pwihniin jounpeihoo ohroj. <sup>28</sup> Irai kihjang Ah likkoau a pwainkihdi Ih robe wahssahioau. <sup>29</sup> Irai wiahda mwarmwar dokdok ingkoang roairoai pas kamwarmwarihkihdi moange, a irai kioang suhkoa pas nehn poah en wia kilel in manman. Doar irai poardi jang Ih nehn irai kapiski Ih, rahrahuki, “Kapang! Nahmwarkihn mihn Jew kan!” <sup>30</sup> A irai andipoa Ih pel doapwoa jang suhkoahu nehn poah pokihki nehn moange. <sup>31</sup> Nehr irai ne lok in wia mwahlki Ih, irai

kihjang robe-o irai wud kioang pein Ah likkoauwok. Doar irai ukla Ih en lohpwuuhla.

### *Jesus Kalohpwuuhla*

<sup>32</sup> Nehr irai allalu jang nehn kahnihmmwo, ihr koanoahdi woal in Cyrene men adanki Simon, irai ipong oang ih en wahda en Jesus lohpwuuhwo. <sup>33</sup> Irai inla lel wijahkij adanki Golgotha (woahwoahki wijahn sihn moang). <sup>34</sup> Irai kioang Jesus wain doal kihda ad kasik pwa en nim, a mwerin Ah jong ekij, Ih johpwa nimla.

<sup>35</sup> Mwerin irai poanihdi Ih oang in lohpwuuhwo, irai wijwijkstra Ah likkoauwo pwa injen anki, irai ken nehkpijоang nehn pwungarai.

<sup>36</sup> Irai ken mwindihooang wijahu jiljiloa Jesus. <sup>37</sup> Pohn moange in lohpwuuhwo ihr poanihdihoang insing oau ma kawoahwoahda kahrpoan Ah kalohpwuuhla. Insinngo pwa,

Ioar Jesus me, Nahmwarkihn mihn Jew kan.

<sup>38</sup> Jounpirap roahmen pel pwili Ih lohpwuuhla, emen mine loap moaun, a emen loap meing.

<sup>39</sup> Armajjok ma kin dauli wijahu kin mwasmwasoahki arai kapiski Jesus, pwahpwahpwa, <sup>40</sup> “Ioar koawoa ma pirin koauwehla Umw Joarwiho pel pwuroahng kouda mwerin rehn jiluh! Pein kapisla koawoa, ma koawoa Nihn Koahs! Doaudi jang in lohpwuuhwen!”

<sup>41</sup> Jamwrou laplappok, apel jounpadahkkok in Kojonneddo, apel epwi jounmajjok pwili kapiski Jesus, <sup>42</sup> “Ih kapisla epwi, a Ih johkak kapisla pein Ih! Jaudi Ih ioar nahmworki in Israel? A Ih en kerdihjang in lohpwuuhwen, a kamai nen kamehlele Ih. <sup>43</sup> Ih koapwoarpwoarki Koahs; doari, Koahs en kapisla Ih en kajalehda Ah pwungki Ih! Ih pwahla pwa, Ih Nihn Koahs.”

<sup>44</sup> Jounpirappok ma pwili Ih lohpwuuhla; ara pel pwili lahlahwe Jesus.

### *Jesus Mehdi*

<sup>45</sup> In jauwaj, roasoahdi oau wiawi pohn jappwo pwon, oaroain awa jiluh. <sup>46</sup> Koaroan oang kiloak jiluh mwerin jauwaj, Jesus ngil koalikda pwa, **“Eli, Eli, lema sabachthani?”\*** ma woahwoahki, **“Oai Koahs, Oai Koahs, amwda Koawoa kerpwihlahki Ngoahi?”**

<sup>47</sup> Epwi armajjok ma uhuhu wijahu ken rongda, irai pwa, “Ih pangpangin Elijah!” <sup>48</sup> Emen irai pispis kijoula pwoakda spwoanj oau kapwuhrhidi wain kasik, kioang in mijen suhkoa pas kihdahlahng Ih pwa Ih en nim.

<sup>49</sup> A epwi irai pwehng Ih, “jowi. Kisai kapang ma Elijah nen indoa kapisla Ih.”

<sup>50</sup> A Jesus pel pwuroahng ngil koalikda, doar Ih ken mweidla ngenin.

<sup>51</sup> Anjoauwohr kahdenngo ma poaroa mwoal joarwiho nehn Umw Joarwiho soahroakpijоang in riau, jang puwoa lel pah. Jampah roarda, sakai kan pwalpijоang, <sup>52</sup> joaujoau kan rispijоang. Palwoaroan nihn Koahs armaj dihrdir ma ne mehdi iejda. <sup>53</sup> Arai injang nehn ahr joaujoau kan; a mwerin en Jesus Ah iejda, irai pwokda nehn Kahnihmw Joarwiho pwokkoang armaj dir.

<sup>54</sup> Koauun jounpei apel jounpeihok ma pwili jiljiloa Jesus inenin majpwehkda nehn irai kapang roarroarin jappwo apel joang ohroj ma wiawi. Irai pwa, “Mehlel minmene uhdahn Nihn Koahs.”

\* 27:46 “Eli, Eli, lema sabachthani?” Psalm 22:1

55 Li dir ma pel pwilihdo mine wijahu, pwili kapkapang mehkan ma wihwiawi, a irai mine ekij doh jang wijahu; ioar irai koa ma pwili Jesus jang Galilee apel kin papah Ih. <sup>56</sup> Mary mihn Magdala, Mary inen James apel Joseph apel inen nihn Zebedee jermweinnok ma pwili mine ipen lihok.

*Palwoaroan Jesus Neknekid oang nehn Joaujoau.*

57 Injoausikdi, woal koapwoahpwoa men jang Arimathea ma adanki Joseph, ih pel sohnpadahk in Jesus men. <sup>58</sup> Ih inla ipen Pilate poakihda palwoaroan Jesus. Pilate koajoanehdi pwa en mweimwei oang ih. <sup>59</sup> Joseph oaloa palwahrro kidimkihpene likkoau roairoai oau. <sup>60</sup> Ih wahlahng nehn pein ah joaujoau kapw, ma kapwehsene wiawihda nehn sakai. Ih kasahpwroahng sakai koalik oau nehn wanihmw in joaujoauwo ih injang. <sup>61</sup> Mary mihn Magdala apel emen Mary mwindi koaroannoang kapkapang joaujoauwo.

*Jilepen Joaujoauwo*

62 Rehnwa mwerin, ioar rehn keiou in kasman in Passover—jamwrou laplappok apel Pharissee-ok pokonpene ipen Pilate. <sup>63</sup> Irai pwehng ih, “Maing, kamai samanda en min likamw meno Ah pwa anjoauwo Ih pe mour: ‘**Ngoahi pirin pwuroahng mourda mwerin rehn jiluh.**’” <sup>64</sup> Koawoa en ruwoj pwa irai en jiloa ah joaujoauwo oaroh lel kajiluh in rehn, pwadoar nah sohnpadahk inдоа pirapoah-jang palwahrro, ken pwehng armaj pwa ‘Ih iejdahjang mehdi.’ Pwa likamw pase pirin nauna jang minin mijkoalkoallo.”

65 Pilate pwehng irai “jiloapoahwa men, alwe jiloahdi mwehu joaujoauwo uhwen amwai kak.”

66 Irai inla pinahla joaujoauwo ki sakai oau apel kioang jiloapoahpwi pwa en jiljiloa.

## 28

*Iejda*

1 Mwerin Sabbath, injohrehn in Rehn Joarwi, Mary mihn Magdala apel emen Mary inlahng kapang joaujoauwo. <sup>2</sup> A nehn anjoauwohr jampah roarda; sohnloang en Koaunno men indihdo jang nehnloanne kasahpwroahjang sakaiho, ih mwindohoang puwoa. <sup>3</sup> Mwomwe inenin ling, doahroar lingin joarom, ah likkoauwo korohro doahroar sinoh. <sup>4</sup> Jiloapoahk inenin jalohda dauluhl apel roarroarkihda irai majpwehkda, irai ken kipdihoang nehn pwirej doahroar armaj mehdihpwi.

5 A sohnloanngo pwehng lihok, “kamwa joah mijik, pwa ngoahi kidal pwa kamwa raprapahki Jesus ma kalohpwuhla. <sup>6</sup> Ih joh me! Ih ne iejda, doahroar Ah pwehng kamwaiho. Kamwa inдоа, kadehde wijahu ma Ih neknekid. <sup>7</sup> A apkas, kamwa pispis alwe pwehng Nah sohnpadahkkok pwa ‘Ih ne iejda jang mehdi, Ih pirin inla Galilee mijen kamwai. Ioar wijahwa ma kamwai pirin kapang Ih.’ Kamwa samsaman da ma ngoahi pwehng kamwa.”

8 Ira ken pispis pwurla jang in joaujoauwo, ira inenin majpwehk apel peren, ira kijkijoulahng pakair kioang sohnpadahkkok irair oauwe.

9 A anjoauwohr Jesus uhda mijara pwehng ira “**Popohl.**” Ara sohla ipoa rukdi mwowoa koldi ehn nok pwongi Ih. <sup>10</sup> A Jesus pwehng ira,

**“Kamwa joah mijik, kamwa alwe pwehng rioaihok arai en inla Galilee, pwa ioar wijahwa ma kamai pirin suhpene.”**

*Rong jang Jilepen Joaujoauwo*

<sup>11</sup> Nehn en lihok ara kijkjoula ipen sohnpadahkkok, epwi jounpeihok ma jiljiloa joaujoauwo lelloang nehn kahnihmmwo pwa irai en pwehng jamwrou laplappok me ohroj ma wiawi <sup>12</sup> Jamwrou laplap apel jounmajjok pokonpene pwa irai en wia lamlamki da ma pirin wiawi. Irai en kioang jounpeihok uhwen mwani koalik oau. <sup>13</sup> Irai pwehng jounpeihok, “Kamwai pirin pwa, ‘Nihn Jesus sohnpadahkkok indoa inpwonngo nehn amai moair pirapoahla palwahrro.’ <sup>14</sup> A ma koapina rongda, kamai pirin kadehde, a kamwai jehpirin perki mehkij.”

<sup>15</sup> Jiloapoahk oaloa nihrai mwanihok, irai wiahda doahroar ma jamwrouwok padahkihoang irai. Sikesik passe lohkjili ipen mihn Jew jang rehnno indoa lel rehnnoauwe.

*Jesus Pwokkoang Nah Sohnpadahkkok*

<sup>16</sup> Sohnpadahk ejek emenno injang pohn dolin Galilee, wijahu Jesus pwehng irai en inlahng. <sup>17</sup> Nehn irai kapangda Jesus wijahu, irai rukdi pwongi Ih; a epwi irai pwen kahjikkoar kamehlele! <sup>18</sup> Jesus sohdo iparai pwehng irai, **“Manman ohroj nehnloanngé apel jampah ne liklikkoang Ngoahi.”** <sup>19</sup> Doari, kamwai alwe wija ohroj padahkihoang sohn wei kan ohroj; pwa irai en wiahla Noai sohnpadahk: poapdaijihla irai in oadoan Koahs Jahm apel Nah apel Ngen Joarwi. <sup>20</sup> Apel padahkihoang irai, ahr en peikkoang me ohroj ma Ngoahi ne koajoanehdihioang kamwai. Doari, kamwai en kidal pwa Ngoahi pirin pwilpwili kamwai anjoau ohroj lel in imwin kawa.”

## Rongmwehu ma insingdi jang ipen

### Mark Oarlap

Rongmwehu in Mark, ioar "Rongmwehu doahr Jesus Christ ma Nihn Koahs." Puk oauwe kajalehioang kisai doahr Jesus, armaj men ma kin mwoakmwoakidki sihkei apel manman. Ah manman dehde mwehu jang in Ah padahk, jang in Ah manman pohn ngen jaussok, apel jang in Ah manmanin lapwadda dipen armaj kan. Jesus pel sikoa doahr pein Ih Nihn-Armaj ma indoahng sohnmesekihla Ah mour pwa en kajaldekihla armaj jang nehn diparai kan.

Mark kin sikoa doahr en Jesus sikesik apel padahk kan, a ih kin sikoa koalik doahr Ah wihwia kan in sikesik sihkei apel dehde. Mark sapda insingehdi sikesik mwosmwos doahr John jounpoapdaij apel doahr en Jesus poapdaijla apel oaloa jongjong pehn Jehsen; a mwerin, ih sikoahda doahr en Jesus doadoahk in kemwehuwihla johmwehu kan apel padpadahk. Nehn nihn Jesus sohnpadahkkok ahr kin rongrongrong apel kapkapang Ih, irai ken koalikla ahr woahwoahki apel dehdehki; Ah imwinskihi kan kin koalikla arai lioassoang Ih. Iroa koalik kan ma kaimwjekla puk oauwe, ioar sikesikin wihwia kan ma pwoaida nehn kaimwjeklahn wihk ma Jesus mour pohn jampah, a mehlel a mehdi pohn lohpwuhwo apel iejda.

Imwin Rongmwehu oauwe min riau, ma mine nehn kilel doahroar me [...]. Emen jouninsing sohrohr likin armajjo ma insingehdi pukin Mark dapwa ioar ih ma insingehdi.

#### **Audoapoa in Oarlap**

1. Sapin Rongmwehu 1.1-13
2. En Jesus doadoahk nehn Galilee 1.14—9.50
3. Jesus injang Galilee inla Jerusalem 10.1-52
4. Kaimwjeklahn wihk nehn Jerusalem apel ipoa 11.1—15.47
5. Iejdahn Jesus 16.1-8
6. Koaun Jesus ma iejda pel pwokkoang nah sohnpadahkkok apel indahla nehnloanng 16.9-20

#### *En John jounpoapdaij kapahrak*

<sup>1</sup> Me ioar sapin Rongmwehu doahr Jesus Christ Nihn Koahs, <sup>2</sup> doahr lallo ma ne insingdi ipen joukohp Isaiah:

"Koahs pwa, 'Ngoahi pirin kadarwe Noai jounpakairro mwohn Koa-woa,  
ma pirin koaunopda Oamw allo.'

<sup>3</sup> Mine ngilloau ma kin poangpoangoang nehn japwsoahn:  
"Kamwai koaunopda al kan ohroj oang Koaunno,  
kamwai kainenehla Ah al kan ma Ih pirin alu loaloa!" "

<sup>4</sup> John ken pwokda nehn japwsoahn, poapdaiji armaj kan, pweh-pwehpwehng irai, "Kamwai koaluhla, wiliakapwla apel poapdaijla, Koahs pirin mahkoahng kamwai dipamwai kan." <sup>5</sup> Armaj dir jang koujapw ohroj nehn wein Judea apel jang Jerusalem inla pwa en rong en John ah kapahrak. Irai kin woahkda diparai kan, a ih poapdaijhla irai nehn Pillap Jordan.

<sup>6</sup> John kin kol likkoau oau ma wiawihda jang in winen kamel, apel kin piroahki lopkao kangir kilin kahu; a da ih kin kangkangkang: padda apel jukehn loanglap in nehn woallo. <sup>7</sup> A me ioar mwomwen koaloklok ma ih kin pwehng armajjok: “Mine woal men ma pirin indoa mwerin ngoahi, ma laplapjang ngoahi dauluhl; ma ngoahi johpwa warroang rukdi mwohn Ih pwa ngoahi en lapwadda joalin Ah juhwo. <sup>8</sup> Ngoahi kin poapdaijikhki kamwai pil, Ih pirin poapdaijikhki kamwai Ngen Joarwi.”

### *Jesus Poapdaijla apel Oaloa Jongjong pehn Jehsen*

<sup>9</sup> Mwerin en Jesus indoa jang Nazareth, kahnihmw siksik oau nehn wein Galilee, poapdaijla ipen John nehn Pillap Jordan. <sup>10</sup> Nehn anjoauwo ma Jesus doauda jang nehn pillo, Ih kapang nehnloanngje rispijоang a Ngen Joarwi indihdo doahr dinin mwurei men mine pohn Ih. <sup>11</sup> Ih pel rongda ngilloau indihdo jang nehnloanngje pwa, “Koawoa ioar Noai jermwein kahpwil wa, ma Ngoahi kin malauki.”

<sup>12</sup> Doari, nehn anjoauwohr Ngen Joarwi ken kahlwahlahng Jesus nehn japwsoahn. <sup>13</sup> Jesus ken mine wijahu rehn pahjek, Jehsen ken kajongjungi Ih. Mahn ingkel kan kin pel pwili Jesus wijahu; a sohnloang kan pel kin indoa pel jeuweje.

### *Jesus Pangin Sohnloakjid Pahmen*

<sup>14</sup> Mwerin John peidekkaoang nehn kalpwuhj, Jesus inla Galilee lohkihjili Rongmwehu jang ipen Koahs, pwa, <sup>15</sup> **“Ne lel anjoauwo, Wein Koahs ne koaroando! Kamwai koaluhla apel wiliakapwla apel kamehlelehla Rongmwehu!”**

<sup>16</sup> Rehn oau Jesus allaluhla pohn poahrinjedin Lehn Galilee; Ih kapangda sohnloakjid roahmen, Simon apel riah Andrew, loakjidki nihra ukko nehn lehu. <sup>17</sup> Jesus pwehng ara, **“Kamwa indoa pwilihla Ngoahi; a Ngoahi pirin wiahkihla kamwa sohnloakjidi armaj.”**

<sup>18</sup> Anjoauwohr, ara kihdi nihra ukko pwilihla Ih.

<sup>19</sup> Ih injang wijahu, pel kapangda riarihoau, James apel John, nihn Zebedee. Ara minmine pohn pohs pas winwina nihra ukkok. <sup>20</sup> Nehn en Jesus kapangda ara, Ih pangin ara. Ara ken kihdi jamarahu ma pwili mine pohn pohs siksik pas ipen sohndoadoahk pwí, ara ken pwilihla Jesus.

### *Woalmen ma Ngen Jaus Dilingla*

<sup>21</sup> Irai inla Capernaum a Sabbath Jesus dilda nehn jinakokehu sapda Ah padahk. <sup>22</sup> Armaj ohroj ma pwili rong ken pwuriamweikihla doahr Ah kin kihwe Ah padahk; pwa manman in Ah padahk johpwa doahroar en jounpadahk in Kojonneddok arai padahk.

<sup>23</sup> Woal men ma ngen jaus dilingla inla nehn jinakokehu rahrahuki pwa, <sup>24</sup> “Jesus mihn Nazareth, da Koawoa nimen wiahng kamai? Koawoa indoahng koauwehla kamai! Ngoahi kidal inje Koawoa, Koawoa ma Nihn Koahs jounpakair joarwihwa!”

<sup>25</sup> Jesus pwehng ngen jausso, **“Nennenla, koawoa diljang nehn armaj menen!”**

<sup>26</sup> Ngen jausso ken isikda woallo oaroh ken roarda, rahrahu diljang ih. <sup>27</sup> Armaj ohroj pwuriamweikihla, peipeidekpene nehn pwungarai pwahpwahpwa, “Dahkij me? Joangoan padahk kapw dahioau me?

Woalmene inenin manman. Ih pwen lalloar, pel ngen jaus kan pel peikkoang!"

<sup>28</sup> Rongin Jesus ken pispis lohkjili wija ohroj nehn wein Galilee.

### *Jesus Kemwehuwihla Armaj Dir*

<sup>29</sup> Doari, Jesus apel Nah sohnpadahkkok, pwilihki James apel John injang nehn jinakokehu inla umwen Simon apel Andrew. <sup>30</sup> Inen pahien Simon-o onohn nehn ummwwo johmwehu karkar, nehn en Jesus lel wijahu arai pwehng Ih doahr iren liho. <sup>31</sup> Ih ken inla kolda poahn liho jeuwnejehda pwa en uhda. Nehr anjoauwohr, karkarro injang ipen liho; ih ken sapda apwali irai.

<sup>32</sup> Injoausikdi, nehn en joawo pirin ken duhla, armaj kan wah-penehng Jesus min johmwehu apel min ngen jaus kan dilingla irai.

<sup>33</sup> Sohn kahnihmmwo ohroj pwili pokonpene mijen ummwwo <sup>34</sup> Jesus kemwehuwihla armaj dir ma anki joangoan johmwehu dir apel kaujang ngen jaus dir ipen armaj kan. Ih ken kauhdi ngen jaussok arai en joah lallal, pwa irai kidal Ih.

### *Jesus Lohkijili Rongmwehu nehn Galilee*

<sup>35</sup> Pwohrdahng rehnnno, injohrehn, Jesus pwohrda inlahjang in ummwwo, inla likin kahnihmmwo wijahkij pwa en kalahpwukla kap-kap. <sup>36</sup> Simon apel pwilihoahk rapahkihla Ih; <sup>37</sup> nehn irai kapangda, irai pwehng, "Maing, armaj ohroj raprapahki koawoa."

<sup>38</sup> A Ih japoang irai, "**Kisai dauluhlwehng nehn koaujoan koaroan kan, pwa Ngoahi en pel lohkijili Rongmwehu wijahk, pwa ioar Ngoahi indoahki.**"

<sup>39</sup> Ih ken alluhjili nehn Galilee pwon, kapkapahrakjili nehn jinakoke kan apel kahkahujang ngen jaus ipen armaj kan.

### *Jesus Kemwehuwihla Woal Lepahmen*

<sup>40</sup> Woal lepahmen pel indoa ipen Jesus, poadpwomwla mwohn Ih, jarda pwehng en jeuje, pwehng Ih, "Maing, ma koawoa nimen, koawoa kak kamkelehdha\* ngoahi."

<sup>41</sup> Doari Jesus ipwilkhida, kaila poah pukkoang woallo, "**Ngoahi nimen,**" Ih pwehng ih, "**Ken mwakelkelda!**" <sup>42</sup> Anjoauwohr lepahu ken jarjang ipen woallo; doari ih ken mwakelkella. <sup>43-44</sup> Jesus kainoapwihi, pwehng Ih, "**Kapang, pwa koawoa en johpwa pwehng emen. Inla kajalehioang jamwrou a koawoa wia oamw meiroang joanngo ma Moses koajoanehdi, en wia oamw mihn kadehde oang irai.**" Doari Ih ken kadarla woallo.

<sup>45</sup> Woallo inlahr lohkijili wija ohroj ah ne mwakelkeda; ma kahrehda Jesus johla kak aluhjili nehn pokon janjal nehn kahnihmmwok, Ih kin kalkalahpwukjili likin kahnihmmwo. A joah, pwa armaj dir kin pokondo Ipoa jang wija ohroj.

## 2

### *Jesus Kemwehuwihla Woal Mwoasor Men*

<sup>1</sup> Mwerin rehnpwi, Jesus pel pwuroahng inla Capernaum. Rongin Ah minmine in umwahu lohkjili; <sup>2</sup> ma kahrehda armaj dir pokondo in ummwwo apel koaisla loaloa pel in wanahmmwo. Ih ken padahki

\* **1:40** kamkelehdha: Johmwehu oauwe kin kajaminihla armaj oang kaudek.

oang arai lallo. <sup>3</sup> Nehn Ah padpadahk, woal mwoasor men ne wijiwijk allaluhdohng Ipoa; ih mine nehn mihn wijik oau, wijik in pahmen. <sup>4</sup> Doari, nehn ahr johkak kadilihda apel sohlahng ipen Jesus ki koais in pokonno, irai pwukulda pohn ummwo kainenehdi wijahu ma Jesus mine, kadilihdihong nehn ummwo ipen Jesus mihn wijikko ma mwoasorro mine puwoa. <sup>5</sup> Nehn en Jesus kapang arai pwojon, Ih pwehng woal mwoasorro, “**Noai jeri! Dipoamw kan ne lapwda.**”

<sup>6</sup> Jounpadahk in Kojonneddohpwi pwili mwindi nehn ummwo, irai lemlelehng pein arai, <sup>7</sup> “Imdoahr woalmene Ah kak wia joangoan sikesik oauwe? Pwa Ih lahlahwe Koahs. Inje ma kak lapwadda dihp kan, jaudi Koahs kalahpwuk?”

<sup>8</sup> Anjoauwohr Jesus kidalda ahr lamlam; Ih pwehng irai, “**Da kamwai wiahki joangoan lamlam pwiai?**” <sup>9</sup> **Dahioau moangoai en pwehng woal mwoasor mene, ‘Dipoamwkan ne lapwda,’ ke, ‘Uhda, oaloa kioammwen, alu?’** <sup>10</sup> **A Ngoahi en kamehlele oang kamwai en kidal pwa Nihn-Armaj\* anki manmanin mahkoahng dipen jampah.**” Ih ken pwehng woal mwoasorro, <sup>11</sup> “**Uhda, oaloa kioammwen, alwe in umwoammwo!**”

<sup>12</sup> Woal mwoasorro uhda mwohn mijarai, pwoakda kiahu, anjoauwohr ken inla. Irai ohroj pwuriamweikhla mehlel apel kapkapingahki Koahs, pwa, “Kamai kahjikkoar kapang mehkij ma doahroar me.”

### *Jesus Pangin Levi*

<sup>13</sup> Jesus pel pwuroahng pwurlahng in oaroahr in Lehn Galilee. Armaj dir pel pokonpene Ipoa, Ih ken pel sapda padahk oang irai. <sup>14</sup> Nehn Ah allaluha wijs, Ih kapangda jounrik daksis men, oadoa Levi nihn Alphaeus, ma onnonohn nehn ah oaipisso. Jesus pwehng, “**Indoa pwilihla Ngoahi.**” Levi ken uhdahr pwilihla Jesus.

<sup>15</sup> Doari Jesus ken mwindihuang mwinge in umwen Levi-o. A jounrik daksis pwi apel armaj dipan dir pwili Jesus apel Nah sohnpadahkkok mwindihuang in sehpillo, pwa irai dir kin pwilpwili kahkahkahuj Jesus. <sup>16</sup> Epwi jounpadahk in Kojonneddo, ma kijehn Pharisee-ok, nehn irai kapangda Jesus Ah pwili mwinge ipen joangoan armaj dipan pwiai apel ipen jounrik daksis pwiai, irai idoakkoang Nah sohnpadahkkok pwa, “Da Ih kin pwilihki mwinge ipen joangoan armaj pwiai?”

<sup>17</sup> A nehn en Jesus rongda me, Ih pwehng irai, “**Jaudi armaj sihkei ioar anahne jounwini, a armaj johmwehu. Ngoahi joah indoahng pangin armaj pwung, a armaj dipan kan.**”

### *Peidek Doahroar Kaijihjol*

<sup>18</sup> Pehn oau nihn John jounpoapdaij sohnpadahkkok apel Pharisee-ok kaijihjol. A armaj pwi indoa ipen Jesus idoak Ipoa, pwa, “Amwda nihn John Jounpoapdaijjok apel nihn Pharisee-ok kin kaijihjol, a nihmw kan johkin pwili?”

<sup>19</sup> Jesus ken japoang irai, “**Pwa da? Kamwai lemleme ma sohnkapar in kamdipw in koapwoapwoaud oau pirin kaijihjol nehn en woal kamwohddo ne lel iparai? Irai johkak.**” <sup>20</sup> A oau anjoau ma pirin indoa ma woal kamwohddo pirin wijik jang irai; doari, ioar anjoauwo irai pirin kaijihjol.

\* **2:10** Nihn-Armaj Daidel oau oang Jounkoamoaur (Daniel 7)

**21 “Joh armaj kin deipinihoang dipwin likkoau kapw pohn likkoau in joakid mering, pwa dapwa likkoau kappwo pirin nurpene, soahrjang ekij likkoau merinngo doari soahroakkoo pirin koalikla.** **22 Pel joh armaj kin widekihoang wain kapw nehn pehk in kilin mahn mering, pwa wain kappwo nen koauwehla pehk merinngo; ohroj ara, wainno apel pehkko, nen ohla mwahl. Ioar ma wain kapw pwen mwehuwoanngoor pehk kapw.”**

*Peidek Doahr Sabbath*

**23 Sabbath oau Jesus wudla nehn mwoaswel in wihd oau. Nah sohnpadahkkok pwili Ih; irai ken dolihdi wehn wihd pwi.** **24 Pharisee-ok ken pwehng Jesus, “Kapang! Nihmw sohnpadahkkok wia me ma uhwoang kojonned in Sabbath.”**

**25 Jesus japoang irai, “Kamwai johkin wadek da David wiahduh anjoauwo ma ih apel pwilihoahk mwakohkohla?** **26 Ih dilda nehn umwen Koahs, kangla pilahwa joarwihok, nehn mwein Jamwrou Laplap Abiathar. Doahr kojonnreddo, jamwrouuwok oar ioar mweimweioang kang pilahwa pwiai. A David kangla apel kioang pwilihoahk irai en pwili kang.”**

**27 Jesus pel pwa, “Sabbath wiawihdahng mihn kemwehupen armaj, a jaudi armaj oang mihn kemwehupen Sabbath.** **28 Ioar mehwa Nihn-Armaj ioar Koau apel Koaun in Sabbath.”**

### 3

*Woal Poah Mwoasor men*

**1 Jesus pwuroahng dilda nehn jinakokehu, wijahu ma woal mwoasor poah men pwili minmine.** **2 Armaj pwi ma pwili mine wijahu nimen kadipoahki Jesus mehkij japwung, irai kin mwajmwajahnnoar Jesus ma Ih pirin kemwehuwihla min mwoasor poahu rehrin Sabbath.** **3 Jesus ken pwehng min mwoasor poahu. “Sohdahdo uhda mijen pokonne.”** **4 Ih ken idoak iparai pwa, “Da kojonnreddo mweidoahng kisai en wia Sabbath? Kisai en wia mehkij ma mwehu ke nauna? Kisai en jeuweje mourin armaj ke koauwehla?”**

Irai nennenla johpwa wia mehkij. **5 Jesus ken lioasla kapkapang irai, ih ken injinjuwedkihla irai koapsakai apel lamlam japwung. Ih ken lallahng woal mwoasor poahu, “Kailwe poahmmwen.”** Min mwoasorro kaillahr poahu, poahu ken mwehula dauluhl. **6 Pharisee-ok ken diljang nehn jinakokehu pokonpene ipen epwi ma kin nihn Herod pwihnnno; irai ken pilahnehda pwa irai en kojukdi Jesus.**

*Pokon Laplap oau in Poahrinjed in Lehu*

**7 Jesus apel Nah sohnpadahkkok inla in poahrinjed in Lehn Galilee, a pokon laplap oau kaujla Ih. Armajjok indoa jang Galilee, jang Judea,** **8 jang Jerusalem, jang Idumea, jang oaloap Jordan, apel jang kahnihmw in Tyre apel Sidon. Armaj pwiai pokonpene ipen Jesus pwa ihr rongda joang kapwuriamwei kan ma Ih kin wihwia.** **9 Ih pwehng Nah sohnpadahkkok irai en koaunopda oau pohs siksikko, ma Ih en doauda puwoa, pwa pokonno en joah jakahpajihla Ih.** **10 Pwa Ih kin kemwehuwihla armaj johmwehu dir, ioar mehwa irai kin jakahpajihla Ih nehn irai kin nimen pukkoang Ih.** **11 Pel armaj ma ngen jaus dilingla**

irai, nehn irai kin kapangda Ih irai kin kipdi mwohn Ih, rahrahu, pwahpwahpwa, “Koawoa ioar Nihn Koahs wa!”

<sup>12</sup> A Jesus ken iroahdi ngen jaussok en johpwa pwa inje Ih.

### *Jesus Pilda Woaroak Eijek Roahmen*

<sup>13</sup> Jesus indahla pohn dol oau; Ih ken pangin araihok ma Ih kin ipwilki en indoa Ipoa. <sup>14</sup> Ih ken pilda min eijke roahmen ma Ih panginki woaroak, Ih pwa, “Ngoahi pilda kamwai pwa kamwai en kin pwilpwili Ngoahi. Ngoahi pirin pel kadarwe kamwai pwa kamwai en lohkihjili Rongmwehu; <sup>15</sup> kamwai pirin pel anki manman in kaujjang ngen jaus kan ipen armaj.”

<sup>16</sup> Doari, ioar oadoan min eijke roahmennok ma pilpilda: Simon (Jesus kioang oadoa Peter); <sup>17</sup> James apel John, nihm Zebedee (Jesus kioang oadoara, Boanerges\*), woahwoahn mour in addoauwe nihm palar ke mwosmwos jongpao); <sup>18</sup> Andrew, Philip, Bartholomew, Matthew, Thomas, James nihm Alphaeus, Thaddaeus, apel Simon sohn pwihnin Zealot, <sup>† 19</sup> apel Judas Iscariot, woallo ma pangla Jesus.

### *Jesus apel Beelzebul*

<sup>20</sup> Jesus injang wijahu inlahng in umwahu. A pokon laplap oau pel pokonpene wijahu, ma kahrehda Ih apel Nah sohnpadahkkok johla kak mwinge ki johla anjoau. <sup>21</sup> Nehr epwi Ah peneineihok rongda me, irai inla ipoa pwa irai en oaloa apwali Ih; pwa armaj kan pwahpwahpwa pwa Ih ne japwungla nehn moange.

<sup>22</sup> Epwi jounpadahk in Kojonneddok ma indihdo jang Jerusalem siksikoa pwa Beelzebul ne dilingla Ih. Epwi pwa koaunin ngen jaus kan ma kioang Jesus manman in kajroahjang ngen jaus ipen armaj.

<sup>23</sup> Ih panginpene armajjok pwehng irai karajraj pwi: **“Imdoahr Jehsen ah kak kajroahla Jehsen?”** <sup>24</sup> **Ma wei oau pirin pwalpi-joang wiahda pwihni pwi ma pirin uhpene nehn pwungarai, weihoh johkak pwoaida, pwa ih pirin mwoarpijoang.”** <sup>25</sup> Ma peneinei oau pirin pwalpi-joang wiahda pwihni pwi ma pirin uhpene nehn pwungarai, peneineiho johkak pwoaida pwa ih pirin mwoarpijoang. <sup>26</sup> Doari ma wein Jehsen pirin pwalpi-joang wiahda pwihni pwi ma pirin uhpene nehn pwungarai, ih johkak woaroai, pwa ih pirin mwoarpijoang apel johla.

<sup>27</sup> **“Joh emen kak koauwehla umwen woal sihkei men pwa en pirapoa ah koapwoa kan ma ih johpwa koldi piroahpene woal sihkeiho. Ioar wioapoawahr doari ih kak pirapoa ah koapwoa kan.”**

<sup>28</sup> **“Ngoahi pwehng kamwai in mehlel pwa armaj kan kak oaloa mahkpen diparai kan ohroj, pel dipen lahlahwe.”** <sup>29</sup> **A emen ma pirin lahlahwe Ngen Joarwi, johpwa kak oaloa mahk in dihp oauwe, pwa ih ne wiahda dihp oau ma johpwa kak lapwda.”**

<sup>30</sup> (Jesus pwa me pwa epwi ihr pwahpwahpwa pwa ngen jaus ne dilingla Ih.)

\* **3:17** Boanerges Loapin lalin Aramaic kije uhdahn woahwoahki “nihm palar” a mourin woahwoahn addoauwe in loapin lal in Mwoakilloa: “mwosmwos jongpao”. Jesus kioang addoauwe nihm Zebedee kan pwa ara kin lamlam karwaro ke nehn kapehd karwaro (pel soahk Luk 9. 54-55). † **3:18** Zealot Soahk Mat. 10.4.

*Inen Jesus apel Riah kan*

<sup>31</sup> Inen Jesus apel riahk leldo. Irai mine likin ummwono nimen lalloang Ih. <sup>32</sup> Pokonno ma mwindi kapilpene Ih pwehng, "Koawoa kidal pwa inoammwo apel rioammwok minmine likinno, irai nimen suhwoang Koawoa."

<sup>33</sup> A Jesus japoang irai, "**Inje inoai, apel inje rioai kan?**" <sup>34</sup> Ih pel kapkapangjili pohn irai ma minmine ipoa, doar Ih ken pwa, "**Ioar inoai apel rioaikoa me.** <sup>35</sup> **Emen ma kin kapwaihahda injenen Koahs, ioar arai rioai apel inoai.**"

## 4

*Karajraj in Jounkamwoaroa*

<sup>1</sup> Jesus pel sapda padahkjili in poahrinjed in Lehn Galilee. Pokon laplap oau pokonpene Ipoa kahrehdha Ih ken doauda mwindi pohn pohs pas. Pohsso peipeipei nehn jeddo, a pokonno mine in poahrinjeddo. <sup>2</sup> Ih ken padahkihoang irai joang dihrdir in karajraj, doahroar Ah kin kalap wia nehn Ah padahk. Ih pwehng irai:

<sup>3</sup> **"Kamwai rong. Armaj men mine ma inlahng kamwroa ah liporrohk.** <sup>4</sup> **Doari, nehn ah kamwkamwroa ah liporrohk, epwi mwoardihoang nehn alin nehn mwoaswello, mahnsang pwi sangdo kangjang.** <sup>5</sup> **Epwi liporro kipdi nehn wija sakaikai ma pwirejjo poadpoad.** Liporrohk pispisin koapda pwa pwirejjo poadpoad. <sup>6</sup> **A anjoauwo ma joauwo dakda, suhkoahk pispisinnoar mengla pwa koalohraiok johpwa lel nehn wija loal.** <sup>7</sup> **Epwi liporrohk kipdi nehn pwungen suhkoa soaksoak.** A suhkoa soaksoakkok koapda kajasihkeihla irai; ioar irai ken johpwa uhwahki. <sup>8</sup> **A epwi liporrohk nehn pwirej mwehu; irai koapda, koalikla, uhwa mwehu; epwi uhwa min jilihjek, a epwi weneijek, a epwi epwiki.**"

<sup>9</sup> Jesus pel pwa, "**Doari, Armaj men ma mine sioa mihn rongrong, a ih en rong.**"

*Kahrpoan Karajraj kan*

<sup>10</sup> Doari, nehn en Jesus kalahpwukla, arai eijek roahmenno apel epwi ma pwili rong indoa ipoa pwa irai en poaki en kawoahwoahng irai karajraj kan. <sup>11</sup> Ih ken japoang irai, "**Oang kamwai mweimweioang en kidal manman rir kan doahr wein Koahs.** A oang irai kan ma minmine likin, irai pirin kidal joang ohroj jang in karajraj.

<sup>12</sup> **Pwa,**

**'Irai en kapkapang,**

**a pwen johpwa kapang,**

**Irai en rongrongrong,**

**a pwen johpwa woahwoahki,**

**pwa ma arai kapang, rong, oh woahwoahki, Irai nen okdeklahng Koahs**

**apel oaloa lapwdahn diparai kan.' "**

*Jesus Kwoahwoahda Karajraj in Jounkamwoaroawo*

<sup>13</sup> Jesus idoak iparai, pwa, "**Kamwai johpwa woahwoahki karajraj pase? A imdoahr amwai kak woahwoahki karajraj pwio? Doari, ioar doahr me:** <sup>14</sup> **Jounkamwoaroa, ioar ma kin kamwoar**

**mahjan in Koahs.**      <sup>15</sup> Epwi armaj doahr Liporrohk ma mwoardihoang nehn al kan. Nehn ahr kin rong mahjanno, Jehsen kin indoa koawehjang irai. <sup>16</sup> Liporro ma kin mwoardi oang nehn wija sakai woahwoahki irai kan ma kin rong oaloahda apel perenikhda.      <sup>17</sup> A johkin soangdi iparai, ma apwal oau ke kojkoj kin lel irai pwa padahkko, a irai kin pispis in lohdi.      <sup>18</sup> Epwi armaj kin doahroar Liporro siksikkok ma mwoardihoang nehn pwungen suhkoa soaksoak. Ioar irai ma kin rong mahjanno, <sup>19</sup> a ki pwunod in mourin jampah kan, noaroak in koapwoa kan, apel joangoan inoang sohrohr kan kin pwokda jakahpajihla mahjanno, kahrehda ken johpwa uhwahda. <sup>20</sup> Epwi doahroar liporro siksikoa ma mwoardihoang nehn pwirej mwehu. Irai kin rong mahjanno, oaloa, ken uhwa: epwi uhwa min jilihjek, epwi weneijek, a epwi uhwahda min epwiki.”

### *Lahm pehn Jepjep*

<sup>21</sup> Jesus pel uhjehla Ah sikesik oang irai, “Mine ipamwai ma kin okojda nah lahm kihdi pehn jepjep ke pehn pehd? Ih joah nen kihdahng nehn uhdahn dohiah?” <sup>22</sup> Johpwa me joaloang kij mine, ma johpwa pirin kajanjalda; pel johpwa me oakkoak kij mine, ma johpwa pirin kalohkjili. <sup>23</sup> Doari armaj men ma mine sioa mihn rongrong, a ih en rong!”

<sup>24</sup> Ih pel pwehng irai, “Kamwai soahk mwehu mehkije ma kamwai pirin rong! Mihn jonngohr ma kamwai pirin jongki epwi, ioar Koahs pirin jongki kamwai—apel koalikjang mehlel. <sup>25</sup> Pwa armaj ma anki mehkij, ekij pirin pel aluhwoang; a ma joh ah mehkij, pirin pel kihekjang mehu ma mine ipoa.”

### *Karajraj en Koakoairdahn Liporro siksik*

<sup>26</sup> Ih pel pwehng irai, “Wein Koahs doahroar armaj men ma kamwoar liporro siksikpwu nehn japwahu. <sup>27</sup> Nehn ah moair inpwong apel poahd in rehn, liporrohk kin koap apel koalkoalikla, a ih johpwa woahwoahki doahr mehpwiai kin wihiawi.      <sup>28</sup> Pwa pwirejjo ma kin kakoapihda liporrohu, kakoalikihla, apel kioang wah: sapdahu dipwdipw siksik kij, mwerin, ih kin wiahla suhkoa siksik, apel mwerin, uhwahda; a nehn wahu dirin liporro siksik. <sup>29</sup> Nehn en wah kan kin mah, armaj kin poaloahdi, kihpene, pwa anjoauwo ioar anjoau in doddol.”

### *Karajraj in Liporrohn Mustard*

<sup>30</sup> Ih pel pwa, “Da kisai pirin karjahng wein Koahs? Ke karajraj da kisai pirin doadoahkki pwa kisai en kawoahwoahda? <sup>31</sup> Ih doahroar liporrohn Mustard, ma keiou siksik nehn pwungen liporrohn suhkoa kan.      <sup>32</sup> A nehn a kamwoarmwoardi oang nehn pwirej, ih kin koapda apel koalikla wiahla suhkoa koalik pas, koalikjang suhkoahn nehn mwoaswel kan ohroj. Ih kajangpijoang, a mahnsang in pehnloanngé kan kin jokdo wiahda irai paj pehn ririn rah kan.”

<sup>33</sup> Jesus kawoahwoahng armaj kan en Koahs mahjan in joangoan karajraj pwiai doahroar arai en kin kak woahwoahki. <sup>34</sup> Joh kapahrak

oau Ih kin wiahng armaj kan ma Ih johkin doadoahkki karajraj; a nehn Ah kin kalahpwukla ipen Nah sohnpadahkkok, Ih kin kawoahwoahng irai karajraj ohroj.

*Jesus Kamoahjihdi Melmel oau nehn Jeddo*

<sup>35</sup> Injoausikin rehnnohr Jesus pwehng Nah sohnpadahkkok, “**Kisai dauluhlla oaloap pille.**” <sup>36</sup> Nehr irai koamwurla pokonno, sohnpadahkkok kerda pohn pohsso ma Jesus mine puwoa pwili jeila; epwi pohs pel pwili irai kijkijoula loappoauwo. <sup>37</sup> Doahr ken eng koalikda, ne koalik jaudahdo pohn pohsso, enkennoar kamweihdi.

<sup>38</sup> Jesus mine mwerin pohsso, moair a moange mine pohn Ah pillahu. Sohnpadahkkok panginda Ih, pwehng Ih, “Maing Jounpadahk, koawoa johpwa kaspoahki irai ne pirinken mehdii?”

<sup>39</sup> Jesus pwohrdahr, ruwojehda melmello, pwa, “**Uhdi!**” Ih pel pwehng nohk, “**Kamwai meleileidi!**” Anjoauwohr melmello uhdi, ken molundi dauluhl. <sup>40</sup> Ih ken pwehng irai, “**Da kamwai majpwehk ki? Da, kamwai kahjikkoar pwojonla?**”

<sup>41</sup> Irai majpwehkda koalik, pwahpene nehn pwungarai, “Inje min mine, ma eng apel no kin peikkoang?”

## 5

*Jesus Kemwehuwihla woal men ma Ngen Jausso Dilingla ih*

<sup>1</sup> Jesus apel Nah sohnpadahkkok kijoula oaloap Lehn Galilee apel dauluhllahng oaloap pillo, nehn japwen mihn Gerasa. <sup>2</sup> Jesus kerdihjang pohn pohsso, a woalmen ma ngen jaus dilingla ken aluhdo ipoa; ih indoa jang nehn joaujoau pwi, wija ih kin minmine. <sup>3</sup> Joh armaj men kakkoang woallo, pel joal pahrang kan johkak joalihdi; <sup>4</sup> pwa pehn dir ih kin joalkihdi joal pahrangngok in poah apel in ehn, a ih kin kamweidpijoang joal pahrangngok; johpwa emen kak koldi pwa ih sihkei. <sup>5</sup> In rehn inpwong, ih kin allaluhjili nehn joaujoau kan, apel nehnwoallo in pohn dol kan, rahrahu koauwehla palwoaroa ki sakai ingkoang kan.

<sup>6</sup> Doari, ih kapangdahr Jesus jang wija doh, ih kijoula, kipdi mwohn Ih, <sup>7</sup> rahrahu, pwahpwahpwa, “Maing Jesus, Nihn Koahs Laplap! Dahioau Koawoa nimen wiahng ngoahi? In oadoan Koahs, joah koalkoa ngoahi!” <sup>8</sup> (Ih pwahki me pwa Jesus pwa, “**Koawoa ngen jaus, injang ipen armaj menen!**”)

<sup>9</sup> Jesus idoak ipoa, “**Ia oadoamwen?**”

A woallo japoang Ih, “Oadoaioa ioar ‘Karej’ pwa kamai min dir!” <sup>10</sup> Ih ken engdehnki Jesus en joah kaujjang ngen jaussok nehn japwahu.

<sup>11</sup> A ipen wijahu, pwihnin pij oau minmineo, mwingmwinge in imwin dol oau. <sup>12</sup> Ngen jaussok ken poakihda ipen Jesus en kadarla irai apel mweidoahng irai en inla dilloang nehn pijjok. <sup>13</sup> Doari Jesus ken mweidoahng. Ngen jaussok ken injang ipen woallo, wud inla dilloang nehn pijjok. Dapwa pij riekid, kijoudihla duhla nehn lehu.

<sup>14</sup> Sohn apwali pijjok kaula nehn kahnihmmwo, nehn koaujoangkan likin kahnihmmwo, pwehng armaj kan da wiawi. Doahr ihr ken inla kapang dahkij ma wiawi. <sup>15</sup> Nehn ahr lel wijahu ma Jesus mine, irai liskihla ahr kapangda woalwa ma kin dirin ngen jaus mwowoa, ne mwindi wijahu meleileidi, mine nehn likkoau mwehu,

mwomwen armaj mwehmwehu men. Irai ken mijikda. <sup>16</sup> A iraihok ma kadehdehki mijarai manmanno, irai pwehng ihr da ma wiawihoang woallo ma dirin ngen jaus apel mwomwen pijjok. <sup>17</sup> Irai ken poakihda Jesus en injang nehn japwaraiho.

<sup>18</sup> Nehr en Jesus doaudahng pohn pohsso, woallo ma ngen jaus dilingla poaki ih pwehng Jesus, “Mweidoahng ngoahi pwa ngoahi en pwilhwe Koawoa!”

<sup>19</sup> A Jesus johpwa mweidoahng, Jesus pwehng ih, **“Inla in umwoammwo, ipen oamw peneineihok, pwehng irai doahr manman koalik ma Koaunno wiahng koawoa, apel doahr Ah kalahngan oang koawoa.”**

<sup>20</sup> Woallo ken inlahr pwahjili nehn wein Decapolis\* manman koalikko ma Jesus wiahng ih; irai ken inenin pwuriamweikihla.

### *Jesus Kasihkeida nihn Jairus Jerpein*

<sup>21</sup> Jesus pwuroahng pwurla oaloap lehu. Pokon koalik oau aluhpene pidekihpene Ih in poahrinjeddo. <sup>22</sup> A koaunin jinakoke men, oadoa Jairus, rukdihoang in pwoalkoa, <sup>23</sup> engdehnla nehn ah poakpoak, pwa “Maing, noai jerpein siksik kij nimwennoar mehdii. Menlau inla kihdahng poahmmwen pohn ih pwa en sihkeida apel kak mour.”

<sup>24</sup> Jesus uhda pwilhla jourmajjo. A pokon koalikko pel kaujla. Wija ohroj nehn allo ken koaisla.

<sup>25</sup> Lihmen pel pwili mine wijahu, ma anki johmwehuin insa pwilpwil oaroain johnpar ejek riau. <sup>26</sup> Ih ken roaproapoan mour ipen jounwini dir, doadoahkkihla nah mwani kan ohroj. Apwen johpwa kaspoa, pwa pwen naunaunahlahr. <sup>27</sup> Nehr en liho rongda doahr Jesus jang ipen armaj kan, ih ken sohlahng likinjarkin, pukkoangdi Ah likkoauwo, <sup>28</sup> pwehng pein ih, “Ma pwen Ah likkoauwohr ngoahi pukkoang, ngoahi nen sihkeida.”

<sup>29</sup> Doari, ih ken pukkoang en Jesus likkoauwo, a nehn anjoauwohr koarkoarin insahu enngengla; liho ken poahmda jang nehn palwoaroa pwa ih ne sihkeidahjang ah johmwehuwo. <sup>30</sup> Nehr anjoauwohr Jesus poahmda sihkei kij injang ipoa, Ih ken jipwipwoaljili nehn pokonno, pwehng ihr **“Inje ma pukkoang Oai likkoauwe?”**

<sup>31</sup> Nah sohnpadahkkok pwehng Ih, “Koawoa kapang pwa pokonne koaisihla koawoa; a koawoa ken pwa **‘Inje pukkoang Ngoahi?’** ”

<sup>32</sup> Jesus ken jipwipwoaljili pohn pokonno pwa en kapangda inje ma wia mehu. <sup>33</sup> A liho, nehn ah kidalda dahkij wiawihoang, ih ken majpwehkda roarroar Peter, sohdo ipoa, rukdi in pwoalkoa, pwehng Jesus me ohroj. <sup>34</sup> Jesus ken pwehng liho, **“Noai jerpein, oamw pwojon ioar kasihkeida koawoa. Doari, alwe in peren pwa koawoa ne sihkeidahjang oamw johmwehu en.”**

<sup>35</sup> A nehn Ah lallallal, pakair oau lel ipen Jairus, jang in umwahu, ma pwa, “Nihmw jerpeinno ne mehdii; joah kadroapwoahki Jounpadahkken en indoaa.”

<sup>36</sup> Jesus johpwa soahk; Ih pwehng Jairus, **“Koawoa en joah mijik, a koawoa pwojonnoar.”** <sup>37</sup> Ih ken johpwa mweidoahng emen en pwilihla Ih, ioarroar Peter, James apel riahu John. <sup>38</sup> Nehr ahr lel umwen jourmajjo Ih kapang doahr ahr loakloakoa apel

\* **5:20** Decapolis Loapin lal in Greek ma woahwoahki “kahnihmw ejek”.

joangjoangoang<sup>39</sup> Ih ken dilda pwehng irai, “**Da kamwai loakloak-loakoahki apel joangjoangoangki? Jerihن johpwa mehdı, ih moahmoahmoair.**”

<sup>40</sup> Irai uruhrkı apel kapiski Ih. Doari, ih ken kadilihjang arai ohroj nehn ummwö, a mwerin, Ih ukda jemen jerihö apel inah apel Nah sohnpadahk jilmenno, Ih ken dilda nehn wijahu ma jerihö okdekda. <sup>41</sup> Ih ken kolda poahn jerihö pwehng, “**Talitha koum,**” ma woahwoahki, “**Jerpein pwohrda!**”

<sup>42</sup> Doari, nehn anjoauwohr jerpeinno ken pwohrda sapda allaluhjili. (Ih johnpar ejek riau) Arai ken inenin pwuriamweikihla mehkije.

<sup>43</sup> Jesus ken inoapwihdi arai en johpwa pwahpwahpwahjili mehkije; Ih ken pwehng irai en kamwinge jerpeinno.

## 6

### *Mihn Nazareth Kajohwe Jesus*

<sup>1</sup> Jesus injang wijahu, inlahng nehn uhdahn Ah kahnihmmwo, a Nah sohnpadahk kan pel pwilihla. <sup>2</sup> Nehn Ah lel Sabbath, Ih ken sapda padahk nehn jinakokehu. Mine min dir mine wijahu pwuriamweikihla nehn ahr rong Ah padahk. Arai ken pwahpene nehn pwungarai, “Woalmene oaloahjang ia joangpwiai? Joangoan loalkoang dahioau mine Ipoa? Imdoahr Ih kak wia joangoan manman pwiai? <sup>3</sup> Jaudi kahpinsoa wa me, nihن Mary, rien James, Joses, Judas apel Simon? Jaudi riah lihkoa ma kin minmine ipasai?” Arai ken kajohwe Ih.

<sup>4</sup> A Jesus pwehng irai, “**Wija ohroj joukohp kin woaun, ioarroar wija ma joh wahu in ih, ioar nehn ah wijahu, ipen ah peneinei.**”

<sup>5</sup> Ioar Ih johpwa wiahda manman oau nehn Ah wijahu, a min johmwehu pwi ma Ih kihda poah puwoa, kemwehuwihla. <sup>6</sup> Ih ken pwuriamweikihla ahr joah pwojon.

### *Jesus kadarpijoang min Eijke roahmennok*

Jesus aluhjili nehn koujapw kan, padpadahk oang armaj kan. <sup>7</sup> Mwerin, Ih panginpene ejek roahmenno, kadarpijoang wad roahmen. Ih kioang irai manman in kajroahjang ngen jaus kan. <sup>8</sup> Ih pwehng irai en johpwa wa mehkij nehn arai jeiloak oauwe, ioarroar jokonpas; arai en johpwa wijik mwinge ke pehk in jeiloak, ke mwani nehn ahr pwoaloj kan. <sup>9</sup> Irai kak sandel, a irai en joah wahda joakid riau mihn ngalngal. <sup>10</sup> Ih pel pwehng irai “**Nehn amwai pirin lel ekij wija, kamwai minminehr ipen irai ma kajamwo kamwai nehn umwaraihok, oaroh kamwai injang wijahu.**” <sup>11</sup> A wijahkij ma irai johpwa nimen kajamwo kamwai ke nimen rong kamwai, kamwai diljang wijahu jiped jang pwirejpar in pwoalkoamwai mihn kapoahm oau me oang irai.”

<sup>12</sup> Min ejek roahmenno ken aluhpijoang kapahrak oang armaj ohroj irai en koaluyla apel wiliakapwla. <sup>13</sup> Irai kauj jang ngen jaus dir ipen armaj kan apel salipki le min johmwehu dir kemwehuwihla irai.

### *Kojkojdihn John jounpoapdaij*

<sup>14</sup> Nahmwarki Herod rongda mehpwiai ohroj, pwa Jesus wadwadla wija ohroj. Epwi pwahpwahpwa pwa ma John jounpoapdaij ioar ne pwuroahng mourda, ioar kahrehda Ih kak wia joangoan manman pwiak.

<sup>15</sup> Epwi pwa Ih Elijah.

Epwi pwahpwahpwa pwa joukohp men Ih, doahroar epwi joukohp in mehjjok.

<sup>16</sup> Nehr en Herod rongda me, ih pwa, "Ioar John jounpoapdaij me, ma ngoahi poaloahjang moange, ih ne pwuroahng mourda." <sup>17</sup> Pwa ih kadarla John en joaldi, ih pwa en peidek oang nehn kalpwuhj pwa Herodias, pahien riahu Philip ioar Herod wud painkihla. <sup>18</sup> John jounpoapdaij johkin uhdihjang koapwung oang Herod ah japwunng, ih pwa, "Johpwa pwung koawoa painkihla pahien rioammwo."

<sup>19</sup> Ioar kahrehda Herodias lioassoangkihda John, nimen kajukdi; a johkak; <sup>20</sup> pwa Herod kin mijik John, pwa ih kidal pwa John woal pwung apel joarwi men. Ioar mehwa ih ken kin jiloahjang me nauna apel kin perenki rong ah sikesik kan, mihndahr ma nehn kapehdin kin soausoaula anjoau ohroj nehn ah kin rong.

<sup>21</sup> Doari Herodias kidalda anjoau mwehu rehnin en Herod noaisikdiho. Pwa rehnno Herod wiahda kamdipw oau oang nah jourmaj kan, oang koaunin nah karejjok, apel oang armaj laplapin wein Galilee. <sup>22</sup> Doari nihn Herodias jerpeinno pwokdo kahkahlek in kamdippwo; Herod apel sohn kamdippwo inenin perenkihda. Ioar Herod pwehngkohoang jerpeinno, "Mine mehkij koawoa anahne? Poaki ipoai, pwa ngoahi pirin kioang koawoa." <sup>23</sup> Ih ken kahula apel inoaukihdi pwa, "Ngoahi pirin kihwe mehkij joah lipilpil, mihnda ma pel oaloap in oai wei."

<sup>24</sup> Jerpeinno dilla idoak ipen ah nohnohu, pwa, "Nohno, da ngoahi en poaki?"

Ah nohnohu japoang, "Moangoan John jounpoapdaij."

<sup>25</sup> Jerpeinno pwurlahng ipen nahmwarkiho, pwehng ih, "Noah nimen koawoa en kihdahng ngoahi apkas moangoan John jounpoapdaij nehn oau pileis en!"

<sup>26</sup> Me ken kainjinjuwedihla nehn kapehdin nahmwarkiho; ih ken johpwa nimen kainjinjuwedihla jerpeinno pwa ih inoau mwohn sohn kamdippwo ohroj. <sup>27</sup> Doahr ih ken pispis kadarla nah jounpei, pwehng pwa moangoan John jounpoapdaij en wijkdo. Jounpeiho inlahr nehn kalpwuhjjo, poaloa jang moangoan John jounpoapdaij. <sup>28</sup> Ih pwurdo wa moangehu nehn pileis oau, ih ken kioang jerpeinno; jerpeinno ken wud kioang ah nohnohu. <sup>29</sup> Nehr nihn John sohnpadahkkok rongda me, arai pwurla oaloa palwoaroa wahla jaripdi nehn joaujoau oau.

### *Jesus Kamwinge Woal Limekid*

<sup>30</sup> Mwerin woaroakkok ahr pwurpene, irai pokonpene ipen Jesus pwa arai en kajalehioang me ohroj ma irai ne wiahda apel padahk ohroj ma irai kawoahwoahda. <sup>31</sup> Armaj dir kin pwurpwuroa Jesus apel Nah sohnpadahkkok kahrehda johla anjoau in arai mwinge. Ioar Jesus pwehngkohoang sohnpadahkkok, "**Kisai inla kalahpwukla mijkoalkoal nehn japwoahnno, wijahu ma kamwai kak koam-moal.**" <sup>32</sup> Arai ken doauda pohn pohs oau pwa irai en inlahng kalahpwukla wijah kij.

<sup>33</sup> A armaj dir kapang arai mwoakid doahr ken kidal da. Irai ken kijoulahng wijahu jang nehn kahnihmmwok, irai lello mwohrai.

<sup>34</sup> Nehr en Jesus doaudihjang pohn pohsso, Ih kapangda pokon koalik

oau, Ih ken ipwilkihda irai. Pwa irai doahroar polohn jihpw oau ma ne joh jiloapoarai. Doari, Ih ken sapda kawoahwoahng irai joang dir. <sup>35</sup> Injoausik pene, Nah sohnpadahkkok indoa Ipoa, pwehng Ih, "Maing, ne pwong a japswoahn oau me. <sup>36</sup> Ken kadarpijoang pokon oauwe, pwa irai en alwe nehn kahnihmw siksik kan apel koujapw koaroan kan pwa irai en pein dupukda kanrai mwinge."

<sup>37</sup> A Jesus japoang irai, "**Kamwai kapwa kamwinge irai.**"

A irai pwehng Ih, "Doari, koawoa mwehuki kamai en inla dupukda mwinge woahroar mwani silper riepwiki\* kamwingehki irai?"

<sup>38</sup> Jesus idoak, "**Lopwonin pilahwa doapoa mine ipamwai? Kamwai kapang apel wadek.**"

Nehn ahr ne wadekda irai pwehng Ih, "Lopwonin pilahwa limoau apel mwumuw roahmen."

<sup>39</sup> Jesus pwehng sohnpadahkkok en wiahda pwiinh siksikpi pokonno apel kamwindihoang irai pohn re kan. <sup>40</sup> Irai ken mwindi in pwiinhnpwi, epwi wad epwiki a epwi wad limeijek. <sup>41</sup> Doahr Jesus ken pwoakda lopwonin pilahwa limoau apel mwumuw roahmen, jardahla nehnloanne kapingkalahngannoang Koahs. Ih ken sipwangpijang pilahwahk kioang Nah sohnpadahkkok pwa irai en nehkkoang armajjok. Ih pel nehkkoang irai ohroj mwumuw roahmenno. <sup>42</sup> Armaj ohroj mwinge oaroh moadla, <sup>43</sup> Sohnpadahkkok dowihda luhwen pilahwahk apel mwummwok wiahda kiam eijkek riau. <sup>44</sup> Woal ma pwili kang pilahwahk, irai min limekid.

### *Jesus Alu Pohn Jeddo*

<sup>45</sup> Mwerin me Jesus pispis pwehng Nah sohnpadahkkok, irai en doauda pohn pohs oau jeila Bethsaida mwohn Ih, oaloap jeddo, nehn Ah pirin kadarpijoang pokonno. <sup>46</sup> Nehn Ah kadarpijoang irai, Ih doaudahla pohn dol oau pwa en kapkap.

<sup>47</sup> Injoausikdi, pohsso ne mine oh nehn pwungen lehu, a Jesus kalkalahpwuk in poahrinjeddo. <sup>48</sup> Ih kapang doahr en sohnpadahk kan engdehn jeijejei nehn lehu pwa irai jei pallan enngo. Doari inlahng injohrehn, nehn pwungen kiloak jiluh apel wonou, Ih inla iparai alu pohn lehu, <sup>49</sup> a irai kapang Ah allalu pohn lehu, irai pwa eni men, <sup>50</sup> ioar irai rahukihda majpwehkda nehn irai kapangda Jesus. Ih ken pispisinnoar lallahng irai, pwa, "**Kamwai sihkei! Ngoahi me, kamwai joah majpwehk.**"

<sup>51</sup> Ih ken doauda pohn pohsso pwilihda irai; anjoauwohr enngo uhdi. Sohnpadahkkok pwuriamweikhla <sup>52</sup> Pwa irai johpwa woahwoahki manmanno ma Jesus kamwingehki armaj limekiddo, pwa nehn kapehdirai pe ros oar.

### *Jesus Kemwehuwihla Armaj Johmwehu kan nehn Gennesaret*

<sup>53</sup> Irai kosehla lehu, lellahng Gennesaret peidi ipen jappwo, piroahdi pohsso. <sup>54</sup> Nehn irai doaudi jang pohn pohsso, armaj kan pispisinnoar kidalda Jesus. <sup>55</sup> Irai kijoupijoang wija ohroj sapda wahdohng ipen Jesus johmwehuwok pohn mihn wijik kan wija kan ma irai rong pwa Ih mine. <sup>56</sup> Apel wija ohroj ma Ih kin inla, nehn kahnihmw siksik kan, ke nehn kahnihmw koalik kan, ke nehn likin kahnihmw kan, armaj

\* <sup>6:37</sup> MWANI SILPER: mwani silper oau ioar dupkoan sohn doadoahk men rehn oau nehn anjoauwo (soahk MAT 20.2)

kan kin kihdi nihrai johmwehu kan wijahn noasnoas kan, poaki Ih en mweidoahng irai en pukkoang ikin Ah likkoauwo. Doari, irai ohroj ma kin pukkoang Ah likkoauwo kin sihkeida jang arai johmwehu kan.

## 7

### *Doahr Padahk in mihn Mehjjok*

<sup>1</sup> Pharisee pwı̄ apel jounpadahk in Kojonnepwi indoa jang Jerusalem pokonpene ipen Jesus. <sup>2</sup> Irai soahkda doahr epwi Nah sohnpadahkkok kin mwingehki poa jamin—nehn ahr johkin amwumw doahr siahkko ma Pharisee-ok pwehng armaj ohroj en wia.

<sup>3</sup> (Pwa Pharisee-ok apel mihn Jew ohroj, kin japjang siahkkok ma irai oaloa jang ipen mihn Jew in mehjjok: ioar ma irai johkin mwingehki ma arai johpwa amwumwla doahr siahk koadaoaudioado jang mihn mehjjok. <sup>4</sup> Irai johkin kang mehkij ma wijikdo jang wijahn noasnoas kan, ma irai johpwa amwunla.\* Irai kin pel wia siahk dir ma irai oaloahjang mihn mehj kan: doahroar amwumw mwoak, amwumw pileis, amwumw pwohl prahs, apel pehd kan.)

<sup>5</sup> Pharisee-ok apel jounpadahk in Kojonneddok idoak ipen Jesus, pwehng Ih, “Maing, amwda nihmw sohnpadahk kan johkin pwilihki kapwaihahda siahk koadaoaudioado en jamasai mihn mehjjok, nehn irai kin pwili mwinge a johkin amwumwla.”

<sup>6</sup> A Jesus japoang irai, “**Mehlel oar pwa uhdahn pwung en Isaiah kohpda doahr amwai mwalaun en, doahr ma ne insingdi. ‘Koahs pwa, armaj pwiai kin woawiki Ngoahi jang in arai lal a mohngiongirai inenin dohjang Ngoahi.**

<sup>7</sup> **Johpwa kaspoan ahr kin joarwi oang Ngoahi, pwa irai kin padahki kojonné in armaj, a irai karaunki pwa en Koahs Kojonné.’**

<sup>8</sup> Ih pel pwa, “**Kamwai kin kerpihla kojonné in Koahs, a kin injinohkihoar kapwaihahda siahk kadoaudioau in armaj kan.**”

<sup>9</sup> Ih pel doaudioaula pwa, “**Kamwai inenin loalkoangin joah oaloahda kojonné in Koahs, pwa kamwai en kauj pein amwai padahk kan.**” <sup>10</sup> Pwa Moses koajoanehdi pwa, ‘Koawoa woawiki joamoamw apel inoamw,’ apel ‘**Ma emen ma pirin lahlahwe jamah ke inah, ih pirin kojkojdi.**’ <sup>11</sup> A kamwai wud kin padahkihwe, ‘**Ma armaj men anki ekij ma ih kak jeuwejehki jamah apel inah, a kin pwa, “Corban me”** (woahwoahki “oang Koahs”), <sup>12</sup> ih pwa ih ne johla anki pwukoahn jeuweje jamah apel inah.’ <sup>13</sup> Doari, ioar doahr amwai kin koauwehla mahjan en **Koahs nehn amwai kin pein padahkihoang armaj kan siahk kan ma kamwai kin pein wiahda. Apel mine siahk dir ma doahroar me ma kamwai kin wihiwa.**”

### *Dahioau kin Kajaminihla Armaj*

<sup>14</sup> Jesus pel pangindo pokonno Ipoa, pwehng irai, “**Kamwai rong apel woahwoahki mwehu me:**” <sup>15</sup> **Johpwa mehkij ma kin aluhwoang nehn koawoa jang likin kak kajaminihla koawoa, pwa**

\* <sup>7:4</sup> Irai johkin kang mehkij ma wijikdo jang wijahn noasnoas kan, ma arai johpwa amwunla. Ke: Irai johkin kang mehkij jang nehn wijahn noasnoas kan ma irai johpwa amwumwla

**mehkan ma kin injang loaloa, ioar ma kin kajaminihla koawoa.**

**16 (Kamwai rong ma mine siamwai mihn rong wija.)”**

17 Nehr Ah injang ipen armajjok dilda nehn ummwo, Nah sohn-padahkkok idoak Ipoa woahwoahn karajraj oauwe. 18 Ih ken pwehng irai, “**Da, kamwai johpwa loalkoang jang armaj pwian? Kamwai jehjoa pwa joh mehkij mihn likin armaj kin dilda loaloa kajaminihla, 19 pwa ih johkin inla nehn mohngiong, pwa nehn ah pehk in mwingehu, wijahu a ih kin injang loaloa inla likin palwahrro.**” (Nehr Ah pwa me, Jesus kadehdehda pwa joangoan mwinge ohroj mwehu oang armaj.)

20 Doahr Ih ken pwa, “**Me kin indahjang nehn armaj, ioar ma kin kajaminihla armaj 21 pwa jang loaloan armaj, jang nehn ah mohngiong, ma lamlam nauna kan kin indahjang, ma kin kahrehoang nehn dipen siahk nauna, nene, pirap, kojarmaj, kamwahl, 22 noaroak apel wia joangoan siahk nauna kan ohroj; kapweipwei armaj, nauna joaroa, pihrin, lahlahwe aklaplap apel joah injino— 23 joang nauna pwiai ohroj kin sapjang loaloan armaj, ioar kin kajaminihla armaj.**”

### *En Lihmen Pwojon*

24 Jesus ken inlahjang wijahu, inlahng nehn wein Tyre. Ih dilda nehn ummwo a Ih johpwa nimen armaj kan en kidal pwa Ih mine wijahu; a Ih johkak joaloangla. 25 Pwa lihmen ma ngen jaus dilingla nah jerpeinno, liho kidalda pwa Jesus mine wijahu, ih ken dildahr Ipoa nehn ummwo dairukdihoang in pwoalkoa. 26 Lihm likin men ih, ih noaisikdi Phoenicia nehn wein Syria. Ih ken poaki ipen Jesus en kaujjang ngen jausso ipen nah jerpeinno. 27 Doari Jesus ken japoang, pwehng ih, “**Kisai kamwinge jeri kan mijoa, johpwa pwung en kihjang kenen jenihan mwinge peidlalng doahk kan.**”

28 Liho japoang pwehng Ih, “**Mehlel Maing, a doahk kan kin pel pwili kang in kenen jeri kan pehn sehpil kan!**”

29 Jesus ken japoang, “**Pwa doahroar oamw pajpoang en, alwe in umwoammwo; pwa ngen jausso ne injang ipen nihmw jerpeinno.**”

30 Liho ken pwurla in umwahu kidalda pwa nah jerpeinno onohn nehn dohiahuh; a ngen jausso ne injang ipoa.

### *Jesus Kemwehuwhla Woal Pongpong apel Jehjoa Lallal men*

31 Jesus inlahjang Tyre, Ih wud ipen Sidon, inlahng Lehn Galilee, kosehla wein Decapolis. 32 Armaj pwi ken ukdohng Ih woal pongpong apel jehjoa lallal men, poaki en kihdahng poah pohn ih. 33 Jesus ken ukjang woallo nehn pokonno, Ih ken dilimmoang jandin poah nehn pwokin sioa, kioang pilen oawoa in jandin poah, jairki loawoan woallo. 34 Jesus ken jardahla nehnloanne, pwahla, “**Ephphatha,**” ma woahwoahki, “**woahjekpijoang!**”

35 Anjoauwohr pwokin sien woallo woahjekpijoang apel joalin loawoa lapwadekla; ih ken sapda lallal. 36 Jesus ken pwehng ihr ohroj en johpwa pwehng emen mehkije. A doahr uhwen lal sihkei ma Ih wiahng arai, ioar doahr sihkei in ahr lohkihjili manman oauwe. 37 Irai ohroj ma pwili rong wioapoan manman oauwe, irai ken pwuriamweikhla pwahpwahpwa, “Me ohroj Ih kin wiahda inenin

mwehu! Pwa Jesus kin nimen armaj pongpong kan en rongda wija apel kalallalihda armaj loahsoang kan!"

## 8

### *Jesus Kamwinge Armaj Pahkid*

<sup>1</sup> Pokon koalik oau pel pwuroahng wiawi ipen Jesus rehnrok, a joh me irai en kang. Ih ken panginpene Nah sohnpadahkkok pwehng irai, <sup>2</sup> "Ngoahi ipwilikhda armaj pwiai pwa irai minminehki Ipoai rehn jiluh, doahr ne pel rojla kanrai mwinge." <sup>3</sup> Ma Ngoahi kadarla irai in umwaraihok joah kang mehkij, irai kak oar mwehlehilla nehn al kan, pwa epwi irai indoahjang wija doh."

<sup>4</sup> Nah sohnpadahkkok idoak, "Armaj pirin kihjang ia nehn japwsoahn oauwe mwinge ma pirin isar oang kamwingehla joangoan koalik in pokon oauwe?"

<sup>5</sup> Jesus idoak oang irai, "**Lopwon in pilahwa doapoa mine ipamwai?**"

A irai japoang, "Lopwon ijuh."

<sup>6</sup> Jesus ken pwehng pokonno en mwindi pohn mohk. Ih ken pwoakda lopwon in pilahwa ijuhwo, kapingkalahnganki oang Koahs, sipwangpijoang, kioang Nah sohnpadahkkok pwa irai en nehk oang pokonno. Irai ken nehpijoang. <sup>7</sup> Mwumw pwi pel mine iparai; Jesus pel kapkapki, pwehng sohnpadahkkok irai en pel nehk oang pokonno.

<sup>8</sup> Pokonno ken mwinge oaroh moad—ihr ohroj dapwa armaj pahkid.

<sup>9</sup> Sohnpadahkkok audohda kiam ijuh oaroh dir, luhwen mwingehk. Jesus ken kadarpijoang pokonno, <sup>10</sup> Ih ken doauda pohn pohs pas pwili Nah sohnpadahkkok dauluhllahng nehn wein Dalmanutha.

### *Pharisee-ok Poaki Manman oau jang ipen Jesus*

<sup>11</sup> Pharisee pwi indoa sapda akpwung oang Jesus. Irai nimen widingehdi, ioar ihr poakihki en wiahda oau manman jang nehnloanng. <sup>12</sup> Jesus pwuriamweikihla pwa, "**Da armaj in anjoau kije poakihki manman oau jang nehnloanng? Ngoahi pwehng kamwai in mehlel, johpwa manman pirin aluhwoang di oauwe.**"

<sup>13</sup> Ih ken injang irai pwuroahng doauda pohn pohsso japhallahng oaloap jeddo.

### *Ihs in Pharisee-ok apel Ihs in Herod*

<sup>14</sup> Sohnpadahkkok moalkoahla wahda kanrai pilahwa; ioarroar pilahwa pas mine iparai pohn pohsso. <sup>15</sup> Jesus koahkoahlik oang irai pwa, "**Kamwai kalke kamwai jang ihs in Pharisee kan apel ihs in Herod.**"

<sup>16</sup> Irai sapda siksikoahpene nehn pwungarai, pwa, "Pwa joh pilahwa ipasai ioar Ih pwahki me."

<sup>17</sup> Jesus kidal pwa da irai pwahpwahpwa, Ih idoak iparai, "**Dahkij kamwai siksikoa pwa joh pilahwa ipamwai? Kamwai kahjikkoar marainkihla joang kan? Kamwai inenin nehn kapehd rosros!**" <sup>18</sup> Mine pwoaroan mijamwaikan—a da kamwai joah kapangki wija? Mine siamwaikan—a da kamwai joah rongki wija? <sup>19</sup> Kamwai moalkoahla lopwon in pilahwa limoauwo ma Ngoahi kamwingehkihla armaj limekiddo? Kiam doapoa kamwai audohda jang luhwen mwingehk?"

Irai pwehng Ih, "Min eijkek riau."

**20 "A lopwon in pilahwa ijuhwo ma Ngoahi kamwingehkihla armaj pahkiddo? Kiam doapoa kamwai audohda jang luhwen mwingehk?"**

Irai pwehng Ih, "Min ijuh."

**21 A Ih idoak iparai, "A kamwai kahjikkoar woahwoahkihla?"**

*Jesus Kemwehuwihla Woal in Bethsaida Majkun men*

**22** Irai lel Bethsaida; wijahu armaj pwi ukdohng Jesus woal majkun men poaki en pukkoang. **23** Jesus oaloa poahn min majkunno uklahng likin koaujoan. Mwerin Ah andipoahdi pohn pwoaroan mijoahk, kihdahng poah pohn woallo, Jesus idoak ma ih ne kapang wija ke joah.

**24** Woal majkunno poahdpijoang pwehng Jesus, "Maing, ngoahi kak kapang armaj kan, a doahrma ma pwen suhkoahpwi allaluhjili."

**25** Jesus pel pwuroahng kihda poahk pohn pwoaroan mijen woallo, woallo pwuroahng poahdpijoang; a me ne mwehula, ih ne kak kapang me ohroj mwehu. **26** Jesus ken kadarla ih in umwahu, pwehng, "**Alwe in umwoammwo, koawoa johpwa pwurla nehn koaujoanno.**"

*En Peter ah Kajalehda doahroar Jesus*

**27** Jesus apel Nah sohnpadahkkok inlahng nehn koujapw pwi ipen Caesarea Philippi. Ih idoak iparai nehn allo, pwa, "**Inje ma armaj kan kin pwahki Ngoahi?**"

**28** A irai japoang, "Epwi kin pwa koawoa John jounpoapdaij, epwi pwa koawoa Elijah, a epwi pwa koawoa emen joukohp in mehjjok."

**29** A Ih idoak iparai, "**A kamwai, inje kamwai pwahki Ngoahi?**"

Peter japoang, "Koawoa ioar Messiah."

**30** Jesus kainoapwihdi irai en johpwa pwehng emen.

*Jesus pwa doahroar Ah pel Loklok apel Mehdi*

**31** Jesus sapda kawoahwoahng Nah sohnpadahkkok doahroar Nihn-Armaj uhdahn pirin loklok koalik, jekenkenla pehn jourmajjok, jamwrou laplappok apel jounpadahk in Kojonneddok. Ih pirin kojkojdi, a mwerin rehn jiluh Ih pirin iejda. **32** Ih pwehng irai mehpwiai in janjal. Peter kalahpwukihla Jesus wijahu, sapda koapwung oang Ih. **33** A Jesus pwurla kapang Nah sohnpadahkkok, koapwung oang Peter, "**Alwe jang Ngoahi Jehsen, pwa oamw lamlam en, jaudi jang ipen Koahs a jang ipen armaj.**"

**34** Jesus ken kapokorpene armaj dir apel Nah sohnpadahkkok, pwehng irai, "**Ma emen in kamwai nimen indoa pwili Ngoahi, en uhdahn moalkoahla pein ih, wahda ah lohpwu, pwilihla Ngoahi.**

**35** Pwa emen ma nimen doaroahla ah mour ih pirin luhj jang; a emen ma mihndahkihla ah mour ki Ngoahi, apel rongmwehuwo, ih pirin mourla. **36** Pirin mine kaspoan oamw en ankihla jampah pwon, a luhj jang oamw mour? **37** Joh douluhl, joh mehkij koawoa kak kihda pwa en japahl oang oamw mour. **38** Ma emen pirin mehkki Ngoahi apel Oai padahk ipen armaj in di nauna apel dipan oauwe, ioar Nihn-Armaj pirin pel mehkki ih nehn Ah pirin indoahki lingin Jamahu pwilihki Nah sohnloang joarwi kan."

**9**

**1** Ih pel pwehng irai, “**Ngoahi pwehng kamwai in mehlel, pwa epwi kamwai ma mine me, jehpirin mehdi, oaroh irai kapang wein Koahs ah pirin indoa in manman koalik.**”

*Jesus Lingla*

**2** Mwerin rehn wonou Jesus ukda Peter, James apel John, ukdahla irai pohn dol illoahioau, pwa irai en kalahpwukla. Ih ken wikla mwohrai **3** Ah likkoauwok lingla pel korohrohla. Joh armaj men nehn jampah kak kakorohroihla likkoau doahroar me. **4** Sohnpadahk jilmenno kapangda Elijah apel Moses ara siksikesik oang Jesus. **5** Peter pwehng Jesus, “Jounpadahk, inenin mwedu asai minmine wijahkije. Kamai en kouda umpwal jiluh wijahkije, oau umwoamw, oau umwen Moses, a oau umwen Elijah.” **6** Irai majpwehkda, doahr ih ken jehjoahla pwa da ih en pwa.

**7** Koasoau oau pwaindi irai; a ngilloau indihdo jang nehn koasoauwo, pwa, “Ioar Noai jermwein kajampwalwa me, kamwai rong Ih!” **8** Irai jipwoaljili ne johla armaj irai kapang pwen Jesus kalahpwuk.

**9** Nehr irai indihdohjang pohn dollo, Jesus inoapwihi irai en, “**Johpwa pwehng emen da kamwai kapang, oaroh Nihn-Armaj iejda jang mehdi.**”

**10** Irai ken kapwaihahda da Ih pwa; irai ken sapda peipeidekpene nehn pwungarai ia woahwoahn lal kije, “Lejda jang ipen armaj mehdi kan.” **11** Irai idoak oang Jesus, “Amwda jounpadahk in Kojonneddok pwa Elijah uhdahn pirin sapin indoa?”

**12** A Ih japoang irai, “**Mehlel, Elijah uhdahn pirin sapin indoa pwa en koaunopda me ohroj. A amwda Puk Joarwi pwahki pwa Nihn-Armaj pirin oaloa loklok koalik apel wia mwahlla?**” **13** A Ngoahi pwehng kamwai, Elijah ne indoa a armaj kan wiahng me ohroj ma irai mwehuki, doahroar ma ne insingdi nehn Puk Joarwi.”

*Jesus Kemwehuwihla Jermwein men ma Ngen Nauna Dilingla*

**14** Anjoauwo irai lellahng ipen epwi Nah sohnpadahkkok, irai kapangda pokon koalik oau ma pidekihpene irai. A jounpadahk in Kojonneddoo pwi akkakmaihoang sohnpadahkkok. **15** Nehr armajjok ahr kapangda Jesus, irai inenin pwuriamweikihla irai kijoupene rahnmwahuwi. **16** Jesus idoak ipen sohnpadahkkok, “**Da kamwai akkakmaihoang irai?**”

**17** Emen sohn pokonno japoang, “Maing, ngoahi wahdohng koawoa noai jermweinne ma ngen jaus dilingla ken jehjoahla lallal. **18** Anjoau ohroj ma ngenno kin dilingla ih, ih kin kipdihoang nehn pwirej, nehn oawoa kin pwuroarda, keikeiskeisakai, a palwoaroa kin dengla. Ngoahi pwehng nihmw sohnpadahk kai irai en kauj jang ngen jausso, a irai johkak.”

**19** Jesus japoang irai, “**Kamwai inenin joah pwojon! Ia woaroai in Oai pirin minmine ipamwai? Ia woaroai in Oai pirin kanangmahng kamwai? Kamwai wahdohng Ngoahi jermweinnen!**” **20** Irai ken wahdohng jermweinno ipoa.

Ngen jausso kapanngoar Jesus, a ih sihda pohn jermweinno, karoarroarihda, kapkihdihoang nehn pwirejjo, kasahpwroahjili oaroh pwuroarda nehn oawoa.

21 Jesus idoak ipen jamahu, “**Ia woaroai in ah wihwia joangoauwe?**” A jamahu pwehng Jesus, “Jang oh in ah siksik, Maing. 22 A pehn dir ngen jausso kin nimen kojukdi ih nehn ah kin peiddoang ih nehn oai apel nehn pil. Doari, jeuveje kama, ma koawoa kak.”

23 Jesus ken pwehng ih, “**‘Ma koawoa kak?’ Me ohroj kak pwoaida ipen inje ma pwojon.**”

24 Nehr anjoauwohr jemen jermweinno pwehng Jesus, “Maing, ngoahi pwojon. A johpwa isar. Koawoa en jeuveje kakoalikhla oai pwojon.”

25 Nehr en Jesus kapangda doahr pokonno ne diddiddirla Ih ken weringda ngen jausso, “**Koawoa, ngen pongpong apel jehjoa lallal, injang ipen jermweinnen. Johpwa pwuroahng dilloang nehn ih.**”

26 Ngen jausso rahula, peiddi jermweinno nehn pwirej, diljang nehn ih. Jermweinno doahrla armaj mehdi men, epwi ken pwahpwahpwa pwa ih ne mehdi. 27 Jesus ken koldi poah jeuveje kauhda jermweinno.

28 Jesus dilda nehn ummwo kalahpwukla. Nah sohnpadahkkok idoak Ipoa, “Amwda kamai ke johkak kaujjang ngen jausso ipen jermweinno?”

29 A Ih japoang irai, “**Joangoan ngen jaus oauwe johkak kajroahk-jang, a ioarroar kapkap.**”

*Jesus pel Pwuroahng Kohpda doahr Ah pirin Mehdi*

30 Jesus apel Nah sohnpadahkkok injang wijahu, kosehla wein Galilee. Jesus johpwa nimen armaj kan en kidal doahr Ah mwoakid kan. 31 Pwa Ih kin kawoahwoa oang Nah sohnpadahkkok: “**Nihm-Armaj pirin ken likliklahng ipen armaj kan, ma pirin kojukdi Ih. A mwerin rehn jiluh Ih pirin iejda.**”

32 A irai johpwa woahwoahki da Ih pwehng irai, a irai pel mijik in idoak ipoa.

*Inje ma Keiou Laplap*

33 Irai lel Capernaum nehn irai mwindi nehn ummwo Jesus kalelpoak iparai pwa, “**Da kamwai akkakmaiki allaluhdo nehn allo?**”

34 A irai johpwa japoang; pwa nehn allo irai akmaipene nehn pwungarai, ki inje ma keiou laplap. 35 Jesus ken mwindi pangindo sohnpadahk ejek roahmenno ipoa pwehng irai, “**Ma emen in kamwai nimen koaunda a en minehla mwerin, en wiahla en ohroj lidu.**”

36 Ih ken oaloa jeri men kihdi nehn pwungarai; jupwurpene jerih, Ih pwehng irai, 37 “**Ma emen ma kin kajamwo emen jeri siksik pwiai in oadoaioa, Ngoahi ioar ma ih kin kajamwo; A ma emen ma kin kajamwo Ngoahi, jaudi Ngoahi oar doari ih kin kajamwo, apel Ih ma kadardo Ngoahi.**”

*Armajjok ma Johkin Uhwoang Kisai kin Uhpali Kisai*

38 John pwehng Jesus, “Maing Jounpadahk, kamai kapang emen ma pwili kaujjang ngen jaus kan in oadoamwen, kamai ken inoapwihdi pwa jaudi kijehmai ih.”

39 A Jesus japoang, “**Kamwai joah kainoapwihdi, pwa joh armaj ma kin wia manman in oadoaioa kak lahlahwe Ngoahi** 40 **Pwa emen ma johkin uhwoang kisai kin uhpali kisai.**” 41 **Ngoahi**

**pwehng kamwai in mehlel, ma emen mihndahkihla mwoakin pil oau oang emen in oadoaioa, ih nen uhdahn oaloa dupko.”**

*Doahroar Kahrechioang Emen nehn Dihp*

**42 “Ma emen ma kahrechioang jeri siksik pwiai ma kin pwojon Ngoahi en wiahda dihp, mwehuwoang oau sakai koalikko en pirapirroang in sipinwoaroa, kapwuhrilekla nehn madauwo.**

**43 Ma oaloap poahmmwen kahrechioang koawoa nehn dihp, poaloahjang; pwa mwehu oang koawoa loapinpoa dilda nehn mour joahsuk jang poa riau peidek oang nehn ehl, nehn oai johkin kunlalu.** **44 [Wijahu arai mwajjok johkin mehdi, a oaiho johkin kunla.]** **45 A ma oaloap ehmmwen kahrechioang koawoa nehn dihp, poaloahjang; pwa mwehu oang koawoa en loopin e dilda nehn mour joahsuk jang e rahpas peidek oang nehn ehl.**

**46 [Wijahu arai mwajjok johkin mehdi, a oaiho johkin kunla.]** **47 A ma oaloap pwoaroan mioammwen kin kahrechioang koawoa nehn dihp, roahkjang! Mwehu ma koawoa loopin pwoaroan maj dilda nehn wein Koahs jang pwoaroan maj riau a peidek oang nehn ehl.** **48 Wijahu irai mwajjok johkin mehdi a oaiho johkin kunla.**

**49 “Armaj ohroj pirin mwakelkelkihla oai, doahroar meiroang kan kin mwakelkelkihla jed.\*** **50 Jed mehkij ma mwehu; a ma nimen jeddo johla, da kamwai kak wiahng pwa nimen jeddo en pwuroahng minehda? Amwai mour en mwehu anjoau ohroj doahroar jed, a kamwai nen injenmwahupene nehn pwungamwai kan.”**

## 10

*En Jesus Padahk doahr Mweipijoang in Pwoapwoaud*

**1** Jesus injang wijahu, inlahng wein Judea, inla oaloap Pillap Jordan. Armaj dir pel pwuroahng pokondohng ipoa, Ih padahk oang ihr doahr Ih kin kalap wia.

**2** Pharisee pwi indoa ipoa pwa irai en jong lidipihdi Ih. Irai idoak, “Padahkihoang kamai ma asai Kojonneddo mweidoahng woal men en mweijang pahioa?”

**3** A Ih japoang, wud pwehng irai, **“Dahkij Moses koajoanehdi oang kamwai?”**

**4** A arai pajpoangwa pwa, “Moses koajoanehdi kijinlikoau in kamweid en wiawi, a woal men kak mweijang pahioahu.”

**5** Jesus pwehng irai, **“Moses insingehdi kojonned oauwe oang kamwai, pwa jang in amwai nohn koapsakai.** **6** Puk Joarwi pwa, **jang in sapin kawa, ‘Koahs wiahda armaj woal apel li.’** **7** ‘Jang in kahrpoahioauwe woal men pirin mweijang jamah apel inah ih pasoahng pahioahu, ara roahmenne paspene wiahla oau.’ **8** Ara ne johla wia roahmen a emennoar.

**9** Doari, joh armaj men en kamweidpijoang da ma Koahs ne kapsahpene.”

**10** Nehr ahr dilda nehn ummwo, Nah sohnpadahkkok idoak ipoa irair oauwe. **11** Ih pwehng irai, **“Ma woalmen pirin mweijang pahioa, painkihla emen li sohrohr, ih wiahda dipen kamwahl.**

\* **9:49** Jed: kijakijki jed oang mihn indoa kan kin kajalehda kilel in limpoak.

**12 Pel doahroar ma lihmen pirin mweijang pahioa apel painkihla emen woal sohrohr, ih pel kamwahl.**

*Jesus Kapaiahda Jeri siksik pwi*

<sup>13</sup> Armaj pwi wahdohng Jesus jeri pwi pwa en kihdahng poah pohrai; sohnpadahkkok ken lipwoarehda armajjok. <sup>14</sup> Nehr en Jesus kidal da me, Ih lioas pwehnglahng sohnpadahkkok, “**Mweidoahng jerihkan en indoa ipoai. Kamwai joah iroahdi irai; pwa wein Koahs ioar wein joangoan armaj pwiai.**” <sup>15</sup> Ngoahi pwehng kamwai in mehlel, pwa emen ma jehpirin oaloa **Wein Koahs doahroar jeri siksik men, ih johkak dilda loaloa.**” <sup>16</sup> Ih ken oaloa jerihok, kihda poahk pohn emenem Ih kapwaihahda irai.

*Mwahnkapw Koapwoahpwoa men*

<sup>17</sup> Jesus onnonop pwa en wia jeiloak oau, a mwahnkapw men kijoudo ipoa, poadpwomwla mwohn Ih pwehng Ih, “Jounpadahk Mwehu, da ngoahi en wia pwa ngoahi en kak oaloa mour joahsuk?”

<sup>18</sup> Jesus pwehng ih, “**Amwda koawoa ke panginki Ngoahi jounpadahk mwehu? Joh emen ma mwehu, Koahs oar doari.**” <sup>19</sup> Koawoa kidal kojonneddok: ‘Joah kojukdi armaj; joah kamwahl; joah pirap; joah likamw; joah kapweipwei armaj; wounki joamoamw apel inoamw.’”

<sup>20</sup> Mwahnkappwo japoang Ih, “Maing oai jounpadahk, jang oh in oai siksik ngoahi ne kapwaihahda mehpwiai ohroj.”

<sup>21</sup> Jesus ipwilkiha ih, pwehng ih, “**Mehkij oar luhwoa, alwe noaskihla meohroj ma koawoa anki, kioang dupkoa kan armaj joamwoahmwoa kan, oamw pai nehnloannge nen koalikla; indoa pwilihla Ngoahi.**” <sup>22</sup> Nehr en mwahnkappwo rong lal pwiai, ih injinjuwedla, ken allaluhla. Pwa woal koapwoahpwoa men ih.

<sup>23</sup> Jesus jipwoalwehng Nah sohnpadahkkok pwehng irai, “**Ia apwal in armaj koapwoahpwoa en dilda nehn Wein Koahs!**”

<sup>24</sup> Sohnpadahkkok pwuriamweikihla sikesik pwiai. A Jesus uh-jehlahr pel pwa, “**Noai jeri, kamwai en kidal doahr apwal in dilda nehn Wein Koahs.**” <sup>25</sup> Apwal oang armaj koapwoahpwoa men en dilda nehn wein Koahs jang kamel men en dilda nehn pwokin si pas.”

<sup>26</sup> Sohnpadahkkok pel pwuriamweila dauluhl ki me, irai pwahpene nehn pwungarai, “Doari, a inje kak mourla?”

<sup>27</sup> Jesus jipwoallahng irai, ih pwa, “**Me johkak ipen armaj, a ipen Koahs ih kak; pwa ipen Koahs meohroj kak pwoaida.**”

<sup>28</sup> Peter pwehnglahng Jesus, “Maing, kamai ne kihdi joang ohroj pwa kamai en pwilihla koawoa.”

<sup>29</sup> Jesus pwehng irai, “Eh! Ngoahi pwehng kamwai in mehlel, pwa ma emen ma pirin mweidla umwah, riah, inah, jamah, nah jeri, japwah kan, ki Ngoahi apel rongmwehuwo, <sup>30</sup> pirin oaloa koalik jang nehn mour in di oauwe. Ih pirin oaloa pak epwiki in umwah, in riah, in inah, in nah, in japwah kan—apel in loklok kan. A nehn mour ma pirin indoa, ih pirin oaloa mour joahsuk. <sup>31</sup> Armaj dir anjoau oauwe kin mine mijoa, irai pirin mwerinla, a armaj dir ma kin mine mwerin, irai pirin mijolahla.”

*Kajiluh in en Jesus Kohpda doahr Ah pirin Loklok apel Mehdi*

<sup>32</sup> Jesus apel Nah sohnpadahkkok allaluhla nehn allo indahlahng Jerusalem, Ih aluhla mijen Nah sohnpadahkkok; a irai ma kauj ih allalu dirkihla majpwehk. Ih pel pwuroahng kalahpwukla ipen irai ejek roahmenno pwehng irai da ma pirin wiawihoang Ih, <sup>33</sup> “**Kamwai kidal pwa kisai allaluhdahlahng Jerusalem, wijahwa ma Nihn-Armaj pirin likliklahng ipen jamwrou laplap apel jounpadahk in Kojonned kan. Irai pirin kadeikda Ih pwa Ih en kojkojdi. Irai pirin kihlahng Ih ipen mihn likin kan.** <sup>34</sup> **Ih pirin wiahla mihn kapis iparai; irai pirin andipoa, poki, apel kojukdi Ih. A in rehn kajiluh Ih pirin iejda.”**

*En James apel John Poakpoak*

<sup>35</sup> Nihn Zebedee jermwein roahmen, James apel John, ara indoa ipen Jesus pwehng, “Maing Jounpadahk, mine mehkij kama nimen koawoa en wiahng kama.”

<sup>36</sup> Jesus idoak ipara, “**A dahkij, kamwa nimen Ngoahi en wiahng kamwa?**”

<sup>37</sup> Ara pwehng Ih, “Kama nimen koawoa en kihdoahng kama lingin oamw wei nehn anjoauwo ma koawoa pirin Nahmwarkihla, apel mweidoahng pwa kama en kak mwindi ipoamw, emen loap moaun in koawoa, a emen loap meing.”

<sup>38</sup> Jesus pwehng ara, “**Kamwa jehjoa pwa dahkij kamwa poakpoakien. Kamwa kak nim mwoakin loklokko ma Ngoahi pirin nim? Kamwa kak poapdaijikhla poapdaijjo ma Ngoahi pirin poapdaijki?**”

<sup>39</sup> Ara pwehng Ih, “Eh kama kak.”

Jesus pwehng ara, “**Doari, ne mwehu; Kamwa pirin nim mwoakko ma Ngoahi pirin nim apel poapdaijki poapdaijjo ma Ngoahi pirin poapdaijki.** <sup>40</sup> **A mwindi loap moaunin apel loap meingin, joah mweimwei oang Ngoahi en pilda; pwa Koahs ma pirin kioang irai kan ma Ih koaunopdahng.”**

<sup>41</sup> Nehn en sohnpadahk ejekko ahr rongda poakpoak oauwe, irai lioassoangkikhda James apel John. <sup>42</sup> Jesus ken panginpene irai pwehng, “**Kamwai kidal doahroar armaj laplap in nehn rosros kan, doahroar ahr kin kolkol sihkei manman in koaunda armaj rosros kan, apel koaun kan kin anki manman ohroj.** <sup>43</sup> **A ih jehpirin doahr me ipamwai. Inje ma nimen laplap ioar ih pirin papah ohroj;** <sup>44</sup> **A ma emen nimen jourmaj ih pirin wiahla lidu in ohroj.**

<sup>45</sup> **Pwa pel Nihn-Armaj indihdo, jaudi pwa armaj en papah, a Ih en papah armaj ohroj apel mihndahkikhla Ah mour pwa en koamoaurla armaj dihrdir.”**

*Jesus Kemwehuwihla Woal Majkun men*

<sup>46</sup> Irai lel Jericho; a nehn en Jesus apel Nah sohnpadahkkok apel pokon koalik oau diljang nehn kahnihmmwo, woal majkun joamwoahmwoa men, oadoa Bartimaeus, nihn Timaeus, mwindi imwin allo mehlahn poakpoak. <sup>47</sup> Nehn ah rongda pwa Jesus mihn Nazareth ioar allaluhla, ih sapda rahrahu pwa, “Maing Jesus, kijehn kadaudok in David, jeuveje ngoahi!”

48 Dirin ihr lipwoarehda pwa en nennenla. Ih kapwa kakoalikhla ah rahrahu, pwahpwahpwa, "Koawoa ma kijehn kadaudok in David, jeuweje ngoahi."

49 Jesus uhdi pwa, "**Kamwai ukdohng Ngoahi.**"

Irai pwehng woallo, "Koawoa, injenmwahula! Uhda! Ih pangpangin koawoa."

50 Ih pispisinnoar kejpwihi ah joakiddo, uhda inla ipen Jesus.

51 Jesus idoak oang ih, "**Da koawoa mwehuki Ngoahi en wiahng koawoa?**"

A woal majkunno japoang, "Maing, ngoahi nimen pwuroahng kapang wija."

52 Jesus pwehng ih, "**Alwe; oamw pwojonnen ne kemwehuwihla koawoa.**" Nehn anjoauwohr ih kapangda wija; ih ken pwilihla Jesus nehn allo.

## 11

### *Dilda Jerusalem ki Rojon in Kalwehdi*

<sup>1</sup> Nehn arai koaroanlahng Jerusalem in kahnihmw en Bethphage apel Bethany, irai lel Dolin Olip. Jesus kadarla Nah sohnpadahk roahmen, <sup>2</sup> pwehng ara, "**Kamwa alwe nehn koujapw oauwen mijen kamwa. Nehn amwa pirin dilda wijahu, kamwa pirin pispis kapangda ejel pwulopwul men ma pirpirapir ma kahjikkoar armaj men dakoa. Kamwa lapwadda ukdo me.**" <sup>3</sup> A ma emen idoak ipamwa, da kamwa wihiwahng mahnnan a kamwa japoang, 'Kounno ioar anahne,' a Ih pirin pispisin kajpahlihdo."

<sup>4</sup> Ara ken inla kapangda ejel pwulopwul men a pirapir in wanihmw in umw oau nehn allo. Nehn ara lapwadda, <sup>5</sup> armaj pwi mine wijahu idoak ipara, "Da kamwa wihiwia? Mihnda kamwa lapwadda ejel siksik menen?"

<sup>6</sup> Ara japoang irai doahr ma Jesus pwehng ara. Armajjok ken mweidoahng ara. <sup>7</sup> Ara wahdohng ejel siksikko ipen Jesus. Arai piroak-ihdihoang likkoau puwoa, Jesus ken doauda pohn ejello. <sup>8</sup> Pokonno piroakihi ahr likkoauwok nehn allo. A epwi poaloahdi rahn suhkoa pwi pel inapoahkihda nehn allo. <sup>9</sup> Irai ohroj ma alu mijoa apel iraihok ma kaujdo pokonno rahrahuki koaul in kaping pase: "Kisai kapnga Koahs! Koahs en kapaiahda Ih ma indoa in oadoan Koaunno. <sup>10</sup> Koahs en kapaiahda wein jamasai David ma pirin indoa. Kaping oang Koahs."

<sup>11</sup> Jesus dilda nehn Jerusalem, inlahng nehn Umw Joarwiho, kapkapangjili meohroj loaloa. A pwa ne joausikpene, Ih ken inlahng Bethany pwilihki sohnpadahk eijkek roahmenno.

### *Jesus Kariahla Suhkua Fig Pas*

<sup>12</sup> Rehnwa mwerin, nehn arai allaluhla jang Bethany, Jesus ken mwakohkohda. <sup>13</sup> Ih kapangda suhkoa fig pas jang wija doh ma dir soah; Ih inla pwa en kapang ma joh wah Ih nen kapangda. Nehn Ah lel wijahu Ih johpwa kapangda wah, pwa soahr doari; pwa jaudi anjoau in roak. <sup>14</sup> Ih ken pwehng suhkoahu, "**Joh armaj men pirin pwuroahng kang wehn fig jang ipoamw.**"

Nah sohnpadahkkok rong sikesik oauwe.

### *Jesus Dilda nehn Umw Joarwiho*

<sup>15</sup> Nehr irai lel Jerusalem, Jesus inla nehn Umw Joarwiho, sapda kajroahjang loaloa irai ohroj ma noaski apel dupdupuk koapwoa wijahu. Ih ukuddi en sohnkawiliali mwanihok ahr sehpillok apel en jounnoaski mwureiok ahr mihn mwindi kan. <sup>16</sup> Ih pel johla mweidoahng armaj en wahjili mehkij nehn Umw Joarwiho. <sup>17</sup> Ih ken pwehng armajjok, “**Ne insingdi nehn Puk Joarwi, Koahs pwa, ‘Umwoiae pirin adanki umwen kapkap oang sohn wei ohroj.’ A kamwai wiahkihla dohn jounpirap kan.**”

<sup>18</sup> Jamwrou laplappok apel jounpadahk in Kojonneddok rongda me; irai sapda lemleme doahr ahr pirin kojukdi Jesus; pwa irai perki koalik, pwa armaj ohroj kajampwalki dauluhl Ah padahk.

<sup>19</sup> Injoausik in rehnno, Jesus apel Nah sohnpadahkkok diljang nehn kahnihmmwo.

### *Padahk jang Suhkoa Fig*

<sup>20</sup> Pwohrdahng injohrehnin rehnno, nehn irai allaluhla nehn allo, irai kapangda suhkoa fig-o ne mengla jang in sapin lel in koadkoa.

<sup>21</sup> Peter samanda da me ne wiawihlahu, ih ken pwehng Jesus, “Maing, kanah kapang suhkoa fig-e ma koawoa kariahla, ne mengla.”

<sup>22</sup> Jesus japoang irai, “**Kamwai pwojon Koahs!** <sup>23</sup> Ngoahi pwehng kamwai in mehlel, ma emen ma pirin pwehng dol oauwe, ‘Sohjang me kasoaahdihla pein koawoa nehn jeddo,’ a johpwa peikajal kij mine nehn kapehdin, a pwojon da ih pwa, doari, dahioau ih pwahla pirin pwoaida. <sup>24</sup> Ioar me Ngoahi nimen kamwai en kidal pwa me ohroj ma kamwai pirin poaki nehn amwai kapkap kan, kamwai pwojon pwa kamwai nen oaloa, ih ken pwoaida oang kamwai. <sup>25</sup> Doari, nehn amwai pirin uhda kapkap, kamwai mahkoahng japwung ohroj ma armaj men wiahng kamwai pwa jamamwaiho nehnloanng en pel mahkoahng kamwai dipamwaihok. <sup>26</sup> [Pwa ma kamwai johpwa mahkoahng emen, Jamamwaiho ma mine nehnloanng johpwa pirin mahkoahng kamwai dipamwaihok.]”

### *Peidek doahr Manmanin Jesus*

<sup>27</sup> Irai pwurlahng Jerusalem. Nehr en Jesus allaluhjili nehn Umw Joarwiho, jamwrou laplap apel jounpadahk in Kojonneddo pwi apel jourmaj pwi indoa, <sup>28</sup> pwehng Ih, “Manmanin inje koawoa wihiwiahki joang pwiai? Inje kioang koawoa manman oauwe?”

<sup>29</sup> Jesus japoang irai, “**Ngoahi pirin wiahng kamwai peidek oau. Doari, ma kamwai japoang Ngoahi, Ngoahi pirin wud pwehng kamwai manman en inje ma Ngoahi wihiwiahki mehpwiai.**

<sup>30</sup> **Kamwai pwehng Ngoahi, en John ah manman in poapdaij, sapjang ipen Koahs ke jang ipen armaj?**”

<sup>31</sup> Irai sapda akmaipene nehn pwungarai, pwahpwahpwa, “Ma kisai pwa, ‘sapjang ipen Koahs’, Ih pirin pwa, ‘A da kamwai joah kamehlelehki John?’ <sup>32</sup> A ma kisai pwa sapjang armaj...” (Irai mijik armaj kan, pwa ohroj kin wiahki John joukohp mehlel men.) <sup>33</sup> Irai ken japoang Jesus, pwehng, “Kamai jehjoe.”

Jesus ken pwehng irai, “**Doari, Ngoahi pel jehpirin pwehng kamwai manmanin inje ma Ngoahi wihiwiahki mehpwiai.**”

## 12

*Karajraj in Jounmwoaswel pwi nehn Mwoaswelin Wain oau*

<sup>1</sup> Jesus padahk oang irai in karajraj, “**Armaj men poadokdi pein ah mwoaswelin wain oau; ih ken kelihpene apel weirda dohien ungudek wain oau, apel kouda wijahn iroir oau.** Ih ken kioang jounmwoaswel pwi pwa irai en kohwahki oang ih. **Ih ken jeiloaklahng nehn japw doh oau.** <sup>2</sup> Oaroh, anjoau in roak ih kadarla lidu men ipen jounmwoaswellok pwa en oaloahjang irai ah pwaij jang nehn mwoaswello. <sup>3</sup> **Jounmwoaswellok koldi liduhwo, poki oaroh kadarla kaip.** <sup>4</sup> Ih pel kadarlahng jounmwoaswellok emen lidu. **Irai pel pokihjili apel koauwehla moange kajarohdi ih.** <sup>5</sup> **Ih pel kadarla emen, irai oaloahr kojukdi.** Armaj dir pel koadoccoarla mwerin, irai pel diar joangoan apwallohr: epwi pwen pokpokkoar, a epwi kojkojdi. <sup>6</sup> **Doari, woal emen oar luhwoa ih kak kadarla, ioar nah jermwein iehrojjo ma ih inenin kajampwalki.** Ih ken kadarla keiou mwuhr, ih pwa, ‘**Ngoahi uhdahn koapwoarpwoarki pwa irai pirin woaunki noai jermweinno.**’ <sup>7</sup> **Jounmwoaswellok ken pwahpene nehn pwungarai, ‘Ioar jerihn johjo wa me.** Kamwai indoa, kisai kojukdi, pwa kisai en ankihla mwoaswelle.’ <sup>8</sup> **Irai koldihoar jermweinno, kojukdi, kejpwihiang nehn mwoaswelin wainno.**”

<sup>9</sup> Jesus ken idoak, “**Doari, da jounmaj en mwoaswelin wainno pirin wia? Ih pirin inla kojukdi jounmwoaswellok apel kioang epwi jounmwoaswel sohrohr mwoaswello pwa irai en koadoccoa apel kohwahki oang ih.** <sup>10</sup> **Kamwai johkin Wadek lal oauwe nehn Puk Joarwi?**

**‘Sakai ma jounkou umw kan ne kerpihlha,  
wud wiahla sakain pwukoakoaimw**

<sup>11</sup> **KOAUNNO ma wiahda me;  
mehkij ma kapwuriamwei mehlel oang kisai.’ ”**

<sup>12</sup> Koaunin mihn Jew-ok ken jong en joalihdi Jesus; pwa irai kidal pwa Ih kin pwahpwahpwahki irai karajraj pase. A pwa irai mijik pokon in armajjok, irai ken okdekla inlahjang.

*Peidek doahr Daksis*

<sup>13</sup> Pharissee pwi apel sohn nihn Herod pwihnnno kadarekdohng ipen Jesus pwa irai en lidipihki joangoan peidek pwi. <sup>14</sup> Doari, nehn ahr leldo, irai pwehng Ih, “**Maing Jounpadahk, kamai kidal pwa woal poadidi men koawoa, ma johkin kasohrohri joangjoangoan armaj;** pwa koawoa kin padahkihoang armaj doahroar en Koahs koajoandi in mehlel. Doari, da oamw lamlam oang irair oauwe: pwung oang asai kojonned kan, kisai en nohpweiki mwani oang Caesar in Rome, ke joah? Da kisai pirin wia? Kisain kihda daksis, ke joah?”

<sup>15</sup> Doari, nehn Ah kidal uhwen ahr mwalaun, Jesus pwehng irai, **“Da kamwai indoahng lidipihki Ngoahi? Kajalehdohng Ngoahi mwani silper en, pwa Ngoahi en kapang.”**

<sup>16</sup> Irai ken kajalehioang mwani silper oau; Ih ken idoak oang irai, **“Kilelin inje apel oadoan inje me?”**

Irai pwehng Ih, “Nahmwarki Caesar.”

<sup>17</sup> Doari Jesus ken pwa, “**Doari, mwehu; kamwai kioang Caesar mehkan ma uhdahn en Caesar, a oang Koahs mehkan ma uhdahn en Koahs.**”

Irai ken pwuriamweikihla pajpoang oauwe.

*Peidek doahroar Iejda jang Mehdi*

<sup>18</sup> Sadducee pwi pwokdohng ipen Jesus. (Ioar irai ma kin pwa armaj jehipirin iejda mwerin mehdi.) <sup>19</sup> Irai idoak ipen Jesus pwa, “Maing Jounpadahk, Moses koajoanehdi oang kisai nehn Pukin Kojonned kan pwa ma woal men pirin mehdi jang pahioa a joh nihra, a rien woallo en wud painkihla liohdiho pwa en wiahda kadaudokin riahu ma mehdi. <sup>20</sup> Doari pwihnnin riari oau mine, irai woal ijimen. Woal koalikko iparai painkihla lihmen oaroh mehdihjang joh nihra jeri. <sup>21</sup> Karoahmenno pel painkihla liho oaroh pel mehdi jang joh nihra jeri. Pel doahrwahr wiawihoang kajilmenno. <sup>22</sup> Doari, riari ijimenno ohroj painkihda liho, ohroj mehdi joh nihrai jeri. Inlahroh liho pel mehdi. <sup>23</sup> Doari nehn anjoauwo ma armaj mehdi kan ohroj pirin mourda, nehn rehn in iejda, injie in irai ijimenno ma liho pirin painki?”

<sup>24</sup> Jesus japoang irai, “**Kamwai inenin japwung! Kamwai kidal pwada? Pwa kamwai johpwa woahwoahki lalin Puk Joarwi ke manman in Koahs.**” <sup>25</sup> Pwa nehn armaj mehdi kan ahr pirin iejda, irai pirin doahroar sohnloang in nehnloange kan, woal apel li johla pirin pwoapwoaud. <sup>26</sup> Doari, doahroar iejdahn min mehdi kan, kamwai johpwa wadek nehn Pukin Moses doahroar sikesikin Koahs Ah pwokkoang jang nehn suhkoa siksikko ma umpwumpwul? Nehn iroahu Koahs pwehng Moses, ‘Ngoahi ma Koahs in Abraham, Koahs in Isaac, apel Koahs in Jacob.’ <sup>27</sup> Doari, me woahwoahki ma Ih Koahs in armaj mour kan, a jaudi Koahs in armaj mehdi kan. Ioar ma kamwai inenin japwungki koalik.”

*Kojonned Koalik*

<sup>28</sup> Jounpadahk in Kojonneddo men pwili mine wijahu, rongrongrong lal pwiai. Ih ken pwuriamweikihla mehlel pwungin en Jesus japoangekkok. Ioar ih ken sohlahng ipen Jesus ki peidek oau, “Maing, kojonned dahioau ma keiou kajampwal nehn kojonned ohroj?”

<sup>29</sup> Jesus japoang ih, “**Ioar kojonned wa ma keiou kajampwal nehn kojonned kan ioar:** ‘Rong, koawoa Israel! Koaunno, asai Koahs, ioar Ih ma Koaun wahr doari. <sup>30</sup> Doari, koawoa uhdahn pirin ipwilki Koaunno, oamw Koahs, nehn kapehdimwen unjek, ngenimwen unjek, oamw lamlam unjek, apel oamw sihkei unjek.’ <sup>31</sup> A kariau, doahr me: ‘Koawoa pirin ipwilki mihn ipoamw doahroar oamw ipwilki pein koawoa.’ Joh oau kojonned mine ma kajampwal jang mehpwiai.”

<sup>32</sup> Jounpadahk in Kojonneddo pwehng Jesus, “Mehlel ipoamw, Jounpadahk! Pwung da koawoa pwa: pwa Koaunnohr ma Koahs, joh pel emen. <sup>33</sup> Armaj uhdahn pirin ipwilki Koahs nehn kapehdin unjek, ah lamlam ohroj unjek, apel ah sihkei unjek; apel ipwilki mihn ipoa doahr ah kin ipwilki pein ih. Kapwaihahda kojonned riau pwiai mwehujang dauluhl asai pirin meiroangkihoang Koahs mahn pohn pei joarwi kan apel wia joangoan meiroang sohrohr kan.”

<sup>34</sup> Nehr en Jesus kapang doahr pwungin pajpoang oauwe, Ih ken pwehng woallo, **“Koawoa johpwa dohjang Wein Koahs.”**

Mwerin me johla armaj idoak mehkij.

*Peidek doahroar Messiah*

<sup>35</sup> Nehr en Jesus padpadahk nehn Umw Joarwiho, Ih pwa, **“Da jounpadahk in Kojonneddo kan kin pwehngkihoang kamwai pwa Messiah pirin kijehn kadaudok en David?”** <sup>36</sup> Pwa Ngen Joarwi ne audohkihda David pwa en pwahda lal oauwe:

**‘Koaunno pwehng oai koaun:**

**Koawoa en mwindi oang in loap moaun in Ngoahi,  
Oaroh Ngoahi kihdihoang oamw imwinski kan pehn  
pwoalkoamwen kan.’**

<sup>37</sup> **“Doari, ma pein David kahdanki Ih ‘oai Koaun’, a imdoahr Messiah en kak wia kijehn kadaudokin?”**

*Jesus Kaperki Pokonno Jounpadahk in Kojonned kan*

Pokon koalik oau kin rongrongrong en Jesus padahk kan in peren.

<sup>38</sup> Nehr Ah pel padahk oang irai, Ih pwa, **“Kamwai kalkkehjang kamwai jounpadahk in Kojonned kan ma kin mwehuki allaluhjili nehn likkoau roairoai apel kin mwehuki armaj en rahnmwahuwi irai nehn pokon kan.** <sup>39</sup> **Apel kin pilda dohiarai lampahnsamw nehn jinakoke kan, apel kin mwehuki mwindi oh in mijen sehpil kan nehn kamdipw kan.** <sup>40</sup> **Ioar joangoan armaj pwiai ma kin doapwoahjang koanngoan umwen liohdi kan, apel kin lioajoahjki kapkap roairoai. Arai koaloklok uhdahn pirin koalik.”**

*En Liohdi men ah Meiroang*

<sup>41</sup> Jesus mwindohoang wijahkij nehn Umw Joarwiho koaroannoang dohien meiroanngo. Ih ken kin kapkapangjili doahroar armajjok ahr kin peiddihoang nihrai mwanihok nehn dohien meiroanngo. Dirin armaj koapwoahpwoa pwili peiddi mwani koalik nehn irai en kin meiroang. <sup>42</sup> A liohdi joamwoahmwoa men pwili leldo pel peiddi send wahssa riau. <sup>43</sup> Jesus panginpene Nah sohnpadahkkok pwehng irai, **“Ngoahi pwehng kamwai in mehlel, pwa en liohdi mene ah meiroang inenin koalik jang araihok ohroj.** <sup>44</sup> **Pwa armaj pwiock peiddi oang nihrai mwani nehn dohien meiroang jang nehn ahr pai; a liohdi mene jang nehn ah paijuwed, ih kihdi me ohroj ma ih anki apel kin mourki.”**

## 13

*Jesus Siksikoa doahr Imwlahn Umw Joarwiho*

<sup>1</sup> Nehr en Jesus injang nehn Umw Joarwiho, emen Nah sohnpadahkkok pwehng Ih, “Maing, kapang koalik in sakai pwiai apel wioapoan ummwoauwe!”

<sup>2</sup> A Jesus japoang, **“Kapang koalik in umw pwiai? Johpwa oau sakai pirin minminehr nehn dohiahuh; pwa ohroj pirin mwoardi.”**

*Apwal kan apel Koaloklok kan*

<sup>3</sup> Jesus mine pohn Dolin Olip, jipwoallahng Umw Joarwiho, a Peter, James, John apel Andrew sohla ipoa pwehng Ih, <sup>4</sup> “Maing, pwehng kamai ngehd mehpwiai pirin wiawi, apel kilel da ma pirin kajalehda ma mehpwiai en ken pwoaida.”

<sup>5</sup> Jesus pwehng irai, “**Kamwai mwajahn pwa armaj en joah kapweipweidi kamwai.** <sup>6</sup> Pwa armaj dir pirin indoa pwahpwahpwa oadoaioa, ‘Ioar Ngoahi Messiahu!’ Irai ken pirin kapweipweidi armaj dir. <sup>7</sup> Kamwai johpwa jalohda, ma kamwai rong ngilen mahwin koaroan apel sikesik in mahwin jang wija doh kan. Joang pwiai uhdahn pirin wiawi, a johpwa woahwoahki pwa imwin jampah ne leldo. <sup>8</sup> Oau japw pirin mahwin oang oau japw; oau wei pirin mahwin oang oau wei. Wija ohroj roar in japw pirin wiawi apel lehk koalik pirin mine. Ioar joang pwiai ma pirin indoa, doahroar sapin moadoak in noaisik.

<sup>9</sup> “Kamwai mwajahn apel kalke pein kamwa! Pwa armaj kan pirin joalihdi kamwai apel kihla kamwai nehn mwoalen koapwung kan. Kamwai pirin woswos nehn jinakoke kan; kamwai pirin wijikdohng mwohn koaun kan apel nahmwarki kan ki Ngoahi, pwa kamwai en kadehde oang irai doahroar Rongmwehu. <sup>10</sup> Pwa mwohn rehnno pirin indoa, rongmwehuwo uhdahn pirin lohkjili nehn wei ohroj. <sup>11</sup> Doari, nehn amwai pirin joaldi apel wijikdohng nehn mwoalen koapwung kan, kamwai johpwa pwunodki mwohn anjoauwo da kamwai en sikoa mwohrai; pwa da kamwai pirin audohkiha anjoauwo, ioar mehwa kamwai pirin pwehng irai. Pwa jaudi kamwai ma pirin lallal nehn anjoauwo, a Ngen Joarwi. <sup>12</sup> Woal kan pirin kihla riari kan pwa irai en kojkojdi, jahm kan pirin pel wiahng joangoahr ipen nihrai jerihkan; Jeri kan pirin uhwoang arai nohno apel pahma kan, apel kihlahng irai pwa irai en kojkojdi. <sup>13</sup> Armaj ohroj pirin lioassoang kamwai ki Ngoahi. A armajjok ma daur oaroh lel in imwin, ioar ma pirin mourla.

### *Janjal Nauna Kamajpwehkko*

<sup>14</sup> “Kamwai pirin kapang ‘Janjal Nauna Kamajpwehkko’ ih uhda nehn wija ma johpwa koanoahng en uhda.” (Emen ma wadwadek en woahwoahki ia woahwoa!) “Doari, irai kan ma mine Judea irai pirin kijou oang pohn dol kan. <sup>15</sup> Armaj emen ma mine pohn umwahu, en joah koauwehla anjoau doaudi oaloa mehkij loaloa. <sup>16</sup> Armajjo ma nehnjapw jehpirin pwurdochng oaloa ah likkoau. <sup>17</sup> Inenin kainjinjuwed oang li lijaian apel li kan ma kadihdi in rehnnok ma pirin leldo! <sup>18</sup> Kamwai kapkap pwa joang pwiai en joah wiawihuang kamwai anjoau in kopou!” <sup>19</sup> Pwa apwal in rehnnok pirin koalikjang apwal ohroj jang oh in sapin kawa indoa lel apkas, apel joh apwal pirin doahroar jang apkas pel allaluhla. <sup>20</sup> A Koaunno ne kajipidihla rehnnok; pwa ma Ih johpwa wia, a joh armaj pirin pisla. A pwa Nah armaj pilpil kan, ioar Ih kajipidihla ki rehnnok.

<sup>21</sup> “Doari, ma emen pirin pwehng kamwai, ‘Messiah wa me!’ Ke ‘Ih men!’—kamwai johpwa kamehlele. <sup>22</sup> Pwa Messiah likamw apel joukohp likamw pwi pirin pwarda. Irai pirin wiahda kilel

**kapwuriamwei pwi apel manman pwi pwa irai en kapweipweidi nihn Koahs armaj pilpil kan ma irai kak.** <sup>23</sup> Doari, kalke kamwai. Ngoahi padahkihoang kamwai mehpwiai ohroj mwohn anjoauwo pirin leldo.

*Indoahn Nihn-Armaj*

**24 “Doari, nehn rehnrok mwerin apwal koalikko, joauwo pirin rosla, johnpwonnggo pirin johla maram in,** <sup>25</sup> ujuhn pehnloanngge kan pirin kipdi apel koajoandihm nehn woahwoa kan pirin johla mine nehn dohiarai. <sup>26</sup> Ioar anjoau wa ma Nihn-Armaj pirin pwokda, indoa pohn koasoau kan in sihkei apel ling koalik. <sup>27</sup> Ih pirin kadarpijoang Nah sohnloang kan oang in koaimw pahu in jampah pwa irai en kapokonpene nihn Koahs armaj pilpilda kan jang in imwin jampah ohroj.

*Padahk jang Suhkao Fig*

**28 “Kamwai padahki me jang in suhkao fig; rahn joangoan suhkao pase kin mwoahroan soahn suhkao apel mwis, a nehn ah kin wiliali soah, kamwai kidal pwa roak ne koaroan.** <sup>29</sup> Pel doahroar kamwai, nehn amwai pirin kapang mehpwiai pirin wiawi, kamwai pirin kidalki pwa anjoauwo ne koaroando. <sup>30</sup> Ngoahi pwehng kamwai in mehlel, pwa mehpwiai ohroj pirin pwoaida mwohn armaj ohroj in dioauwe ahr pirin mehdii. <sup>31</sup> Nehnloanngge apel jampah pirin johla, a Oai lal kan johpwa pirin johla.”

*Johpwa Emen ma kidal Rehnno ke Awahu*

**32 “A doahroar rehnno ke awahu, johpwa emen kidal ngehd pirin leldo. Pel sohnloang in nehnloanngge kan jehjoa, Nahu pel johpwa kidal; Jamahuuar doari ma kidal.** <sup>33</sup> Kamwai mwajmwajahn apel poahd, pwa kamwai jehjoa anjoau. <sup>34</sup> Ih pirin doahroar armaj men ma kin wia jeiloak roairoai oau ma kioang nah liduhwok in umwahu pwa irai en apwali apel kioang irai ohroj doadoahk; ih ken pwehng sohn jiloa wanihmmwo en jiloa mwehu apel mwajmwajahn.

<sup>35</sup> Doari, kamwai mwajahn pwa kamwai jehjoa ngehd koaunin ummwo pirin pwurdo—ma injoausik, ke in lopkoan pwong, ke injohrehn, ke inminjoang. <sup>36</sup> Ma ih pispissoar pwurdo, ih jehpirin kapangda amwai moair. <sup>37</sup> Doari, da Ngoahi pwehng kamwai, Ngoahi pel pwehng armaj ohroj: kamwai poahpoahpoahd apel mwajmwajahn!”

## 14

*Koajoanpen Kojkojdihm Jesus*

<sup>1</sup> Rehn riauwoar luhwoa mwohn Joarwihm Passover apel Pilahwa Joah Doal Ihs. Jamwrou laplap apel jounpadahk in Kojonneddok raprapahki doahr irai en widingehdi apel joalihdi Jesus pwa irai en kojukdi. <sup>2</sup> Irai ken pwahpene nehn pwungarai, “Kisai joah wia anjoau in kamdipw oauwe, pwadoar armaj kan loakloakoahkihda.”

*Jesus Salipekla nehn Bethany*

<sup>3</sup> Jesus minmine nehn Bethany nehn umwen Simon, woal lepahu. Nehn irai mwingswinge, lihmen dilda ipoa, wa rume siksik oau ma

dirin le ma inenin karahdin apel koalik dupko, ma wiawi jang in pwilin suhkoa ma adanki nard. Liho ken koauwehla rume sikskko widekihdihoang pohn moangoan Jesus.<sup>4</sup> Epwi ma pwili mine wijahu ken lioasla pwahpene nehn pwungarai, “Amwda le kalahdin oauwe ken ohla mwahl?<sup>5</sup> Nehn ah kakkoar noasla in mwani silper jilipwki mihn jeuveje irai ma pajuwed.” Irai ken liplipahnedi liho.

<sup>6</sup> Jesus pwa, “**Kamwai pijekjang! Kamwai joah diroapwki lihe! Siahk mwehu, oau me ih wiahng Ngoahi.**”<sup>7</sup> Irai ma pajuwed kan kin minminehr ipamwai rehn ohroj; doari anjoau ohroj ma kamwai mwehuki, kamwai kak jeuveje irai; a Ngoahi, Ngoahi jehpirin pwilpwili kamwai anjoau ohroj.<sup>8</sup> Ih ne wiahda uhwen ma ih kak: Ih wiahda soal oauwe oang palwoaroaioa pwa en koaunopda dahkij ma pirin wiawihao Ngoahi mwohn oai pirin joajjoardi.<sup>9</sup> Doari, kamwai en kidal pwa wija ohroj nehn jampah ma Rongmwehu pirin lel dahkij ma ih ne wiahda pirin pel pwili lohkjili pwa en kin wia mihn kasman Ngoahi.”

### *Judas Pwungkihla en Pangla Jesus*

<sup>10</sup> Judas Iscariot, emen irai ejek roahmenno, ken inla ipen jamwrou laplappok pwa en panngoang irai Jesus.<sup>11</sup> Irai ken perenkilda dahkij Judas pwehng irai. Irai ken inoaukihao ih pwa irai pirin dupukki mwani. Doari, jang nehn anjoauwo johpwa me Judas nimen wia, ioarroar en kidalda anjoau mwehu ih en kak pangla Jesus.

### *Jesus apel Nah Sohnpadahkkok Mwingehpene nehn Kamdipw in Passover*

<sup>12</sup> Nehn keioun rehnin Joarwihl Pilahwa Joah Doal Ihs, rehnno ma irai kin kalap kojukdi jihpw pwulopwul in Passover, nihn Jesus sohnpadahkkok ken pwehng, “Ia wija koawoa nimen kamai en koaunopda oamw kamdipw in Passover-o?”

<sup>13</sup> Jesus ken kadarla ara roahmen, pwehng, “**Kamwa alwe nehn kahnihmmwen; kamwa pirin suhwoang woal men ma wahwahwa dohn pil oau. Kamwa ken kaujwe.**”<sup>14</sup> Wija ma ih pirin dilda, kamwa pel dilda kamwa pwehng koaunin ummwwo pwa Jounpadahkko iloakihdo pwa kama en idoak ipoamw, ‘Ia pere ma Ngoahi apel Noai sohnpadahkkok pirin wia amai kamdipw in Passover?’<sup>15</sup> A ih pirin kajalehiaoang kamwa pere koalik oau puwoa, ma ne koajoandoi apel koaunopda. Doari, kamwa koaunopda joang ohroj wijahu.”

<sup>16</sup> Sohnpadahkkok lella nehn kahnihmmwo; ira kidalda me ohroj doahr ma Ih pwehng ira. Ara ken koaunopda me ohroj.

<sup>17</sup> Injoausikpene, Jesus apel Nah sohnpadahk ejek roahmenno inla Jerusalem. <sup>18</sup> Nehn irai mwingmwinge in sehpillo, Jesus pwehng irai, “**Ngoahi pwehng kamwai in mehlel, pwa emen kamwai pirin pangla Ngoahi emen ma pwili Ngoahi mwingmwinge me.**”

<sup>19</sup> Sohnpadahkkok ken pwunodkihda lalloauwe, irai ken sapda wademen idoak ipoa, “Maing, ngoahi ma koawoa pwahki lalloauwe?”

<sup>20</sup> Jesus japoang, “**Eh, emen jang kamwai ejek roahmen pwiai, emen ma pwili kadkadu kanah pilahwa nehn Oai mwoakke.**

<sup>21</sup> **Mehlel pwa Nihn-Armaj uhdahn pirin mehdi doahroar Puk**

**Joarwi ne pwa, nen naunahng armajjo ma pirin pangla Nihna-Armaj! Mwehuwoanngoar armaj mene en johpwa noaisikdi!"**

*En Koaunno Kamdipw Joarwi*

<sup>22</sup> Nehn anjouauwo ma irai mwingswinge Jesus kihda pilahwahioau kapingkalahngankihoang Koahs, sipwang pijoang kioang Nah sohn-padahkkok, pwehng, "**Kamwai oaloa, pwa ioar palwoaroaioahwa me.**"

<sup>23</sup> Ih pel oaloa mwoak oau kapingkalahngankihoang Koahs, kioang irai. Irai ohroj ken pwili nimjang. <sup>24</sup> Ih pel pwa, "**Ioar insahi-hoawa me ma pirin widekdihoang armaj ohroj, insahihoa ma pirin kadehde en Koahs inoau kapw.**" <sup>25</sup> Ngoahi pwehng kamwai in mehlel, pwa jang mwerin rehnnoauwe, Ngoahi johla pirin pwuroahng nim wain oaroh lel rehnno ma Ngoahi pirin pwuroahng nim wain kapw nehn wein Koahs."

<sup>26</sup> Mwerin irai koaulki koaul pas, irai ken allaluhlahng in Dolin Olip.

*Jesus Kohpda en Peter ah pirin kahmahmkihla Ih*

<sup>27</sup> Jesus ken pwehng irai, "**Kamwai ohroj pirin kaupijoang apel kerpwihla Ngoahi, pwa Puk Joarwi ne pwa, 'Koahs pirin kojukdi jiloapoahu, a jihpw kan pirin kaupijoang.'**" <sup>28</sup> A mwerin Oai pirin iejda, Ngoahi pirin inla mwohmwai Galilee."

<sup>29</sup> Peter japoang Jesus, "Maing, mihnda ma ohroj pirin kerpwihla koawoa, a ngoahioahr joah!"

<sup>30</sup> Jesus pwehng Peter, "**Ngoahi pwehng koawoa in mehlel, pwa pwongoauwe, mwohn joang jummwa kariau, koawoa pirin kahmahmkihla Ngoahi pehn jiluh, pwa koawoa jehjoa Ngoahi.**"

<sup>31</sup> A Peter japoang Jesus, in ngil sihkei, "Ngoahi johpwa pirin kahmahmkia pwa ngoahi jehjoa koawoa, Maing, mihnda ma ngoahi pel pwili koawoa mehdi."

Doari, sohnpadahkkok ohroj pel pwili wia joangoan sikesikkoauwe.

*Jesus Kapkap nehn Mwoaswel Gethsemane*

<sup>32</sup> Irai lel nehn mwoaswel ma adanki Gethsemane. Jesus ken pwehng Nah sohnpadahkkok, "**Kamwai mwindi, pwa Ngoahi pirin kapkap.**"

<sup>33</sup> Ih ken ukda Peter, James apel John. Ih kupwurohla apel pahsoaula,

<sup>34</sup> Ih ken pwehng irai, "**Nehn kapehdihoa inenin pwunodda doahrma Ngoahi pirin mehdi. Kamwai jowi Ngoahi me johpwa moairla.**"

<sup>35</sup> Ih ken inla ekij dohlahjang irai, poapwomwla pohn pwirej kapkapki ma awahn loklokko johkak dauluhl jang Ih. <sup>36</sup> Ih ken pwa, "**Pahpa, Pahpa, me ohroj kak ipoamw. Koawoa kihwehjang Ngoahi dal oauwe. A joah, jaudi injenoai en pwoaida, pwa dahkij Koawoa kupwurki ioar en pwoaida.**"

<sup>37</sup> Ih ken japhaldo ipen irai jilmenno kidalda pwa irai moair. Ih ken pwehng Peter, "**Simon, koawoa moair? Koawoa joh kak pwili poahpoahpoahdkia awa oauwoar?**" <sup>38</sup> Ih ken pwehng irai, "**Kamwai pwili poahd apel kapkap pwa doar kamwai lohdihoang nehn jongjong. Pwa ngen ma peik a palwahr ma jasihkei.**"

<sup>39</sup> Ih pel jahalla kapkap, in joangoan mwommwohr. <sup>40</sup> Ih ken pel jahaldoing ipen Nah sohnpadahkkok kidalda pwa irai moahmoahmoair, pwa mijaraihok inenin soausoaukihla arai nimmen moair. Irai ken jehjoahla pwa da irai en pwehng Jesus.

<sup>41</sup> Mwerin, kajiluh in a pwurla iparai, Ih pwehng irai, “**Kamwai ken moair koamkoammoal? Ne isar! Awahu ne leldo, ma ioar Nihn-Armaj pirin pangpangla ipen irai dipan kan.**” <sup>42</sup> Kamwai pwohrda! Kisai! Kapang, ioar armaj wa ma pirin pangla Ngoahi ne leldo.”

### *Jesus ne Joaldi*

<sup>43</sup> Jesus kahjik kadoarihla Ah sikesik, a Judas, emen arai eijke roahmenno, lel Ipoa. Pokon koalikkoua ma pwili; irai wijik kodlaij apel koapwoahn pei, indoahjang ipen jamwrou laplappok, jounpadahk in kojonneddok apel jourmajjok. <sup>44</sup> Judas kioang pokonno kilel oau, pwa, “Armajjo ma Ngoahi pirin misik, ioar Ih, kamwai joalihdi. Kamwai ukwe jiloa Ih.”

<sup>45</sup> Nehn en Judas lel wijahu, ih ken inlahng ipen Jesus, pwehng, “Jounpadahk!” ih ken misik Jesus. <sup>46</sup> Pokonno ken koldi Jesus joalihdi Ih soang. <sup>47</sup> A emen iraihok ma mine wijahu, wijda nah kodlaiijo ngap pijoang poaloahjang sien nihn emen Jamwrou Laplappo lidu. <sup>48</sup> Jesus ken pwehng irai, “**Imdoahr, kamwai indoahng koldi Ngoahi wijik jahr apel koapwoahn pei, doahr ma Ngoahi pwen lollap nauna men?**” <sup>49</sup> Rehn ohroj Ngoahi kin minminehr ipamwai, padpadahk nehn Umw Joarwiho, kamwai johpwa joalihdi Ngoahi. Doari, me pirin wiawi pwa lalin Puk Joarwi en pwoaida.”

<sup>50</sup> Nah sohnpadahkkok ohroj ken kerpiwhla Ih kaula.

<sup>51</sup> Mwahnkapw men pwili kauj Jesus; pidkihpene palwoaroa upuhp oau. Irai jong in koldi ih. <sup>52</sup> Ih kaula kiljoau, kaujjang ah likkoauwo.

### *Jesus Uhda Mwoalen Koapwung Laplap*

<sup>53</sup> Irai ken uklahng Jesus in umwen Jamwrou Laplappo, wija ma ohroj Jamwrou Laplappok, jourmajjok apel jounpadahk in Kojonneddok pokonpene. <sup>54</sup> Peter pwen kahkahkahujjoar Jesus a ekij dohlahjang, oaroh lel nehn kelin umwen Jamwrou Laplappo. Ih ken mwindinhoang wija ipen jounpei pwi pwa ih en pwili irai koaroangroang ipen oaiho. <sup>55</sup> Jamwrou laplappok apel Sohn Mwoalen Koapwung Laplappok ohroj ken engdehnkihla rapahkihda kadehdehpwi ma pirin kahrechioang Jesus en kojkojdi, irai ken johpwa diar. <sup>56</sup> Dirin jounkadehde pwi kinehioang Jesus likamw pwi, a arai kadehde kan johpwa pwungpene.

<sup>57</sup> Armaj pwi uhda ken kinehioang Jesus likamw oauwe, <sup>58</sup> “Kamai pein rongjang woalmene, pwa, Ngoahi pirin koauwehla Umw Joarwihe, ma armaj kouda, a mwerin rehn jiluh Ngoahi pirin kouda oau ma johpwa wiawihkihda poahn armaj.” <sup>59</sup> A pel arai sikesik kan johpwa pwungpene.

<sup>60</sup> Jamwrou Laplappo ken uhda jang nehn dohiahu mwohrai ohroj, ih ken idoak ipen Jesus, “Johpwa mehkij koawoa pirin japoangki kadip pwiai ma wiawihlioang koawoa?”

<sup>61</sup> Jesus nennenla, johpwa japoang, Jamwrou Laplappo ken pel pwuroahng idoak ipoa, “Koawoa ma Messiah, Nihn Koahs Kapaiho?”

**62** Jesus ken japoang, “**Ioar Ngoahi ma Ih; kamwai ohroj pirin kapang Nihn-Armaj Ah pirin mine in loap moaunin Wija Laplap apel ma allaluhdo pohn koasoau kan in pehnloannge.**”

**63** Jamwrou Laplappo ken uhdahr soahrpijoang ah likkoauwo, ken pwahla, “Kisai johpwa anahne pel epwi jounkadehde! **64** Kamwai ne pein rong Ah lahlahwe. Dahkij kamwai lemleme?”

Irai ohroj ken pwa Ih ne dipda doari Ih koanoahng kojkoji.

**65** Epwi irai ken sapda andipoa, poaroahla mijoa, poki, apel idoak, “Kohpda pwa inje ma poki koawoa?,” Jounpeihok ukla Ih poki.

### *En Peter Kahmahmki Jesus*

**66** Nehn en Peter minmine ijoan nehn kelin umwen Jamwrou Laplappo, lidu in Jamwrou Laplap men lel wijahu. **67** Nehn ah kapangda Peter pwili koaroangroang wijahu, ih ken kapkapang Peter, pwehnglahng, “Koawoa pel emen ioangen Jesus mihn Nazareth.”

**68** Peter ken kahmahmkihla, pwa, “Ngoahi jehjoa... Ngoahi jehjoa dahkij koawoa pwahpwhapwa.” Ih ken dilla nehn palanngo; nehn anjoauwohr joang jummwa keiou wiawi.

**69** Liduhwo pel pwuroahng kapangda ih wijahu pwehnglahng araihok ma minmine wijahu, “Uhdahn emen irai me.” **70** Peter pel pwuroahng kahmahmkihla.

Mwerin anjoaukij, irai ma minmine wijahk pel pwehng, “Koawoa johkak kahmahmki pwa koawoa emen kijehrai, pwa koawoa mihn Galilee.”

**71** Peter ken pwahla, “Ngoahi kahukihla pwa ngoahi lallal mehlel! Koahs en koalkoa ngoahi ma ngoahi likamw. Ngoahi jehjoa armaj menen ma kamwai pwahpwhapwa.”

**72** Nehn anjoauwohr joang jummwa kariau wiawi. Peter ken samanda en Jesus pwehng ih, “**Mwohn joang jummwa kariau pirin wiawi, koawoa pirin kahmahmki Ngoahi pehn jiluh pwa koawoa jehjoa Ngoahi.**” Ih ken sapda joang.

## 15

### *Jesus Mwohn Pilate*

**1** Oh inminjoang jamwrou laplappok pwilihki jourmajjok apel jounpadahk in Kojonneddok, pel sohn mwoalen koapwung laplappok ohroj, wiahda arai koajoandi. Irai joalikhidi Jesus jihn, irai ukla Ih ipen Pilate. **2** Pilate ken idoakkoang Jesus, “Koawoa ioar nahmwarkiinh mihn Jew?”

Jesus japoang, “**Koawoa ma pwa.**”

**3** Nehn en jamwrou laplappok irai karkaraunki Jesus joang dirpwi, **4** Pilate pel pwuroahng idoak Ipoa, “Koawoa jehpirin japoang? Rong meohroj irai kadkadipoahki koawoa?”

**5** Jesus johpwa nimen pwahla lal oau a ioar Pilate pwunodkihda dauluhl.

### *Jesus Kadeikda Pwa En Kojkoji*

**6** Nehn anjoau in joarwihns Passover ohroj Pilate kin oapwoahnki kajaldekihla emen sohn kalpwuhjjok ma armajjok poaki. **7** A doari anjoauwo mine woal men, adanki Barabbas, ma pwili lollap naunah-pwi joaldi nehn kalpwuhj pwa ih kojukdi armaj men nehn pingping

in armaj pwi. <sup>8</sup> Doari, anjoauwo ma pokonno dirla ihr sapda poaki ipen Pilate en wiahng irai joangoan kalahnganno ma ih kin wiahng irai mijkoalkoalwa. <sup>9</sup> Ih idoak iparai, “Kamwai nimen ngoahi en lapwaddahng kamwai nahmwarkihn mihn Jew-ok?” <sup>10</sup> Pwa ih inenin kidal pwa jamwrou laplappok pangdohng ih Jesus pwa irai pihrinoang.

<sup>11</sup> Jamwrou laplappok koangoangehki pokonno pwa irai en poaki Pilate en lapwaddohng irai Barabbas. <sup>12</sup> Pilate pel pwuroahng idoakkoang pokonno, “A da kamwai mwehuki ngoahi en wiahng woalmene ma kamwai kin panginki nahmwarkihn mihn Jew-kan?”

<sup>13</sup> Irai rahukihlahng, “Kalohpwuhla Ih!”

<sup>14</sup> A Pilate idoakkoang irai, “Pwa dihp dahioau Ih wiahda?”

Irai kapwa kakoalikihla ngilarai rahuki, “Kalohpwuhla Ih!”

<sup>15</sup> Pilate nimen kainjenmwahuwi pokonno, ioar ih jaladoang irai Barabbas; a mwerinno ih mweidoahng Jesus en pokpok, apel kioang irai en kalohpwuhla.

### *Jounpei pwi Kapiski Jesus*

<sup>16</sup> Jounpei pwi ukla Jesus nehn kelin umwen koapinahu, irai panginpene ohroj jounpeihok ma wia kijehn arai pwihnnno. <sup>17</sup> Irai ken kalikkauwihiha Jesus robe pwijehnmwoal oau, pel pahda rahn suhkoa soaksoak pwi in mwomwen mwarmwar irai kihdahng pohn moange. <sup>18</sup> Mwerinno, irai kin dairukdi mwohn Ih, pwahpwahpwa, “Nahmwarkihn mihn Jew-kan en mour woaroai!” <sup>19</sup> Irai kin pokihki moangehu pehri pas apel andipoa mijoa apel poadpwomwla mijen Ih dairukdihoang mwohn Ih. <sup>20</sup> Mwerin irai kapwroa Jesus, irai kihjang Ah robe pwijehnmwoallo, kajpahlihoang Ah likkoauwok. Irai ken ukla Ih pwa en kalohpwuhla.

### *Jesus Kalohpwuhla*

<sup>21</sup> Nehn irai allaluhla irai suhwoang woal men nehn allo, adanki Simon, mihn Cyrene, jemen Alexander apel Rufus. Ih allaluhdohng nehn kahnihmmwo jang nehn a weiho, a jounpeihok iponngangoen wahda en Jesus lohpwuhwo. <sup>22</sup> Irai ken uklahng Jesus wijahu ma adanki Golgotha, ma woahwoahki, “Wijahn Sihn Moang.” <sup>23</sup> Irai jongin kioang Ih wain doalki joangoan wini oau ma adanki myrrh, a Jesus johpwa nim. <sup>24</sup> Doari, irai ken kalohpwuhla, apel nehkpijoang Ah likkoauwok nehn pwungarai, wijwijken dama emenemen pirin anki. <sup>25</sup> Kiloak duwoau inminjoang anjoauwo irai kalohpwuhla Jesus. <sup>26</sup> Insing oau mine pohn lohpwuhwo ma kawoahwoahda kahrpoan Ah lohpwuhla, ma pwa,

“Nahmwarkihn mihn Jew-kan.”

<sup>27</sup> Irai pel kalohpwuhla lollap nauna roahmen pwilohki Jesus, emen mine in Ah loap moaun a emen loap meing. <sup>28</sup> [Ioar pirin doahr pwoaidahn lalin Puk Joarwi, ma pwa, “Ih ken pwili wadwaddoang armaj dipannok.”]

<sup>29</sup> Armaj ohroj ma kin alu wijahu kin isik moangoarai apel lahlahwe Jesus, “Aha! Ioar Koawoa ma kak koauwehla Umw Joarwiho, apel pwuroahng kouda nehn rehn jiluh! <sup>30</sup> Apkas kerdihjang in lohpwuhwen apel doaroahla pein Koawoa.”

<sup>31</sup> Jamwrou laplap apel jounpadahk in Kojonneddlo pwili kapwroa Jesus pwahpwahpwahehki, “Ih kapisla epwi, a johkak kapisla pein

Ih! <sup>32</sup> Kisai kapang Messiah, nahmwarkihns Israel, kerdihdohjang in lohpwuhwen apkas, kamai kapwa kamehlele Ih!"

Lollap roahmenno ma pwili lohpwuhlahu, ara pel lahlahwe Ih.

### *Mehdihns Jesus*

<sup>33</sup> Injauwajjo ros oau indihoang pohn jappwo pwon oaroain awa jiluh. <sup>34</sup> A kiloak jiluh Jesus kakoalikihla ngiloa, Ih pwa, "**Eloi, Eloi, lema sabachthani?**" **ma woahwoahki, "Oai Koahs, Oai Koahs, amwda Koawoa ke moalkoahla Ngoahi?"**

<sup>35</sup> Epwi armajjok ma pwili mine wijahu, nehn irai rong Ih, irai pwa, "Rong, Ih pangpangin Elijah." <sup>36</sup> Emen irai ken kijoukihla limw oau kaduhdi nehn wain siksik dupkoia oau, kioang in imwin suhkoa pas, ih koudalahng in oawoan Jesus a ih pwa, "Jowi, kisai kapang ma Elijah pirin indihdo kihdihjang Ih in lohpwuhwen!"

<sup>37</sup> Jesus rahrahula, Ih kadarla ngenin.

<sup>38</sup> Kahdenngo ma kin poaroa mwoal joarwiho nehn Umw Joarwiho soahroakpijоang nehn pwunge jang puwoa lel pah. <sup>39</sup> Koaunin jounpei men, ma uhda oh in mwohn lohpwuhwo kapang mwomwen en Jesus mehdii. Ih pwa "Mehlel pwa woal mene uhdahn nihn Koahs!"

<sup>40</sup> Lihpwi pel pwili mine wijahu, kapkapang, a irai ekij dohjang. Irai ioar: Mary mihn Magdala, Salome, apel Mary inen James siksikko apel Joses. <sup>41</sup> Ioar irai pwiai ma kin pwilpwilihjili Jesus pwa irai en kin papah Ih anjoauwo Ih mine Galilee pel li dir pwili mine wijahu, ma pwili Jesus indoahjang Jerusalem.

### *Joajjoardihns Jesus*

<sup>42-43</sup> Allaluhlahng injausik ioar anjoauwa Joseph mihn Arimathea leldo. Ih kijehn sohn Mwoalen Koapwung Laplapo ma armajjok kin woaunki; ih kin pel pwili joujouwihdo Wein Koahs. Doari, rehnno, pwa ih wia rehnin koaunopda (rehnwa mwohn Sabbath). Joseph inla ipen Pilate, johpwa perki mehkij, pwa ih en poaki palwoaroan Jesus. <sup>44</sup> Pilate pwuriamweikihla ah rongda pwa Jesus ne mehdii; ih ken pangindo koaunin pwihnnin jounpei men pwa ih en kadehde ipoa ma mehlel pwa Jesus ne mehdii. <sup>45</sup> A mwerin ah oaloa kadehde jang jounpeaho, ih kapwa mweidoahng Joseph en oaloa palwoaroan Jesus. <sup>46</sup> Joseph dupukda likkoau linen oau, ih lapwaddi palwahrro jang in lohpwuhwo, kidimkihpene likkoauwo, apel nekiddi nehn joaujoau ma wiawihda nehn sakai oau. Ih ken kasahpwroahng sakai koalik oau poaroahkihla wijahn dildahn joaujoauwo. <sup>47</sup> Nehr anjoauwo ma mehpwiai wihiawi, Mary mihn Magdala apel Mary inen Joses, ira widwidahli apel kadehde mwehu wijahu palwoaroan Jesus liklikdi.

## 16

### *Jesus Iejda*

<sup>1</sup> Mwerin Sabbath-o, Mary mihn Magdala, Salome, apel Mary inen James, irai dupukda le karahdin pwi irai en inla salipki palwoaroan Jesus. <sup>2</sup> Oh imminjoang in rehnin Joarwi anjoauwo ma joauwo dakda, irai inla in joaujoauwo. <sup>3-4</sup> Nehr irai allaluhlahng in joaujoauwo irai pwahpene nehn pwungarai, "Inje pirin jeujeje kisai kasahpwroahjang sakaiho in oawoan joaujoauwo" (Pwa ausoapoan sakaihoau.) Nehr irai lel wijahu irai kapangda pwa sakaiho ne kasahpwroahkjang. <sup>5</sup> Irai ken

dilda nehn joaujoauwo kapangda mwahnkapw men, ma mwindi loap moaunin joaujoauwo robe korohrohioau ma—kanuhla irai.

<sup>6</sup> Mwahnkappwo pwehng irai, “Kamwai joah majpwehk, ngoahi kidal pwa kamwai raprapahki Jesus mihn Nazareth ma ne kalohpwuuhla. Joh Ih me—Ih ne iejda! Kamwai kadehde, me ioar wijahwa Ih liklikdi. <sup>7</sup> Kamwai alwe padahkihoang Nah sohnpadahkkok, a mehlel Peter. ‘Ih pirin irla Galilee mwohn kamwai; ioar wijahwa kamwai pirin kapang Ih, doahr Ah ne inoaukihoang kamwai.’”

<sup>8</sup> Lihok diljang nehn joaujoauwo, irai ken kau pwa irai inenin majpwehkda apel jalohda. Irai pel johpwa pwehng armaj men mehkij, pwa irai majpwehkda.

#### *Jesus pwokkoang Mary mihn Magdala*

[<sup>9</sup> Mwerin Jesus iejda oh inminjoang in rehnin Joarwi, keiou, Ih pwokkoang Mary mihn Magdala, liho ma Ih kajroahjang ipoa ngen jaus ijimen. <sup>10</sup> Mary ken inla padahkihoang iraihok ma kin pwilpwilihjili Jesus ma injinjuwed apel joangoangoang. <sup>11</sup> Anjoauwo irai rong Mary pwa Jesus mour a ih pel kapang Jesus, irai johpwa kamehlele ih.

#### *Jesus Pwokkoang Sohnpadahk Roahmen*

<sup>12</sup> Mwerin me Jesus pel pwokkoang Nah sohnpadahk roahmen in oaujoangoan mwomw anjoauwo ira allaluhlahng in umwara likin kahnihmmwo. <sup>13</sup> Ira japahldo pel padahkihoang epwi irai, a irai ma rong johpwa kamehlele.

#### *Jesus pwokkoang Sohnpadahk Eijke Emenno*

<sup>14</sup> In koarjoahklahu Jesus pwokkoang Nah sohnpadahk eijke emenno anjoauwo ma irai mwingmwinge. Jesus koapwung oang irai doahr arai joah pwojon apel koapsakai in kamehlele iraihok ma ne kapang Ih mwerin Ah iejda. <sup>15</sup> Ih pwehng irai, “**Kamwai alwe wija ohroj nehn jampah padahkihoang armaj ohroj rongmwehuwo.** <sup>16</sup> **Inje ma pwojon apel poapdaijla, pirin mourla; a inje ma joah pwojon, pirin kerpwihekla.** <sup>17</sup> Manman pwiai pirin aluhwoang iraihok ma kin pwojonla; irai en kin kajroahjang ngen jaus kan ipen armaj in oadoaoia; irai pirin lalki lalin japwen likin kan; <sup>18</sup> ma irai pwoakda sinek kan, ke pel nimla mehkij ma pwoaisin, irai jehpirin mehkhidi; irai pirin kihdahng poahraiok pohn armaj johmwehuwok a ihr pirin mwehula.”

#### *Jesus Pwoakpwoakdahla Nehnloanng*

<sup>19</sup> Mwerin en Koaun Jesus sikesikkoang irai, Ih pwoakpwoakdahla nehnloanng Ih mwindi loap moaunin Koahs. <sup>20</sup> Sohnpadahkkok ken japhylla padpadahkjili wija ohroj; Koaunno kin pel pwilpwili irai nehn arai doadoahkkok pwa en kadehdehda pwa arai padahkkok mehlel jang in manmannok ma irai wiahda.] \*

---

\* **16:20** Epwi iren puk joarwi mehj pwi ma kawoahwoahda iroa siksik 18-20, epwi mwerin iroa siksik 20: *Lihok ken kijoula ipen Peter apel pwilihoahk pel padahkihoang me ohroj ma irai ne rong. Mwerin me, Jesus doadoahkki nah sohnpadahkkok pwa irai en kalohkihipijoang ah kaweedin koamoaur joh imwinno jang palimese lel palikapi in jampah.*

## Rongmwehu ma ne Insingdi jang ipen LUKE

### *Oarlap in Puk Oauwe*

*Rongmwehu in Luke* kajalehda doahroar en Jesus Ah wia jounkoamoaur in Israel apel en armaj ohroj, ma inoaupoa wiawihla kawahu. *Luke* kajalehda (kilelehdi) doahroar en Ngenin Koaunno Ah ne pangin Jesus pwa en “Kapahrakkikoang armaj joamwoahmwoa kan Rongmwehu,” ioar ma puk oauwe pel kajalehda doahroar Rongmwehu in Jesus ah kin jeuweje armaj kan ma kin minmme nehn joangoan anahn ohroj. Irair en peren ma pel dehde mwehu nehn *Luke* a mehlel nehn iroa koalik kan in sapdahu, wija ma pakairin indoahn Jesus wihiawi, apel in imwin, anjoau ma Jesus indahla nehnloanne. Jouninsing in puk oauwe pel insingehdi *Wihwiahn Woaroakkok* ma sikoa doahroar pwojon Christ ah koairda apel parpijoang mwerin Jesus indahla nehnloanne.

Loap 2 apel 6 (Soahk nehn audioapoa in oarlap ma mine pah) ne audohkihda iroa ngoadoar ma johkin diarek nehn Pukin Rongmwehu sohrohr kan, a ioar oar nehn Rongmwehu oauwe, ma doahroar sikesik in sohnloanngok ahr koaul nehn noaisikdihn Jesus, apel jilepen jihppwok ahr pajlahng ipen Jesus; sikesik in Jesus nehn Ah minmme nehn pwungen jounpadahk in Kojonneddok nehn Umw Joarwiho nehn Jerusalem; apel karajraj in Mihn Samaria Kadekko apel karajraj in Jermweinno ma joaloangla. Puk oauwe kin kajampwalki mehlel padahk doahroar kapkap, doahroar Ngen Joarwi, doahroar en lihkan ahr jauwaj oang Jesus nehn Ah padahk, apel doahroar en Koahs Ah kin mahkoahng dipen armaj kan.

### **Audoapoa in Oarlap**

Sapin jakardahn jouninsing Luk 1.1-4

Noaisikdihn apel sikkahn John jounpoapdaij apel Jesus 1.5—2.52

Doadoahk in John jounpoapdaij 3.1-20

Jesus poapdaijla apel oaloa jongjong pehn Jehsen 3.21—4.13

En Jesus doadoahk nehn Galilee 4.14—9.50

Jesus injang Galilee inlahng Jerusalem 9.51—19.27

Kaimwjeklahn wihk nehn Jerusalem apel kahnihmw ipoa 19.28—  
23.56

Koaun Jesus iejda, pwokkoang Nah sohnpadahk kan, Ih indahla nehnloanne 24.1-53

### *Sapin Jakardahn Jouninsing Luke*

<sup>1</sup> Koampoakploi Theophilus:

Armaj ngoadoar engdehn insingehdi sikesik in mehkan ma ne pwoaida ipasai. <sup>2</sup> Irai insingehdi da ma kamai ne oaloahjang iraihok ma widahlihki mijarai kan apel padahkihoang armaj kan joang pwiai jang in sapdahu indoa. <sup>3</sup> A doar maing Theophilus, nehn oai lemleme mwehu doahroar mengihsik in mehpwiak ohroj jang in sapdahu, ngoahi lemheda pwa pirin mwehu mehlel ma ngoahi wiahda oau pukin poapdaijla oang koawoa doahroar mehpwiak. <sup>4</sup> Ngoahi wia

me pwa koawoa en woahwoahkihla joang ohroj ma koawoa ne oaloa padahkin.

*Pakair in noaisikdihn John jounpoapdaij*

<sup>5</sup> Nehr mwein Herod, nahmwarkihl Judea, mine jamwrou men oadoa Zechariah, kijehn loapin jamwrou ma adanki Abijah. Pahioahu oadoa Elizabeth, pel kijehn kadaudok in jamwrou oau. <sup>6</sup> Ira inenin mour poadidi mwohn mijen Koahs, ira kin pel kapwaihahda mwehu mahjan apel kojonned ohroj in Koaunno. <sup>7</sup> A joh nihra jeri pwa Elizabeth johkak noaisik, a ira ne moadohla.

<sup>8</sup> Rehn oau Zechariah wihwia ah doadoahk in jamwrou nehn Umw Joarwiho. <sup>9</sup> In doahroar ma kin wiawi ipen jamwrou kan, ih pilpildahng en wia meiroang in okoj warpwohmwehu nehn Umw Joarwihi Koaunno pohn pei joarwi, doari ih ken dildahng nehn wijahu, <sup>10</sup> a pokon koalik oau minmine likin kapkapkap nehn anjoaun okjekko. <sup>11</sup> Sohnloang in Koaunno men pwokkoang Zechariah uhda loap moaun in mwoal in meiroanngo wija ma warpwohmwehuwo kalkalahs. <sup>12</sup> Nehr Zechariah kapangda sohnloanng, ih nuhkihla apel majpwehkda. <sup>13</sup> A sohnloanng pwehnglahng, “Zechariah, koawoa en joah mijik, pwa oamw kapkap ne pwoaida ipen Koahs! Pahioamw Elizabeth pirin noaisikihdi jermwein men ma koawoa pirin kioang oadoa John. <sup>14</sup> Ih pirin kahrehioang koawoa peren apel popohl, apel armaj ngoadoar pirin perenda nehn ah pirin noaisikdi! <sup>15</sup> Pwa ih pirin laplap mwohn mijen Koaunno. Ih jehpirin jair wain ke jakau sihkei. Mwohn ah pirin noaisikdi ih pirin dirkihla Ngen Joarwi. <sup>16</sup> Ih pirin kajpahlidho mihn Israel ngoadoar ipen Koaunno, asai Koahs. <sup>17</sup> Ih pirin indoa mwohn Koaunno in rojon apel manman doahroar joukohp Elijah. Ih pirin kemwehuwihla nehn pwungen mwahmwa kan apel nihrai jeri kan; Ih pirin pel ukudla armaj japeik kan oang in al pwung kan, apel koaunopda nihn Koaunno armaj oang Ih.”

<sup>18</sup> Zechariah pwehnglahng sohnloanng, “Da ngoahi en kidalki pwa mehkije pirin pwoaida ipoai, pwa ngoahi apel pahioaiho ne moadohla?”

<sup>19</sup> A sohnloanng japoangla, “Ngoahi Gabriel, ma kin ariri Koahs, Ngoahi pwa ngoahi en pakairkihoang koawoa rong mwehu pase. <sup>20</sup> A pwa oamw joah kamehlele oai pakair, ma pirin pwoaida nehn anjoau in, koawoa pirin loahsoangla; koawoa johla pirin kak lallal oaroh lel nehn rehnno ma mehpwiak pirin pwoaida.”

<sup>21</sup> Nehr anjoauwo pokonno joujouwi Zechariah, pwonpwonkihda pwa dahkij ih woaroaikihla loaloa. <sup>22</sup> Nehr ah dildohjang nehn Umw Joarwiho ih johla kak lalloang irai. Irai kidal da pwa ih widahlihda mehkij kapwuriamwei loaloa. Ih uhda mwohn mijarai, jeioahl pwa ih nimen lallal a johkak pwa ih ne loahsoangla.

<sup>23</sup> Nehr en Zechariah ah anjoau in pwukoa doadoahk in nehn Umw Joarwiho doarihla, ih japhahllahng nehn umwahu. <sup>24</sup> Mwerin anjoau kij, pahioahu Elizabeth lijaianda, ih minminehki nehn umwahu oaroain johnpwong limoau. <sup>25</sup> Ih kin pwa, “Ioar doahroar en Koaunno jeuwejehda ngoahi me, nehn Ah kihjang ngoahi oai kamehk ipen armaj kan!”

*Pakair in Noaisikdihn Jesus*

<sup>26</sup> Nehr en Elizabeth kawonou in johnpwong, Koahs pel kadardo sohnloang Gabriel nehn kahnihmw in Galilee oau ma oadoa Nazareth, <sup>27</sup> ipen meipwon men ma ne inoau in pwoapwoaud oang woal men ma oadoa Joseph, kijehn kadaudok in Nahmwarki David. A jerpein meipwonno adanki Mary. <sup>28</sup> Sohnloanngo inla ipoa rahnmwahuwi, ih pwa, "Mary, popohl oang koawoa! Koaunno minmme ipoamw apel ne kapaihda koawoa!"

<sup>29</sup> Mary majpwehkkihda sikesik oauwe apel lamlam koalikki ia pirin woahwoahn sikesik pase. <sup>30</sup> Sohnloanngo pwehng, "Mary, koawoa en joah perki mehkij, pwa kalahngan en Koahs uhdahn koalik ipoamw. <sup>31</sup> Koawoa pirin lijaianda, noaisikihdi jermwein men ma koawoa pirin kioang oadoa Jesus. <sup>32</sup> Ih pirin laplap apel adanki Nihn Koahs, Keiou Laplap. Koaunno Koahs pirin kajapwilda en nahmwarki doahroar jamah David. <sup>33</sup> Ih pirin pel nahmwarkihih kadaudok in Jacob kan alluhluh; Ah wei jehpirin doari!"

<sup>34</sup> Mary pwehng sohnloanngo, "Imdoahr me en kak wiawi, nehn oai meipwon?"

<sup>35</sup> Sohnloanngo japoang, "Ngen Joarwi pirin mine pohmmwen apel rojon in Koahs pirin mine ipoamw, ioar kahrehda jeri joarwiho pirin adanki Nihn Koahs. <sup>36</sup> Koawoa en samsaman kijehmw Elizabeth doahroar en armaj kan ahr wiahki li johkak nainki jeri; a apkas ih ne lijaianda ne mine nehn kawonou in ah johnpwong, mihndahr ma ih ne li moadohla. <sup>37</sup> Pwa joh mehkij ma johkak ipen Koahs."

<sup>38</sup> Mary pwehnglahng sohnloanngo, "Ngoahi lidu in Koaunno en wiawihaoang ngoahi dakhij ma koawoa pwahla." Sohnloanngo ken inlahjang ih.

### *Mary Paj ipen Elizabeth*

<sup>39</sup> Mwerin me, Mary koaunopda me ohroj apel pispis inlahng nehn kahnihmw oau mine in japw nahnhahn Judea, <sup>40</sup> ih dilda nehn umwen Zechariah pwa en rahnmwahuwi Elizabeth. <sup>41</sup> Nehr en Elizabeth rongda en Mary rahnmwahu, jerihon ken mwoakidda nehn kapehdin. Elizabeth ken dirkihla Ngen Joarwi, <sup>42</sup> ih kakoalikihla ngiloa, pwehng Mary, "Koawoa meid pai ipen lihkan! Meid pai jeri ma koawoa pirin noaisikihdi! <sup>43</sup> Dakhij joang kapwuriamwei oauwe wiawihkihaoang ngoahi, ma inen oai Koaun paj ki ipoai? <sup>44</sup> Pwa nehn anjoauwohr ma koawoa rahnmwahuwi ngoahi, jeri siksikko nehn kapehdihoa mwoakidkihda ah malau. <sup>45</sup> Koawoa meid pai pwa oamw pwojon ma kahrehda sikesik in Koaunno pirin pwoaida ipoamw!"

### *En Mary ah Koaulin Kaping*

<sup>46</sup> Mary pwa,  
"Mohngiongihoa kin kapnga Koaunno;

<sup>47</sup> Ngenihoa kin perenki Koahs, oai Jounkoamoaur,

<sup>48</sup> pwa Ih lemle mehr Nah lidu siksik mene!

Jang apkas inla di ohroj pirin kapnga ngoahi

<sup>49</sup> pwa joang kapwuriamwei kan ma Koahs, Keiou Laplap ne wiahda ipoai.

Oadoaoia ioar ma joarwi;

<sup>50</sup> Ah kalahngan kin janjal oang ohroj ma kin woaunki, jang oau di lel oau di.

- 51 Ih ne kihwe poah sihkei,  
    apel kajohla lamlam in ihr aklaplap kan ohroj.  
 52 Ih jinoakdi nahmwarki laplap jang nehn ahr mwoal kan,  
    a wud kajapwilda min silksik kan.  
 53 Ih kamoadihkila mwinge mwehu ihr ma duhpek kan,  
    a kadarpijoang ihr ma koapwoahpwoa kan kaip.  
 54 Ih pwa en kololloar Ah inoau oang jamasaihok,  
    apel indoahng jeuweje Ah lidu Israel;  
 55 Ih johpwa moalkoahla kalahngan ma Ih wiahng Abraham  
    apel kadaudokoa kan ohroj allaluhla!"  
 56 Mary minminehki ipen Elizabeth johnpwong jiluh, mwerin ih  
japahllahng in umwahu.

*Doahroar Noaisikdihn John jounpoapdaij*

- 57 Anjoau in en Elizabeth noaisik ne lel; ih noaisikihdi jermwein kij.  
 58 Nehn en mihn ipoahk apel peneinei irai rongda doahroar kalahngan  
en Koaunno ah pwoaida ipoa, irai ohroj pel pwili inenin perenkihda.  
 59 Nehn kawaluhn rehn mwerin jeriho ah noaisikdi, irai wahla ih en  
jorkomjajila apel kioang ih en adankihla oadoan jamahu, Zechariah.  
 60 Inahu japoang irai, "Joah! Ih pirin adanki John."  
 61 Irai pwehng ih, "A imdoahr? Johpwa oamw peneinei men adanki  
John!" 62 Irai jeioahli jemen jeriho apel kalelpoak ad dahioau ma ih  
nimen kioang jeriho.  
 63 Zechariah poakihda puk oau, ih insingehdi puwoa, "Ih pirin  
adanki John." Irai ohroj ken inenin pwuriamweikihla! 64 Nehn  
oar anjoauwo Zechariah pwuroahng lallalda, apel sapda kapkapnga  
Koahs. 65 Sohn wija ohroj inenin majpwehkda, apel rongin mehpwiak  
lelpijoang wija ohroj nehn japw nahahn Judea. 66 Apel ohroj ma pwili  
rong mehpwiak kin lemleme apel idoak, "Da jeri mene pirin wiahla?"  
Pwa ne janjal pwa manman in Koaunno mine pohn ih.

*En Zechariah ah Kokohp*

- 67 Jemen John, Zechariah, dirkihla Ngen Joarwi ih kohpda in  
doahroar me:  
 68 "Kisai kapnga Koaunno, Koahs in Israel!  
 Pwa Ih ne indoa pwa en jeuweje Nah kan apel koamoaurihla irai.  
 69 Ih kajapwildahng kisai Jounkoamoaur manman men,  
    jang nehn kadaudok in David, Nah lidu.  
 70 Ih ne pwen inoaukihdihoang ipen Nah joukohp joarwihns kawa kan  
 71 pwa Ih pirin doaroahla kisai jang asai imwinskihi kan,  
    apel jang nehn manmanin irai ohroj ma kin lioassoang kisai.  
 72 Ih pel pwa Ih pirin kalahngan oang jamasaihok,  
    apel samsaman oar Ah inoau koalik joarwiho.  
 73 Ih kahukihoang jamasai Abraham,  
 74 apel inoaukihdihoang pwa Ih pirin kapisla kisai jang asai imwin-  
    sihi kan,  
    apel mwedoahng pwa kisai en papah Ih joah perki mehkij;  
 75 a kisai en kin mwakelkel apel pwung mwohn mijoa rehn ohroj in  
    asai mour.

<sup>76</sup> A koawoa, noai jeri siksik, koawoa pirin adanki joukohp in Koahs, Wija Laplap.

Koawoa pirin inla mwohn Koaunno,

pwa koawoa en koaunopda Ah al kan oang Ih;

<sup>77</sup> pwa koawoa en padahkihoang Nah kan doahroar ahr pirin mourla nehn ahr pirin oaloa mahk in diparai kan.

<sup>78</sup> Pwa asai Koahs ma kupwur kalahngan apel kadek.

Ih pirin kamaramihki kisai maram in koamoaur,

<sup>79</sup> apel joaroahki maram jang nehnloanne pohn ohroj ma min-mine nehn ros in mehdi,

pwa en kahkahlwahwe kisai nehn alin popohl.”

<sup>80</sup> Jeriho koalikla apel koahiokla in pali ngen. Ih kin koaukoaujoan nehn japswoahn oaroh lel rehnno ma ih pwokda janjal mwohn mihn Israel.

## 2

### *Noaisikdihn Jesus*

<sup>1</sup> Nehn anjoauwo Nahmwarki Caesar Augustus kouda kojonned oau ma pwa sohn ah wei ohroj en insingdi. <sup>2</sup> Ioar keiou in insingdihn armaj me ma wiawi nehn mwein Quirinius, koapinahn Syria. <sup>3</sup> Armaj ohroj ken mwoakidlahng nehn uhdahn arai wija ma irai noaisikdi pwa irai en pwili insingdi.

<sup>4</sup> Joseph injang kahnihmw Nazareth nehn Galilee inlahng Judea nehn kahnihmw kij oadoa Bethlehem, wijahu ma nahmwarki David noaisikdi pwa ih kijehn kadaudok in David. <sup>5</sup> Ih inla o pwa en pwili insingdi, pwilihki Mary ma ih inoau in pwoapwoaudioang, lijaian anjoauwo. <sup>6</sup> Nehr ara ne lel Bethlehem, en Mary ah anjoaun noaisik ne lel. <sup>7</sup> Ih noaisikihdi nah mehjeni jermwein men. Ih kidimkihpene likkoaua jeri kihdihoang nehn dohien kamwinge mahn oau—pwa ne johla wija nehn umwen keiru.

### *Jounjiloa Jihpw pwi apel Sohnloang pwi*

<sup>8</sup> Jounjiloa jihpw pwi jiljiloa nihrai pwihm in jihppwok inpwonngo nehn jappwo. <sup>9</sup> A sohnloang in Koaunno men pwokdohng irai, apel maram in Koahs joaroahda apel pidekihpene irai. Irai inenin majpwehkda. <sup>10</sup> A sohnloanngo pwehng irai, “Kamwai joah mijik, pwa ngoahi wahdohng kamwai rong mwehu oau, ma pirin kamalauihda armaj ohroj. <sup>11</sup> Pwa pwongoauwe Jounkoamoaurro ne noaisikdi oang kamwai nehn kahnihmw in David—ioar Koaun Messiah <sup>12</sup> A ioar kilelin wa oang kamwai: kamwai pirin kapang jeri siksik men ma kidkidki likkoaua jeri onohn nehn dohien kamwinge mahn.”

<sup>13</sup> Nehn oar anjoauwo pwihm in sohnloang dihrdir oau pwokda wijahu pwili sohnloanngo kapkapnga Koahs koahkoahkoaulki:

<sup>14</sup> “Kaping oang Koahs nehnloanne wija illoa,

apel popohl nehn jampah oang armaj kan ma Ih kin kapaiahda!”

<sup>15</sup> Nehn en sohnloanngok injang irai japhahldahla nehnloanne, jilepen jihppwok pwahpene nehn pwungarai, “Kisai inla Bethlehem apel kapang mehkan ma wiawihla wijahu ma doahroar en Koaunno ne pwehng kisai.”

<sup>16</sup> Irai ken karwarohla kapangda Mary, Joseph apel jeriho ma min-mine nehn dohien kamwinge mahnno. <sup>17</sup> Nehn en jilepen jihppwok

kapangda jeri siksikko, irai pwehng ira me ohroj ma pweiekkoang irai doahroar jerih. <sup>18</sup> Apel ohroj ma rongda audioapoan en jilepen jihppwok sikesikkok inenin pwuriamweikihla. <sup>19</sup> Mary kin lemlemehr mehpwiak ohroj apel lamlam koalikki nehn kapehdin. <sup>20</sup> Jounjiloa jihppwok japhallahng nehn arai wija, johpwa uhdihjang arai koaul kapkapnga Koahs pwa me ohroj arai rongda apel widahlihda pwoaida in doahroar en sohnloanng o pwehng irai.

### *Jesus Oaloa Oadoa*

<sup>21</sup> Mwerin wiik oau, jerih jorkomjajila, Ih adankihla Jesus, adwa ma sohnloanng kioang Mary mwohn ah kahjik lijaianda.

### *Kajarwihlahn Jesus*

<sup>22</sup> Anjoaun kamkel ma insingdi nehn kojonned in Moses ne dauli, Joseph apel Mary wahdahlahng jerih Jerusalem pwa Ih en kajarwi hoang Koaunno, <sup>23</sup> doahroar Ah ne koajoandi jang ipen Koaunno: "Jeri woal ohroj ma mehjeni pirin kin kajarwihoang Koaunno." <sup>24</sup> Ira pel wa indahla ara mihn meiroang, doahroar ma ne pel koajoandi jang ipen Koaunno: mwurei roahmen ke mwurei pwulopwul roahmen.

<sup>25</sup> Nehr anjoauwo woal men kin minmine Jerusalem, oadoa Simeon. Woal mene inenin poadidi apel kin mijik Koahs; ih kin pwili joujouwi koamoaur in Israel, apel Ngen Joarwi kin minmine ipoa. <sup>26</sup> Ngen Joarwi kajalehng ih pwa ih nen joah mehdi mwohn ah pirin widahli Messiah ma Koaunno ne inoaukihda. <sup>27</sup> Ngennohr pel kaweidki Simeon en inla nehn Umw Joarwiho. Nehr en jemen jerih apel inahu ira wahla Jesus nehn Umw Joarwiho pwa en kapwaihahda siahk in kojonneddoo, <sup>28</sup> Simeon oaloahr jerih, pwoakda kapkapnga Koahs, pwahla,

<sup>29</sup> "Maing oai Koaun, koawoa en mweidl nihmw lidu  
en allaluhwe nehn popohl, in doahroar oamw ne inoaukihda.

<sup>30</sup> Pwa pwoaroan mijoihoa kai ne kapangla oamw koamoaur,  
<sup>31</sup> ma Koawoa ne onopdahng mwohn wei ohroj:

<sup>32</sup> Maram oau mihn joaroahda mihn likinnok  
apel kalingihla sohn oamw wei, Israel."

<sup>33</sup> Jemen jerih apel inahu pwuriamweikihla mehkan ma Simeon siksikoahki doahroar nihra jerih. <sup>34</sup> Simeon kapaiahda ira ih pwehng Mary inen jerih, "Jeri mene ne pilpilda pwa en wiahla mihn koauwehla apel koamoauria armaj ngoadoar ipen mihn Israel kan; Ih pirin wiahla kilel oau ma armaj dir pirin pallanda, <sup>35</sup> kajalehkihda lamlam rir in nehn kapehdirai kan. Injinjuwed koalik pirin koauwehla nehn kapehdimwen, doahroar kodlaij ingkoang pas."

<sup>36-37</sup> Pel mine li joukohp men, oadoa Anna, nih Phanel, kijehn kadaudok in Asher. Ih pwoapwoaudki johnpar ijuh oar, pwa apkas ih ne liohdihla, ih johnpar 84. Ih johkin diljang nehn Umw Joarwiho; pwa inpwong apel inrehn ih kin pwongi Koahs, kapkap apel kaijihjol. <sup>38</sup> Nehr anjoauwohr ih pel lella wijahu, ih kapingkalahng oang Koahs apel sikoa doahroar jerih oang irai ohroj ma joujouwihdo koamoaur oang Jerusalem.

### **Irai Pwurlahng Nazareth**

<sup>39</sup> Nehr irai ne kapwaihahda me ohroj ma ne kileldi nehn kojonned in Koaunno, irai ken japhallahng Galilee, nehn kahnihmw Nazareth.

<sup>40</sup>Jeriko koalkoalikla apel sihsihkeila; Ih pel koahiokla apel kalahngan in Koahs kin mine pohn Ih.

### *Jesus Nehn Umw Joarwiho*

<sup>41</sup> Nehn pahr ohroj jemen Jesus apel inahu kin indahla Jerusalem pwa ira en pwili Joarwihn Passover. <sup>42</sup> Nehn en Jesus ne mahki johnpar eijkek riau, irai pel indahla pwa irai en pel pwili joarwiho in doahroar irai kin pwen wia. <sup>43</sup> Nehn Joarwihn Passover-o ne doarihdi, irai japahllahng nehn uhdahn irai wija, a Jesus minminehr Jerusalem. Jamahu apel inahu johpwa kidal; <sup>44</sup> Ira lemleme pwa Ih ne pwilihla pokonno inla mwohn ira. Mwerin ira ne allaluhki rehn oau pwon, ira sapda rapahki nihra jerihio ipen ara peneinei apel koampoakpara kan. <sup>45</sup> Nehn ira joah kapangda, ira pwurlahng Jerusalem apel raprapahkijili Ih. <sup>46</sup> Nehn kajiluh in rehn ira kapangda Ih nehn Umw Joarwiho, mine nehn pwungen jounpadahk en kojonneddok rongrongrong apel peipeidek oang irai. <sup>47</sup> A ohroj ma pwili rongrongrong inenin pwuriamweikihla loalkoang ma pwokda nehn Ah japoang peidek kan. <sup>48</sup> Nehn en jamahu apel inahu kapangda Ih, ira inenin pwuriamweikihla. Inahu pwehnglahng Ih, “Noai jeri, amwda koawoa ke wiahkihoang kama joang oauwe? Ngoahi apel joamoammwo inenin sihwohkihla ama raprapahkijili koawoa.”

<sup>49</sup> Ih japoangkihla ira, “**Amwda kamwa ke raprapahkijili Ngoahi? Kamwa johpwa kidal pwa Ngoahi uhdahn pirin kin minmine nehn Umwen Joamoaiho?**” <sup>50</sup> Ira johpwa woahwoahki sikesik pase.

<sup>51</sup> Jesus ken pwili ira allaluhlahng Nazareth, wijahu Ih kin peikkoang ira. Inahu kin samsaman mehpwiak ohroj apel joh kin moalkoahla. <sup>52</sup> Jesus koalkoalikla apel loalloalkoangla, Ih pel kajampwalla ipen Koahs apel ipen armaj.

## 3

### *En John jounpoapdaij Kapahrak*

<sup>1</sup> Kaeijek limoau in johnpar in mwein Caesar Tiberius, Pontius Pilate koapinahn Judea, a Herod koaun in Galilee, riahu Philip ma koaunda in Iturea apel Trachonitis; Lysanias koaunda in Abilene, <sup>2</sup> a Annas apel Caiaphas ioar Jamwrou Laplap; ioar anjoauwa lal in Koahs indoahng ipen John nihm Zechariah, ma minmine nehn japssoahn. <sup>3</sup> John kin allalu wija ohroj ma koaroannoang pohn Pillap Jordan, kapkapahrakkohoang armajjok, “Kamwai koaluhla, wiliakapwla apel poapdaijla, a Koahs pirin mahkoahng dipamwai kan.” <sup>4</sup> Doahroar ah ne insingdi nehn pukin joukohp Isaiah:

“Mine ngilloau ma kin poangpoangoang nehn japssoahn:

‘Kamwai koaunopda alin Koaunno,  
kamwai kainenehla Ah al kan ma Ih pirin alu loaloa!

<sup>5</sup> Wahu ohroj uhdahn pirin audohda,  
dol apel dokdok ohroj pirin kapaspasihekla.

Al piroak ohroj uhdahn pirin kainenehklakla,  
wija japahrak ohroj pirin kapahrakla.

<sup>6</sup> Armaj ohroj pirin widahli koamoaur jang ipen Koahs!” ”

<sup>7</sup> A ih pwehng irai armaj ngoadoar ma indoa ipoa pwa irai en poapdajila. Ih pwa, "Kamwai doahroar sinek kan! Inje pwehng kamwai pwa kamwai kak pisjang koaloklok in Koahs ma nimenoar lel kamwai? <sup>8</sup> Kamwai wiahda siahk kan ma pirin kajalehda amwai ne koaluhla apel wiliakapwla. Kamwai joah siksikoa pwa, 'Kamai jamanki Abraham,' pwa ngoahi pwehng kamwai pwa Koahs kakkoar wiahjang in sakai pwiak nihn Abraham jeri! <sup>9</sup> Jiloahu ne onopdahng poaloahdi sipin suhkoa ohroj ma johkin kihda wah mwehu, en poalpoaldi peidekla nehn oaiho."

<sup>10</sup> Armajjok kin idoak ipen John, "A doar da kamai pirin wia?"

<sup>11</sup> Ih japoangkihla irai, "Inje ma anki joakid riau, en kioang injé ma joh ah, a inje ma mine kanah mwinge a en pel kioang ih ma joh kanah mwinge."

<sup>12</sup> Jounrik daksis pwi pel pwili indoa pwa irai en pwili poapdajila ipen John; irai idoak ipoa, "Jounpadahk, a kamai, da kamai en pel wia?"

<sup>13</sup> A ih japoangki irai, "Kamwai joah rikpene uhwen mwani oau ma koalikjang da ma ne kileldi."

<sup>14</sup> Jounpei pwi pel idoak, "A kamai, da kamai pirin wia?"

A ih pwa, "Kamwai joah jerkihjang nihn armaj mwani ke karaun mwahli emen armaj; a kamwai en isarki dupkoamwai kan."

<sup>15</sup> Armaj kan lemekhihogang pwa John ioar Messiah, lamlam pase ken koalkoalikla nehn kapehdrai kan. <sup>16</sup> A John pwehng ihr ohroj, "Ngoahi kin poapdajihki kamwai pil; a mine emen ma uhdahn laplap jang ngoahi ma pirin indoa mwerin ngoahi, joal in ah juhwo ngoahi johpwa warroang lapwadda. Ih ioar pirin poapdajihki kamwai Ngen Joarwi apel oai. <sup>17</sup> Ih kol nah poahkko, onopdahng pwa en kasohrohrihpijoang liporrohn wihd kan jang in kilinnok. Ih pirin nekidla wah kan nehn johkohu, a okojla kilinnok nehn oaiho ma johkak kunla."

<sup>18</sup> Joangoan iroa ngoadoar John kin pangpanginki armaj kan nehn ah kin kapkapahrakkihloang irai Rongmwehu pwa irai en wiliakapwla.

<sup>19</sup> Ih pel kapahrank oang Koapina Herod, koapwung oang ah japwung nehn ah painkihla Herodias ma uhdahn pahien riah Philip, apel joang dir ma nauna ih wiahda. <sup>20</sup> Herod pel wiahda joangoan nauna koalik oau nehn ah joalihdi John, peiddoang nehn kalpwuhj.

### *Jesus Poapdajla Ipen John*

<sup>21</sup> Mwerin en armaj kan ne poapdajila, Jesus pel pwili poapdajila a nehn Ah wia kapkap nehnloannge rispijoang. <sup>22</sup> Ngen Joarwi indihoang pohn Ih in mwomwen mwurei men; a ngilloau indihdo jang nehnloannge, ma pwahla, "Koawoa ma ioar Noai jermwein kajampwalwa ma Ngoahi kin perenkikhda."

### *Iroakdihh Dihkan en Jesus*

<sup>23</sup> Jesus dapwa johnpar jilihjek nehn Ah sapkihda Ah doadoahk: armaj kan kin pwahki pwa Ih nihn Joseph, a Joseph nihn Heli, <sup>24</sup> Heli nihn Matthat, Matthat nihn Levi, Levi nihn Melchi, Melchi nihn Jannai, Jannai nihn Joseph, <sup>25</sup> Joseph nihn Mattathias, Mattathias nihn Amos, Amos nihn Nahum, Nahum nihn Esli, Esli nihn Naggai, <sup>26</sup> Naggai nihn Maath, Maath nihn Mattathias, Mattathias nihn Semein, Semein nihn Josech, Josech nihn Joda, <sup>27</sup> Joda nihn Joanan, Joanan nihn Rhesa,

Rhesa nihn Zerubbabel, Zerubbabel nihn Shealtiel, Shealtiel nihn Neri,  
<sup>28</sup> Neri nihn Melchi, Melchi nihn Addi, Addi nihn Cosam, Cosam nihn Elmadam, Elmadam nihn Er, <sup>29</sup> Er nihn Joshua, Joshua nihn Eliezer, Eliezer nihn Jorim, Jorim nihn Matthat, Matthat nihn Levi, <sup>30</sup> Levi nihn Simeon, Simeon nihn Judah, Judah nihn Joseph, Joseph nihn Jonam, Jonam nihn Eliakim, <sup>31</sup> Eliakim nihn Melea, Melea nihn Menna, Menna nihn Matthata, Matthata nihn Nathan, Nathan nihn David, <sup>32</sup> David nihn Jesse, Jesse nihn Obed, Obed nihn Boaz, Boaz nihn Salmon, Salmon nihn Nahshon, <sup>33</sup> Nahshon nihn Amminadab, Amminadab, nihn Admin, Admin, nihn Arni, Arni nihn Hezron, Hezron nihn Perez, Perez nihn Judah, <sup>34</sup> Judah nihn Jacob, Jacob nihn Isaac, Isaac nihn Abraham, Abraham nihn Terah, Terah nihn Nahor, <sup>35</sup> Nahor nihn Serug, Serug nihn Reu, Reu nihn Peleg, Peleg nihn Eber, Eber nihn Shelah, <sup>36</sup> Shelah nihn Cainan, Cainan nihn Arphaxad, Arphaxad nihn Shem, Shem nihn Noah, Noah nihn Lamech, <sup>37</sup> Lamech nihn Methuselah, Methuselah nihn Enoch, Enoch nihn Jared, Jared nihn Mahalaleel, Mahalaleel nihn Kenan, <sup>38</sup> Cainan nihn Enosh, Enosh nihn Seth, Seth nihn Adam, Adam ma nihn Koahs.

## 4

### *Jesus Jongjong nehn Japwsoahn*

<sup>1</sup> Jesus pwurdo jang Jordan, dirkihla Ngen Joarwi; Ngennohr pel kahlwahla ih nehn japwsoahn, <sup>2</sup> wija ih minminehki rehn pahjek, kajongjong pehn Jehsen. Oaroain rehn nok ih joah mwinge, kahrehda rehn pahjekko doarihla ih mwakohkohda.

<sup>3</sup> Jehsenno pwehnglahng, “Ma koawoa ioar Nih Koahs, a koawoa en pwehng sakai oauwe en wiahla pilahwa.”

<sup>4</sup> A Jesus japoang, **“Ne insingdi nehn Puk Joarwi pwa ‘Jaudi pilahwahr doari ma armaj kak mourki.’”**

<sup>5</sup> Jehsenno pel uklahng Ih wija illoa oau apel kajalehioang wein jampah ohroj nehn marip oau, <sup>6</sup> apel pwehng Ih, “Ngoahi pirin kioang koawoa joangoan manman ohroj apel lingin wei pwiai ohroj. Pwa ohroj ne liklikoang ngoahi a ngoahi kak kioang inje ma ngoahi kak kioang. <sup>7</sup> Ohroj mehpwiai pirin oamw ma koawoa poardi pwongi ngoahi.”

<sup>8</sup> Jesus japoang, **“Ne insingdi nehn Puk Joarwi pwa, ‘Pwongi Koaunno oamw Koahs, papah ih kalahpwuk.’”**

<sup>9</sup> Jehsenno pel uklahng ih Jerusalem kihdahng ih pohn wija ma keiou illoa pohn koadkoan Umw Joarwiho, pwehng ih, “Ma koawoa ioar Nih Koahs wa, a koawoa en lujdihwe jang me. <sup>10</sup> Pwa ne insingdi nehn Puk Joarwi: ‘Koahs pirin ruwoj nah sohnloannngok, irai en apwali mwehuwi koawoa, <sup>11</sup> apel kolkihda koawoa poahrai pwa ehmmwen kan en joah ohla pohn sakai.’”

<sup>12</sup> Jesus pel japoang, **“Ne pel insingdi ‘Koawoa en joah kajongjungi Koaunno, oamw Koahs.’”**

<sup>13</sup> Jehsenno koarjoahla ah kajongjong ohroj oang Jesus, ih injang Ih anjoau kij oaroh pel lel oaroain anjoau kij.

*Jesus Sapkihda Ah Doadoahk nehn Galilee*

<sup>14</sup> Jesus japhahdohng Galilee manman in Ngen Joarwi mine ipoa. Rongin Ih lohkjili nehn wija ohroj. <sup>15</sup> Ih kin padahk nehn arai jinakoke kan, armaj ohroj kin kapkapnga.

*Mihn Nazareth kan lioassoangda Jesus*

<sup>16</sup> Jesus inla Nazareth, wijahu ma Ih sikda, Ih inla nehn jinakoke oau rehnin Sabbath doahroa Ah siahk. Ih uhda pwa Ih en wadek Puk Joarwi. <sup>17</sup> Pukin joukohp Isaiah ma irai kioang. Ih wilikpijoang pukko wadekda wijahu ma siksikoa,

**18 “Ngenin KOAUNNO audohda Ngoahi**

**Ih ne kajarwihla Ngoahi**

**pwa Ngoahi en lohkihoang armaj joamwoahmwoa kan rongmwehu.**

**Ngoahi en lohkihoang armaj joaldi kan ahr jaldek  
apel jaldek oang arai kan ma minmine nehn kalpwuhj**

**apel kapoahdpijoang mijen ihr majkun kan,**

**apel kajaledekla iraihok ma mine nehn apwal,**

**19 apel kalohkihda pwa anjoauwo ne leldo, ma Koaunno pirin koamoaurla nah armaj kan.”**

<sup>20</sup> Jesus wilikpene pukko kioang papah men. Ih mwindihoho nehn dohiahu. Armaj ohroj nehn jinakokehu ken kakili ih. <sup>21</sup> Ih sapda pwehng irai, **“Rehn oauwe iren Puk Joarwi ne pwoaida doahroar amwai ne rong ah wadwadda.”**

<sup>22</sup> Ihr ohroj kadehde apel pwuriamweikihla lal mwehu kan ma Ih pwa, “Jaudi ih nihn Joseph jermwein wa?”

<sup>23</sup> Ih pwehng irai, **“Uhdahn kamwai pirin pwehng ngoahi loapin lal oauwe; ‘Doahksoa pein kemwehuwihla koawoa.’ Apel kamwai pirin pel pwa, ‘Joang kapwuriamwei ohroj ma kemi ne rong pwa koawoa ne wiahda nehn Capernaum, a koawoa en pel wiahda nehn uhdahn oamw wija.’”** <sup>24</sup> Ih pel pwa, **“Ngoahi pwehng kamwai in mehlel, pwa johpwa joukohp men kin kenken nehn ah wija ipen kijeh kan.** <sup>25</sup> **Mehlel pwa mine liohdi dir Israel nehn mwein Elijah, anjoauwo ma johla wud oaroain johnpar jiluh oaloap apel lehk koalik lel oang jappwo pwon.** <sup>26</sup> **A johpwa emen irai ma Elijah inla ipoa, a oang oar liohdi men ma minmine Zarephath nehn Sidon.** <sup>27</sup> **Pel nehn mwein joukohp Elisha dirin armaj lepa mine nehn Israel; a johpwa emen in irai mwakelkella, ioarroar Naaman mihn Syria.”**

<sup>28</sup> Armaj ohroj nehn jinakokehu inenin lioas nehn ahr rongda lal pwiai. <sup>29</sup> Irai uhdahr warahkihla Jesus jang nehn kahnihmmwo wahdahlahng Ih pohn dollo ma ahr kahnihmmwo kokouda puwoa pwa irai en jinoakla Ih. <sup>30</sup> A Jesus alu nehn pwungarai inla jang irai.

*Woal men ma Ngen Jaus Dilingla*

<sup>31</sup> Jesus allaluhlahng Capernaum, kahnihmw in Galilee oau; Ih ken padahk oang armajjok rehnin Sabbath. <sup>32</sup> Armaj ohroj ken pwuriamweikihla mwomwen Ah padahk, pwa Ah lal kan kin manman.

<sup>33</sup> Mine woal men ma pwili mine nehn jinakokehu, ma ngen jaus dilingla ih. Ih rahrahu koalik pwahla, <sup>34</sup> **“Ah! Jesus mihn Nazareth, da koawoa nimen wiahng kamai? Koawoa indoahng koauwehla kamai!**

Ngoahi kidal pwa inje koawoa; Koawoa ioar Nihn Koahs jounpakair joarwihwa!"

<sup>35</sup> Jesus ruwoj ngen jausso, "**Nennenla, diljang nehn armaj menen!**" Ngen jausso peiddi woallo mijarai ohroj, diljang nehn ih, apel johla wiahng woallo me nauna.

<sup>36</sup> Ihr ohroj ken pwuriamweikihla pwahpene nehn pwungarai, "Dahkij mine nehn en woal mene ah lal kan? Pwa Ah lal sihkei apel manman oang ngen jaus kan, a irai kin peikkoang!" <sup>37</sup> Rongin Jesus ken lohkla wija ohroj nehn jappwo.

### *Jesus Kemwehuwihla Armaj Dihrdir*

<sup>38</sup> Jesus injang nehn jinakokehu allaluhlahng in umwen Simon. Inen pahien Simon-o onohnki nehn ummwö ki johmwehu karkar koalik. Irai pwehng Jesus en jeuweje liho. <sup>39</sup> Jesus ken sohla ipoa apel ruwoj karkarro. Karkarro injang ipen liho, ih ken pwohrda apwali arai.

<sup>40</sup> Injoausikdi, armaj ohroj ma mine nihrai armaj johmwehu joah lipilpil wijkdohng ipoa; Ih kihdihoang poah kan pohrai ohroj kemwehuwihla irai. <sup>41</sup> Ngen jaus kan pel kin injang ipen armaj dir ma kin rahrahu pwahpwahpwa, "Koawoa ma Nihn Koahs!"

Jesus lipwoarehda irai apel johpwa nimen mweidoahng irai en lallallal, pwa irai kidal pwa ioar Ih ma Messiah.

### *Jesus Kapahrakki Rongmwehu nehn Judea*

<sup>42</sup> In ah rehnpijoang Jesus injang nehn kahnihmmwo inla kalahpwukla wijahkij. Armajjok sapda raprapahkijili; nehn ahr kapangda Ih, ihr engdehnkihoang Ih en joah injang iparai. <sup>43</sup> Ih pwehng irai, "**Ngoahi uhdahn pirin pel kapahrakki rongmwehuin in Wein Koahs oang kahnihmw kan, pwa ioar mehwa ma Koahs kadarkihdo Ngoahi.**"

<sup>44</sup> Ih ken kapkapahrakjili nehn jinakoke kan nehn Judea.

## 5

### *Jesus sapin pangin Nah Sohnpadahkkok*

<sup>1</sup> Oau rehn Jesus minmine in oaroahr in Lehn Gennesaret, a armaj dir pokondohng Ipoa pwa irai en pwili rong mahjan en Koahs. <sup>2</sup> Ih kapangda pohs rahpas ma nihdekda poahrinjeddo; a sohnloakjid pwi ne kerdihang puwoa pwa irai en inla duhpla nihrai nehk kan. <sup>3</sup> Jesus doaudahng pohn apas pohssok, woaroan Simon, pwehng ih en ekij woaroahjang in oaroahrro. Jesus ken mwindihoang pohn pohsso padahk oang pokonno.

<sup>4</sup> Nehr Ah kadoarihlha Ah padahk, a Ih pwehng Simon, "**Simon, kasohdihwe ekij pohssen nehn wija loalen, pwa kamwai en kak kadarpijoang nihmwai nehk kan.**"

<sup>5</sup> Simon japoang, "Maing, kamai ne loakjid oaroh rehnpijoang a pwen joh koanoahmai. A ma koawoa ma pwa, ngoahi pirin kadardi nihmai nehk kai." <sup>6</sup> Irai kadardi nihrai nehkkok; irai koldi dirin mwumw, nimwennoar soahrdi nihrai nehkkok. <sup>7</sup> Irai ken jeioahlhidoo ioangoaraiok ma kijouki apas pohs, pwa irai en jeido jeuweje irai, irai ken jeido. Irai ken audohkikhda mwummwok pohs rahpasso oaroh dir nimwennoar mwoidi. <sup>8</sup> Nehr en Simon Peter kapang dahkij ma

ne wihwiawi, ih poapwomwla mwohn Jesus, pwehng Ih, "Alwehjang ipoai Maing! Pwa armaj dipan men ngoahi!"

<sup>9</sup> Ih apel pwilihoahk ohroj inenin pwuriamweikihla dirin koanoarai in loakjid oauwe ma irai ne koldi. <sup>10</sup> Apel doahroar ioange kan; James apel John, nihn Zebedee-ok. Jesus pwehnglahng Simon, "**Simon koawoa en joah majpwehk, pwa jang apkas inla koawoa pirin loakjidi armaj.**"

<sup>11</sup> Irai ken nihdda wararai pohssok nehn japw, kihdi arai me ohroj ken pwilihla Jesus.

### *Jesus Kemwehuwihla Woal Lepahmen*

<sup>12</sup> Pehn oau Jesus minmine nehn kahnihmw oau ma woal men johmwehuki lepa mine. Nehr en woallo kapangda Jesus, ih rukdioaroh lel pwirej mwohn ih poaki, "Maing, ma koawoa nimen, a koawoa kak kamwkelehdha ngoahi!"

<sup>13</sup> Jesus koula poah pukkoang woallo, Ih pwa, "**Ngoahi nimen. Ken mwakelkelda!**" Nehr anjoauwohr lepahu johla mine ipen woallo.

<sup>14</sup> Jesus ruwoj ih, "**Koawoa en johpwa pwehng emen. Inla ipen jamwrouwo en kajawi koawoa; pwa en kamehlelehng armaj ohroj pwa koawoa ne mwehula, a koawoa wia meiroanngo ma Moses koajoandi.**"

<sup>15</sup> Rongin Jesus ne kalohkla nehn wija dihrrdir, apel armaj dir kin pokondo ipoa pwa ihr en rong Ih apel kemwehuwihla arai johmwehu kan. <sup>16</sup> A Ih kin inla kalahpwukla nehn japssoahn kan, wija ma Ih kin kapkap.

### *Jesus Kasihkeida Woal Mwoasor men*

<sup>17</sup> Oau rehn nehn en Jesus wihwia Ah padahk, a Pharisee pwi apel jounkawoahwoa kojonneddok pwi pwili mine ipoa pidekihpene Ih; irai indoahjang nehn kahnihmw ohroj in Galilee apel Judea apel jang Jerusalem. Manman in Koaunno mine ipen Jesus pwa Ih en kemwehuwihla armaj johmwehu kan. <sup>18</sup> A, woal pwi pel leldo wah woal mwoasor men nehn rohp oau. Irai engdehn in dilkihda woal mwoasorro nehn ummwo kihdi mwohn mijen Jesus. <sup>19</sup> Nehr irai johkak dilkihda pwa jakahpaj in pokonno. Irai doaukihda pohn ummwo pwukulpijoang kadardi woal johmwehuwo nehn pwungen armajjok mwohn Jesus. <sup>20</sup> Nehr en Jesus kapang arai pwojon, Ih pwehng woallo, "**Koampaokploi! Dipoamw kan ne lapwda.**"

<sup>21</sup> Jounpadahk in Kojonneddok apel Pharisee-ok sapda peidek oang pein irai, "Inje woal mene ma lahlahwe Koahs? Inje ma kak lapwadda dihp? Jaudi Koahs kalahpwuk kak mahkoahng dihp?"

<sup>22</sup> Jesus ne kidal arai lamlam, ioar mehwa Ih pwehngkihoang irai, "**Amwda amwai lamlam doahrenki?**" <sup>23</sup> **Ia mehwa moangoai in pwa, 'Dipoamw kan ne lapwda', ke pwa, 'Uhda alu?'** <sup>24</sup> A Ngoahi en kamehlele oang kamwai en kidal pwa Nihn-Armaj anki manmanin mahkoahng dihp pohn jampah." Ih pwehng woal mwoasorro, "**Uhda oaloa kioammwen koawoa inla in umwoammwo!**"

<sup>25</sup> A nehn anjoauwohr woallo mwoasorro ken uhda mwohrai ohroj, oaloa kiahuh ma ih kin mine loaloa, inla in umwahu kapkapnga Koahs.

<sup>26</sup> Ihr ohroj ken pwuriamweikihla mehlel! Nehr ahr majpwehk, irai

kin kapnga Koahs pwahpwahpwa, “Ia woahr joangoan kapwuriamwei kan ma kamwai ne kapang rehnnoauwe!”

*Jesus Pangin Levi*

<sup>27</sup> Mwerin mehpwiai, Jesus inlahjang wijahu, Ih kapangda jounrik daksis men oadoa Levi, ma mine nehn ah oahpisso. Jesus pwehng ih, **“Pwilihla Ngoahi.”** <sup>28</sup> Levi uhdahr kihdi me ohroj ma ih anki ken pwilihla Jesus.

<sup>29</sup> Levi ken wiahda kamdipw koalik oau nehn umwahu oang Jesus; jounrik daksis dir apel armaj pwi pel pwili mwindihuang in sehpillo.

<sup>30</sup> Pharisee pwi apel irai jounpadahk in Kojonneddoo pwi lipahnedkihda apel pwehng nihn Jesus sohnpadahkkok, “Amwda kamwai ke kin pwili mwinge ipen jounrik daksis apel armaj dipan kan?”

<sup>31</sup> Jesus japoang irai, **“Jaudi armaj sihkei ioar anahne doahksoa, a armaj johmwehu.”** <sup>32</sup> Ngoahi joah indoahng pangin armaj pwung kan en wiliakapwla, a pwen armaj dipan kan.”

*Peidek doahroar Kaijihjol*

<sup>33</sup> Epwi armaj pwehng Jesus, “Nihn John sohnpadahk kan kalap kaijihjol apel kapkap, apel doahroar sohnpadahk in Pharisee kan kin wia, a nihmw kan kin mwinge apel nim.”

<sup>34</sup> A Jesus japoangla irai, **“Imdoahr, kamwai lemleme pwa kamwai kak kaijihjoli sohnkapar in kamdipw in koapwoapwoaud nehn en woal kamwohddo ah minmine iparai? Kamwai johkak!** <sup>35</sup> A oau anjoau ma pirin indoa ma woal kamwohddo pirin wijik jang irai; doari, ioar anjoauwo irai pirin kaijihjol.”

<sup>36</sup> Jesus pwehng irai karajraj pase: **“Joh armaj kin soahr jang kijehn joakid kapw apel kioang in joakid dehn, pwa likkoau dehnno pirin koauwehla likkoau kappwo, a kijehn likkoau kappwo johpwa pirin pahrekkoang likkoau dehnno.** <sup>37</sup> Pel doahroar, joh armaj kin widekihoang wain kapw nehn pehk in kilin mahn mering, pwa ma ih pirin wia me, wain kappwo pirin kahrehoang pehk merinngo ah pirin pwohngek pijoang apel soahroak pijoang, wain kappwo pirin widekla apel pehkko pirin ohla. <sup>38</sup> A, armaj kin widekihoang wain kapw nehn pehk kapw. <sup>39</sup> Apel joh armaj men nimen nim wain kapw mwerin ah ne nimla wain dehn. Ih pirin pwa, ‘Wain dehnno ioar mum.’ ”

## 6

*Peidek doahroar Sabbath*

<sup>1</sup> Rehnin Sabbath oau Jesus alu nehn mwoaswel in wihd oau. Nah sohnpadahkkok dolihdi wehn wihd pwi irij nehn poahrai, kangkangkang allaluhla. <sup>2</sup> Pharisee pwi pwehng irai, “Da kamwai wihiwiahki mehkij ma asai kojonneddoo inoapwihdi en joah wiawi nehn rehnin Sabbath?”

<sup>3</sup> Jesus japoang, **“Kamwai johkin wadek da ma David wiahdahu anjoau ma ih apel pwilihoahk mwakohkohla?** <sup>4</sup> Doahroar ah dilda nehn Umwen Koahsso, oaloa lopwon in pilahwa joarwi pwi, kangla apel kioang pwilihoahk en pel pwili kang. A asai kojonneddoo kainoapwi armaj en jehpwili kang pilahwa joarwihok pwa jamwrou kan oar doari en kang?”

**5 Jesus pel pwa, “Nihn-Armaj ioar ma pel Koaun in Rehnin Sabbath.”**

### *Woal Mwoasorpoah Men*

**6 Pel rehnin Sabbath oau Jesus dildahng nehn jinakoke oau pwa Ih en padahk. A woal men pel pwili minmine wijahu ma loap kidalin poah mwoasor.** **7 Jounpadahk in Kojonneddoo apel Pharissee pwi kin nimen kapangda mehkij japwung ipen Jesus pwa irai en kadipoahki Ih. Irai kin mwajmwajahn oar ma Jesus nen joah kemwehuwihla woallo ma mwoasor poah rehnin Sabbath.** **8 A nehn en Jesus Ah woahwoahki arai lamlam, Ih pwehnglahng woal mwoasor poahu, “Koawoa, uhda indahdo in mijaohi.”** Woallo indahla uhda inenda mwohrai. **9 Jesus pwehnglahng jounpadahk in Kojonneddoo apel Pharissee-ok, “Ngoahi nimen idoak mehkij ipamwai; dahioau asai kojonneddoo mweidoahng kisai en wia rehnin Sabbath? Kisai en wia mehkij ma mwehu ke nauna? Kisai en jeuveje mourin armaj ke koauwehla?”** **10 Ih jipwoaljili pohrai ohroj; a Ih pwehnglahng woal mwoasor poahu, “Kailwe poahmmwen.”** Woallo kailla poah ken mwehula.

**11 Jounpadahk in Kojonneddoo apel Pharissee-ok ken inenin lioasla apel sapda siksikoahpene nehn pwungarai da ma irai kak wiahng Jesus.**

### *Jesus Pilda Nah Woaroak Eijek Roahmen*

**12 Anjoauwohr Jesus indahla pohn dol oau pwa en kapkap. Ih kapkap oang Koahs oaroh rehn.** **13 Inminjoang in rehnno Ih panginpene Nah sohnpadahkkok apel pilda jang iparai eijkek roahmenno, ma Ih kahdanki Woaroak.** **14 Simon ma ih kahdanki Peter, apel Andrew rien Simon, pel James apel John, Philip apel Bartholomew;** **15 Matthew apel Thomas, James nihn Alphaeus apel Simon (sohn pwihnnin Zealot),** **16 Judas nihn James, apel Judas Iscariot ma pirin pangla Jesus.**

### *Jesus Kapahrak apel Kemwehuwihla min Jshmwehu kan*

**17 Jesus doaudihjang pohn dollo a woaroakkok pel pwili: Ih uhda wija paspas kij pwilikhki Nah sohnpadahk dir. Armaj inenin dir pwili pokondo wijahu jang wija ohroj nehn Judea, jang Jerusalem, jang kahnihmw in oaroahr kan in Tyre apel Sidon.** **18 Ihr indoahng pwili rong Ih apel Ih en kemwehuwihla ahr johmwehuwok. Pel iraihok ma ngen jaus ne dilingla pwili mine wijahu, pwa Jesus en kemwehuwihla irai.** **19 Armaj ohroj kin nimen pukkoang Jesus, pwa manman injang Ipoa apel kin kasihkeida ahr johmwehu kan ohroj.**

### *Pai apel Injinjuwed*

**20 Jesus kapkapangjili pohn Nah sohnpadahkkok, Ih pwa, “Meid pai kamwai ma joamwoahmwoa kan;**

**pwa ioar amwai wei, Wein Koahs!**

**21 Meid pai kamwai ma nimen mwinge da anjoau oauwe;**  
**pwa kamwai pirin moadla!**

**Meid pai kamwai ma kin joangjoangjoang anjoau oauwe;**  
**pwa kamwai pirin uruhr!**

<sup>22</sup> "Meid pai kamwai nehn en armaj kan ahr pirin lioassoang, kajohwe, kajarahdi apel koauwehla oadoamwai kan ki Nihn-Armaj. <sup>23</sup> Kamwai perenda apel rahrahuki amwai malau anjoauwo, pwa dupkoamwai nehnloanngé inenin koalik. Pwa ioar doahroar en jamaraihok wiahng joukohppok.

<sup>24</sup> A, meid nauna oang kamwai kan ma koapwoahpwoa anjoau oauwe;  
pwa kamwai ne oaloahdi mour in injenmwahu nehn jampah!

<sup>25</sup> Meid nauna oang kamwai kan ma moad anjoau oauwe;  
pwa kamwai pirin duhpekla!

Meid nauna oang kamwai kan ma kin uruhr anjoau oauwe;  
pwa kamwai pirin injinjuwed apel joang!

<sup>26</sup> "Meid nauna oang kamwai ma armaj ohroj pirin kapnga kamwai; pwa ioar doahroar ma jamaraihok wiahng joukohp likammwok.

*Ipwilki Asai Imwinskihi kan*

<sup>27</sup> "A, Ngoahi pirin pwehng kamwai ohroj ma rongrong Ngoahi: kamwai ipwilki amwai imwinskihi kan; kamwai wia mwehu oang ihr kan ma kin lioassoang kamwai; <sup>28</sup> kapaida ihr ma kin kariahla kamwai; kamwai kapkapki ihr ma kin wia naunahng kamwai. <sup>29</sup> Ma emen poki oaloap joapoamwen, mweidoahng oaloap. A ma emen kihjang oamw joakid, mweidoahng en pel oaloa oamw jehs. <sup>30</sup> Kioang armaj ohroj mehkij ma irai poaki ipoamw; apel ma emen kihjang mehkij ma uhahn oamw, johpwa pwehng ih en kajpahlighdo. <sup>31</sup> En doahroar ma kamwai nimen armaj en wiahng kamwai, a ioar en doahroar amwai en wiahng irai.

<sup>32</sup> "Ma kamwai pirin ipwilki iraihok oar ma ipwilki kamwai; joangoan pai da ma kamwai koapwoarpwoarki kamwai nen oaloa? Pwa armaj dipan kan pel kin ipwilki iraihok ma kin ipwilki irai. <sup>33</sup> Apel ma kamwai pirin wia me mwehu oang oar ma kin wia mwehu oang kamwai, joangoan pai da ma kamwai koapwoarpwoarki kamwai nen oaloa? Pwa armaj dipan kan kin pel wia joannghohr. <sup>34</sup> Apel ma kamwai pirin kioang mehkij oang irai kan oar ma kamwai kajik mehkij jang iparai, joangoan pai da ma kamwai joujouwi kamwai nen oaloa? Pwa irai ma dipannok pel kin kioang ihr ma dipan kan pwa irai en pel oaloa dupko! <sup>35</sup> A joah! Kamwai en limpoak oang amwai imwinskihi kan apel wia mwehu oang irai; kamwai kioang irai mehkij a joah kahjik kajpahlin jang iparai. Pwa dupkoamwai pirin koalik apel kamwai pirin wiahla nihn Koahs, Wija Laplap. Pwa Ih kin kalahngan oang ihr ma johkin kalahngan apel oang armaj nauna kan. <sup>36</sup> Kamwai en kin mahk doahroar Jamamwai ma kin pel mahk.

*Doahroar Kadeik*

<sup>37</sup> "Joah kadeik irai kan pwa kamwai en joah kadeikda ipen Koahs; Kamwai joah kariahla irai kan pwa kamwai en joah oaloa amwai karia ipen Koahs; kamwai mahkoahng irai kan pwa Koahs en pel mahkoahng kamwai. <sup>38</sup> Kamwai kihwe pwa kamwai

en oaloa dupkoa jang ipen Koahs; kamwai wia kijakij japan, a Ih pirin kajpahlidhong kamwai in woahioau ma isar, ma koalikjang, ma jikjang mehlel. Pwa mihn jonngohr ma kamwai pirin jongki irai kan, ioar ma Koahs pirin pel jongki kamwai.”

<sup>39</sup> Jesus pel pwehng irai karajraj pase, “Joh armaj majkun men kak kahlwa emen majkun. Pwa ma ih pirin wia me, ira pirin kipdihoang nehn warwar. <sup>40</sup> Joh sohnpadahk men kin laplap jang ah jounpadahkko; a sohnpadahk ohroj, nehn ahr pirin koahiokla mehlel, irai pirin kin doahroarla ahr jounpadahk kan.

<sup>41</sup> “Amwda koawoa ke soahk dipoar siksik kij nehn mijen rioammwo a koawoa joah injinohki pwilein suhkoahn nehn mijoammwen? <sup>42</sup> Ia mwomwen oamw kak pwehng rioammwo, ‘Menlau jowi mijkoalkoal, ngoahi en kihjang dipoar siksik kij in nehn mijoammwen;’ nehn oamw johkak pein poahmda pwilein suhkoan nehn pwoaroan mijoammwen? Mwalaun men koawoa! Kihjang mijkoalkoal pwilein suhkoan nehn pwoaroan mijoammwen, koawoa kapwa kak kapang imdoahr oamw pirin kihjang dipoar siksik kij nehn mijen rioammwo.

#### *Suhkoo Pas apel Wah kan*

<sup>43</sup> “**Suhkoo mwehu pas wah joh kin nauna; pel suhkoo nauna pas wah joh kin mwehu.** <sup>44</sup> Kisai kin kidalki suhkoo ohroj jang in wahrai. Joh armaj kak dolihdi wehn fig jang in wehn suhkoo soaksoak, ke dolihdi jang wain in suhkoo mwahl. <sup>45</sup> Armaj mwehu men kin kajalehda mehkan ma mwehu pwa nehn ah mohngiong dirkihla me mwehu; doahroar armaj nauna men kin kajalehda me nauna pwa nehn ah mohngiong dirkihla me nauna. Pwa oawoan armaj kin kajalehda dahkij mine nehn mohngiongin.

#### *Jounkou Umw Roahmen*

<sup>46</sup> “A, da kaspoan amwai pangpanginki Ngoahi ‘Oai Koaun, oai koaun,’ a kamwai joah wia dahkij ma Ngoahi kin pwehng kamwai? <sup>47</sup> Ngoahi pirin kajalehioang kamwai armaj joah lipilpil men ma kin indoahng rong Oai padahk kan apel kapwaihahda. <sup>48</sup> Ih pirin doahroar armaj ma kin kouda umwah: ih kin jaripda pwirej oaroh lel paip, ih kin poajoanihdi umwahu pohn paippo. A nehn en lapake kin koardo lel ummwo, ih johkak kamwoakkida, pwa ih kokouda pohn paip. <sup>49</sup> A, ih ma kin rong Oai padahk kan, a johkin kapwaihahda, ih doahroar armaj ma kin kouda umwah pohn pwirej apel joh poahjoan in. Nehn anjoauwo ma lapake kin koardo lel ummwo ih kin kipdi apel mwoarpijoang. Ia pirin woahr ohla oauwe!”

## 7

#### *Jesus Kemwehuwihla en Koaunin Jounpei in Rome men nah Lidu*

<sup>1</sup> Nehr en Jesus kadoarihla Ah padahk oang pokonno, Ih inla Capernaum. <sup>2</sup> Koaunin jounpei in Rome men mine wijahu ah lidu men ma johmwehu koalik enken oar mehdi. Lidu mene inenin kajampwal ipen koaunin jounpeaho. <sup>3</sup> A nehn en koaunin jounpeaho rongda doahr

Jesus, ih kadarla laplap in Jews pwi pwa en poaki Jesus en indoa kemwehuwihla nah liduhwo. <sup>4</sup> Mihn Jews-ok inla ipen Jesus poaki in ngidngid en inla, pwa, "Woal mene koanoahng oaloa kalahngan, <sup>5</sup> pwa ih kin ipwilki sohn asai wei, apel pein koudahng kisai oau jinakoke."

<sup>6</sup> Doari, Jesus ken pwilihla irai. A nehn Ah ne koaroanlahng ummwo, koaunin jounpeaho kadarla koampoapkah pwi pwa irai en pwehng Jesus, "Maing, koawoa en joah koakoahkihla oamw indoa pwa ngoahi johpwa warroang kadilihda koawoa nehn umwoiae; <sup>7</sup> ngoahi pel johpwa warroang alwe ipoamw. Koawoa en pwen lal oar, a noai liduhwo ken sihkeida. <sup>8</sup> Pwa ngoahi armaj men ma ne mine pehn koaun pwi, ngoahi pel koaunda jounpei pwi. Nehn oai kin pwehng emen irai, 'Alwe,' a ih kin inla; oang emen, 'Indoa,' a ih kin indoa; a oang oai lidu, 'Wiahda me,' a ih kin wiahda."

<sup>9</sup> Nehn en Jesus rongda mehpwiak, Ih ken pwuriamweikihla, jipwoallahng pokonno ma pwilpwilihwe Ih, Ih pwehnglahng irai, "**Ngoahi kahjik kidalda uhwen koalik in pwojon oauwe, pel joh nehn Israel.**"

<sup>10</sup> Iraihok ma ne koadoaddoarla japhaldo in ummwo, kidalda pwa liduhwo ne sihkeida.

### *Jesus Kamourihda Nihh Liohdi men Jermweinno*

<sup>11</sup> Mwerin anjoau kij, Jesus inlahng kahnihmw oau ma adanki Nain; Nah sohnpadahkkok apel pokon koalik oau pel pwili Ih. <sup>12</sup> Nehn Ah koaroanlahng wanihmw in kel in kahnihmmwo, a kapar in mehdi oau allaluhdo jang loaloa. Armaj mehdiho, nihh liohdi men nah jeri iehroj, ma ihr wahwahla likin, armaj dir pwi ma pwili liohdiho. <sup>13</sup> Nehn en Koaunno kapangda liohdiho, Ih ipwilkihda pwehng, "**Li, joah joang.**" <sup>14</sup> Ih ken sohlahng ipen jepjeppo kihdahng poah puwoa, a iraihok ma wa jepjeppo ken uhdi. Jesus pwa, "**Mwahnkapw! Pwohrda!**" <sup>15</sup> Nehn anjoauwohr armaj mehdiho pwohrda sapda lallal. Jesus kapwurihlahng inahu.

<sup>16</sup> Irai ohroj inenin majpwehkda, irai kapkapnga Koahs pwahpwah-pwa, "Joukohp laplap men ne pwokda nehn pwungasai," irai pwa "Koahs ne indoa pwa en koamoaurla Nah armaj ohroj!"

<sup>17</sup> Rong in en Jesus manman oauwe lohkjili nehn wija ohroj nehn Judea apel nehn jappwok ma pidekihpene.

### *Jounwijik Pakair pwi Jang ipen John jounpoapdaij*

<sup>18</sup> Nihh John sohnpadahkkok kajalehioang ih doahroar mehpwiai ohroj. John ken pangindo nah sohnpadahk roahmen <sup>19</sup> kadarlahng ipen Koaunno pwa ira en idoak, "Ioar koawoa ma John pwa pirin indoa, ke kamai en joujouwi oar emen sohrohr?"

<sup>20</sup> Nehn ara lel ipen Jesus, ira pwehng Ih, "Maing, John jounpoapdaij ma kadardo kama en kalepoak ipoamw ma ioar koawoa ma pirin indoa, ke kamai en joujouwihoar emen sohrohr?"

<sup>21</sup> Nehn anjoauwohr Jesus pel kemwehuwihla armaj dihrdir jang ahr johmwehu kan, jasihkei kan, ngen jaus kan, apel kapoahdpijoang mijen armaj majkun dir. <sup>22</sup> Ih japoang, "**Kamwa pwurwe pwehng John da ma kamwa ne kapang apel rong; doahroar en majkun kan ahr ne kak kapangda wija, doahroar ihr ma johkak alu ne kak alu, ihr lepa kan ne mwakelkelda, doahroar ihr ma**

**pongpong ne rongda wija, ihr ma mehdi kan ne mourda, apel doahroar Rongmwehu kin kalohk oang ihr ma joamwoahmwoa kan.** <sup>23</sup> **Meid pai armaj men ma johkin jakoapwoarpwoarki Ngoahi!"**

<sup>24</sup> Mwerin nihn John jounwijk pakairrok ne inla, Jesus sapda kadehde oang pokonno doahroar John, Ih pwa, “**Nehn amwai inlahng ipen John nehn japwsoahnno, dahkij kamwai nimen kapang? Alek pas ma kin jahjahjahkkihjili eng?**” <sup>25</sup> Da kamwai inlahng kapang? Armaj men ma mine nehn likkoau mwehu? Joangoan armaj ma kin mine nehn likkoau mwehu kan apel anki dir in koapwoa kin diarek nehn Umwen Nahmwarki kan. <sup>26</sup> A, dahkij kamwai nimen kapang? Joukohp men? Eh mehlel, kamwai en kapang pwa ih laplap jang joukohp men. <sup>27</sup> Pwa ioar John ma ne insingdi doahroar ih nehn Puk Joarwi, ‘Koahs pwa, Ngoahi pirin kadarwe Noai jounpakairro mwohn Koawoa, ma pirin koaunopda allo mwohn Koawoa.’”

<sup>28</sup> Jesus pwa, “**Ngoahi en pwehng kamwai, John laplap jang ohroj ma mour, a nehn Wein Koahs armajwa keiou siksik laplap jang John.**”

<sup>29</sup> Armaj ohroj apel jounrik daksissok ne rong Jesus, ioar irai ma peikkoang Koahs apel oaloa poapdajipen John. <sup>30</sup> A Pharisee-ok apel jounpadahk in Kojonneddok ioar irai ma kajohwe Koahs nehn arai johpwa nimen poapdajla ipen John.

<sup>31</sup> “**A dahkij Ngoahi pirin karjahkihoang armaj in anjoau oauwe? Dahkij irai en doahroar?**” <sup>32</sup> **Irai doahroar jeri kan ma kin ummwummwoais wijahn noasnoas kan. Oau pwihns kin rahrahu pwehpwehpwehnglahng oau pwihns, ‘Kamai koajkoajoang in malau oang kamwai, a kamwai johpwa nimen kahlek; kamai koaulki koaul in injinjuwed in mehdi oang kamwai, a kamwai johpwa nimen joang!’** <sup>33</sup> Pwa nehn en John jounpoapdaj ah indoa ih kin wia kaijihjol apel johpwa nim wain, a kamwai kin pwa, ‘Ngen jaus dilingla ih’.

<sup>34</sup> A Nihn-Armaj ne indoa mwinge apel nim wain, a kamwai pel pwa, ‘**Kapang woal mene! Oawoan mwinge apel mumki wain, pirienki jounrik daksis apel armaj jekenken kan!**’ <sup>35</sup> A, en Koahs erpis kin janjalkihda Nah kan ohroj ma oaloahda.”

### *Jesus nehn Umwen Pharisee men, oadoa Simon*

<sup>36</sup> Pharisee men pangin Jesus en pwili ih mwinge in umwahu. Jesus inla in umwahu mwindi oang mwinge. <sup>37</sup> A lihmen mine nehn kahnihmmwo ma anki mour in dihp. Ih rongda pwa Jesus pwili mwingmwinge nehn umwen Pharisee-o, ioar ih wahkihdo rumehn le karahdin oau. <sup>38</sup> Ih mwindi likinjarkin Jesus ipen pwoalkoa, ih ken joang, pilen mijoa dundundioang pohn pwoalkoan Jesus, ih limwihi pisen moange, kiski pwoalkoa kan apel salipki lehu pwoalkoan Jesus-ok. <sup>39</sup> Pharisee-o ma lukehdo Jesus, nehn ah widahli me, ih pein pwahla nehn kapehdin, “Ma uhdahn joukohp men woal mene, Ih pirin kidal inje lihmene ma pukpukkoang Ih; Ih pirin kidal joangoan mour in dihp ma ih kin wihwia!”

**40** Jesus pwehng ih, “**Simon, mine mehkij ma Ngoahi nimen pwehng koawoa.**”

Simon japoang, “Maing, Jounpadahk, pwehng ngoahi.”

**41** Jesus pwa, “**Armaj roahmen mine ma pwaipwaniddoang woal men. Emen in ira pwaipwanidki mwani silper limepwki, a emen mwani silper limeijke.** **42 Joh ara mihn koapwungla ara pwaipwaniddok, ioar mehwa woallo mahkoahngki ira. Doari, menlau japoang Ngoahi, inje in ira ma ah limpoak koalik oang woallo?**”

**43** Simon japoangkihla Jesus, “Ngoahi lemleme pwa armaj ma oaloa mahk koalik ipen woallo.”

A Jesus pwa, “**Oamw pajpoangen pwung.**” **44** Ih jipwoallahng liho, ih pwehnglahng Simon, “**Koawoa en kapang da lihmene wia? Nehn Oai indoia in umwoammwe, koawoa johpwa kioang Ngoahi pil mihn Ngoahi en duhpki pwoalkoaioa kai, ah ih duhpikhla pwoalkoaioa kai pilem mijoa apel dahlimwihihda pisen moange.**

**45 Koawoa joah misik Ngoahi in doahroar asai rahnmwahu in popohl, a ih johpwa uhdihjang ah mismisik pwoalkoaioa kai jang nehn Oai dildahdo.** **46 Koawoa johpwa salip Ngoahi, ah ih salipkihla pwoalkoaioa kai le karahdin.** **47 Doari, Ngoahi pwehng koawoa en kidal pwa ih ne oaloa mahk in dipoa kan ma inenin dir, pwa jang ah limpoak koalik.** Pwa ma ih ma pirin oaloa mahk siksik in dipoa kan, ah limpoak kin siksik.”

**48** Jesus pwehnglahng liho, “**Dipoamw kan ne lapwda.**”

**49** A iraihok ma pwili mine in sehpil in mwingeju sapkihda pwahpene nehn pwungarai, “Inje woalmene ma pel kin lapwadda dihp kan?”

**50** Jesus pwehnglahng liho, “**Oamw pwojon ma koamoaurla koawoa, alwe nehn popohl.**”

## 8

### *Lihpwi Ma kin Pwilpwili Jesus*

**1** Mwerin anjoau oau Jesus allaluhjili nehn kahnihmw apel nehn koujapw kan, kapkapahrakki Rongmwehu in Wein Koahs. Irai ejek roahmenno pwilpwilhjili Ih, **2** apel lihpwi ma Ih kemwehuwihihla jang ahr johnwehuwok apel ngen jaus kan: ma ioar Mary mihn Magdala ma Ih kaujjang ngen jaus ijimen ipoa; **3** Joanna, pahien Chuza, koaunin jounpei en Herod, Susanna, apel li ngoadoar pwi ma kin pwili appwapwali Jesus apel en Nah sohnpadahk kan arai dipwoauwok.

### *Karajraj in Jounkanwoaroa*

**4** Armaj kan pokpokondohr ipen Jesus jang nehn kahnihmw ohroj; apel nehn ahr lel pene ipoa, Ih pwehng irai karajraj oauwe:

**5** “**Armaj men mine ma inlahng kamwroa ah liporrohk.** Doari, nehn ah kamwkamwroa ah liporrohk, epwi mwoardihoang nehn al in nehn mwoaswello, armaj kan siakpijoang, mahnsanngok sangdo kangjang. **6** Epwi mwoardi oang wija sakaikai, irai koapda apel mengla; pwa joh pil in kamwolouwi nehn pwirejjo.

**7** Epwi liporrohk kipdi nehn pwungen suhkoa soaksoak. A suhkoa soaksoakkok koapda kajasihkeihla irai. **8** A epwi

**liporrohk mwoardihoang nehn pwirej mwehu, koapda mwehu ken uhwahda, apas kihda wa epwiki.”**

Jesus kadoarihkhila karajraj pase, Ih pwa, “**Armaj men ma mine sioa, en rong!**”

*Kahrpoan Karajraj kan*

<sup>9</sup> A sohnpadahk kan kalelpoak ipoa, “Maing, ia woahwoahn karajraj pase?” <sup>10</sup> Ih japoangla irai, “**Kamwai oar doari mweimwei en dehdehkhila manman rir kan doahroar Wein Koahs;** a iraihok likin kamwai joah; pwa irai pirin kidal jang in karajraj, pwa irai en kin widahli a pwen joah kapang, irai en rong, apwen joah woahwoahki.

*Jesus Kowoahwoahda Karajraj in Jounkamwoaroa*

<sup>11</sup> **“Ioar woahwoahn karajraj pase: liporrohk woahwoahki lalin Koahs.** <sup>12</sup> Liporro kan ma mwoardi pohn al kan woahwoahki irai kan ma kin rong a Jehsen kin indoa apel kihjang lallo nehn arai mohngiong pwa irai en joah pwojon apel mourkihla. <sup>13</sup> Liporro ma kin mwoardi oang nehn wija sakai woahwoahki irai kan ma kin rong oaloahda apel perenkihda. A ih johpwa kin lel nehn kapehdirai kan, pwa irai kin pwojon anjoau kij oar; apel nehn anjoau in jongjong irai kin pispis kip-wehjang. <sup>14</sup> Liporrohk ma mwoardihoang nehn pwungen suhkoa soakkok doahroar iraihok ma rong lallo, a pwunod in koapwoa kan apel peren in jampah oauwe kin jakahpajihla apel kin pinahla jang lallo nehn kapehdirai kan. <sup>15</sup> A liporro kan ma mwoardihoang nehn pwirej mwehu, woahwoahki irai kan ma kin rong, irai kasoangehdi oang nehn kapehdirai in peik apel mwakelkel in kanangma oaroh kin uhwahda mwehu iparai.

*Lahm Pehn Pahn*

<sup>16</sup> **“Joh armaj kin akanda lahm oau, kioang pehn pahn oau ke kioang pehn pehd.** A ih kin kihdihoang nehn dohiahu pwa armaj kan en kak kapangki wija nehn ahr pirin dilda nehn umw.

<sup>17</sup> **“Me joaloang ohroj uhdahn pirin janjalda, apel me oakkoak ohroj pirin diarekda apel kalohkjili.**

<sup>18</sup> **“Kamwai en kanaihoahng doahroar amwai kin rong, pwa armaj ma anki mehkij kakoalikihekin pirin aluhwoang, a emen ma johpwa anki mehkij, ih pirin luhj jang mehkijjo ma ih lemleme pwa ah.”**

*Inen Jesus apel Riah kan*

<sup>19</sup> Inen Jesus-o apel riahk indoa pwa irai en suhwoang, a irai joh kak sohla ipoa pwa jakahpaj in pokonno. <sup>20</sup> Armaj men pakair kioang Jesus pwa, “Inoammwo apel rioammwok minmine likinno pwa irai nimen suhwoang koawoa.”

<sup>21</sup> A Jesus pwehnglahng ihr ohroj, **“Ioar inoai apel rioai kan, ma kin rong lalin Koahs apel kin kapwaihahda.”**

*Jesus Kamolunihdi Melmel oau*

<sup>22</sup> Oau rehn Jesus apel Nah sohnpadahkkok doaudahng pohn pohs pas, a Ih pwehng irai, **“Kisai jeiwe dauluhllahng loappoauwo pillo.”** Irai ken doauda apel kijoula. <sup>23</sup> Nehr irai kijkijoula nehn pillo Jesus

moairla, a eng koalikla kamwoakidihda pillo, pohsso dirkihla pil, ekij oar ken mweidi. <sup>24</sup> Sohnpadahkkok ken pokon pene ipen Jesus pwa irai en kapwohrihda Ih, irai pwa, “Maing Jounpadahk, kisai en ken mweidi!”

Jesus pwohrda lipwoarehda enngok apel nohk, doar nehn anjoauwoh r enngok pispis oar uhdi, apel pillo molundi mehlel. <sup>25</sup> Ih pwehnglahng irai, **“Ia amwai pwojon en?”**

A irai ken pwuriamweikihla apel majpwehkda, pwahpene nehn pwungarai, “Inje woal mene? Ma pwen lallal oar eng apel no kan, peikkoang Ih!”

*Jesus Kemwehuwihla Woal men ma Ngen Jaus pwi Dilingla Ih*

<sup>26</sup> Jesus apel Nah sohnpadahkkok lella wein Gerasa loappo janjalalahng Galilee. <sup>27</sup> Nehr en Jesus doaudi jang pohn pohsso woal men jang nehn kahnihmmwo suhwoang Ih, ma ne woaroaila en ngen jaus minehki ipoa. Anjoau roairoai ih kin kilkiljoaujili, joh kin mine nehn umw, a ih kin allaluhjili nehn pwungen joaujoau kan. <sup>28</sup> Nehr ah kapangda Jesus, ih rahula apel poardi mwohn Ih, ngil koalikla, pwahla, “Maing Jesus nihn Koahs Laplap! Dahkij koawoa nimen wiahng ngoahi? Ngoahi poaki ipoamw, koawoa en joah koalkoa ngoahi!” <sup>29</sup> Ih pwahla me pwa Jesus ne pwehng ngen jausso en diljang ipoa. Pehn dir ngen jausso kin dilingla ih, nehn armajjok kin piroahdi ehn apel poah kan, ih kin uhdahr mweidla joal kan ma piroahdi ih, ngen jausso kijoukihla ih nehn japssoahn.

<sup>30</sup> Jesus idoak ipoa, **“Ia oadoamwen?”**

Ih japoang, “Karej,” pwa ngen jaus dihrdir kin dilingla ih. <sup>31</sup> Ngen jaussok ken poakihda ipen Jesus en joah kajroahla irai oang nehn pwoar loal joh kapinno.

<sup>32</sup> Pwihnni pij oau minmine wijahu, mwingswingehjili in kilin dol. Ngen jaussok poakihda ipen Jesus en mweidoahng pwa irai en inla dilloang nehn pijjok, Ih ken mweidoahng. <sup>33</sup> Ngen jaussok ken diljang ipen woallo inla dilloang nehn pijjok. Nehr anjoauwohr pijjok kijoudihla duhla nehn pillo.

<sup>34</sup> Nehr en sohn apwali pijjok arai kapangda dahkij wiawi, irai kaula kalohkihjili mwoakid oauwe ipen armaj kan nehn kahnihmmwo nehn jappwo. <sup>35</sup> Armajjok aluhla pwa irai en pein kadehde mehu. Nehr ahr lel ipen Jesus, irai kidalda pwa woallo ma ngen jaussok ne injang ipoa, ih ne onohn ipen ehn Jesus, a ih ne likkoauda, mwomwen armaj mwehumwehu men. Irai ken majpwehkda. <sup>36</sup> Iraihok ma pwili kapang dahkij wiawi, irai pwehng sohn kahnihmmwo doahroar en woallo ah ne mwehula. <sup>37</sup> Mihn Gerasa kan ohroj wiahkioar oau pwehng Jesus pwa en inlahjang iparai, pwa irai inenin majpwehkda koalik. Jesus doaudahng pohn pohs pas kijoujang iparai. <sup>38</sup> A woallo ma ngen jaussok injang ipoa, poaki ipen Jesus, “Koawoa en mweidoahng ngoahi en pwilihwe koawoa.”

Jesus johpwa mweidoahng. Ih pwehng, <sup>39</sup> **“Pwurwe in umwoammwo kalohkihoang armaj kan manman ma Koahs ne wiahda ipoamw.”**

Woallo pwurla kalohki wija ohroj nehn kahnihmmwo manman ma Jesus ne wiahng ih.

*Nihin Jairus Jerpeinno apel Liho ma Pukkoang Ikin en Jesus Likkoauwo*

<sup>40</sup> Nehn en Jesus japahldo jang loappoauwo pillo, armajjok kajamwo Ih, pwa irai ohroj pwen joujouwi Ih. <sup>41</sup> A woal men adanki Jairus, koaunin jinakoke men. Ih leldo apel poardi oang in ehn Jesus, poaki Ih en inlahng in umwahu, <sup>42</sup> pwa nah jerpein iehroj men ma johnpar eijkek riau nimenoar mehdii.

Nehn en Jesus allaluhla armaj kan jakahpajihla ih. <sup>43</sup> Lihmen pwili mine wijahu ma johmwehuki insa pwilpwil johnpar eijkek riau; joh kak mwehula. Ih ne kejpwihihla me ohroj ma ih anki oang in koadoahkpen ah johmwehuwo ipen jounwini kan. <sup>44</sup> Ih dildahng nehn pokonno likinjarkin Jesus pukkoangdi ikin Ah likkoauwo. Nehnnoar anjoauwo ah johmwehu in insa pwilpwillo uhdi. <sup>45</sup> Jesus idoak pwa,

**“Inje ma pukkoang Ngoahi?”**

Irai ohroj japoangki pwa jaudi irai. Peter japoangla Jesus, “Maing, imdoahr en armaj kan pideki pene pel jakahpajihla koawoa?”

<sup>46</sup> A Jesus japoang, **“Mine armaj pukkoang Ngoahi pwa Ngoahi ne poahmda manman oau ne injang Ngoahi.”** <sup>47</sup> Liho ne kidalda pwa ih ne diarekda, ih ken roarroarroar sohla ipen Jesus, rukdihuang ipen ehn Jesus. Ih pwehng Jesus mwohn armaj kan ohroj kahrpoan ah pukkoang Jesus apel doahroar ah mwehula nehnnoar anjoauwo ma ih pukkoang. <sup>48</sup> Jesus pwehnglahng, **“Noai jerpein, oamw pwojon en ne kasihkeida koawoa. Alwe nehn popohl.”**

<sup>49</sup> Nehn en Jesus pwahpwahpwa mehpwiai, jounpakair men ne leldohng ipen koaunin jinakokehu pakairkihong, “Nihmw jerpeinno ne mehdii; koawoa en joah kadroapwoahki Jounpadahkken.”

<sup>50</sup> A Jesus ne rongda pakairro, Ih pwehnglahng jemen jerpeinno, **“Joah mijik, pwojonnaar, a ih pirin pwen mwehu.”**

<sup>51</sup> Nehn Ah leldohng in ummwo Ih joah mweidoahng emen en pwili dilda loaloa, likin Peter, James apel John, apel jemen jerpeinno apel inahu. <sup>52</sup> Armaj ohroj in ummwo joangoangoang apel injinjuwedki jerpeinno. Jesus pwehnglahng irai, **“Kamwai joah joang, pwa jerpeinne johpwa mehdii, ih moair!”**

<sup>53</sup> Irai wia kauruhr ki, pwa irai kidal pwa jerpeinno ne pwen mehdii.

<sup>54</sup> Ih kadilijang ihr ohroj nehn perehu, Ih pwoakda poahn jerpeinno ngil koalikda, pwa, **“Jerpein, pwohrda!”** <sup>55</sup> Nehnnoar anjoauwo mour pwur oang jerpeinno apel ih pisipis oar uhda. Jesus pwehng irai en kamwingehla. <sup>56</sup> Jamahu apel inahu, ira inenin pwuriamweikihla mehlel. A Jesus pwehng ira en johpwa pwehng emen da ma ne wiawihlahu.

## 9

*Jesus Kadarpijoang Sohnpadahk Eijkek Roahmenno*

<sup>1</sup> Jesus panginpene sohnpadahk eijkek roahmenno kioang arai manman apel sihkei in kajroahjang ngen jaus ohroj apel manman in kasihkeida johmwehu kan. <sup>2</sup> Ih kadar pijoang irai pwa en kapahrakki doahroar Wein Koahs apel kemwehuwihla johmwehu kan. <sup>3</sup> Ih pel pwehng irai, **“Kamwai en johpwa wa mehkij nehn jeiloak oauwe: joh jokon, joh pehk mihn kioang mwinge loaloa, joh pilahwa, joh mwani pel joh ngalngal.”** <sup>4</sup> Wijahkij ma irai pirin kajamwo

**kamwai, kamwai minminehr iparai ma kajamwo kamwai nehn umwaraihok, oaroh kamwai injang wijahu.** <sup>5</sup> A wijahkij ma armaj kan joah nimen kajamwo kamwai, kamwai diljang wijahu jiped jang pwirejpar in pwoalkoamwai, kapoahm oau me oang irai.”

<sup>6</sup> Sohnpadahkkok aluhpijoang, aluhjili nehn koaujoan kan ohroj, kapkapahrakki doahroar Rongmwehu apel kemwkemwehuwihla johmwehu kan wija ohroj.

### *Nahmwarki Herod Pwonpwonda*

<sup>7</sup> Herod, koaunin Galilee rongda mehkan ohroj ma ne wiawi; ih ken pwonpwon kihda, pwa epwi pwa John jounpoapdaij ne mourda; <sup>8</sup> A epwi pwa Elijah ma pwokda, a epwi pwa emen joukohp in mehjjok ma ne pwuroahng mourda. <sup>9</sup> Herod pwa, “Ngoahi ne poaloahjang moangoan John, a inje woal mene ma ngoahi rongrongrong doahroar Ih?” Ih jongjong in pwa en kapang Jesus.

### *Jesus Kamwinge Woal Limekid*

<sup>10</sup> Woaroakkok japhahldo pwehng Jesus me ohroj ma irai ne wiahda. Jesus ukla irai pwa en kalahpwukla wijahkij nehn kahnihmw Bethsaida. <sup>11</sup> Nehr en pokonno rongda me, ihr kaujla Ih. Jesus kajamwo ihr pwehng ihr doahroar Wein Koahs, apel kemwehuwihla ihrrok ma anahne jauwaj.

<sup>12</sup> Anjoau ma joauwo en ken dilla, sohnpadahk eijkek roahmenno indoa ipen Jesus pwehng, “Maing, koawoa en ken kadarpijoang pokonne pwa irai en inlahng rapahki kanahr mwinge apel wijahn ahr moair nehn koaujoan kan. Pwa japssoahn oau me.”

<sup>13</sup> A Jesus pwehnglahng irai, **“Kamwai kapwa pein kamwinge irai.”**

Irai pwa, “Lopwonin pilahwa limoau apel mwumw roahmen ma mine ipamai. Koawoa mwehuki kamai en inla dupukda mwinge oang pokon koalik oauwe?” <sup>14</sup> (Dapwa woal limekid ma pwili mine wijahu.)

Jesus pwehng sohnpadahkkok, **“Kamwai wiahda pwihn pwi wad limeijek, pwehng ihr en mwindi.”**

<sup>15</sup> Sohnpadahkkok ken wiahda da ma Ih pwehng irai en wia. <sup>16</sup> Jesus pwoakda lopwonin pilahwa limoauwo apel mwumw roahmenno, jardahla nehnloanne kapingkalahngannoang Koahs, sipwangpijoang, kioang Nah sohnpadahkkok pwa irai en nehkkoang pokonno. <sup>17</sup> Armaj ohroj mwingeroh moad, sohnpadahkkok dowihda luhwen mwingehk wiahda kiam eijkek riau.

### *En Peter Kajalehda doahroar Christ*

<sup>18</sup> Oau rehn Jesus kalahpwukla kapkap, sohnpadahkkok indoa ipoa. Ih idoak oang irai, **“Inje ma pokonne kin pwahki Ngoahi?”**

<sup>19</sup> A irai japoang, “Epwi kin pwa John jounpoapdaij, epwi pwa Elijah, epwi pwa koawoa emen joukohp in mehjjok ma ne iejda.”

<sup>20</sup> A Ih pwa, **“A kamwai, inje ma kamwai pwahki Ngoahi?”**

Peter japoangla, “Koawoa ioar nihn Koahs Messiah.”

### *Jesus kohpda doahroar Ah pirin Koaloklok apel Mehdi*

<sup>21</sup> Jesus kainoapwihdi irai en johpwa pwehng emen mehkije. <sup>22</sup> Ih pel pwehng irai, **“Nihn-Armaj uhdahn pirin loklok koalik, jekenkenla**

**pehn jourmajjok, jamwrou laplappok apel jounpadahk in Kojonneddok. Ih pirin kojkojdi, a mwerin rehn jiluh Ih pirin iejda.”**

<sup>23</sup> A Ih pel pwehng irai ohroj, “**Ma emen nimen indoa pwilihla Ngoahi, ih uhdahn moalkoahla pein ih, wahda ah lohpwu rehn ohroj, kauj Ngoahi.** <sup>24</sup> Pwa emen ma nimen doaroahla ah mour ih pirin luhj jang; a emen ma mihndahkihla ah mour ki Ngoahi, ih pirin mourla. <sup>25</sup> Nen mine kaspoan oamw en wihnkihda jampah pwon, a mwuhr koawoa joaloangla ke lohdi? Joh douluhl! <sup>26</sup> Ma emen pirin mehkki Ngoahi apel Oai padahk, ioar Nihn-Armaj pirin pel mehkki ih nehn Ah pirin indoahki lingin Ih apel Jamahu pwilihki Nah sohnloang joarwi kan. <sup>27</sup> Ngoahi en kamehlelehng kamwai pwa epwi kamwai ma minmine me jehpirin mehdi oaroh irai pwili kapang Wein Koahs.”

### *Jesus Lingla*

<sup>28</sup> Wihk oau mwerin en Jesus pwahla mehpwiai, ih ukda Peter, John apel James, indahla pohn dol pwa en kapkap. <sup>29</sup> Nehn Ah kapkap, mwomwen mijoa wikla, Ah likkoauwok korohro rapwrapwoalla. <sup>30</sup> Anjoauwohr, woal roahmen pwokda ipoa siksikesik oang Ih; ioar ira Moses apel Elijah. <sup>31</sup> Ira pwokdo nehn ling joarwi, pwehpwehpwehng Jesus doahroar Ah pirin kapwaihahda kahroan en Koahs kadardo en mehdi nehn Jerusalem. <sup>32</sup> Nehn en mehpwiai wihwiawi, Peter apel pwilihoa kan moair koalikla; a nehn arai pwohrda irai kapangda doahroar lingin Jesus apel woal roahmenno ma minmine ipoa. <sup>33</sup> Nehn en woal roahmenno injang Jesus, Peter pwehng Ih, “Maing oai Koaun inenin mwehu asai minmine wijahkije. Kamai pirin wiahda umpwal jiluh, oau oang koawoa, oau oang Moses apel oau oang Elijah.” (Ih johpwa uhdahn kidal pwa dahkij ih pwahpwahpwa.)

<sup>34</sup> Nehn ah siksikoa mehpwiai koasoau oau pwokda pwaindi irai, sohnpadahkkok ken majpwehkda nehn arai minehla pehn rir in koasoauwo. <sup>35</sup> Ngil oau indoa jang nehn koasoauwo pwa, “Ioar noai jermwein kajampwalwa ma Ngoahi pilda; kamwai rong Ih!”

<sup>36</sup> Nehn en ngillo johla, Jesus kalahpwuk oar mine wijahu. Sohn-padahkkok johpwa pwehng emen armaj doahroar mehu ma irai kapang.

### *Jesus Kemwehuwihla Jermwein men ma Ngen Jaus Dilingla*

<sup>37</sup> Rehnwahr mwerin, irai indihdo jang pohn dollo, pokon koalik oau suhwoang Jesus. <sup>38</sup> Woal men rahula jang nehn pokonno, “Maing Jounpadahk, ngoahi poaki koawoa en indoa kapang noai jermweinne —noai jermwein wahr doari! <sup>39</sup> Koawoa en kapang, nehn en ngen jausso ah kin dilingla ih, ih kin pwururdahr rrahrahu, kipdihoang nehn pwirej sasjili, pwuroar kin koarjang nehn oawoa, ngenno kin koauwehla kilin apel johpwa nimen diljang ipoa! <sup>40</sup> Ngoahi ne poaki ipen nihmw sohnpadahkkok en kauj jang ngen jausso ipoa, a irai johkak.”

<sup>41</sup> Jesus japoang, “**Ia woahr amwai joah kamehlele apel japwung!** **Ia woaroai in Oai pirin minmine ipamwai? Ia woaroai in Oai**

**pirin kanangmahng kamwai?”** Ih pwehng woallo, “**Ukdo nihmw jermweinnen me!**”

<sup>42</sup> Nehr en jermweinno allaluhdo ipen Jesus ngen jausso peiddi ih oang nehn pwirej, ih ken roarroarroar. Jesus kajroahla ngen jausso, ih ken kemwehuwiha jermweinno, ih kioang ipen jamahu. <sup>43</sup> Armaj kan ohroj ken pwuriamweikihla rojon apel manman koalik in Koahs oauwe.

*Jesus Pwuroahng Sikoahda doahroar Ah pirin Mehdi*

Armajjok kahjikkoar uhdihang ahr pwurpwuriamweiki da Jesus wihwia, a Ih pwehng Nah sohnpadahkkok, <sup>44</sup> **“Kamwai joah moalkoahla da ma Ngoahi pirin pwehng kamwai: Nihn-Armaj pirin likliklahng pehn manman in armaj.”** <sup>45</sup> A sohnpadahkkok johpwa kidal woahwoahn Ah lal kan. Ih kajoaloange jang irai pwa irai en joah woahwoahki, a irai mijikin idoak woahwoahn mehkije.

*Inje ma Keiou Laplap?*

<sup>46</sup> Sohnpadahkkok akmaikhda pwa inje ma keiou laplap nehn pwungarai. <sup>47</sup> Jesus kidalda arai lamlam, ioar mehwa Ih oaloa jeri men, kauhda ipoa, <sup>48</sup> pwehng sohnpadahkkok, **“Inje ma kajamwo jeri mene in Oadoaioa, kin kajamwo Ngoahi apel kajamwo Ih ma kadardo Ngoahi. Pwa ih ma keiou jekenken ipamwai ohroj, ioar ih ma keiou laplap.”**

*Emen Ma Johkin Uhwoang Kamwai, Ih kin upali Kamwai*

<sup>49</sup> John pwa, “Maing, kamai kapang emen ma pwili kaujang ngen jaus kan in oadoamwen, kamai ken inoapwihdi pwa ih johkin pwili amai pwihnnno.”

<sup>50</sup> Jesus japoang, pwehng ih apel ohroj sohnpadahkkok, **“Kamwai en joah kainoapwihdi, pwa emen ma johkin uhwoang kamwai, ioar kin upali kamwai.”**

*Koujapw oau nehn Samaria kia Kajamwo Jesus*

<sup>51</sup> Nehr anjoauwo ma Jesus pirin injang jampah indahla nehnloanne ne koaroando, Ih lemehma Ih en indahla Jerusalem. <sup>52</sup> Ih kadarla epwi jounwijk pakair mwohn Ih pwa irai en inla onopda me ohroj nehn koujappwo nehn Samaria. <sup>53</sup> A, sohn koujappwo joah nimen kajamwo, pwa janjal Ih allaluhdahlahng Jerusalem. <sup>54</sup> Sohnpadahk James apel John nehn ara kidalda me, ira pwehng Jesus, “Koaun, koawoa mwehuki kama en pwa oai en mwoardi jang nehnloanne koauwehla irai?”

<sup>55</sup> Jesus pwurlahng ira woarwoarihda. <sup>56</sup> Jesus apel Nah sohnpadahkkok ken dauluhllahng nehn oau koujapw sohrohr.

*Ihr Ma kin Mwomwehda Pwili Jesus*

<sup>57</sup> Nehr irai allaluhla nehn allo, woal men pwehng Jesus, “Ngoahi pirin pwili koawoa wija ohroj ma koawoa pirin inla.”

<sup>58</sup> A Jesus pwehnglahng ih, **“Fox kan mine arai pwoar apel mahnsang mine arai paj, a Nihn-Armaj joh wija Ih en ilwe koammoal.”**

<sup>59</sup> Ih pwehng emen woal, **“Pwili Ngoahi.”**

A woallo pwa, “Maing, a mwowoa mweidoahng ngoahi en japhalla jaripdi joamoaiho.”

**60** Jesus japoangla, “**Mweidoahng irai kan ma ne mehdi en pein jaripdi arai mehdi kan. A koawoa alwe pwili kalohkijhjili Wein Koahs.**”

**61** Emen pel pwa, “Maing, ngoahi pirin pwilihla koawoa, a koawoa en mweidoahng ngoahi mwowoa en inla koamwurmwur oang oai peneineihok.”

**62** Jesus japoang, pwehng ih, “**Emen ma sapkihda doadoahk kajampwal oau, a pwurla mwerin, ih johpwa warroang Wein Koahs.**”

## 10

*Jesus Kadarpijoang Nah Sohnpadahk Ijihjek Roahmen*

**1** Mwerin mehpwiai Koaunno pilda sohnpadahk ijihjek roahmen kadarpijoang irai, wad roahmen, pwa irai en inlahng nehn kahnihmw kan apel wija kan ma pein Ih pirin inlahng. **2** Ih pwehng irai, “**Roakke inenin koalik, a sohndoadoahk kan ma pirin rikda jipid; kamwai en kapkap poaki Koaunin roakke pwa Ih en kadardohng sohndoadoahk dir nehn Ah roakke.**” **3** Doari, kamwai alwe, kamwai en kidal pwa Ngoahi kadarwe kamwai doahroar jihpw pwulopwul pwi nehn pwungen wolf. **4** Kamwai joah wa dohn mwani, ke pehk in jeiloak ke ju. Kamwai joah uhdi nehn al kan pwa kamwai en rahnmwahuwi armaj. **5** Nehr amwai pirin kin lel nehn oau umw kamwai pirin pwa, ‘Popohl oang umw oauwe.’ **6** A ma armaj in popohl men mine nehn ummwo, amwai popohl pirin minehla ipoa, a ma joh, a popohllo pirin pwurdochng kamwai. **7** Kamwai en minminehr nehn ummwo, pwili kang apel nim me ohroj ma irai pirin koaunopda kioang kamwai, pwa sohndoadoahk ohroj kin koanoahng oaloa dupkoan ahr doadoahk. Kamwai joah kin kajkajaujili injang oau umw inlahng nehn oau. **8** Ma kamwai pirin dildahng nehn oau koaujoan a irai kajamwo kamwai, kamwai kang mwinge kan ma irai pirin kioang kamwai. **9** Kamwai kemwehuwihla johmwehu kan nehn koaujoanno, apel padahkihoang irai pwa ‘Wein Koahs ne indoa koaroandohng kamwai.’ **10** A ma kamwai dildahng nehn oau koaujoan a irai joah nimen kajamwo kamwai, kamwai inlahng nehn al kan apel pwehng sowoa kan, **11** ‘Pwirej par in amwai koaujoan ma ne soangoang in pwoalkoamai kai, kamai jipedwehng kamwai. A kamwai en kidal pwa Wein Koahs ne koaroandohng kamwai!’ **12** Mehlel Ngoahi pwehng kamwai pwa nehn Rehnin Kadeikko Koahs pirin kajalehda Ah kadek oang Sodom koalik jang koaujoanno!

*Koaujoan Joahpwojon pwi*

**13** “**Ia woahr nauna oang koawoa Chorazin! Pel ia woahr nauna oang koawoa Bethsaida! Pwa ma manmannok ma ne wiawihoang kamwa, wiawi ipen Tyre apel Sidon, sohn kahnihmw pwiai nen minmine nehn likkoaun injinjuwed, apel kamwroahdi poahj pohrai, kajalehda ahr koaluhla apel wiliakapwla.**” **14** Nehr Rehnin Kadeikko Koahs pirin kajalehda Ah kadek oang Tyre apel Sidon koalik jang kamwa. **15** A oang koawoa, Capernaum,

**koawoa nimen pwoakdahlahng koawoa nehnloanng? Koawoa pirin jinoakedahlahng nehn ehl!"**

<sup>16</sup> Jesus pel pwehng sohnpadahkkok, “**Emen ma kin rong kamwai kin rong Ngoahi; a emen ma mwamwahlki kamwai kin mwamwahlki Ngoahi; a emen ma mwamwahlki Ngoahi kin mwamwahlki Ih ma kadardo Ngoahi.**”

*Japahldohn Irai Ijihjek Roahmenno*

<sup>17</sup> Sohnpadahk iijihjek roahmen pwurdo perperen koalik. Irai pwehng Jesus, “Maing, amai Koau, ngen jaus kan kin pel peikkoang kamai nehn amai kin ruwoje irai ki Oadoamwen!”

<sup>18</sup> A Jesus japoang irai, “**Ngoahi kapang Jehsen kipla doahroar joarom jang nehnloanng.**” <sup>19</sup> **Rong!** Ngoahi ne kioang kamwai manman, pwa kamwai en alu pohn sinek apel scorpion kan apel powehdi manman in imwinsihi ohroj, johpwa mehkij pirin koauwehla kamwai.” <sup>20</sup> **Doari, kamwai en joah perenki en ngen jaus kan arai peik oang kamwai, a kamwai en malaukiha oadoamwai kan ne insingdi nehnloanng.**”

*Jesus Malauda*

<sup>21</sup> Nehrnoar anjoauwo Jesus dirkihla peren koalik jang Ngen Joarwi, Ih pwa, “**Joamoai, Koaun in nehnloanng apel jampah! Ngoahi kalahnganki oang koawoa oamw kajalehioang irai ma joaloalkoang kan dahkij ma Koawoa oakihjang irai ma loalkoang apel koahiok in jampah kan. Maing Joamoai, ioar me ma Koawoa kupwurki en wiawi.**

<sup>22</sup> **“Joamoai ne kioang Ngoahi me ohroj. Johpwa emen kidal inje Nihn Koahsso pwa Jahm oar doari. Pel joh emen ma kidal inje Jahm, pwa Nihn Koahsso oar doari, apel irai kan ma Nihn Koahsso pilda en kajalehioang.”**

<sup>23</sup> Jesus wud jipwoallahng sohnpadahkkok, pwehnglahng irai in rir, “**Meid pai kamwai kapkapang mehkan ma kamwai kapang apkas!**”

<sup>24</sup> **Ngoahi en pwehng kamwai pwa joukohp dir apel nahmwarki dir nimen kapang dahkij kamwai kapang, a irai johkak, apel rong mehkan ma kamwai rong, a irai johkak.”**

*Karajraj in Woalin Samaria Kadek men*

<sup>25</sup> Jounpadahk in Kojonné men indoa ipen Jesus apel jong in lidipi, idoakkoang Ih, “Jounpadahk, da ma ngoahi uhdahn wia pwa ngoahi en kak oaloahdi mour joahsuk?”

<sup>26</sup> A Jesus japoang, “**Dahkij Pukin Kojonnéddo pwa? Imdoahr oamw kawoahwoa?**”

<sup>27</sup> Woallo japoangla, “Ipwilki Koaunno oamw Koahs ki oamw mohngiong unjek, ki ngenimwen unjek, ki oamw sihkei ohroj unjek apel ki oamw lamlam unjek,’ apel ‘Ipwilki mihn ipoamw doahroar oamw kin ipwilki pein koawoa.’”

<sup>28</sup> Jesus pwa, “**Koawoa pwung. Wia me, a koawoa pirin mour.**”

<sup>29</sup> A jounpadahk in Kojonné nimen kamehlele oang pein ih, ih idoak oang Jesus, “Inje mihn ipoai?”

<sup>30</sup> Jesus japoang, “**Armaj men indihlahjang Jerusalem oang Jericho; lollap nauna pwi pallanda ih kihjang ah likkoauwok poki ih oaroh pirin oar ken mehdi, irai ken inlahjang ih.**” <sup>31</sup> Jamwrou

**men allaluhdihla nehn allohr; a nehn ah kapangda woallo, ih dauluhl wud oaloap allo.** <sup>32</sup> Pel doahroar Levi men alu wijahu kapang woallo, ih pel dauluhlla jang alu oaloap allo. <sup>33</sup> A woalin Samaria men ma wia ah jeiloak wudla wijahu, nehn ah kapang armajjo nehn kapehdin poakehla. <sup>34</sup> Ih ken sohla ipoa, widekihdi le apel wain pohn wijahk ma ohla, ih kidimpene. Ih ken kihdahng pohn warahu wahlahng nehn umwen keiru oau apwali ih wijahu. <sup>35</sup> Rehnwa mwerin ih oaloa mwani silper riau kioang koaunin umwen keiruwo pwehng ih, ‘Apwali ih mwehu, a nehn oai pirin pwurdo ngoahi nen dupuk oang koawoa dahkij ma koawoa apwali ki ih.’”

<sup>36</sup> Jesus kadoarihla pwehng ih, “**Inje ma koawoa leme nehn pwungen irai jilmenne ma wia mihn ipen woallo ma lohdihoang lollap naunahk?**”

<sup>37</sup> A ih japoang, “Woallo ma kadek oang ih.”

Jesus pwehng ih, “**Alwe, koawoa wiahda doahroar.**”

*Jesus Pas ipen Martha apel Mary*

<sup>38</sup> Nehr en Jesus apel Nah sohnpadahkkok allaluhla irai lel nehn koaujoan kij ma lihmen, oadoa Martha, kajamwo Ih oang nehn umwahu. <sup>39</sup> Rien Martha lihmen oadoa Mary ma mwindi ipen ehn Koaunno rongrongrong Ah padahk kan. <sup>40</sup> A Martha pwunodkihda doadoahkkok ohroj ma ih pirin wia ih indoa pwa, “Koaun, koawoa en kapang doahroar en rioai jerpeinne kidoa doadoahk ohroj ngoahi en wia? Pwehng ih en indoa jeuweje ngoahi!”

<sup>41</sup> A Koaunno japoang, “**Martha, Martha, koawoa pwunodkihda apel joahpijekkihla joang dihrdir,** <sup>42</sup> a joang oau oar ma anahn. Mary ne pilda me pwungwa, doari jehpirin liklikjang ih.”

## 11

*En Jesus Padahk doahroar Kapkap*

<sup>1</sup> Oau rehn Jesus kapkap wijahkij. Nehr Ah kadoarihla Ah kapkappo, emen Nah sohnpadahkkok pwehng Ih, “Koaun, padahkihoang kamai doahr kapkap, doahroar en John ah padahkihoang nah sohnpadahkkok.”

<sup>2</sup> Jesus pwehnglahng irai, “**Anjoau in amwai kapkap kamwai pwa, ‘Jamamai:**

**oadoamwen en joarwi,  
oamw wei en pwoaida,**

<sup>3</sup> **Kihdoa rehnnoauwe kanmai mwingehn oauwoau rehn.**

<sup>4</sup> **Mahkoahng dipamai kan,**

**doahroar amai kin mahkoahng ohroj ma kin wiahda dihp  
oang kamai.**

**Joah kahlwahng kamai nehn jongjong.’”**

<sup>5</sup> Jesus pel pwehng irai, “**Ma emen kamwai mine ah pirien a ih inla ipoa in umwahu lopkoan pwong poaki ipoa, ‘Oai pirien kidoa lopwon in pilahwa jiluh.** <sup>6</sup> Oai pirien men ma kapwehnsen lel ipoai, a johpwa mwinge kij ipoai ngoahi en kioang ih!’” <sup>7</sup> A ma armajjo loaloa japoang, ‘**Joah kadroapwi ngoahi, wanihmmwe ne loakdi, noai jerikhkai apel ngoahi ne moair.** Ngoahi johkak

pwohrda kioang koawoa mehkij.’<sup>8</sup> Kamwai en kidal pwa ma ih joah pwohrda pwa en kioang koawoa pilahwa pwa koawoa ah pirien, a ih pirin pwohrda kioang koawoa me ohroj koawoa anahne pwa koawoa johpwa mehkki poaden poakpoak.<sup>9</sup> Ioar mehwa Ngoahi pwehngkihoang kamwai; poaki, a kamwai pirin oaloa; rapahki, a kamwai pirin diar; lesles, a wanihmmwo pirin risdahng kamwai.<sup>10</sup> Pwa inje ma poaki pirin oaloa; apel inje ma kin rapahki pirin diar; apel wanihmmwo pirin risdahng inje ma lesles.<sup>11</sup> Mine kamwai jahm men ma pirin kioang nihmwai jermweinno sinek ma ih poaki kanah mwumw?<sup>12</sup> Ke nehn a poaki adroau, a koawoa kioang aihe?<sup>13</sup> Ia woahr amwai nauna a kamwai kidal kioang me mwehu oang nihmwai jerihkan. Ia woahr koalikin Jamamwai nehnloannge pirin kioang Ngen Joarwi irai kan ma kin poaki Ih?”

*Jesus apel Beelzebul*

<sup>14</sup> Jesus kauj jang ngen jaus men ipen woal loahsoang men. Nehn en ngen jausso injang ipoa, woallo ken kak sapda lallal. Pokonno pwuriamweikihla.<sup>15</sup> Epwi ihr pwa, “Ih ioar Beelzebul, koaunin ngen jaus kan ma kioang Ih manman in kajroahjang ngen jaussok.”

<sup>16</sup> Epwi nimen lidipi Jesus, irai poaki Ih en wiahng irai oau manmanno jang nehnloannge.<sup>17</sup> A Jesus kidal ahr lamlam, Ih pwehng irai, “Wei oau joah lipilpil ma kin pwalpijoang wiahda pwihn pwi ma kin uhpene nehn pwungarai johkak woaroai; peneinei oau ma kin uhpene kin mwoarpijoang.”<sup>18</sup> A, imdoahr? Ma wein Jehsen mine pwi hn pwi ma peipene nehn pwungarai, imdoahr ah wei en kak pwoaida? Kamwai siksikoa pwa Ngoahi kin kauj jang ngen jaus ipen armaj pwa Beelzebul kin kioang Ngoahi manman en wia me.<sup>19</sup> Ma ioar doahroar oai kin kauj ngen jaus kan, a imdoahr ioangoamwai kan kin kauj jang? Pein ioangoamwai kan kadehdehda amwai uhdaahn japwung.<sup>20</sup> In oadoan Koahs ma Ngoahi kin kaujikhjang ngen jaus kan, me kadehdehda pwa Wein Koahs ne lel kamwai.

<sup>21</sup> “Ma woal sihkei men ma ah koapwoahn mahwin ohroj onopda, ih jiloa umwahu, a ah koapwoa kan pirin nekdekla mwehu.”<sup>22</sup> A ma emen ma sihkei jang pallanda ih, kalwehdi, ih pirin wahjang ah koapwoahn mahwin ohroj ma ih kin sihsihkeiki, apel nehkpijoang dahkij ih pirapoahla.

<sup>23</sup> “Inje ma johkin pwili Ngoahi, kin uhwoang Ngoahi, a ih ma johkin jeuveje Ngoahi rikpene, kin kamwroahpijoang.”

*Japahldohn Ngen Jausso*

<sup>24</sup> “Nehn en ngen jaus men kin diljang nehn armaj men, ih kin allaluhjili nehn japwsoahn raprapahki wijahn koammoal. A ma ih johkak diar, ih kin pwehng pein ih, ‘Ngoahi en pwurla in umwoaiho.’<sup>25</sup> Ih ken pwurla kapangda doahroar en ummwo ne mwakelkelda apel joandi mwehu.<sup>26</sup> Ih inla ukdo ngen ijimen ma jaus jang pein ih, irai ken dilda koaujoanla wijahu. A in imwlahn joang ohroj, armajjo pirin naunahla jang in sapdahu.”

<sup>27</sup> Nehn en Jesus Ah pwahla mehpwiai, a lihmen jang nehn pokonno pwehng Ih, “Ia woahr peren in liho ma noaisikihdi koawoa apel apwalihda koawoa!”

<sup>28</sup> Jesus japoang, “**Ioar, a ia woahr peren in irai kan ma kin rong mahjan in Koahs apel kapwaihahda!**”

*Poakpoakin Manman oau*

<sup>29</sup> Nehn en armaj dir ahr pidekihpene Jesus, Ih pwa, “**Ia uhwen nauna in armaj in rehn pwiai! Irai poakpoaki manman oau, a jehpirin aluhwoang irai, ioarroar kilel manmanno ma wiawi oang Jonah.** <sup>30</sup> Doahroar joukohp Jonah a wia kilel oau oang mihn Nineveh, ioar doahroar Nihn-Armaj pirin wiahla kilel oau oang armaj in rehn pwiai. <sup>31</sup> Nehn Rehnin Kadeikko li nahmwarki Sheba pirin uhda kadipoa armaj in anjoau oauwe; pwa ih jeiloakdo jang nehn ah weiho pwa en rong doahroar en nahmwarki Solomon kaweid loalkoang; a mehkij me, kamwai en kidal pwa mine emen me, ma laplap jang Solomon. <sup>32</sup> Nehn Rehnin Kadeikko mihn Nineveh pirin uhda kadipoa kamwai, pwa ahr koluhla apel wiliakapwla nehn ahr rong en Jonah kapahrakkok; a kamwai en kidal pwa mine emen me ma koalik jang Jonah!”

*Maram in Palwahr*

<sup>33</sup> “Johpwa emen kin akanda lahm oau apel oakihla ke kihdi oang pehn pahn oau; pwa ih pirin kioang nehn dohiahu, pwa armaj ohroj en kak kapang marammo nehn ahr dilda nehn ummwo. <sup>34</sup> Pwoaroan mioammwen doahroar lahm oang palwoaroamwen. Ma pwoaroan mioammwen mwakelkel, palwoaroamwen pwon pirin dirkihla maram. A ma pwoaroan mioammwen nauna, palwoaroamwen pwon pirin dirkihla ros.

<sup>35</sup> Kanaihoahng pwa marammo ma mine ipoamw jaudi ros oau.

<sup>36</sup> Ma palwoaroamwen pwon dirki maram, johpwa wijahkij mine nehn ros, ih pirin maram wija ohroj doahroar lahm oau ma joajjoaroa koawoa ki ah maram.”

*Jesus Koapwungoang Pharisee-ok apel Jounkawoahwoa in Kojonné-dok*

<sup>37</sup> Nehn en Jesus kadoarihla Ah kapahrak, Pharisee men luke Ih pwa en pwili mwinge ipoa; Jesus dildahng nehn ummwo apel mwindi oang in sehpil. <sup>38</sup> Pharisee-o ken pwuriamweikihla nehn ah kapang Jesus johpwa amwumbla mwohn mwinge. <sup>39</sup> Doar Koaunno ken pwehnglahng Ih, “Kamwai Pharisee kan injinohkihoar kamwkele likin nihmwai mwoak apel pileis kan, a loaloamwai dirkihla lioas in uhwoang apel mwoarjuwed. <sup>40</sup> Pweipwei kamwai! Koahs ma wiahda kamwai, likin apel loaloa! <sup>41</sup> A kamwai kijkijoahki armaj joamwoahmwoa kan koanngoan nihmwai mwoak apel pileis kan, a joang ohroj pirin mwakelkel ipamwai.

<sup>42</sup> “Ia woahr nauna oang kamwai Pharisee kan! Pwa kamwai kin meiroang kioang Koahs eijkek kij oau in mihn doal mwinge kan doahroar mint, rue apel ohroj mihn doal mwinge sohrohr kan, a kamwai joh kin injinohki pwung apel limpoak oang Koahs.

**Ioar mehkhoa ma kamwai en wia mijkoalkoal, mwohn amwai pirin wia joang sohrohr kan.**

<sup>43</sup> “Ia woahr nauna oang kamwai, Pharisee kan! Pwa amwai kin mwehuki mwindi pohn jeia kasohrohrla kan nehn jinakoke kan apel nimen armaj kan en rahnmwahu in wahu nehn wijahn noasnoas kan. <sup>44</sup> Ia woahr nauna oang kamwai! Pwa kamwai doahroar joaujoau joah janjal pwi ma armaj allalu puwoa jehjoa.”

<sup>45</sup> Emen jounkawoahwoa in kojonneddoo ken pwehnglahng Jesus, “Jounpadahk, nehn oamw pwahpwhapwa joang pwiai, koawoa kin pel koauwe kamai!”

<sup>46</sup> Jesus japoang, “Ia woahr pel nauna oang kamwai, jounkawoahwoa in Kojonneddoo kan! Pwa amwai kin kasoausoauwihihla armaj kan wijk ma irai johkak wahda, a pein kamwai johkin kailla jaid pas en jeuwejehda ahr wijk kan. <sup>47</sup> Ia woahr nauna oang kamwai! Kamwai kin wiahda joaujoau mwehu oang joukohppok, ma jamamwaihok kojukdi. <sup>48</sup> Kamwai pein kadehdehda pwa kamwai pwungki da jamamwaihok wia; irai ma kojukdi joukohppok, a kamwai wiahdahng arai joaujoau. <sup>49</sup> Ki kahrpoa ioauwe erpis in Koahs ne pwahla, ‘Ngoahi pirin kadarlahng irai joukohp kan apel woaroak kan; a irai pirin kojukdi epwi apel koalkoa epwi.’ <sup>50</sup> Pwa armaj in anjoau oauwe en koaloklokki kojkojdih joukohp ohroj jang kapikpikdahn jampah, <sup>51</sup> jang in kojkojdih Abel lel Zechariah, ma kojkojdi nehn pwungen pei joarwiho apel Wija Joarwiho. Eh, Ngoahi pwehng kamwai en kidal pwa armaj in anjoau oauwe pirin loklokki irai ohroj.

<sup>52</sup> “Ia woahr nauna oang kamwai, jounkawoahwoa in Kojonneddoo kan! Amwai kin koldi kih-o ma kin risingda wanirmw in umwen loalkoang. Pein kamwai johkin dilda, a kamwai kin iroahdihjang irai kan ma kin jongjongin dilda!”

<sup>53</sup> Nehr en Jesus injang nehn ummwo, jounpadahk in Kojonneddoo kan apel Pharisee-ok sapda koauwe Ih inenin koalik apel peidekki joang dihrdir. <sup>54</sup> Pwa ihr nimen lidipihkihdi Ih mehkij ma Ih pwahla japwung.

## 12

### *Mwalaun in Pharisee*

<sup>1</sup> Armaj kid pwi pokonpene, inenin koaisla epwi siak ehn epwi. Jesus sapkihda pwehng Nah sohnpadahkkok, “Kamwai kalke jang ihs in Pharisee kan—ma woahwoahki arai mwalaun kan. <sup>2</sup> Me ohroj ma kin oakkoakla, uhdahn pirin janjalda, apel me rir ohroj pirin pel janjalda. <sup>3</sup> A, me ohroj ma kamwai kin sikoa nehn ros, pirin janjalda nehn maram; apel me ohroj ma kamwai kin mwoanginnginki wija joaloang, pirin rahrahu koalik jang pohn koadkoan umw kan.

### *Inje Kamwai pirin Mijik*

<sup>4</sup> “Ngoahi pwehng kamwai, Oai pirien kan, kamwai joah mijik irai kan ma kin kojukdi palwahr, a johkak wia mehkij nauna jang pwurlakoa. <sup>5</sup> Ngoahi pirin padahkihong kamwai inje ma

**kamwai en mijik: mijik Koahs, ma kak kojukdi koawoa apel anki manman in peidla koawoa nehn ehl. Kamehlele Ngoahi, Ih oar doari kamwai en kin mijik!**

**6** “Jaudi mahnsang siksik limmen kin noasla in send riau? A johpwa emen Koahs kin moalkoahla. **7** Pisen moangoamwai kan ohroj ne pel wadwaddi. Doari, kamwai joah perki mehkij; pwa kamwai inenin kajampwal jang mahnsang dir!

*Kadehde Christ apel Pohnjehjoa Christ*

**8** “Ngoahi en pwehng kamwai, irai kan ma kadehde Ngoahi in janjal mwohn armaj kan, pwa ihr wia Noai, Nihn-Armaj pirin pel wia doahroar oang irai mwohn sohnloang in Koahs kan. **9** A inje ma pohnjehjoa Ngoahi ipen armaj kan nehn pokon janjal, Nihn-Armaj pirin pel pohnjehjoa irai mwohn sohnloang in Koahs kan.

**10** “Inje ma pirin pwahla mehkij ma uhwoang Nihn-Armaj, kak mahkla; a inje ma pwahla mehkij nauna ma uhwoang Ngen Joarwi, jehpirin mahkla.

**11** “Nehn ahr pirin wahla kamwai en koapwung nehn jinakoke kan ke mwohn koapina kan ke koaun kan, kamwai joah kin pwunodki imdoahr kamwai en doaroa kamwai ke da kamwai en pwa. **12** Pwa Ngen Joarwi ma pirin padahkihoang kamwai dahkij kamwai pirin pwa.”

*Karajraj in Woal Koapwoahpwoa Pweipwei men*

**13** Armaj men jang nehn pokonno pwehng Jesus, “Jounpadahk, pwehng rioai woallo kama en nehkpijoang ama johjohu.”

**14** Jesus japoang ih, “**Koampoakpoai, inje kioang Ngoahi pwungin koapwung ke nehk koapwoa kan nehn pwungamwa?**” **15** Ih ken pwehng irai ohroj, “**Kalke kamwai jang noaroak nauna ohroj, pwa mour mehlel in armaj joh kin mine in koapwoa kan ma kamwai anki, mihindahr ia woahr dirin amwai koapwoa.**”

**16** Ih pel pwehng irai karajraj oauwe, “**Woal koapwoahpwoa men mine, ma japwahu dir koannge.**” **17** Ih sapda pein lemleme, ‘**Joh wija ngoahi kak nekidla wehn joapwoaiho ohroj. Da ngoahi kak wia?**’ **18** Ioar mehwa me ngoahi pirin wia; ngoahi pirin kamwroahdi oai umwen nahk kan, ngoahi wud kouda epwi ma koalik jang, wija ma ngoahi pirin nekidla wehn joapwoiae apel oai koapwoa ohroj. **19** Ngoahi pirin pein pwehng ngoahi, woal pai men koawoa! Koawoa anki koapwoa dir, ma koawoa anahne oang johnpar dir. Koawoa, injenmwahu; mwinge, nim, perperen! **20** A Koahs pwehng ih, ‘**Armaj pweipwei men koawoa! Pwongoauwehr koawoa pirin mehd!** A inje ma pirin anki oamw koapwoahkan ohroj ma koawoa ne nekidpene?”

**21** Jesus kadoariikhla karajraijo, Ih pwa, “**Me ioar doahroar pirin wiawihoang armaj kan ma kin koajokpene oang irai koapwoahn jampah, a joamwoahmwoa mwohn mijen Koahs.**”

*Koapwoarpwoarki Koahs*

**22** Jesus pel pwehng Nah sohnpadahkkok, “**Ioar mehwa Ngoahi pwehng kioang kamwai; kamwai joah kin pwunodki amwai mour, dahkij kamwai pirin kang, ke likkoau kamwai anahne**

**oang palwoaroamwaikan.** <sup>23</sup> Pwa mour inenin kajampwal jang mwinge apel palwahr inenin kajampwal jang likkoau. <sup>24</sup> Kamwai kapang mahnsang kan: irai johkin poadokdi, pel johkin doli, pel joh arai umwen nekidek; a Koahs kin kamwinge irai. A kamwai inenin kajampwal mehlel jang mahnsang kan! <sup>25</sup> Inje nehn pwungamwai ma kak karoairoaihla ah mour nehn ah pwunpwunodki mehpwiai? <sup>26</sup> Ma kamwai johkak apwali joangoan moangoai oauwe, mihnda kamwai en pwunodki epwi me sohrohr? <sup>27</sup> Kamwai kapang rohs in nehn japw kan doahroar ahr kin koapda; irai joh kin doadoahk, irai johkin wiahda arai likkoau. A kamwai en kidal pwa pel Nahmwarki Solomon, nehn ah koapwoahpwoa, joh kin kapwaski likkoau ling doahroar apas rohs pwiai. <sup>28</sup> Koahs ma kin kapwasihda dipwdipw in nehn japw kan, ma mine rehn oauwe, a lakapw ne joh, peidek oang nehn sidohp pwidengla. A Ih joah nen pel uhdahn kalikkoauwi kamwai? Joangoan siksikin amwai pwojon!

<sup>29</sup> “Doari, kamwai joah kin pwunod, kalap raprapahki pwa da kamwai pirin kang ke nim. <sup>30</sup> (Pwa ihr ma rosros kan ioar irai ma kin kalap pwunpwunodki mehpwiai ohroj.) Jamamwai ma mine nehnloannge kidal doahroar amwai kin anahne mehpwiai. <sup>31</sup> Kamwai en kin injinohki Wein Koahs mijkoalkoal, a Ih pirin kioang kamwai mehpwiai.”

### *Koapwoahpwoahn Nehnloannge kan*

<sup>32</sup> “Joah majpwehk pwihni jihpw siksik, pwa Jamamwaiho ne perenki en kioang kamwai Weih. <sup>33</sup> Kamwai noaskihla amwai koapwoa kan, kioang mwani kan ihr joamwoahmwoa kan. Kamwai wiahng kamwai pwuko oau ma johkak dehnla, nekidla nehnloannge amwai pai kan, wija ma joh kin siksikla, pwa joh sohnpirap kak pirapoahjang, pel joh loanginmwoas kak koauwehla. <sup>34</sup> Pwa oamw mohngiong unjek kin uhlahng wijahu ma oamw pai kan mine.

### *Lidu kan ma kin Mwajmwajahn*

<sup>35</sup> “Onnonop oang dahkij ma pirin indoa, kapwaskihda likkoauwin papah apel nihmwai lahm kan en okjekda. <sup>36</sup> Doahroar lidu kan ma kin joujouwi arai koaun ma pirin japahldo jang kamdipw in koapwoapwoaud. Nehr ah leldo apel lesles, irai kin risingdahng ih wanihmmwo anjoauwohr. <sup>37</sup> Joangoan peren in papah kan ma arai koaun kapang irai kin poahd apel onop nehn ah japahldo! Ngoahi pwehng kamwai in mehlel, pwa ih pirin kihjang ah joakkido kamwindihdi irai, apel papah irai. <sup>38</sup> Ia woahr peren in irai ma ih kapang arai onopda mihindahr ma ih indoa lopkoan pwong ke kosjang! <sup>39</sup> Kamwai en kamehlele me; ma koaunin umw oau kidal anjoau sohnpirap men pirin indoahng in umwahu, ih jehpirin mweidoahng en koauwehla dilda. <sup>40</sup> Doari, kamwai pel pwili onnonop, pwa Nihm-Armaj pirin indoa nehn anjoau oau ma kamwai johpwa kajik.”

### *Lidu Loalpwoas ke Lidu Joaloalpwoas*

<sup>41</sup> Peter pwa, "Koaun, karajraj pase doakoa kamai ke oang armaj ohroj?"

<sup>42</sup> Koaunno japoang, "**Inje ma koawoa wiahki jounkouwa loalpwoas apel loalkoang?** Ioar ih ma ah koaun pirin kajapwildaung ih en awali ah wijahu apel kioang lidu sohrohr kan kanrai mwinge nehn anjoau ma koanoahng." <sup>43</sup> Ia woahr peren in lidu meno, ma ah koaun kajaingdi ah wiwia me, nehn ah pirin pwurdohung in umwahu! <sup>44</sup> Mehlel Ngoahi pwehng kamwai, pwa koaunno pirin kioang lidu mene en koaunda ah dipwjoau kan ohroj. <sup>45</sup> A ma liduhwo pwehng pein ih pwa ah koaunno nen kosin japahldo, ih ken sapda poki lidu sohrohr kan, woal apel li, a ih pel mwinge, nim apel jakaula; <sup>46</sup> koaunno pirin pwurdo rehn apel awa ma liduhwo johpwa kidal. Koaunno pirin poaloahpijoang ih apel kejpwiheklahng nehn pwungen ihr ma joaloalpwoas.

<sup>47</sup> "Doari, lidu ma kidal dahkij ah koaun mwehuki ih en wia, a johpwa koaunopda pein ih, ih pirin uhdahn oaloa pokpok koalik.

<sup>48</sup> A ih ma jehjoa dahkij ah koaun mwehuki ih en wia, a ih wia mehkij ma koanoahng en pokpokki, ih pirin oaloa pokpok siksik. Koanoahng me koalik en injang iraihok ma oaloa koalik, iraihok ma oaloa inenin koalik en kihda woahioau ma inenin koalik.

### *Jesus ioar Kahrhoan Sohrohrpijoang*

<sup>49</sup> "Ngoahi inдоа pwa Ngoahi en jaunoang oai jampah; a, ia woahr Oai nimen pwa en ken okda!" <sup>50</sup> Ngoahi pirin oaloa poapdaij oau, apel ia woahr pwunod ma mine ipoai, oaroh ngehd en doarihla! <sup>51</sup> Kamwai lemleme pwa Ngoahi wahdohng jampah moaloailoai! Joah! Jaudi moaloailoai, pwa sohrohrpijoang. <sup>52</sup> Jang me inla peneinei oau ma sowoa limmen pirin sohrohrpijoang nehn pwungarai —jilmen pirin pallan roahmen, apel roahmen pirin pallan jilmen. <sup>53</sup> Jahm kan pirin uhwoang nihrai jermwein kan apel jermwein kan pirin uhwoang jamarai kan. Nohno kan pirin uhwoang nihrai jerpein kan, apel jerpein kan pirin uhwoang inarai kan; nohno kan pirin uhwoang pahien nihrai jermwein kan, apel jerpein kan pirin uhwoang inen pahioaraihok."

### *Woahwoahki Anjoau*

<sup>54</sup> Jesus pel pwehng armajjok, "Nehn amwai kin kapang koasoau oau jang in palikapin loannge, kamwai kin pispis in pwa, 'Pirin wud,' a kin pwoaida. <sup>55</sup> Nehn amwai kin kapang eng ah kin koaljang in palieir, kamwai kin pwa, 'Th pirin pwideng,' a kin pwoaida. <sup>56</sup> Mwalaun kamwai! Kamwai kapang jampah apel mijen loannge, kajawihda iren nehn woahwoa, da kahrehma kamwai jehjoa kajawihki woahwoahn anjoau oauwe?"

### *Koapwungla nehn pwungen Koawoa apel Oamw Imwinsihs*

<sup>57</sup> "Da kahrehma kamwai joah pein kajawihki dahkij pwung ma kamwai en wia? <sup>58</sup> Ma armaj men pirin lelki koawoa mwoalen koapwung, engdehnki koapwungla nehn pwungamwa mwohn amwa pirin wia koapwung. Pwa ma koawoa johpwa, koawoa

**nen warahkiheklahng jounkoapwunngo, a jounkoapwunngo wud panglahng koawoa ipen pilijmehn, a pilijmehn oaloa koawoa peiddoang nehn kalpwuhj.** <sup>59</sup> Ngoahi pwehng koawoa in mehlel, pwa koawoa johkak diljang wijahu, oaroh koawoa pirin koapwungla mwanihok ohroj lel send mwoarmwoar in oamw pwaipwanid o.”

## 13

*Kerpwihla Dipamwai kan ke Mehdi*

<sup>1</sup> Nehr anjoauwo mine armaj pwi wijahu ma pwehnglahng Jesus da ma wiawi oang mihn Galilee pwi, ma Pilate kojukdi nehn ahr wiwia arai meiroang kan oang Koahs. <sup>2</sup> Jesus japoangkilha irai, “**Kamwai lemleme pwa mihn Galilee pwiai, ma mehkihdi joangoan kojkijoauwe, ihr uhdahn armaj dipan naunahjang mihn Galilee-ok ohroj?** <sup>3</sup> Joh douluhl! Kamwai en kidal pwa ma kamwai en kerpwihla dipamwai kan, kamwai ohroj pirin mehdi doahroar irai. <sup>4</sup> A imdoahr woal ejek walmennek ma wijahn iroir in Siloam kipdi pohrai, kojukdi irai. Kamwai lemleme pwa me kadehdehda pwa irai nauna jang armaj ohroj ma kin koaujoan Jerusalem? <sup>5</sup> Joh douluhl! Kamwai en kidal pwa ma kamwai johpwa kerpwihla dipamwai kan, kamwai ohroj nen pel mehdi doahroar irai.”

*Karajraj in Suhkoa Fig ma Joh Wah*

<sup>6</sup> Jesus pel pwehnglahng irai karajraj pas, “**Mine armaj men ah suhkoa fig pas mine nehn ah mwoaswello. Ih inlahng doli wah, a johpwa wah oau ih kapangda.** <sup>7</sup> Ih pwehng nah jounmwoaswello, ‘**Kapang pwa ne johnpar jiluh ngoahi indoa kapkapang wehn suhkoa fig pase, a joh mehkij ngoahi kapangda. Poaloahdihjang! Joh kaspoan a mohmohmourki pwirejje.**’ <sup>8</sup> Jounmwoaswello japoangkilha woallo, ‘**Maing, mweidoahng mijkoalkoal ma ih joah nehn uhwa nehn johnpar oauwe. Ngoahi pirin jaripdi koiaci pidekihpene suhkoahu.** <sup>9</sup> **Ma ih pirin uhwa nehn johnpar allaluhdo, a mwehu; a ma joah koawoa kapwa mweidoahng en poalpoaldi.**’”

*Jesus Kemwehuwihla Li Johnmwehuki Sihn men Rehnin Sabbath*

<sup>10</sup> Rehnin Sabbath oau Jesus wiwia Ah padahk nehn jinakoke oau. <sup>11</sup> Lihmen pwili mine wijahu, ma ngen jaus dilingla ih oaroain johnpar ejek waluh ma kahreha ih johnmwehu. Liho johnmwehuki sihn, kojpene, johkak inenda. <sup>12</sup> Nehr en Jesus kapangda liho, Ih pwehnglahng, “**Li, koawoa en mwehuda jang oamw johnmwehu!**” <sup>13</sup> Ih ken kihdahng poahk pohn liho, a nehn anjoauwohr liho ken inenpijoang apel uhda kapkapnga Koahs.

<sup>14</sup> Koaunin jinakokehu lioaskihla en Jesus kemwehuwihla lihmene rehnin Sabbath. Ih uhda pwehng pokonno, “Mine rehn wonou ma kisai en doadoahk; a ioar rehn koa ma kamwai en indoa pwa kamwai en kin oaloa kasikhkeipamwai, a jaudi rehnin Sabbath!”

<sup>15</sup> Koaunno japoangkilha ih, “**Mwalaun kamwai! Jaudi kamwai ohroj kin jaladda kahumwein ke ejel jang nehn dohiarai apel ukla irai oang in pil pwa irai en nimpil rehnin Sabbath.**” <sup>16</sup> A

**lihmene ma kadaudok en Abraham ma ne joajjoajoalki ipen Jehsen johnpar eijke waluh; a joah koanoahng ih en lapwda jang nehn ah joal rehnin Sabbath?”**<sup>17</sup> En Jesus pajpoang oauwe kajaroohdi irai ohroj ma uhwoang, a armaj ohroj likin irai perenkihda wihwia kapwuriamwei ohroj ma Ih kin wiahda.

*Karajraj in Laporro in suhkoa ma Keiou Siksik*

**18** Jesus pel pwa, “**Dahkij Wein Koahs doahroar? Dahkij Ngoahi kak karjahkihoang?**”<sup>19</sup> Ih doahroar liporro mustard oau ma armaj men oaloa apel poadokdi nehn ah mwoaswello. Liporro siksikko koapda wiahla suhkoa pas, mahnsang kan kin koammoal nehn rah kan.”

*Karajraj in Ihs*

**20** Jesus pel idoak, “**Da Ngoahi en karjahioang Wein Koahs?**”<sup>21</sup> **Ih doahroar ihs ma lihmen oaloa doaloahkihda pilahwa kij, pilahwahu ken pwoaipijoang.”**

*Wanihmw Soahsiksik*

**22** Jesus allaluuhlahng nehn kahnihmw apel koujapw kan padpadahk oang armaj kan nehn Ah allaluuhlahng Jerusalem.<sup>23</sup> Armaj men idoak oang Ih, “Maing, mehlel pwa armaj jipidpw oar pirin mourla?”

Jesus japoangla irai,<sup>24</sup> “**Kamwai engdehn in alu nehn wanihmw soahsiksikko;** pwa Ngoahi pwehng kamwai, armaj ngoadoar pirin jong dilda, a irai pirin johkak.”<sup>25</sup> Nehr en koaunin umw men ah pirin uhda apel risingdi wanihmw in umwahu, kamwai pirin mine likin apel lesles apel pwa, ‘Maing, risingdahng kamai.’ Ih pirin japoangki kamwai, ‘Ngoahi jehjoa mihn ia pwi kamwai.’<sup>26</sup> Kamwai pirin japoangki, ‘Kamai ma pwili koawoa mwinge apel nim, apel koawoa ma ne padpadahk nehn amai kahnihmw!’<sup>27</sup> Ih pirin pel pwa, ‘Ngoahi pel jehjoa ia wija kamwai injang. Kamwai alwe jang ngoahi, kamwai ohroj armaj mwoarjuwed pwi!’<sup>28</sup> Ia woahr amwai pirin joang apel keikeikeisakai nehn amwai pirin widahli Abraham, Isaac, Jacob apel joukohp ohroj nehn Wein Koahs, a kamwai pirin kerpihuk jang loaloa!<sup>29</sup> A mihn palimese apel palikapi, mihn paliepeng apel palieir, pirin wud indoa mwindingoang kamdipw nehn Wein Koahs.<sup>30</sup> Kamwai en kidal pwa iraihok ma mwerin anjoau oauwe, irai pirin mijaoahla anjoauwo; a armaj in mijoa kan apkas irai pirin mwerinla.”

*En Jesus Limpook oang Jerusalem*

**31** Nehr oar anjoauwo Pharisee pwi pwokdohng Jesus apel pwehng, “Maing, koawoa pirin uhdahn injang me, inlahng ekij wija sohrohr, pwa Herod nimen kojukdi koawoa.”

**32** Jesus japoangla irai, “**Kamwai alwe apel pwehng fox menen: ‘Koawoa en kidal pwa rehn oauwe apel lakapw, Ngoahi pirin kauj jang ngen jaus kan ipen armaj kan, kemwehuwihla johmwehu kan; apel nehn kajiluhn rehn Ngoahi pirin kadoarihla Oai doadoahk.’**”<sup>33</sup> A, rehn oauwe, pel lakapw, pel pali, ma Ngoahi uhdahn allaluuhla; pwa joh wijahkij koanoahng joukohp men kin kojkojdi likin Jerusalem.

**34 "Jerusalem, Jerusalem! Koawoa ma kin kojukdi joukohp kan, apel kin kasohaki sakai jounpakair kan ma koadoddoardohng koawoa! Ia woahr koalik in Oai nimen jupwurkihpene poaihoa kai nihmw armaj kan, doahroar jummwa pein men kin pwainkihpene nah kan pehn poah kan, a koawoa kia mweidoahng Ngoahi!**  
**35 Doari, pirin johla sohn oamw Umwen Joarwihen! Koawoa en kidal pwa koawoa johla pirin kapang Ngoahi, oaroh lel anjoau ma koawoa pirin pwa, 'Koahs en kapaiahda Ih ma indoa in oadoan Koaunno!' ”**

## 14

*Jesus Kemwehuwihla Woal Johmwehu men*

**1 Rehnin Sabbath oau Jesus pwili mwinge ipen Pharisee janjal men nehn umwahu; a armaj kan inenin mwajmwajahni Ih.** **2 Woal men, ma ehn apel poah kan likammasma, indoa ipen Jesus.** **3 Jesus pwehnglahng jounpadahk in Kojonneddok apel Pharisee-ok, Ih idoak, "Ma asai Kojonneddoo mweidda pwa kisai en kemwehuwihla armaj rehnin Sabbath, ke joah?"**

**4 Irai nennenlahr johpwa lallal. A Jesus oaloa woallo kemwehuwihla, kadarla ih.** **5 Ih pel pwehng irai, "Mine emen ipamwai ma nah jeri ke nah kahu men pirin kipdihoang nehn lipw oau rehnin Sabbath, a ih jehpirin pispis oapihdahjang loaloa, mihnda ma rehnin Sabbath?"**

**6 Irai ken johkak japoangki Ih mehkij.**

*Aksiksik apel Kadek*

**7 Jesus soahkda doahroar epwi ma lukdo kan ahr kin pilda dohiarai wija kan ma keiou mwehu, Ih pwehng irai ohroj karajraj pase:** **8 "Ma emen luke koawoa oang in kamdipw in koapwoapwoaud oau, joah mwindi nehn wijahu ma keiou mwehu. Pwa emen ma laplap jang koawoa pel kakkoar pwili lukdohng in kamdippwo,** **9 ih ma luke kamwa doar indoa, pwehng koawoa, 'Kioang woal mene dohioamwen.'** Koawoa nen jarohdi sohdihla in mwerinno. **10 A ma koawoa pirin oaloa luk, indoa mwindi in mwerin pwa ih ma luke koawoa en indoa pwehng koawoa, 'Oai pirien, menlau indahdo in mijoa,'** Me pirin kahrechioang oamw woaunla ipen ohroj lukdo kan. **11 Pwa irai ohroj ma kin kajapwilda pein ihr, nen siksikla; a ihr ma kin aksiksikki pein ihr, nen laplapla."**

**12 Jesus pel pwehng woallo ma luke ih, "Nehn oamw pirin wiahda mwingechn injauwaj ke injausik, joah luke oang oamw pirien kan, ke rioamw kan, ke pel kijehmw kan, ke mihn ipoamw koapwoahpwoa kan—pwa doar irai dupuk oang koawoa luke oang koawoa in arai kamdipw.** **13 Ma koawoa pirin wia oamw kamdipw, a koawoa en luke armaj joamwoahmwoa kan, armaj dangpel kan, armaj mwoasor kan, apel armaj majkun kan.** **14 A, koawoa pirin kapaida, pwa irai johkak dupuk oang koawoa. Koawoa pirin oaloa dupkoan oamw kadek jang ipen Koahs nehn anjoau ma ihr ma lelpoak kan pirin iejda jang mehdi."**

*Karajraj in Kamdipw Koalik*

<sup>15</sup> Nehn en emen sohnkaparrok ma pwili mwindi in sehpillo ah rongda mehpwiai, ih pwehnglahng Jesus, “Ia woahr kaperen in iraihok ma pirin pwili mwindihohoang in kamdippwo nehn Wein Koahs!”

<sup>16</sup> Jesus pwehnglahng ih, “Mine woal men ma wiahda kamdipw koalik oau; ih luke armaj ngoadoar oang in kamdippwo. <sup>17</sup> Ne lel anjoau mwinge, ih kadarla nah lidu men ipen ihrrok ma ne oaloa luk, ‘Indoa pwa joang ohroj ne onopda.’ <sup>18</sup> A emenemen irai ken pwahda kahrpoan ah johkak pwili inla. Emen pwehng liduhwo, ‘Ngoahi dupukda japw oau, ngoahi uhdahn pirin inla kapang; menlau oaloahda oai poakmahk e.’ <sup>19</sup> A emen pel pwehng ih, ‘Ngoahi dupukda noai kahumwein eijkek, ngoahi allaluhlahng jongda irai apkas. Menlau oaloahda oai poakmahk e.’ <sup>20</sup> A emen pel pwa, ‘Ngoahi kapwehsen pwoapwoaudla, ioar kahrehma ngoahi joh kak pwilihki alwe.’ <sup>21</sup> Liduhwo pwurla pwehng ah koaunno mehkan ohroj. Koaunno inenin liosas, ih pwehng nah liduhwo, ‘Alwe nehn allap kan apel aljop kan in nehn kahnihmw oauwe, koawoa ukdo ihr joamwoahmwoa kan, ihr dangpel kan, ihr majkun kan apel mwoasor kan.’ <sup>22</sup> Mwerin anjoau oau, liduhwo pel pwa, ‘Maing, joang ohroj ne wiawi doahroar da ma koawoa pwahla; apel minminehr dohn epwi.’ <sup>23</sup> Koaunno pel pwehng liduhwo, ‘Alwe nehn alin likin kahnihmw oauwe, pwehng armaj kan en indoa pwa umwoaie en dirla. <sup>24</sup> Kamwai ohroj en kidal pwa johpwa emen in irai ma oaloa lukkok pirin pwili jong oai kamdippwe!’ ”

### *Mourin Pwili Jesus*

<sup>25</sup> A pokon koalik oau kahkahkahuj Jesus, Ih pwurlahng irai pwa, <sup>26</sup> “Ma emen nimen kauj Ngoahi apel pwilihla Ngoahi, a ih ipwilki jamah, inah, pahioa, nah jerihkan, riah kan apel pein ih koalik jang ah ipwilki Ngoahi, ih joh kak en wiahla Noai sohnpadahk. <sup>27</sup> Apel emen ma johkak wahda ah lohpwu apel kaujdo Ngoahi, ih johkak wiahla Noai sohnpadahk. <sup>28</sup> Pwa ma emen ipamwai, nehn ah koajkoajoane en kouda ah umwen iroir oau, a ih pirin mwindi lemleme ma isar nah mwanihn kadoarihla doadoahkko. <sup>29</sup> Pwa ma joah, ih johpwa nen kak kadoarihla umwen iroirro mwerin ah ne kihdihoang poahjoanno. Armaj ohroj ma kapang, irai pirin uruhrkihda ke kapiski, pwa, <sup>30</sup> ‘Armaj mene sapkihda kouda umw oau, ih johkak kadoarihla!’ <sup>31</sup> Ma nahmwarki men pirin mahwinki armaj 10,000 (nen) oang emen nahmwarki sohrohr ma nainki armaj 20,000 (rienen), ih uhdahn pirin mwindi lemleme ma ih kak kalwehkihdi armaj rienenco nah armaj nenne. <sup>32</sup> A ma ih johkak, a ih pirin kadarla nah jounpakair nehn ara dohpijoang pwa en poakmahk apel nehnpwungmwehula.” <sup>33</sup> Jesus pel pwa, “Ioar pel doahroar kamwai; johpwa emen kamwai kak wiahla Noai sohnpadahk, ma ih joah mweijang me ohroj ma ih anki.”

### *Jed ma Joh Kaspoa*

<sup>34</sup> “Jed mehkij ma mwehu, a ma nimen jeddo johla, joh mehkij kak kajpahlihdo nimen jeddo. <sup>35</sup> Ih pel johla kaspoahng pwirej ke koiaji; ih kin kejpwihekla. Rong, ma mine sioammwen!”

## 15

### *Jihpw ma Joaloangla*

<sup>1</sup> Rehn oau dirin jounrik daksis apel armaj jekenken kan indoa pwa irai en rong Jesus. <sup>2</sup> Pharisee-ok apel jounpadahk in Kojonneddok sapda lipahned, pwa, "Woal mene kin kajamwo ihr ma jekenken kan apel kin pwili mwinge iparai." <sup>3</sup> Jesus pwehng irai karajraj pase:

<sup>4</sup> "Ma mine emen kamwai ma nah jihpw epwiki, a emen joaloangla—da ih pirin wia? Ih joah pirin kihdi min duweijek dohmenno nehn mohj, apel inla raprapahkihjili jihppwo ma joaloanglahu oaroh ih kapangda? <sup>5</sup> A nehn ah ne kapangda, ih perenda kihdahng pohn aproa <sup>6</sup> wahlahng in umwahu apel kapokonpene ah piriennok apel mihn ipoahk, pwehng irai, 'Kamwai pwili ngoahi malauda pwa ngoahi ne kapangda noai jihppwo ma joaloangla. Kisai kamdipw!' <sup>7</sup> Ngoahi pwehng kamwai, pwa me pirin doahroar perenno ma mine nehnloanange ma armaj dipan mennoar koluhla jang armaj <sup>99</sup> (duweijek dohmen) ma pwung apel joah anahne koluhla."

### *Mwaniho ma Joaloangla*

<sup>8</sup> "Imdoahr ma mine lihmen ma nah mwani silper eijke, a oau joaloangla, da ih pirin wia? Ih akanda lahm oau, pohkda nehn umwahu apel rapahki mwehu wija ohroj, oaroh ih kapangda mwaniho. <sup>9</sup> A nehn ah ne kapangda, ih pirin panginpene ah piriennok apel mihn ipoahk, pwehng irai, 'Kamwai pwili ngoahi malauda, pwa ngoahi ne kapangda noai mwani wa ma joaloangla!' <sup>10</sup> Ngoahi pwehng kamwai ioar doahroar nihn Koahs sohnloang kan, irai kin malaukihda armaj dipan men ma koluhla."

### *Jermweinno ma Joaloangla*

<sup>11</sup> Jesus pel pwa, "Mine woal men ma nah jermwein roahmen. <sup>12</sup> Jermwein siksikko pwehng jamahu, 'Pahpa, kidoahng ngoahi oai pwaij ma uhdahn oai jang in johjo.' Jamahu ken nehkpijoang johjo oang nah jermwein roahmenno. <sup>13</sup> A mwerin rehn pwi, jermwein siksikko noaskihla ah pwaij jang in ah johjo, wahda mwanihok, jeiloaklahng japw doh oau wija ih kerpiwhla mwahl nah mwanihok in mour juwed apel siahk nauna. <sup>14</sup> Nehn ah koarjoahla ah me ohroj, a lehk koalik oau lel jappwo, jermweinno sapda mwakohkohla. <sup>15</sup> Ih inla ipen pwildak in jappwo men pwa en doadoahk ipoa, ih ken kadarla jermweinno en apwali nah pijjok. <sup>16</sup> Jermweinno kin nimen pwili kang kenen pijjok, joh armaj kioang ih en kang. <sup>17</sup> Nehn ah poahmda ah japwung, ih pwa, 'Ia woahr dirin mwinge ipen nihn joamoaiho sohndoadooahk, a ngoahi ken pirin mehkihdi oai mwakohko! <sup>18</sup> Ngoahi pirin uhda, pwurla ipen joamoaiho pwehng ih, "Pahpa, ngoahi ne dipda ipen Koahs apel ipoamw. <sup>19</sup> Ngoahi ne johla koanoahng koawoa en nainki; wiahkihla ngoahi emen nihmw sohndoadooahk." <sup>20</sup> Ih uhdahr ken pwurla ipen jamahu.

"Ih kahjikkao koaroannoang ummwo, a jamahu ne kapangda ih. Nehn kapehdin mwoakidkihda koalikin ah ipwilkihda nah jermweinno. Ih kijoulahr jupwurpene misik. <sup>21</sup> A, jermweinno

pwa, ‘Pahpa ngoahi ne dipda ipen Koahs apel ipoamw; ngoahi ne johla koanoahng en adanki nihmw jermwein.’<sup>22</sup> A jamahu pangin nah liduhwok, pwehng irai, ‘Kamwai pispis wahdo likkoauwa ma keiou mwehu kalikkoauwihkihda ih. Kamwai kioang rihng in jandin poah apel ju in ehn.<sup>23</sup> Kamwai wahdo kahu pwulopwul moad kojukdi, pwa kisai en kamdipwki!<sup>24</sup> Pwa noai jermweinne ne mehdi, ah ne pel mourda, ih ne joaloangla, a ne pel diarekda.’ Irai sapda kamdipw.

<sup>25</sup> “Anjoauwohr jermwein koalikko minmine nehn jpw. Anjoauwo ih koaroandohng ummw, ih rongda ahr koajkoajoang apel kahkahlek.<sup>26</sup> Ih pangindo emen liduhwok, idoak ipoa, ‘Dahkij wihiaw?’<sup>27</sup> A liduhwo japoang pwa, ‘Rioammwo ne pwurdo, joamoammwo kojukdi kahu pwulopwul moaddo, pwa ih pwurdochng ih, mour apel sihkei.’<sup>28</sup> Jermwein koalikko inenin lioas johpwa nimen dilda nehn ummw. Jamahu dilla likin, poaki ipoa en dilda.<sup>29</sup> Ih japoangki jamahu, pwa, ‘Johnpar dihrdir ngoahi ne doadoahk oang koawoa doahroar lidu men apel johpwa koauwehla oamw kojonned oau. A dahkij koawoa kioang ngoahi? Pel johpwa kuhs men ma ngoahi en kamdipwhihi oai piriennok!<sup>30</sup> A, nihmw jermweinno ma ne koarjoahkikhla ah johjo oang li juwedok, a koawoa ken kojuk oang kahu pwulopwul moaddo nehn ah pwurdo!’<sup>31</sup> Jamahu japoang, ‘Noai jeri, koawoa kin minminehr ipoai anjoau ohroj, apel oai koapwoa ohroj oamw.<sup>32</sup> Mwehu koawoa en pwili kamai perenda wia kamdipw oauwe, pwa rioammwo ne mehdi, a ne pel mourda; ah ih ne joaloangla, ih ne pel diarekda.’”

## 16

### *Jounkouwa Mwoarjuwed*

<sup>1</sup> Jesus pel pwehng Nah sohnpadahkkok, “Woal koapwoahpwoa men mine, ma nah lidu men kin kohwahki ah koapwoahk. Woal koapwoahpwoahu rongda pwa jounkouwahu kin wia koauwehla ah koapwoahk.<sup>2</sup> Ih pangindo nah jounkouwahu idoak ipoa, ‘Imdoahr rong pase ma pid koawoa? Kajalehda me ohroj doahroar oamw apwali oai koapwoa kan, pwa koawoa ne johla wia noai jounkouwa.’<sup>3</sup> Jounkouwahu pwehng pein ih pwa, ‘Dahkij ngoahi en wia? Pwa oai koaunno ne pirin kihjang oai kouwa doadoahk. A ngoahi jasihkei in doadoahk nehn pwirej, ngoahi mehk in poapkpoakjili.<sup>4</sup> Apkas ngoahi ne kidal pwa da ngoahi en wia! Pwa ma ngoahi ne johla doadoahk, oai pirien kan en kak kajamwo ngoahi oang nehn umwarai kan.’<sup>5</sup> Ih pangindo armaj ohroj ma pwaipwanid oang ah koaunno. Ih idoak ipen armajjo ma indoa keiou, ‘Ia woahr oamw pwaipwanid oang koaunno?’<sup>6</sup> A ih japoang, ‘diroam in oail olip epwiki.’ A ih pwehng, ‘Oaloa nihmw pukken pwaipwanid en, mwindi insingehdi diroam limeijek.’<sup>7</sup> A ih pel idoak ipen emen, a koawoa, ‘Ia woahr oamw pwaipwanid?’ A ih japoang, ‘Pehk in pilahwa kid.’ A ih pwehng, ‘Oaloa nihmw pukken, mwindi insingehdi pehk walipwki.’<sup>8</sup> Nehn en koaunno kidalda, ih kapngahla loalkoang mwoarjuwed in jounkouwahu;

**pwa armaj kan ma kijehn jampah, irai ma kin lemlemehr pein irai koalikjang armaj kan ma kijehn maram.”**

<sup>9</sup> Jesus pel pwa, “Ngoahi pwehng kamwai, kamwai en doadoahkkihoang armaj kan amwai koapwoahn jampah kan, pwa irai en wiahla amwai pirien, pwa nehn amwai koapwoa kan nen johla, Koahs pirin kajamwo kamwai oang nehn dohiamwai joahsuk. <sup>10</sup> Inje ma kin mehlel oang mehkij ma siksik, ih pirin pel mehlel oang mehkij ma koalik; apel ih ma kin joah mehlel oang mehkij ma siksik, ih pirin pel joah mehlel oang mehkij ma koalik. <sup>11</sup> Ma kamwai johpwa pirin mehlel oang pai in jampah kan, a inje pirin mehlel oang kamwai in pai mehlel kan in puwoa? <sup>12</sup> Apel ma kamwai joah mehlel oang doadoahk in kouwahki oang emen ah dipwjoau, a inje ma pirin kioang kamwai mehkij pwa en wia uhdahn amwai?

<sup>13</sup> “Joh lidu men kak papah koaun roahmen, pwa ih pirin lioassoang emen a ipwilki emen; ih pirin kajampwalki emen, a mwamwahlki emen. Doari, kamwai johkak papah Koahs apel mwani.”

*En Jesus Lal pwi*

<sup>14</sup> Pharisee-ok pwili rongrong mehpwiai ohroj; irai kin kapkapiski Jesus, pwa ahr kajampwalki mwani. <sup>15</sup> Jesus pwehng irai, “**Kamwai kin akpwungki pein kamwai mwohn mijen armaj kan, a Koahs pwen kidal nehn mohngiongimwai kan. Dahkij ma armaj kin kajampwalki, kin wiahla mehkij mwahl mwohn mijen Koahs.**

<sup>16</sup> “Manmanin Kojonned in Moses apel padahk in joukohppok ne mine jang kawahu indoa lel nehn mwein John jounpoapdaj; a jang nehn anjoauwo Rongmwehu doahroar Wein Koahs lolohkjili apel armaj ohroj kin engdehnki en dildahng nehn Wein Koahs.

<sup>17</sup> A pwen moangoai oang nehnloanange apel jampah en johrla jang iroa keiou siksik kij in Kojonneddo en johrla.

<sup>18</sup> “Ma woalmen mweijang pahioa, painkihda emen li sohrohr, ih wiahda dipen kamwahl; apel emen ma painkihda li ma pahioahu ne mweijang, ih pel wiahda dipen kamwahl.”

*Woal Koapwoahpwoa men apel Lazarus*

<sup>19</sup> “Anjoau oau woal koapwoahpwoa men mine ma kin likkoauki likkoau keiou mwehu apel mourki mour koalik dupkoah rehn ohroj. <sup>20</sup> Pel mine woal joamwoahmwoa men oadoa Lazarus, ohla kilin, ma kin wijiklahng in wanihmw in umwen woal koapwoahpwoahu; <sup>21</sup> pwa ih kin nimen kang mwoarmwoar in mwinge ma ki kipdihjang pohn en woal koapwoahpwoahu ah sehplillo. Doahkkok kin pel samwsamwe ah ohlahk. <sup>22</sup> Woal joamwoahmwoahu mehdi, sohnloanngok wahdahla ih nehnloanngi ipen Abraham. Woal koapwoahpwoahu pel mehdi joajjoardi,

<sup>23</sup> nehn ah weiweiroak nehn Hades, ih jipwoaldahla kapangda Abraham wija doh, a Lazarus mine ipoa. <sup>24</sup> Ih poangpoangdahla pwa, ‘Pahpa Abraham, ipwilkihda ngoahi! Kadardo Lazarus pwa en kadu jandin poah nehn pil, ih kamwolouwihi loawoaoia, pwa ngoahi ne inenin pwidengla nehn oai oauwe.’ <sup>25</sup> Abraham japoang, ‘Noai jeri, lemleme pwa koawoa ne oaloa me mwehu

ohroj nehn oamw mour, a Lazarus oaloa joang nauna ohroj, ioar mehwa ih injenmwahuki anjoau oauwe, a koawoa mine nehn oamw moadaoak. <sup>26</sup> A pel oau, wahu koalik oau mine nehn pwungasai; ihr ok ma nimen doauwe jang loapoawe johkak, pel ihr ok ma nimen doaudo jang men pel johkak.’ <sup>27</sup> Woal koapwoahpwoahu japoang, ‘A ngoahi poaki ipoamw, pahpa Abraham, kadarla Lazarus in umwen joamoaiho, <sup>28</sup> ipen rioai jermwein limmenno. Kadarla ih en kaperki irai pwa irai en joah indoahng wija kamoadaoak kije.’

<sup>29</sup> “Abraham pwehng ih, ‘Moses apel joukohppok mine ipen rioammwok pwa en kaperki irai joang ohroj; rioammwok en rong da irai pwa.’ <sup>30</sup> Woal koapwoahpwoahu japoang, pwa, ‘Maing, Pahpa Abraham, joang oauwe johpwa isar! Ma emen jang ipen irai ma ne mehdi kan iejda inla iparai, a irai nen pwurjang diparai kan.’ <sup>31</sup> A Abraham japoang, ‘Ma irai joah rong Moses apel joukohppok, irai pel jehpirin kamehlele emen ma pirin iejda jang ipen ihr ma ne mehdi.’ ”

## 17

### *Dihp*

<sup>1</sup> Jesus pwehng Nah sohnpadahkkok, “**Joang kan ma kin kahrehioang armaj nehn dihp uhdahn kin pwen wiawi; a meid naunahng armajjo ma kin kahrehda joang pwiai!**” <sup>2</sup> Ma emen ma kahrehng jeri siksik pwiai nehn dihp, mwehu oang oau sakai koalikko en pirapirroang in sipinwoaroa peidekla nehn madauwo. <sup>3</sup> Kamwai en kalke pein kamwai!

“Ma rioamw men dipda, woarwoarihda; ma ih koaluhla, mahkoahng. <sup>4</sup> A ma ih wiahda japwung oang koawoa pehn ijuh nehn rehnoau, a pehn ijuhwo ih indoa ipoamw pwa, ‘Ngoahi koaluhkihla oai japwung’, a koawoa uhdahn pirin mahk oang.”

### *Pwojon*

<sup>5</sup> Woaroakkok pwehng Koaunno, “Maing, kakoalikihla amai pwojon.”

<sup>6</sup> Koaunno japoang irai, “**Ma amwai pwojon woahr liporrohn mustard oau, kamwai kak pwehng suhkua pase, ‘Pein wijnekda jang men inla poaddi nehn madauwo,’ a ih nen peik oang kamwai.**

### *En Lidu men ah Pwukoa*

<sup>7</sup> “**Ma emen in kamwai mine nah lidu ma mwoasmwoaswel ke appwapwali jihpw nehn japw; a nehn ah pirin pwurdo jang nehn japw, kamwai kin pwehng en karwaro inla mwingehla?**” <sup>8</sup> Joh douluhl! Koawoa en pwehng ih, ‘Koaunopda koanoai mwingehn joausik, koawoa sahpis oang ngoahi nehn oai mwingmwinge apel nim pil; mwerin, koawoa kapwa mwinge.’ <sup>9</sup> Lidu men joah koanoahng oaloa kajpahl kalahngan, ma ih peik oang ah koaunno. Ke da? <sup>10</sup> Ioar pel doahroar kamwai; kamwai pirin pel kapwaihahda meohroj ma kileldi oang kamwai en wia, kamwai en kin pwa, ‘Kamai lidu pwi; ioar oar pwoaijoamai, kamai en kapwaihahda amai pwukoa.’ ”

*Jesus Kemwehuwihla Woal Lepa Eijek*

<sup>11</sup> Nehn en Jesus allaluhlahng Jerusalem, Ih wud nehn pwungen Samaria apel Galilee. <sup>12</sup> A nehn Ah dilda nehn koujapw oau Ih suhwoang woal lepa eijek. Irai uhda ekij dohla, <sup>13</sup> rahrahulahng, pwa, “Maing, Jesus amai Koaun! Jeuweje kamai.”

<sup>14</sup> Jesus kapangda irai, Ih pwa, **“Kamwai alwe ipen jamwrouuwok oaloa kajau iparai.”**

A nehn anjoau ma irai allaluhla, irai ne mwakelkelda. <sup>15</sup> Emen in irai, nehn ah kapangda doahroar ah ne mwakelkelda, ih pwurdo ipen Jesus, ngil koalikda kapkapnga Koahs. <sup>16</sup> Ih poadpwomwla mwohn ehn Jesus pel kapkapnga Ih. A woallo mihn Samaria men. <sup>17</sup> Jesus pwa, **“Jaudi irai woal eijek ma ne mwakelkelda? A ia irai dohmenwa? <sup>18</sup> Da wia mihn likin menehr ma pwurdo pwa en kajpahl kalahngan oang Koahs?”** <sup>19</sup> Jesus pwehnglahng woallo, **“Doari, uhda, alwe pwa oamw pwojonnen ne kemwehuwihla koawoa.”**

*Indoahn Wein Koahs*

<sup>20</sup> Pharisee pwi kalelpoak ipen Jesus, “Ngehd Wein Koahs pirin indoa?” Ih japoang irai, pwa, **“Wein Koahs joh kin indoa in mwomw janjal. <sup>21</sup> Joh emen pirin pwa, kapang ioar ih me, ke ioar ih o; pwa Wein Koahs ne mine nehn kamwai.”**

<sup>22</sup> A ih pwehnglahng Nah sohnpadahkkok, **“Anjoau oau pirin indoa ma kamwai nen nimen kapang rehn in Nihn-Armaj, a kamwai nen johkak. <sup>23</sup> Mine irai pwi pirin pwehng kamwai, ‘Kamwai rapahki o! Ke, rapahki me!’** A kamwai joah alwe rapahki. <sup>24</sup> Pwa doahroar en joarom kin kamaramihda jampah jang oaloap lel oaloap, me ioar doahroar pirin wiawi rehn in Nihn-Armaj. <sup>25</sup> A keiou, Ih pirin oaloa loklok koalik, a armaj in nehn mwei oauwe joah nimen oaloahda Ih. <sup>26</sup> Dahkij ma wiawi nehn mwein Noah, ioar nen pel wiawi nehn mwein Nihn-Armaj. <sup>27</sup> Armaj ohroj kamkam dipw, jakjakau, pwoapwoaud mwahl, oaroh lel rehnno ma Noah dilloang nehn warihmmwo, nohlik koalikko leldo, kojukdi ihr ohroj. <sup>28</sup> Pel doahroar da ma ne wiawi in mwein Lot, armaj ohroj kamkam dipw, jakjakau, noasnoas, japwjapw, kokou umw; <sup>29</sup> A rehnno ma Lot injang nehn Sodom, oai apel sulfur mwoardi jang nehnloanng, kojukdi ihr ohroj. <sup>30</sup> Ioar doahroar ma pirin wiawi nehn rehn in Nihn-Armaj Ah pirin janjalda.

<sup>31</sup> “Nehn rehnno armaj men ma mine pohn umwahu, ih en joah doaudi oaloa ah koapwoa. Pel doahroar armaj men ma minmine nehn japw, ih en johpwa pwurdo in umwahu. <sup>32</sup> Samsaman pahien Lot-o! <sup>33</sup> Inje ma nimen doaroahla ah mour, ih pirin luh jang; a emen ma nimen mindahkihla ah mour, ih pirin mourla. <sup>34</sup> Ngoahi pwehng kamwai pwa pwonngo armaj roahmen pirin moair pohn pehd oauwoar, emen pirin wijikjang, a emen pirin luhwoahdi. <sup>35</sup> Li roahmen pirin daulahk pilahwa; emen pirin wijikjang, a emen pirin luhwoahdi. <sup>36</sup> [Armaj roahmen pirin minmine nehn japw, emen pirin wijik jang, a emen pirin luhwoahdi.]”

<sup>37</sup> Sohnpadahkkok idoak ipen Jesus, “Maing, ia wija mehpwiai pirin wiawi?”

Jesus japoangki irai, **“Wija ma palwahr mehdioau mine, ioar wijahwa vulture kin pokonlahng.”**

## 18

*Karajraj in Liohdi apel Jounkoapwung men*

<sup>1</sup> Jesus pwehng Nah sohnpadahkkok karajraj pase, pwa en padahki-hoang irai en kin poaden kapkap, joah koakoahkla. <sup>2</sup> **Jounkoapwung men mine nehn kahnihmw oau, ih johkin mijik Koahs apel joh kin woaunki armaj.** <sup>3</sup> Liohdi men pel minehr nehn kahnihmmwo, ma kin pwurpwuroa jounkoapwunngo en rapahki ah pwung, poaki ipoa, ‘Jeuweje ngoahi nehn roapoan pwung oang poalloaiho!’ <sup>4</sup> Anjoau roairoai jounkoapwunngo johpwa nimen wia mehkij, mwuhr ih pein lemehda nehn kapehdin, ‘Mihndahr ma ngoahi joh kin mijik Koahs apel joh kin woaunki armaj, <sup>5</sup> a ngoahi pirin jeuveje lihmene en rapahkiha ah pwung, pwa ih en johla kadroapwoa ngoahi apel johla kin pwurdo koauwehla oai anjoau.’”

<sup>6</sup> Jesus pel pwa, “Rong da ma jounkoapwung nauna mene pwahpwa. <sup>7</sup> A, imdoahr, Koahs nen joah pirin jeuveje Nah armaj kan ma kin poak jauwaj inrehn apel inpwong? Ih pirin kos in jeuveje irai? <sup>8</sup> Kamwai en kidal pwa ih uhdahn pispis in jeuveje irai ki arai anahn kan. A Nihn-Armaj pirin diar pwojon nehn jampah nehn Ah indoa?”

*Karajraj in Pharisee apel Jounrik Daksis men*

<sup>9</sup> Jesus pel pwahla karajraj pase oang armaj pwi ma kin akpwungki pein ihr apel lioassoang epwi: <sup>10</sup> **“Armaj roahmen inlahng kapkap nehn Umw Joarwiho; emen ira Pharisee, a emen jounrik daksis.** <sup>11</sup> Pharisee-o uhda kapkap ih pwa, ‘Maing Koahs, ngoahi kapingkalahngan kioang koawoa oai joh kin noaroak, oai joh kin mwoarjuwed, oai joh kin kamwahl doahroar armaj kan. Ngoahi pel kapingkalahngan kioang koawoa oai pel johpwa doahroar jounrik daksis mene. <sup>12</sup> Ngoahi kin kaijihjol pehn riau nehn wiwk oau, apel ngoahi kin meiroangki eijkek kij oau jang nehn meohroj ma ngoahi anki.’ <sup>13</sup> A jounrik daksisso uhda ekij dohlahjang, ih joah nimen jardahlahng nehnloanne, a ioar mehwa ih wihwia, pokpoki nehn pwalah, pwa, ‘Maing Koahs, mahk oang ngoahi, armaj dipan men!’” <sup>14</sup> Jesus pwa, Ngoahi pwehng kamwai, “Kamwai en kidal pwa jounrik daksisso pwungla ipen Koahs, ih pwurla in umwahu; a Pharisee-o joah. Pwa ohroj ma kin aklaplapki pein ihr, pirin siksikla; a ohroj ma kin aksiksikki pein ihr, pirin laplapla.”

*Jesus Kapaiahda Jeri Siksik pwi*

<sup>15</sup> Armaj pwi wahdohng Jesus nihrai jeri siksik pwi pwa en kihdahng poah pohrai. Sohnpadahkkok kapangda ken woarwoarihda irai.

<sup>16</sup> A Jesus pangindo jeri siksikkok apel pwehnglahng sohnpadahkkok, **“Mweidoahng jerihkan en indoa ipoai. Kamwai joah iroahdi irai; pwa wein Koahs ioar wein joangoan armaj pwiai.** <sup>17</sup> Mehlel

**Ngoahi pwehng kamwai, pwa emen ma jehpirin oaloahda Wein Koahs doahroar jeri siksik men, ih johkak dilda loaloa.”**

*Woal Koapwoahpwoa men*

<sup>18</sup> Emen koaunin mihn Jews-ok idoak ipen Jesus, “Jounpadahk mwehu, dahkij ngoahi uhdahn wia pwa ngoahi en kak oaloahki mour joahsuk?”

<sup>19</sup> Jesus pwehng ih, “Amwda koawoa ke panginki Ngoahi jounpadahk mwehu? Joh emen ma mwehu, Koahs kalahpwuk.

<sup>20</sup> Koawoa ne kidal kojonned kan: ‘Joah kamwahl; joah kojukdi armaj; joah pirap; joah likamw; woaunki joamoamw apel inoamw.’”

<sup>21</sup> Woallo japoang Jesus, “Ngoahi ne kapwaihahda kojonned pwiai jang nehn oai siksik.”

<sup>22</sup> Nehr en Jesus rong, Ih pwa, “Pel mine mehkij koawoa anahne wia. Noaskihla meohroj koawoa anki, kioang dupkoak kan armaj joamwoahmwoa kan, oamw pai nehnloanne nen koalikla; indoa pwilihla Ngoahi.” <sup>23</sup> Nehr en woallo rongda me, ih inenin injinjuwedla, pwa ih woal inenin koapwoahpwoa men.

<sup>24</sup> Jesus kapang doahroar ah injinjuwed, Ih pwa, “Ia woahr apwal in armaj koapwoahpwoa en dilda nehn Wein Koahs! <sup>25</sup> Apwal oang armaj koapwoahpwoa men en dilda nehn Wein Koahs jang kamel men en dilda nehn pwokin sihpas.”

<sup>26</sup> Iraihok ma rongrong Jesus kalelpoak pwa, “A doar inje ma kak mourah?”

<sup>27</sup> Jesus japoang, “Mehkij ma johkak ipen armaj, a uhdahn kak ipen Koahs.”

<sup>28</sup> Peter pwehng Jesus, “Maing, kapang! Kamai ne injang umwamai kan, pwa kamai en pwilihla koawoa.”

<sup>29</sup> Jesus pwa, “Ngoahi pwehng kamwai in mehlel, ma emen injang umwah, pahioa, riah, jamah, inah, nah jeri kan ki Wein Koahs, <sup>30</sup> pirin oaloa dupkoak koalik nehn mour oauwe, apel nehn mour joahsuk ma allaluhdo.”

*Kajilpak in en Jesus sikoa doahroar Ah pirin Loklok apel Mehdi*

<sup>31</sup> Jesus kalahpwukihla Nah sohnpadahk ejek roahmenno, pwehng irai, “Kapang! Pwa kisai allaluhlahng Jerusalem, wijahu ma meohroj joukohppok ne insingehti doahr Nihn-Armaj, pirin pwoaida. <sup>32</sup> Ih pirin likliklahng ipen mihn likinnok, ma pirin kapiski Ih, kihjang woaun in Ih, apel andipoa Ih. <sup>33</sup> Irai pirin poki apel kojukdi Ih, a rehn kajiluh Ih pirin iejda.”

<sup>34</sup> A sohnpadahkkok johpwa woahwoahki da Ih pwa; woahwoahn lal pwiai rirjang irai, irai joh kak en woahwoahki dahkij Jesus pwahpwahpwa.

*Jesus Kemwehuwihla Woal Majkun men*

<sup>35</sup> Nehr en Jesus ne allaluhla koaroanlahng Jericho, mine woal majkun men minmine imwin allo mehlahn poakpoak mwani. <sup>36</sup> Nehr ah rongda pokonno daulihla ih, ih idoak, “Dahkij wiawi?”

<sup>37</sup> Irai pwehng ih, “Jesus mihn Nazareth ma allaluhla.”

<sup>38</sup> Woallo rahulahng, “Jesus! Nihn David! Jeuweje ngoahi!”

<sup>39</sup> Armajjok ma mine mijen pokonno woarwoarihda ih, apel pwehng ih en nennenla. A ih kapwa kakoalikihla ngiloa, pwa, "Maing, koawoa ma nihn David! Jeuveje ngoahi!"

<sup>40</sup> Jesus uhdi ruwoj woal majkunno en wijkdo ipoa. Nehn en woallo koaroando ipoa, Ih idoak oang, <sup>41</sup> "**Da koawoa nimen Ngoahi en jeuvejehki koawoa?**"

A ih pwa, "Maing, ngoahi anahne pwuroahng kapangda wija."

<sup>42</sup> Jesus pwehng ih, "**Ken kapangda! Oamw pwojon en ma kemwehuwihla koawoa.**"

<sup>43</sup> Nehn anjoauwohr ih kak kapangda wija, ih ken pwilihla Jesus apel kapkapnga Koahs. Nehn en pokonno kapang manman oauwe, irai ohroj pel kapkapnga Koahs.

## 19

### *Jesus apel Zacchaeus*

<sup>1</sup> Jesus dilda apel allaluuhla nehn Jericho. <sup>2</sup> Woal koapwoahpwoa men mine wijahu, oadoa Zacchaeus, ma laplap ipen jounrik daksissok. <sup>3</sup> Ih nimen kapang pwa inje Jesus, a jang in ah mwosmwos, ih johkak kapang Jesus nehn pokonno. <sup>4</sup> Ih ken kijoula mwohn pokonno, doaudahng nehn suhkoa sycamore pas, pwa ih en kapang Jesus ma pirin wuddo wijahu. <sup>5</sup> Nehn en Jesus lel wijahu Ih jarda pwehng Zacchaeus, "**Zacchaeus pispis doaudi pwa rehn oauwe Ngoahi pirin lel ipoamw nehn umwoammwo.**"

<sup>6</sup> Zacchaeus ken pispis doaudi, peren koalik kajamwo Jesus oang nehn umwahu. <sup>7</sup> Armaj ohroj ma ne pwili kapang me, irai sapda lipahnedki, pwa, "Woal mene ne pwili inla jang in Ah luk oang nehn umwen woal dipan men!"

<sup>8</sup> Zacchaeus uhda mwohn Koaunno, pwehng, "Maing, ngoahi pirin kikkijoahki oaloap in oai koapwoa joamwoahmwoa kan, a ma mine emen ma ngoahi kapweipweidi, ngoahi pirin koapwung oang pak pahu koalikjang."

<sup>9</sup> Jesus japoang, "**Rehn oauwe koamoaur ne lelloang in umw oauwe, pwa pel nihn Abraham armaj mene.** <sup>10</sup> Pwa Nihn-Armaj indoahng rapahki apel koamoaurla ih ma joaloangla."

### *Karajraj in Mwani Kohl*

<sup>11</sup> Nehn en armajjok ahr rongrong mehpwiai, Jesus pel kapsahng apas karajraj. Ih ne koaroanlahng Jerusalem, armajjok kin lemleme pwa Wein Koahs ne pirin oar janjalda. <sup>12</sup> Ih pwa, "**Woal laplap men mine ma jeiloaklahng nehn japw dohioau pwa en kajapwildahng nahmwarki;** a ih pirin pel japhaldo nehn uhdahn ah wija.

<sup>13</sup> A mwohn ah pirin kijoula, ih panginpene nah lidu ejek, kioang emenemen mwani kohl oau, ih pwehng irai, 'Kamwai kapang da ma kamwai kak wihi kihda jang in mwani pwiai, oaroh ngoahi pwurdo.' <sup>14</sup> A armaj in jappwo kin lioassoang mehlel woallo, ioar mehwa irai kadarkihla jounpakair pwi mwerin ih en pwa, 'Kamai joah mwehuki woal mene en wia amai nahmwarki.'

<sup>15</sup> "**Woallo ne wiahla nahmwarki ih japhaldo.** Ih pispis ruwoj nah liduhwok en indoa ipoa, pwa ih en kapang ia woahr mwani irai wiahda." <sup>16</sup> Lidu keiouwo indoa, pwa, 'Maing, me ioar

**mwani kohl ejek ma ngoahi wihnci jang in mwaniho ma koawoa kioang ngoahi.**<sup>17</sup> Woallo pwehng ih, ‘Inenin mwehu! Lidu lelpoak men koawoa. A pwa jang in oamw loalpwoas in mehkij ma siksik, ngoahi pirin kioang koawoa en koaun kahnihmw ejek.’<sup>18</sup> Karoahmen in liduhwo pel lelido pwehng ih, ‘Maing, me ioar mwani kohl limoau ma ngoahi wihnci jang in mwaniho ma koawoa kioang ngoahi.’<sup>19</sup> A ih pwehnglahng, ‘Ngoahi pirin kioang koawoa en koaun kahnihmw limoau.’<sup>20</sup> Pel emen lidu indoa pwehng ih, ‘Maing, kapang nihmw mwanihwa me, ngoahi nekidla nehn dipwin likkoau kij.’<sup>21</sup> Ngoahi mijik koawoa pwa koawoa woal jakon men. Koawoa kin oaloa mehkij ma jaudi oamw apel dolihdi mehkij ma koawoa joah poadokdi.’<sup>22</sup> Woallo pwehng ih, ‘Lidu naunahmen koawoa! Ngoahi pirin doadoahkki pein oamw lal kan pwa en kadeikda koawoa. Koawoa kidal pwa ngoahi woal jakon men, ma kin oaloa mehkij ma jaudi oai apel doli mehkij ma jaudi ngoahi poadokdi.’<sup>23</sup> A amwda koawoa joah nekidla noai mwanien nehn pangk? Pwa nehn oai pwurdo ngoahi en pwuroahng oaloa pwilihkhila wihnnin.’<sup>24</sup> Ih pwehng irai ma pwili mine wijahu, ‘Kamwai kihjang mwani kohl en jang ih, kioang ih ma nainki mwani kohl ejekko.’<sup>25</sup> A irai pwehng, ‘Maing, ne mine nah mwani kohl ejek!’<sup>26</sup> A ih japoang irai, ‘Kamwai en kidal pwa emen ma anki mehkij, a mehkij koalikjang pirin liklikoang, a irai ma joh arai mehkij mihindahr ma siksik pirin liklikjang.’<sup>27</sup> Doari, iraihok ma oai imwinski ma joah mwehuki ngoahi en wia arai nahmwarki, wahdo kojukdi irai mwohn ngoahi.’ ”

### *Dilda Jerusalem ki Rojon in Kalwehdi*

<sup>28</sup> Mwerin en Jesus pwahla mehpwiai, Ih wudla mwohrai inlahng Jerusalem.<sup>29</sup> Nehr Ah ne koaroanlahng Bethphage apel Bethany ipen Dolin Olip, Ih kadarla Nah sohnpadahk roahmen mwohrai,<sup>30</sup> “**Kamwa alwe nehn koujappwen mwohmwa.** Nehr amwa pirin dilda, kamwa pirin kapangda ejel pwulopwul men ma pirapir, ma pe kahjik armaj men dakoa. Kamwa lapwadda, ukdo.”<sup>31</sup> A ma emen idoak ipamwa, mihindahng kamwa ejellen, kamwa japoangki, ‘**Koaunno anahne’.**”

<sup>32</sup> Ira inla diarda joang ohroj doahroar en Jesus pwehng ira.<sup>33</sup> Nehr ara laplapwad ejel pwulopwullo, armajjok ma nainki idoak ipara, “Amwda kamwa ke lapwadda?”

<sup>34</sup> Ira japoang, “Koaunno ma anahne.”<sup>35</sup> Ira ken ukdohng ipen Jesus. Irai piroakihoang likkoau puwoa apel jeuweje Jesus en doaudahng puwoa.<sup>36</sup> Nehr Ah allaluhwe armajjok piroakihdi arai likkoauwok pohn allo.

<sup>37</sup> Nehr Ah koaroannoang Jerusalem, wija ma allo kijoudihlahng Dolin Olip, pokon koalikko ma pwilpwilihwe Ih siakda koaul in kapingkalahngan oang Koahs in ngil koalik ki kapkapnga Ih ki joang ohroj ma irai ne kapang,<sup>38</sup> “Koahs en kapaiahda nahmwarki ma allalu indoa in oadoan KOAUNNO! Popohl in nehnloanngé apel lingin aluhwoang Koahs!”

<sup>39</sup> Pharisee pwi ma pwili pokonno pwehnglahng Jesus, “Jounpadahk, pwehng nihmw sohnpadahk kan en nennenla!”

<sup>40</sup> Jesus japoang, “**Kamwai en kidal pwa ma irai nennenla, a sakai pwiai pirin sapda rahrahu.**”

### *Jesus Jangidla Jerusalem*

<sup>41</sup> Nehn Ah ne koaroanlahng kahnihmmwo, Ih ne kapangda, Ih jangidla. <sup>42</sup> Ih pwa, “**Ma koawoa pwen kidal oar rehnnoauwe da ma uhdahn pirin kioang oamw popohl!** A apkas koawoa johkak kapang! <sup>43</sup> Pwa anjoau kij pirin leldo, ma oamw imwinski kan pirin kelihpene koawoa, pidekihpene koawoa, sohpenehng koawoa jang loap ohroj. <sup>44</sup> Irai pirin koauwehla koawoa pwilihki nihmw armaj kan dauluhl. Johpwa sakai oau pirin luhwoahdi nehn dohiah, pwa koawoa johpwa woahwoahki anjoau ma Koahs indoahng koamoaurla koawoa.”

### *Jesus Dilda nehn Umw Joarwiho*

<sup>45</sup> Jesus dilda nehn Umw Joarwiho sapda kajroahjang jounnoasnosok, <sup>46</sup> pwehng irai, “**Ne insingdi nehn Puk Joarwi ma Koahs pwa, ‘Umwoaie pirin adanki umwen kapkap.’ A kamwai ne wiahkihla dohn jounpirap pwi!**”

<sup>47</sup> Ih kin padpadahk nehn Umw Joarwiho rehn ohroj. Jamwrou laplappok, jounpadahk in Kojonneddok apel koaunin armaj kan nimen kujukdi Jesus. <sup>48</sup> Irai johkak en diarda imdoahr irai en wia me, pwa armaj ohroj kin nimen rongongoar Jesus, joah nimen luhj jang oau Ah padahk kan.

## 20

### *Peidekki doahr Manman in Jesus*

<sup>1</sup> Oau rehn ehn en Jesus Ah wihiwia Ah padahk oang armaj kan nehn Umw Joarwiho apel kapkapahrakkii Rongmwehu, jamwrou laplappok apel jounpadahk in Kojonneddok, pwilihkihla jourmaj in mihn Jews pwi indoa ipoa, <sup>2</sup> pwehng Ih, “Pwehng kamai, en inje manman ma koawoa wiahki mehpwiai? Ke inje ma kioang koawoa manman en wia joang pwiai?”

<sup>3</sup> Jesus japoang, “**Ngoahi nimen idoak ipamwai mehkij. Kamwai pwehng Ngoahi.** <sup>4</sup> **Ma en John jounpoapdaij ah manman in poapdaij injang ipen Koahs ke ipen armaj?**”

<sup>5</sup> Irai sapda akpwungpene nehn pwungarai, “Da kisai en pwa? Ma kisai pwa, ‘Sapjang ipen Koahs,’ a Ih nen pwehng kisai, ‘A da kamwai joah kamehlelehki John?’ <sup>6</sup> A ma kisai pwa, ‘Sapjang armaj,’ pokon oauwe pirin kasoahki kisai sakai pwa irai kin wiahki John joukohp men.” <sup>7</sup> Irai japoangki Jesus, “Kamai jehjoa pwa ia wija ah manman in poapdaij injang.”

<sup>8</sup> Jesus pwehng irai, “**A, ngoahi pel jehpirin pwehng kamwai, en inje manman ma Ngoahi wihiwiahi mehpwiai.**”

### *Karajraj in Jounmwoaswel pwi nehn Mwoaswel Wain*

<sup>9</sup> Jesus pwehng pokonno karajraj pase: “**Woal men koadoahkoahda mwoaswel wain oau, ih kioang jounmwoaswel pwi irai en kouwahki.** A ih jeiloakla likin anjoau roairoai.

<sup>10</sup> Ne lel anjoia in doddol wehn wainnok, ih kadarla lidu men ipen jounmwoaswellok pwa en oaloa ah pwaj jang nehn ah mwoaswello. Jounmwoaswellok pokihla liduhwo apel kadarla ih johpwa kioang mehkij. <sup>11</sup> Ih pel pwuroahng kadarla emen nah liduhwok; a jounmwoaswellok pel pokihla, kamehkihda ih kadarla johpwa kioang mehkij. <sup>12</sup> Woallo pel kadarla kajilmen in nah lidu. Jounmwoaswellok pel koauwehla ih, kerpwihla likin. <sup>13</sup> Doari, woallo ma anki mwoaswel in wainno ken lemleme, ‘Da ngoahi en wia? Ngoahi pirin kadarla noai jermwein kajampwallo pwa irai nen uhdahn wounki!’ <sup>14</sup> A nehn en jounmwoaswellok kapangda jermweinno, irai pwahpene nehn pwungarai, ‘Ioar nihn woallo jermwein wa me. Kisai kojukdi pwa kisai en ankihla mwoaswelin wainne,’ <sup>15</sup> Irai ken kerpwihla ih jang nehn mwoaswello, kojukdi ih.”

**Jesus pwa, "Dahkij koaunin mwoaswel in wainno nen wiahng jounmwoaswellok? <sup>16</sup> Ih pirin pein inla pwa en kojukdi jounmwoaswellok, ih kioang epwi jounmwoaswel sohrohr mwoaswel in wainno."**

Nehn armajjok ahr rongda mehpwiai, ihr pwa, "Me johkak wiawi!"

<sup>17</sup> Jesus jipwoallahng irai, idoak, “**A ia woahwoahn lal in Puk Joarwi oauwe?**

**‘Sakai ma jounkou umw kan ne kerpwihla pwa johkaspoa,  
a wud wiahla sakai wa ma keiou kajampwal?’**

<sup>18</sup> “A, emen ma kipdihoang pohn sakaiho pirin ohla, a emen ma sakaiho kipdihoang pohn ih, nen mwisdi.”

*Peidek in Dupuk Daksis*

<sup>19</sup> Jounpadahk in Kojonneddok apel jamwrou laplappok raprapahki mehkij irai en joalihkihi Jesus anjoau pispis, pwa irai kidal pwa ih karajraj ki irai; a irai mijik armajjok. <sup>20</sup> Ioar mehwa irai kapkapangki anjoau mwehu, pwa irai en dupukla armaj pwi kadarla en lidipihki Jesus peidek pwi, pwa irai en kihlahng Ih pehn manman in koapinahn Rome.

<sup>21</sup> Irai pwiai idoak ipen Jesus, "Maing Jounpadahk, kamai kidal pwa oamw lal kan apel padahk kan pwen inenin pwung, pwa koawoa johkin injinohki mwomwen armaj, pwa kupwur en Koahs oang armaj ioar ma koawoa kin injinohki padahki. <sup>22</sup> Pwehng kamai, ma uhwoang kojonned pwa kamai en dupuk daksis oang Caesar in Rome ke joah?"

<sup>23</sup> Jesus kidal ahr widening, Ih pwehng irai,<sup>24</sup> “Kajalehioang Ngoahi oau mwani silperren! Mijen inje apel oadoan inje ma mine puwoa?”

A irai japoang, “Caesar.”

<sup>25</sup> Jesus pwehng irai, “Doari, dupukkoang Caesar dakhij ma en Caesar, a dupukkoang Koahs dakhij ma en Koahs.”

<sup>26</sup> Irai johkak kajapwunge Ih in mehkij mwohn pokonno, irai ken nennenla, pwuriamweikihla Ah paipoanngok.

## *Peidek doahr Iejda*

<sup>27</sup> Saducee pwi indoa ipen Jesus. Irai kin pwa armaj mehdikan jehpirin mourda jang mehdidi. Irai idoak ipen Jesus, <sup>28</sup> "Maing Jounpadahk. Moses koaioandi oang kamai koijonned oauwe; ma woal

men mehdi jang pahioahu joh nihra jeri, a rien woallo en painkihla liohdiho pwa ira en kapwaihahioang riahu ma mehdi nah jeri. <sup>29</sup> A, doari, riarihoau mine, woal ijimen; riarai woal koalikko painkihda lihmen, a ih mehdihjang, joh nah jeri.

<sup>30</sup> "Woal karoahmenno pel painkihda liohdiho pel joh jeri; <sup>31</sup> kajilmen in riariho pel wiahda pel doahroar joanngohr wiawihoang ohroj irai ijimenno, irai mehdi jang pahioaraiho ohroj joh nihrai jeri. <sup>32</sup> Mwerin liho pel mehdi. <sup>33</sup> A doari, nehn rehnno ma armaj iejda, inje ma pirin pahien liho? Pwa irai ijimenno ohroj painkihda liho."

<sup>34</sup> Jesus japoang, "**Woal apel lihkan nehn jampah kin pwoap-woaud,** <sup>35</sup> a woal apel lihkan ma warroang iejda jang mehdi mourki mourin mweaho ma pirin indoa, irai johkin pwoap-woaud. <sup>36</sup> Pwa irai ne doahroarla sohnloang kan ma ne johla kak mehdi. Irai ioar nihn Koahs, pwa irai ne iejda jang mehdi. <sup>37</sup> Moses pel kadehdehda in mehlel doahroar en ihr mehdi kan ahr pirin iejda. Pwa nehn sikesik in suhkaoa umpwumpwullo, Moses kahdanki Koaunno 'Koahs in Abraham, Koahs in Isaac, Koahs in Jacob.' <sup>38</sup> Ih ioar Koahs in ihr ma mour jaudi Koahs in ihr ma mehdi, pwa armaj ohroj kin mour oang Ih."

<sup>39</sup> Epwi jounpadahk in Kojonneddok pwehng Jesus, "Maing Jounpadahk oamw pajpoang pwung!" <sup>40</sup> Pwa irai johla nimen peidek oang Ih.

### *Peidek doahroar Messiah*

<sup>41</sup> Jesus pwehng irai, "**Imdoahr amwai kak pwa Messiah nihn David?** <sup>42</sup> Pwa pein David pwahla nehn Pukin Psalm kan: 'Koaunno pwehng oai koaun;

Koawoa en mwindi oang in loap moaun in Ngoahi,

<sup>43</sup> Oaroh Ngoahi en wiahkihla oamw imwinsihs kan loangin pehn pwoalkoamwen kan.'

<sup>44</sup> "A, ma David panginki ah 'Koaun,' a imdoahr Messiah Ah kak wia nihn David?"

### *Jesus Kainoapwihi armajjok jang Jounpadahk in Kojonneddok*

<sup>45</sup> Nehn en armaj ohroj rongrong, Jesus pwehng nah sohnpadahkkok:

<sup>46</sup> "**Kamwai kalke kamwai jang jounpadahk in Kojonnéed kan ma kin mwehuki mine nehn likkoau roairoai, aluhjili mwohn armaj kan, kin nimen armaj kan en rahnmwahuwi irai nehn pokon kan, kin pilda dohiarai in mijoa nehn jinakoke kan, kin mwehuki moangehda sehpil kan nehn kamdipw kan,** <sup>47</sup> ma kin kihjang liohdi kan ahr meohroj, a kin nimen kapkap roairoai! Arai koaloklok uhdaahn pirin koalik mehlel!"

## 21

### *En Liohdi men ah Meiroang*

<sup>1</sup> Jesus jipwjipwoaljili nehn Umw Joarwiho, Ih kapangda doahroar epwi armaj koapwoahpwoa ahr peiddi ahr meiroang kan nehn dohn meiroanngo. <sup>2</sup> Ih pel kapangda liohdi joamwoahmwoa men ma peiddi sen soal riau. <sup>3</sup> Ih pwehnglahng sohnpadahkkok, "**In mehlel kamwai en kidal pwa dakhij liohdi mene kihdi koalik jang en ohroj.**

<sup>4</sup> Pwa irai ohroj meiroangkihioang Koahs mehkij jang nehn ahr

**pai kan. A lihmene jang nehn ah joamwoahmwoa ih meiroang kihla meohroj ma ih nainki apel kin mourki.”**

*Jesus Kohpda Ohlahn Umw Joarwiho*

<sup>5</sup> Epwi Nah sohnpadahkkok siksikoa doahroar Umw Joarwiho, doahroar mwehuwin koajkoajin sakaihok ma wiahda ummwao apel doahroar ling in kapwas ma armaj kan kin meiroang kioang Koahs. Jesus pwa, <sup>6</sup> “Kamwai kapang pwa rehnnoau pirin indoa ma mehpwiai ohroj ma kamwai widwidahli pirin johla mine, johpwa sakai oau pirin luhwoahdi pohn oau; ohroj pirin mwoardi.”

*Apwal apel Koaloklok kan*

<sup>7</sup> Irai kalepoak ipoa, pwa, “Maing Jounpadahk, ngehd joang pwiai pirin pwoaida? Kilel da ma pirin kajalehda pwa anjoau in joang pwiai ne koaroando?”

<sup>8</sup> A Jesus pwa, “Kamwai mwajahn pwa armaj doar kapweipweidi kamwai. Pwa armaj dir pirin pwokdo in oadoaioa, pwa, ‘Ngoahi ioar Ih! Anjoauwa me!’ A kamwai johpwa rong irai. <sup>9</sup> Kamwai johpwa majpwehkda nehn amwai pirin rong rongin mahwin apel mwei apwal kan; pwa joang pwiai uhdahn pirin wiawi mwowoa, a imwin anjoau kahjik pirin lel.”

<sup>10</sup> Ih pel pwa, “Pei pirin wiawi nehn pwungen japw kan, mahwin pirin pwoaida nehn pwungen wei kan. <sup>11</sup> Roarroarin japw kamajpwehk, lehk, johmwehu nauna pirin wiawi wija ohroj; joang kamajpwehk apel kilel kapwuriamwei pwi pirin pwokda pehnloanng. <sup>12</sup> A mwohn mehpwiai ohroj pirin wiawi; kamwai pirin joaldi apel koaloklok, kamwai pirin panngekla nehn jinakoke kan apel wijiklahng nehn kalpwuhj kan, kamwai pirin wijikoang mwohn nahmwarki apel mwohn koaun in wei kan ki oadoaioa. <sup>13</sup> A ioar anjoauwa ma kamwai pirin kadehdehda Ngoahi. <sup>14</sup> Koajoanehdi nehn amwai lamlam kan mwohn anjoau, kamwai en joah pwunodki imdoahr amwai en japoang irai; <sup>15</sup> pwa Ngoahi pirin kioang kamwai joangoan japoangek pwi apel marain pwi ma joh emen ipen amwai imwinskihi kan kak pallanda apel kajohwe. <sup>16</sup> Jamamwai apel inamwai kan, riamwai kan, kijehmwai kan apel amwai pirien kan, ioar irai ma pirin pangla kamwai, pel pirin kojukdi epwi kamwai. <sup>17</sup> Armaj ohroj pirin lioassoangda kamwai ki Ngoahi. <sup>18</sup> A, johpwa pisen moangoamwai pas pirin mwoarjang. <sup>19</sup> Kasihkei kamwai pwa kamwai en pein doaroahla kamwai.

*Jesus Pwa doahroar Ohlahn Jerusalem*

<sup>20</sup> “Nehn amwai pirin kapang karej in jounpeihok ma ne pidekihpene Jerusalem, kamwai pirin kidal ki pwa anjoau in ah ohla ne koaroando. <sup>21</sup> A nehn anjoauwo irai kan ma minmine nehn Judea, irai en uhdahn kaulahng pohn dol kan; irai kan ma minmine nehn kahnihmmwo; irai en uhdahn injang loaloa; irai ma minmine nehn japw, irai en johpwa pwurdo nehn kahnihmmwo. <sup>22</sup> Pwa rehn pwiok ioar ‘Rehnin koaloklok,’ anjoau in meohroj ma insingdi nehn Puk Joarwi pirin pwoaida. <sup>23</sup> Ia wen nauna oang li lijaian kan apel nohno kan ma kadihdi nehn rehnkok! Pwa apwal koalik pirin lel japw oauwe, apel en

**Koahs lioas koalik pirin lel sowoahkan.** <sup>24</sup> **Irai pirin mehkihdi kodlaij apel epwi pirin joallahng nehn wein likin ohroj, apel Jerusalem pirin siakekpijoang pehn ehn ihr ma rosros kan, oaroh ahr anjoau en doarihla.**

*Indoahn Nihn-Armaj*

<sup>25</sup> **"Kilel kapwuriamwei pwi pirin pwokda in joauwo, in john-pwonngo, apel in ujuhkan.** Nehn jampah wija ohroj nehn wei kan, armaj kan pirin mijikda ngirngir koalik in nehn madauwo apel ngilen no koalik kan.

<sup>26</sup> **Irai pirin mwehlehlkihla arai mijik nehn ahr pirin joujouwi mehkan ma pirin wiawi oang jampah pokon; pwa koajoandihnehn woahwoa pirin isikekda.**

<sup>27</sup> **Ioar anjoauwo ma Nihn-Armaj pirin pwokda allaluhdo nehn koasoau ki rojon apel ling koalik.**

<sup>28</sup> **Nehn en mehpwiai sapda wiawi, kamwai uhda apel jarda, pwa koamoaurpamwai ne koaroando."**

*Padahk jang in Suhkao Pik*

<sup>29</sup> Doari Jesus pel pwehng irai karajraj pase, "Kamwai soahk mwehu doahroar suhkao fig apel suhkao sohrohr kan ohroj.

<sup>30</sup> Nehn amwai kapang soahn suhkao pwiai ahr kin sapin pwokda, kamwai en kidal pwa roak ne koaroan.

<sup>31</sup> Pel doahroar, nehn amwai pirin kapang mehpwiai pirin wiawi, kamwai en kidal pwa Wein Koahs ne pirin ken lel.

<sup>32</sup> "Ngoahi pwehng kamwai in mehlel, pwa mehpwiai ohroj pirin wiawi mwohn armaj in dihoauwe ohroj ahr pirin mehdii.

<sup>33</sup> **Nehnloannege apel jampah pirin joaloangla, a Oai mahjan kan pirin johkak joaloangla.**

*Anahnin Onnonop*

<sup>34</sup> **"Kamwai kanaihoahng kamwai. Kamwai joah kadroap-woahki kamwai kamkam dipw apel jakjakau, apel pwunod kan in mour oauwe; pwa Rehnno kak oar lidipihdi kamwai.**

<sup>35</sup> **Ih pirin indoa doahroar lidip oau oang armaj ohroj pohn jampah.**

<sup>36</sup> **Kamwai en kapang mwehu apel kapkap anjoau ohroj pwa kamwai en sihkei apel isar oang pisjang mehpwiai ohroj ma pirin wiawi, apel warroang uhda mwohn mijen Nihn-Armaj."**

<sup>37</sup> Jesus kin padahk inrehn kan nehn Umw Joarwiho, a injoausik kan Ih kin injang nehn kahnihmmwo Ih inlahng in Dolin Olip, mine o inpwong.

<sup>38</sup> Inminjoang kan armaj ohroj kin inlahng Umw Joarwiho pwa ihr en rong Ih.

## 22

*Koajoandihnehn kojkojdihnehn Jesus*

<sup>1</sup> Anjoau in Joarwihnehn Pilahwa Joah Doal Ihs, ma adanki Passover, ne koaroan.

<sup>2</sup> A jamwrou laplappok apel jounpadahk in Kojonned o raprapahki da irai en kak kojukkihdi Jesus; pwa irai inenin mijik armaj kan.

*Judas Pwungkihda en Pangla Jesus*

<sup>3</sup> Jehsen ken dilloang nehn Judas, ma adanki Iscariot, emen in irai ejek roahmenno.

<sup>4</sup> Judas inlahng ipen jamwrou laplap apel koaun in Umw Joarwihok pwehng irai doahroar ah pirin panglahng Jesus

irai. <sup>5</sup> Irai inenin malaukihda apel pwungkihpene irai en dupukki ih mwani. <sup>6</sup> Judas pwungkihla apel sapda joujouwi anjoau mwehu ma en kak panngoang Jesus irai nehn en armaj kan ahr pirin jehjoea.

### *Jesus Onopda Pwili Kang Kamdipw in Passover*

<sup>7</sup> Joarwihm Pilahwa Joah Doal Ihs ne leldo, anjoau ma jihpw pwulopwul oang kamdipw in Passover kin kojkojdi. <sup>8</sup> Jesus kadarla Peter apel John, pwehng ira, “**Kamwa alwe koaunopda asai sehpil in Passover.**”

<sup>9</sup> Aira pwehng Ih, “Ia wija koawoa mwehuki kama en koaunopda?”

<sup>10</sup> A Ih japoang, “**Kamwa kapang nehn amwa pirin dilda nehn kahnihmmwo, kamwa pirin suhwoang woal men ma wa poakis in pil oau.** Kamwa kauj ih oaroh in dilda nehn umw oau.

<sup>11</sup> Kamwa pwehng koaun in ummwo, ‘Jounpadahkko kadardo kama ipoamw, pwa: Ia pere ma Ngoahi apel Noai sohnpadahk kan pirin kang kamdipw in Passover loaloa?’ <sup>12</sup> Ih pirin kajalehioang kamwa pere koalik oau puwoa ma ne koajoanjoandi, ioar wijahwa ma kamwa pirin koaunopda joang ohroj.”

<sup>13</sup> Ira inla kapangda joang ohroj doahr en Jesus pwehng ira. Ira ken koaunopda kamdipw in Passover.

### *Kamdipw Joarwi*

<sup>14</sup> Nehn anjoauwo ne lel, Jesus apel Nah woaroakkok mwindihoaang nehn dohiarai in sehpillo. <sup>15</sup> Ih pwehng irai, “**Ngoahi ngoangkihla mehlel pwili kamwai wia kamdipw in Passover oauwe mwohn Oai pirin loklok!** <sup>16</sup> Kamwai en kidal pwa Ngoahi ne johla pirin pwuroahng pwili kang Passover oauwe oaroh janjalda woahwoa in unjek nehn Wein Koahs.”

<sup>17</sup> Jesus pwoakda mwoak oau, kaping kalahngan oang Koahs, pwa, “**Kamwai oaloa mwoak oauwe kamwai ohroj nim.** <sup>18</sup> **Kamwai en kidal pwa Ngoahi ne johla pirin pwuroahng nim wain oauwe jang me inla oaroh lel anjoauwo ma Wein Koahs pirin lel.**”

<sup>19</sup> Ih pel pwoakda pilahwahu, kaping kalahngan oang Koahs, Ih sipwangdi kioang irai, pwa, “**Ioar palwoaroaoahwa me ma liklikkoang kamwai. Wia me oang mihn kasmanda Ngoahi.**”

<sup>20</sup> Pel doahroar, mwerin mwinge Ih kioang irai mwoak oau, pwa, “**Mwoak oauwe ioar en Koahs inoau kapw ma wiawihkihda insahihoa ma ne widekla ki kamwai.**”

<sup>21</sup> “A, kapang! Ih ma pirin pangla Ngoahi pwili mine in sehpil oauwe. <sup>22</sup> Nihn-Armaj pirin mehdi doahroar en Koahs ne koajoanehdji; ia woahr nen naunahng armajo ma pirin pangla Ih!”

<sup>23</sup> Irai sapda peidek pene nehn pwungarai, inje in irai ma pirin kak wia joang oauwe.

### *Akmai in inje ma Laplap*

<sup>24</sup> Sohnpadahkkok akmaikhda inje ma pirin keiou laplap nehn pwungarai. <sup>25</sup> Jesus pwehng irai, “**Nahmwarki in armaj rosros kan in jampah anki manman in koaunda nihrai armaj kan. Koau in armaj kan pwa ihr ioar ‘En Armaj Pirien.’** <sup>26</sup> A ih jehpirin doahroar me ipamwai; pwa ih ma keiou laplap ipamwai pirin doahroar ih ma keiou siksik; a ih ma koaun pirin doahroarla

**lidu.** <sup>27</sup> Pwa inje ma laplap ipen ihr ma kin mwindi oang mwinge ke ih ma kin sahpis? Jaudi ih ma kin mwindi oang in sehpil? A Ngoahi mine nehn pwungamwai kan wia sohn sahpis men.

<sup>28</sup> “Kamwai kin minminehr Ipoai anjoau ohroj nehn Oai apwal kan. <sup>29</sup> Apel nehn en joamoaiho kioang Ngoahi manman in koaun, Ngoahi pel pirin kioang kamwai joangoan manmannohr. <sup>30</sup> Kamwai pirin pwili ngoahi mwinge in oai sehpil nehn oai Wei, kamwai pirin pwili mwindi pohn mwoal pwa en wia koaun kadaudok eijkek riau in Israel.”

*Jesus Kohpda en Peter ah pirin kahmahmkki*

<sup>31</sup> Jesus pwa, “**Simon, Simon!** Kapang pwa Jehsen ne oaloa mweimwei pwa en jong kamwai ohroj doahroar jounmwoaswel men ah kin pohkjang kilin wehn pilahwa. <sup>32</sup> A Ngoahi kapkapki koawoa, **Simon**, pwa oamw pwojon en joah ohia. Apel nehn oamw pirin japhaldo Ipoai, koawoa pirin kasihkeida pwojon in rioamw kan.”

<sup>33</sup> Peter japoang, “Maing oai Koaun, ngoahi ne onopda en pwilihlha koawoa nehn kalpwuhj apel pwili koawoa mehdi.”

<sup>34</sup> A Jesus japoang, “**Peter, koawoa en kidal pwa rehn oauwe, mwohn joang jummwa koawoa pirin kahmahmkhiha Ngoahi pehn jiluh pwa koawoa kidal Ngoahi.**”

*Pwuko, Pehk, apel Kodlaij*

<sup>35</sup> Jesus idoakkoang Nah sohnpadahkkok, “**Anjoauwo ma Ngoahi kadarwe kamwai, joah wa pwuko, pehk ke ju, a mine mehkij kamwai apwalkihda?**”

Irai japoang, “Joh mehkij.”

<sup>36</sup> Jesus pwehng irai, “**A apkas, ma mine emen nah pwuko apel pehk, a ih en wahda, a emen ma joh nah kodlaij a ih en noaskihla ah joakkido dupukkihda apas kodlaijo.** <sup>37</sup> Pwa kamwai kidal pwa Puk Joarwi pwa, ‘*Ih pwili wadwad oang armaj nauna kan,’ uhdahn en pwoaida. Pwa me ma ne insingdi oang Ngoahi, kin pwoaida.*’”

<sup>38</sup> Sohnpadahkkok pwa, “Kapang, Maing amai koaun, kodlaij rahpas me!”

A Jesus japoang, “**Ne isar!**”

*Jesus Kapkap pohn Dolin Olip*

<sup>39</sup> Jesus injang nehn kahnihmmwo, inlahng in Dolin Olip, doahroar ma Ih kin kalap wia; Nah sohnpadahkkok pel pwilihlha. <sup>40</sup> Anjoauwo Ih lel wijahu, Ih pwehng irai, “**Kapkap pwa kamwai en joah lel nehn jongjong.**”

<sup>41</sup> Ih ken sohrohrla jang irai, dohinoar armaj kin kasoahla sakai oau; Ih ken poadpwomwlha kapkap, <sup>42</sup> Ih pwa, “**Joamoai, ma koawoa mwehuki, a Koawoa kihwe jang Ngoahi dal en loklok oauwe. A joah, jaudi injenoai, pwa injenoamw ioar en pwoaida.**”

<sup>43</sup> Sohnloang men jang nehnloannge pwokdohng Ih, kasihkeida Ih.

<sup>44</sup> Nehn Ah ne inenin pwunod koalikda, Ih kasihkeila Ah kapkap; pwudohn Ih koardihoang pohn pwirej doahroar insa.

<sup>45</sup> Ih uhda jang Ah kapkap japhallahng ipen Nah sohnpadahkkok kapang irai pwen moair pwa johla engirai ki arai injinjuwed. <sup>46</sup> Ih

pwehng irai, “**Da kamwai moahmoahmoairki? Kamwai pwohrda kapkap pwa kamwai en joah lelloang nehn jongjong.**”

*Jesus ne Joaldi*

<sup>47</sup> Nehr anjoauwo ma Ih pe lallal, pokon oau leldo wijahu; Judas, emen ma sohnpadahk eijke roahmenno, ma uk irai. Ih sohlahng oar ipen Jesus kiski Ih. <sup>48</sup> A Jesus pwa, “**Judas, kis oau ma koawoa pangkihla Nihn-Armaj?**”

<sup>49</sup> Nehr en sohnpadahkkok ma pwili Jesus kapangda dahkij ma pirin wiawi, irai pwehnglahng Jesus, “Maing amai Koau, kamai en doadoahkki nihmai kodlaij kai?” <sup>50</sup> Emen irai ken poaloa nihn Jamwrou Laplap nah lidu men, poaloahjang sioa loap moaun.

<sup>51</sup> Jesus pwa, “**Ne isar, doari!**” Ih ken pukkoang oar sien woallo ken mohdi.

<sup>52</sup> Jesus pwehnglahng jamwrou laplappok apel jourmaj in Umw Joarwiho apel koaun kan ma pwili indoahng oaloa Ih, “**Kamwai indoa wa kodlaij apel mihn pok, doahroar ma Ngoahi pwen lollap men?**” <sup>53</sup> Ngoahi kin minminehr ipamwai rehn ohroj nehn Umw Joarwiho, a kamwai johpwa jong in koldi Ngoahi. A apkas ioar amwai anjoau, apel anjoauwa ma in manman in rosros pirin koaunda.”

*Peter Kahmahmki Jesus*

<sup>54</sup> Irai joalihdi Jesus uklahng in umwen Jamwrou Laplappo; a Peter pwilpwilhla irai a ekij dohjang irai. <sup>55</sup> Nehr pwungen kello, oai kij jaunekda. Peter pwili mwindi ipen ihrrok ma mwindi pidekihpene oaiho. <sup>56</sup> Emen liduhwok kapangda ih pwili mwindi ipen oaiho, ih kakilihdi, ih pwa, “Woal mene pel pwili Jesus.”

<sup>57</sup> Peter kahmahmki, pwehnglahng, “Li, ngoahi pwanah jehjoa ih!”

<sup>58</sup> Mwerin anjoau kij, woal men kapangda Peter, ih pel pwehnglahng, “Koawoa pel emen irai!”

A Peter japoang, “Woal, jaudi ngoahi!”

<sup>59</sup> Oaroh mwerin awa oau pel emen woal engdehnki sihkei pwa, “Mehlel pwa woal mene uhdahn pwili Jesus pwa ih pel mihn Galilee men!”

<sup>60</sup> Peter japoang, “Woal, ngoahi jehjoa pwa da koawoa siksikoahn!” Nehr anjoauwohr ih lallallal, a ne joang jummwa. <sup>61</sup> Koaunno jipwoallahng Peter kakildi ih; doar Peter samanda pwa Koaunno ne pwen pwehng ih, “**Mwohn joang jummwa pwongoauwe koawoa pirin pwa pehn jiluh pwa koawoa jehjoa Ngoahi.**” <sup>62</sup> Peter inlahjang, dilla likin injinjuwedekihla ken joang.

*Jesus Wiahla mihn Kapis apel Pokpok*

<sup>63</sup> Armajjok ma jiljiloa Jesus kapiski apel poki Ih. <sup>64</sup> Irai kin poaroahla mijoa apel idoak, “Inje ma poki koawoa? Kajawihda!” <sup>65</sup> Irai kin pwehng Ih joang nauna dir.

*Jesus Mwohn Mwoalin Koapwung*

<sup>66</sup> Nehr ah rehnpijoang, koaunin mihn Jews-ok, jamwrou laplap, apel jounpadahk in Kojonneddok pokonpene, a Jesus ukkukdohng mwohn Sohn Mwoalen Koapwung. <sup>67</sup> Irai idoak ipoa, “Pwehng kamai, koawoa ioar Messiah?”

Ih japoang, “**Ma Ngoahi pwehng kamwai, kamwai nen johpwa kamehlele Ngoahi.**”<sup>68</sup> A ma Ngoahi idoak oang kamwai mehkij, kamwai nen johpwa japoang.”<sup>69</sup> A kamwai en kidal pwa jang apkas inla Nihn-Armaj pirin mwindi in loap moaunin Koahs Wija Laplap.”

<sup>70</sup> Irai ohroj idoak, “Doari, Koawoa ioar nihn Koahs?”

Ih japoang irai, “**Kamwai ma pwa Ngoahi ioar Ih.**”

<sup>71</sup> Irai pwahla, “Doari, kisai johpwa anahne jounkadehde, pwa pein kisai ne rong da Ih pwa!”

## 23

### *Jesus Uhda mwohn Pilate*

<sup>1</sup> Sohnponnno pwon uhda uklahng Jesus mwohn Pilate. <sup>2</sup> Irai sapiahda kadipoa: “Kamai koldi woal mene, kaweid japwung nihmai armaj kan pwehpwehpwehng irai en joah dupuk daksis oang Caesar; apel pwahpwahpwa pwa Ih ioar Messiah, nahmwarki men.”

<sup>3</sup> Pilate idoakkoang Ih, “Koawoa ioar nahmwarkihm mihn Jew?”

Jesus japoang, “**Koawoa ne pwa.**”

<sup>4</sup> Doari Pilate pwehnglahng jamwrou laplappok apel pokonno, “Joh kahrpoa oau ngoahi kapangda ngoahi en koalkoahki woal mene.”

<sup>5</sup> A irai pel engdehnki sihkei pwa, “Ki Ah padahk kan Ih ne sapda kapingda armajjok nehn Judea. Ih ne sapda nehn Galilee, apkas ne leldo me.”

### *Jesus Uhda Mwohn Herod*

<sup>6</sup> Nehr en Pilate ah rongda me, ih ken idoak, “Woal mene mihn Galilee?”<sup>7</sup> Nehr ah kidalda pwa Jesus kijehn wei oau ma Herod kin koaunda, ih ken kadarlahng Ih ipen Herod, ma pel pwili minmine Jerusalem nehn anjoauwo.<sup>8</sup> Herod inenin malauikhda ah kapangda Jesus, pwa ih ne rong doahroar Jesus anjoau roairoai. Ih kajik en kapang Jesus wia epwi manmanno.<sup>9</sup> Ih idoakkoang Jesus joangoan peidek dirpwi, a Jesus johpwa japoang.<sup>10</sup> Jamwrou laplappok, jounpadahk in Kojonneddok uhda wijahu sihsihkeiki arai kadipoa Jesus.<sup>11</sup> Herod apel nah jounpeihok kapiski Jesus apel wiamwahlkhla Ih; irai kalikkoauwihkhida robe mwakelkel oau irai kapwurihla Ih ipen Pilate.<sup>12</sup> Rehnnohr Pilate apel Herod ira pirienla; pwa jang mijkoalkoal allaluhdo ira kin imwinskihsihpene.

### *Jesus Koajoandi en Mehdi*

<sup>13</sup> Pilate panginpene jamwrou laplappok, koaunnok, apel armaj ohroj,<sup>14</sup> pwehng irai, “Kamwai wahdohng ngoahi woal mene, pwa Ih kapingda armaj kan. A ngoahi ne kajawi Ih mwohn mijamwai kan, ah pwen johpwa mehkij japwung ngoahi kapangda doahroar mehkan ma kamwai kadkadipoahki Ih.<sup>15</sup> Herod pel johpwa diarda Ah japwung, ioar mehwa ih kapwurihkhido Ih ipasai. Johpwa mehkij woal mene wiahda japwung pwa en koanoahng kojkojdi.<sup>16</sup> Doari, ngoahi pirin kioang en pokpokkoar kadarekla.”

<sup>17</sup> [Pilate kin pwen lapwadda emen jang mihn kalpwuhj anjoaun Passover.]<sup>18</sup> Sohn pokonno ohroj rahukihla, “Kojukdi Ih! Lapwad-dohng kamai Barabbas!”<sup>19</sup> A Barabbas ne peidekkoang nehn kalpwuhj ki ah uhwoangda kojonned nehn kahnihmmwo apel kojarmaj.

<sup>20</sup> Pilate nimen kajaldekla Jesus, ioar mehwa ih pwuroahng suhwoang pokonno ki iroahu. <sup>21</sup> A arai pwen rahrahukihoar, “Kalohpwuhla Ih! Kalohpwuhla Ih!”

<sup>22</sup> Kajiluhn en Pilate pel pwehng irai, “Pwa nauna dahioau Ih wiahda? Johpwa mehkij Ih wiahda japwung pwa en koanoahng kojkojadi. Ngoahi pirin kioang en pokpok pel kajaldekla.”

<sup>23</sup> A irai kapwa kakoalikihla ahr rahrahuki pwa Jesus en kalohpwuhla, a doari, da irai rahrahuki pwoaida. <sup>24</sup> Doari Pilate ken kaminahla da irai poaki. <sup>25</sup> Ih ken lapwadda woallo ma irai poaki en lapwdahng irai, ma joalkihdi nehn kalpwuhj ah uhwoangda kojonned apel kojarmaj, a ih kioang irai Jesus pwa irai en wiahng injenarai.

### *Jesus ne Lohpwuhla*

<sup>26</sup> Jounpeihok kahlwahjang Jesus nehn kahnihmmwo, irai doaroahdi woal men pohn allo, oadoa Simon, mihn Cyrene, ma allaluhdo jang likin kahnihmmwo, irai kioang ih en wahda lohpwuhwo alu mwerin Jesus.

<sup>27</sup> Pokon koalik oau pwilpwilihlha Jesus; pwilhki lihpwi ma injinjuwed apel joangoangoangki Jesus. <sup>28</sup> Jesus pwurla pwehng irai, “**Lihn Jerusalem kan! Kamwai joah joangki Ngoahi, kamwai joangki pein kamwai apel nihmwai jeri kan.**” <sup>29</sup> Pwa rehn pwi pirin indoa, ma armaj kan pirin pwa, ‘Meid pai li ma joah noainoai, johpwa noaisikihdji jeri apel johpwa kadihdji!’

<sup>30</sup> **Doari,**

**irai pirin pwehng dol koalik kan,**

**‘Kipdi pohn kamai!**

**Apel oang dol siksik kan,**

**‘Pwaindi kamai!**

<sup>31</sup> **“Pwa ma armaj wia mehpwiai oang suhkoa mour, a dahioau pirin wiawahoang suhkoa meng?”**

<sup>32</sup> Woal roahmen, ira koaroj lollap pel ukkukla, pwa ira en pwili Ih kojkojadi. <sup>33</sup> Nehn irai lel wijahu ma adanki “Sihn Moang,” irai kalohpwuhla Ih wijahu pwilhki lollap nauna roahmenno, emen mine loap moaun a emen loap meing in Jesus. <sup>34</sup> Jesus pwa, “**Joamoai, mahkoahng irai, pwa irai jehjoa dahioau irai wihwia.**”

Irai ken nehkpijoang Ah likkoauwok pileiki. <sup>35</sup> A pokonno kapkappang koaun in mihn Jews-ok kaukauruhrki Ih, pwahpwahpwa, “Ih doaroahla epwi, mweidoahng en doaroahla pein Ih, ma ioar Ih Messiah wa ma Koahs pilda!”

<sup>36</sup> Jounpeihok pel pwili kapwroa Jesus. Irai sohlahng Ih kioang Ih wain kasik, <sup>37</sup> pwehng Ih, “Kapisla koawoa, ma ioar koawoa nahmwarkihm mihn Jews!”

<sup>38</sup> Pohnangin koadkoan moange insingdi,

“Ioar Ih me Nahmwarkihm mihn Jews.”

<sup>39</sup> Emen lollappok ma pwili kalohpwuhla koauwe Jesus, pwa, “Ma koawoa ma Messiah wa, kapisla Koawoa apel kama!”

<sup>40</sup> A emen in ira woarwoarihda, pwa, “Koawoa johpwa mijik Koahs? Koawoa mine nehn joangoan kadeikin doahroar Ahu. <sup>41</sup> A asa kadeik pwen pwung, pwa kisa koanoahng oaloa koaloklok oauwe, pwa asa wihwia kan ma kahrehda; a woal mene joh nauna oau Ih wiahda.”

42 Ih ken pwehnglahng Jesus, "Saman ngoahi, Jesus, nehn oamw wiahla nahmwarki men!"

43 A Jesus pwehnglahng, "**Ngoahi pwehng koawoa in mehlel pwa rehnnoauwehr koawoa pirin pwili Ngoahi mine nehn Paradise.**"

### *Mehdihn Jesus*

44 Aluhwoang kiloak ejek riau injauwaj, joauwo johla maram apel ros pwainlja jappwo oaroh lel kiloak jiluh. 45 Kahdenngo nehn Umw Joarwiho soahroakdi nehn pwunge. 46 Jesus ngil koalikda, pwa, "**Joamoai, Ngoahi ne kioang Ngenihoa nehn poahmmwen,**" Ih pwahla me Ih ken mehdi.

47 Koaunin jounpei men kapang da ma ne wiawi ih kapnga Koahs, pwahla, "Mehlel oar pwa woal mene woal pwung men!"

48 Nehr en armajjok ma pokonpene wijahu pwa irai en kapang da wiawi, irai ken pokpoki nehn pwalahrai kan injinjuwed pwurla in umwaraihok. 49 Ohroj ma kin kidal Jesus, pwilihki lihok ma pwilihdo Ih jang Galilee, uhda ekij dohjang, kapkapang.

### *Joajoardihn Jesus*

50-51 Woal men mine ma adanki Joseph, mihn Arimathea, kahnihmw oau nehn Judea. Woal mwehu apel kajampwal men, ih kin pwili joujouwi indoahn Wein Koahs. Mihndahr ma ih pwili sowoa Mwoalin Koapwuningo ih johpwa pwungki arai koajoandi apel arai mwoakiddo. 52 Ih inla ipen Pilate poakihda palwoaroan Jesus. 53 Ih kihdi jang in lohpwuhwo, kidimkihpene likkoau linen oau kioang nehn joaujoau oau joajjoarda nehn paip oau—kahjikkoar armaj men joajjoardi nehn joaujoauwo. 54 Rehnno nialim, Sabbath ne enken sap.

55 Lihok ma pwilpwilihdo Jesus jang Galilee pwilihla Joseph, kapang joaujoauwo apel doahroar en palwoaroan Jesus liklikdi loaloa. 56 Irai pwurla in umwaraihok wiahda mihn karahdin pwi apel mihn soal pwi oang palwahrro.

Sabbath, irai ken koammoal, doahroar da ma ne kileldi nehn Kojonneddoo.

## 24

### *Jesus Iejda*

1 Injohrehn in keioun rehn nehn wihk, lihok ken inlahng in joaujoauwo wahda mihn karahdinnok ma irai ne koaunopda. 2 Irai kapang pwa sakaiho ne kasahpwroahkjang in oawoan joaujoauwo.

3 Irai dilda loaloa, a johpwa kapangda palwoaroan Koaun Jesus.

4 Irai uhda wijahu pwuriamweikhla, a anjoauwohr woal roahmen uhda mwohrai, mine nehn likkoau korohro dak. 5 Nehr irai ne dirkihla majpwehk, irai rukdihoang pohn pwirej, woallok pwehng irai, "Amwda kamwai ke raprapahki armaj mour men nehn pwungen armaj mehdi kan? 6 Ih ne joh me; Ih ne iejda. Samanda da ma Ih ne pwehng kamwai nehn Ah minmine nehn Galilee: 7 '**Nihn-Armaj uhdahn pirin panngekla ipen ihr ma dipan kan, kalohpwuhla, a Ih pirin iejda in kajiluh in rehn.**'"

8 Lihok ken samanla en Jesus lallok, <sup>9</sup> irai pwurla jang in joaujoauwo, apel pwehng mehpwiai ohroj oang ejek emenno apel ohroj luhwoahk.

10 Lihpwiai ioar: Mary mihn Magdala, Joanna, apel Mary inen James,

irai apel epwi li ma pwili irai pakairki doahroar mehpwiai oang woaroakkok. <sup>11</sup> A woaroakkok wiahki rong pwiai joh kaspoa, ioar mehwa irai johpwa kamehlelehki. <sup>12</sup> A Peter uhdaahr ken kijouwoang in joaujoauwo; ih rukdi kapangda likkoauwohr ma kidimla Ih. Ih ken pwurla in ummwo pwurpwuriamweiki da ma ne wiawihlahu.

### *Nehn Alin Inlahng Emmaus*

<sup>13</sup> Nehr rehnnohr nihn Jesus sohnpadahk roahmen sikesik aluhlahng in koujapw kij ma oadoa Emmaus, dohjang Jerusalem dapwa mwail ijuh. <sup>14</sup> Ira siksikoahpene doahroar meohroj ma ne wiawihla. <sup>15</sup> Nehr ara siksikoa, pein Jesus sohla koaroannoang ipara pwili ara allaluhla. <sup>16</sup> Ira kapang Ih, a ira johpwa kidal pwa inje Ih. <sup>17</sup> Jesus idoak ipara, “**Da ma kamwa siksikoa allaluhdo?**”

Ira ken uhdi mijen injinjuwedla. <sup>18</sup> Emen ira oadoa Cleopas, idoakkoang Jesus, “Koawoahr doari mihn keiru men nehn Jerusalem ma johpwa kidal da ma ne wihiwiai allaluhdo rehn pwiai nehn kahnihmmwo?”

<sup>19</sup> A Ih idoak, “**Me dahkij?**”

Ira japoang, “Doahroar mehkan ma wiawihaoang Jesus mihn Nazareth, Joukohp men, ma Koahs apel armaj ohroj kin wiahki ma Ih anki manman in joang ohroj ma Ih pwa apel wia. <sup>20</sup> Amai Jamwrou laplappok apel koaunnok ken pangla Ih pwa en koaloklok in mehdi doar Ih ken kalohpwhukla. <sup>21</sup> A kamai koapwoarpwoarkihla pwa Ih ma pirin kamaioauda Israel! A likin mehpwiai ohroj, lel rehnnoauwe ne rehn jiluh mwerin mehpwiai ahr wiawi. <sup>22</sup> Lihpwi ma kijehmai ne kapwuriamweihla kamai; pwa irai inlahng in joaujoauwo injohrehn, <sup>23</sup> a johkak rapahkihda palwahrro. Irai pwurdo pwa irai kapang kajanjalin sohnloang pwi ma pwehng irai pwa Ih pwen mour. <sup>24</sup> Pel epwi kijehmai hok inlahng in joaujoauwo ne kadehde doahroar da ma lihok ne pakairkihdo, irai pel johpwa kapangda palwoaroan Jesus.”

<sup>25</sup> Jesus ken pwehnglahng ira, “**Kamwa pwanah pweipwei apel ia woahr kosin amwa en kamehlele joang ohroj ma joukohppok ne pwa!**” <sup>26</sup> **Pwa jaudi koanoahng Messiah en loklokki joang pwiai ohroj mwoohn Ah pirin dildahng nehn lingin Ah wei?**” <sup>27</sup> Doari, Jesus ken kawoahwoahng ira doahroar sikesikin Ih nehn Puk Joarwi, sapjang pukin Moses apel pukin joukohp ohroj.

<sup>28</sup> Nehr irai ne lellahng koujappwo ma irai allaluhlahng. Jesus alu mwomwen pwa Ih pirin daudauluhlla. <sup>29</sup> A ira ken kauhdi Ih, pwa, “Mine ipama, pwa joauwo ne pirin ken duhla apel pirin ken rosdi.” Doari Ih ken dilda mine ipara. <sup>30</sup> Ih mwindi oang pwili ira mwinge; Ih pwoakda pilahwahu kapkap apel kaping kalahngankihoang Koahs. Ih sipwangdi pilahwahu kioang ira. <sup>31</sup> Mijara kan ken poahdpijoang ira kidalda pwa pwen ioar Ih Jesus, a nehn anjoauwohr Jesus joaloang jang ira. <sup>32</sup> Ira ken sikoahpene, “Nehr kapehdisa kai joah kin mwoakmwoakidki peren, doahroar oai, nehn Ah siksikesik apel kahkawoahwoahng kisa Puk Joarwi, allaluhdo nehn allo?”

<sup>33</sup> Ira uhdaahr pwurlahng Jerusalem ipen sohnpadahk eijke emenno apel iraihok ma pokpokon iparai, <sup>34</sup> pwehng irai, “Mehlel oau pwa Koaunno ne iejda! Ih ne pwokkoang Simon!”

<sup>35</sup> Ira wud sikoahda dahkij ma wiawihaoang ira nehn allo, doahroar ara kidalda Koaunno nehn Ah sipwangdi pilahwahu.

*Jesus Pwokkoang Nah Sohnpadahkkok*

<sup>36</sup> Nehr irai siksikoa mehpwiai, Jesus pwurroar uhda nehn pwun-garai pwehng irai, “**Popohl oang kamwai!**”

<sup>37</sup> Nehr irai majpwehkda, irai lemehioang pwa irai kapkapangda eni men. <sup>38</sup> A Ih pwehng irai, “**Amwda kamwai ke majp-wehkda? Amwda jakoapwoarpwoar ke inda nehn amwai lam-lam?** <sup>39</sup> **Kapang poaihoa kai apel ehihoa kai, apel kapang mwehu pwa pwen ioar Ngoahi me. Pukkoang Ngoahi, doari kamwai nen kidal, pwa eni joh kin mine udukoa ke sihn, doahroar amwai kapkapang ipoai.**”

<sup>40</sup> Mwerin Ah pwa me, Ih ken kajalehng irai poahk apel ehn nok.

<sup>41</sup> Irai pel kahjik oar kamehlele, irai dirki peren apel pwuri amwei; doari Ih idoak iparai, “**Mine mwinge ipamwai apkas?**” <sup>42</sup> Irai kioang mwumw siksik inih men, <sup>43</sup> Ih ken mwinge mwohn mijarai.

<sup>44</sup> Doari Jesus pwehng irai, “**Ioar mehpwiai ma Ngoahi ne padahk kioang kamwai nehn anjoauwo ma Ngoahi minmine ipamwai, doahroar meohroj ma ne insingdi ki Ngoahi nehn Kojonned in Moses, nehn Pukin joukohppok apel nehn Pukin Psalm Kan, uhdahn pirin pwoaida.**”

<sup>45</sup> Doari Ih ken kamaramihla arai lamlam pwa irai en woahwoahk-ihla Puk Joarwi, <sup>46</sup> Doari Ih ken pwehng irai, “**Me ioar ne insingdi: Messiah uhdahn pirin loklokla apel uhdahn pirin iejda jang mehdi in kajiluh in rehn,** <sup>47</sup> **Rongmwehu in koaluhla apel lapwdahn dihp kan pirin kalohkjili nehn wei kan ohroj, in oadoa, sapda jang Jerusalem.** <sup>48</sup> Kamwai ma pirin kadehde mehpwiai. <sup>49</sup> **A pein Ngoahi pirin kadardohng kamwai mehu ma jamamwaiho ne inoaukiha. A kamwai uhdahn pirin joujouwihoar nehn kahnihmmwo oaroh manman in puwoa audohda kamwai.**”

*Jesus Indahla Nehnloannge*

<sup>50</sup> Mwerin, Jesus kahlwa irai jang nehn kahnihmmwo, koaroanlahng Bethany; ioar wijahu Ih pwoakda poah kapaida irai. <sup>51</sup> Nehr Ah kapaiahda irai, Ih ken injang irai pwoakpwoakdahla nehnloannge. <sup>52</sup> Irai ken pwongi Ih, irai pwurlahng Jerusalem dirkihla peren koalik, <sup>53</sup> apel anjoau ohroj irai indoa in Umw Joarwiho, kapkapnga Koahs.